

## **PENYATA DEWAN**

### **PERSIDANGAN KEDUA (PERASMIAN) PENGGAL PERTAMA DEWAN UNDANGAN NEGERI, NEGERI SEMBILAN YANG KE-15 PADA 9 OKTOBER 2023 (ISNIN)**

#### **HADIR:**

<b>BIL.</b>	<b>NAMA</b>	<b>KAWASAN</b>
1.	YANG DIPERTUA DEWAN UNDANGAN NEGERI, NEGERI SEMBILAN: YB Dato' M K Ibrahim bin Abd Rahman	
2.	MENTERI BESAR NEGERI SEMBILAN: YAB Dato' Seri Haji Aminuddin b. Haji Harun	Sikamat
3.	YB Datuk Seri Haji Jalaluddin bin Haji Alias	Pertang
4.	YB Tuan Teo Kok Seong	Bahau
5.	YB Puan Noorzunita Begum binti Mohd Ibrahim	Pilah
6.	YB Dato' Haji Ismail bin Lasim	Senaling
7.	YB Tuan Arul Kumar a/l Jambunathan	Nilai
8.	YB Tuan Haji Mustapha bin Nagoor	Palong
9.	YB Puan Nicole Tan Lee Koon	Bukit Kepayang
10.	YB Tuan Veerapan a/l Superamaniam	Repah
11.	YB Datuk Mohd Faizal bin Ramli	Linggi
12.	YB Tengku Hajah Zamrah binti Tengku Sulaiman	Ampangan
13.	YB Tuan Loke Siew Fook	Chennah
14.	YB Dato' Ir. Haji Bakri bin Sawir	Klawang
15.	YB Dato' Haji Zaifulbahri bin Haji Idris	Chembong
16.	YB Tuan Gunasekaren a/l Palasamy	Seremban Jaya
17.	YB Tuan Choo Ken Hwa	Lukut
18.	YB Tuan Chew Seh Yong	Lobak
19.	YB Tuan Mohd Razi bin Mohd Ali	Sungai Lui
20.	YB Puan Sri Bibi Sharliza binti Mohd Khalid	Juasseh
21.	YB Tuan Ng Chin Tsai	Temiang

<b>BIL.</b>	<b>NAMA</b>	<b>KAWASAN</b>
22.	YB Tuan Haji Saiful Yazan bin Sulaiman	Johol
23.	YB Tuan Yap Yew Weng	Mambau
24.	YB Dato' Mohd Zaidy bin Abdul Kadir	Jeram Padang
25.	YB Dr. Rajasekaran a/l Gunnasekaran	Sri Tanjung
26.	YB Tuan Muhammad Sufian bin Maradzi	Seri Menanti
27.	YB Tuan Siau Meow Kong	Rahang
28.	YB Tuan Suhaimi bin Aini	Kota
29.	YB Tuan Yew Boon Lye	Chuah
30.	YB Datuk Haji Mohd Asna bin Amin	Lenggeng
31.	YB Tuan Suhaimizan bin Bizar	Gemencheh
32.	YB Tuan Haji Ridzuan bin Ahmad	Gemas
33.	YB Tuan Mohd Fairuz bin Mohd Isa	Serting
34.	YB Tuan Mohamad Hanifah bin Abu Baker	Labu
35.	YB Tuan Haji Kamarol Ridzuan bin Mohd Zain	Paroi
36.	YB Tuan Abdul Fatah bin Zakaria	Bagan Pinang

**TIDAK HADIR DENGAN IZIN**

1.	YB Dato' Seri Utama Haji Mohamad bin Haji Hasan	Rantau
----	---	--------

**HADIR MENGIKUT FASAL 37(3) UNDANG-UNDANG  
TUBUH KERAJAAN NEGERI SEMBILAN**

1. SETIAUSAHA KERAJAAN NEGERI, NEGERI SEMBILAN  
(YB Dato' Mohd Zafir bin Ibrahim)
2. PENASIHAT UNDANG-UNDANG NEGERI, NEGERI SEMBILAN  
(YB Dato' Muzalmah binti Mustapha Kamal)
3. PEGAWAI KEWANGAN NEGERI, NEGERI SEMBILAN  
(YB Dato' Mohd. Khidir bin Majid)

**TURUT HADIR**

1. SETIAUSAHA DEWAN UNDANGAN NEGERI, NEGERI SEMBILAN  
(Mohd Amin bin Ludin)
2. KETUA PENOLONG SETIAUSAHA  
(Mohd Zamri bin Md Saad)

Setiausaha Dewan mengumumkan ketibaan YB Yang Dipertua Dewan.

Mesyuarat dimulakan pada jam 10.08 pagi.

1. **MEMBACA DOA**

**Setiausaha Dewan:** Persidangan Kedua (Perasmian) Penggal Pertama, Dewan Undangan Negeri, Negeri Sembilan Yang Ke-15. Susunan Mesyuarat, perkara pertama, Membaca Doa. Dipersilakan Yang Berhormat ADUN Klawang.

[YB ADUN Klawang telah membacakan doa di bawah Peraturan IX, muka surat 11 di dalam Peraturan-Peraturan dan Perintah-Perintah Tetap Dewan Negeri]

2. **PERUTUSAN YANG DIPERTUA DEWAN**

**Setiausaha Dewan:** Perkara kedua, Perutusan Yang Berhormat Dato' Yang Dipertua Dewan.

**YB Yang Dipertua Dewan:** *Assalamualaikum* WBT. *Bismillahirrahmanirrahim, Alhamdulillahirabbil'alamin wassolatu wassalamu'ala asrofil ambiya iwalmursalin wa'ala alihi wasohbihi ajma'in. Rodhitu billahi robba, wabil islami diina, wabimuhhammadin nabiyya warosuula. Alhamdulillah,* segala puji bagi Allah Tuhan Pencipta Alam, selawat dan salam ke atas junjungan Nabi Muhammad SAW ahli keluarga dan para sahabat Baginda.

Yang Amat Berhormat Dato' Seri Haji Aminuddin bin Haji Harun; Menteri Besar Negeri Sembilan, Yang Berhormat Ahli-Ahli Majlis Mesyuarat Kerajaan Negeri, ahli-ahli Yang Berhormat, ketua-ketua jabatan, Dato'-Dato', Datin-Datin, tuan-tuan dan puan-puan hadirin yang dihormati sekalian.

*Alhamdulillah,* saya mengucapkan selamat datang kepada para hadirin sekalian dan dengan izin Allah jua, dapat kita berkumpul bagi Persidangan Kedua (Perasmian) Penggal Pertama, Dewan Undangan Negeri, Negeri Sembilan Yang Ke-15. *InsyaAllah,* sidang kali ini dijadualkan akan berlangsung selama 5 hari mulai dari hari ini, 9 haribulan Oktober 2023, hingga 13 haribulan Oktober 2023 nanti, iaitu hari Jumaat.

Persidangan hari ini, persidangan hari ini ialah, akan dirasmikan sebentar nanti oleh Ke Bawah Duli Yang Maha Mulia Yang di-Pertuan Besar Negeri Sembilan Darul Khusus; Tuanku Muhriz Ibni Almarhum Tuanku Munawir. Saya berharap para hadirin sekalian dapat memberikan tumpuan kepada Titah Ucapan Perasmian oleh Ke Bawah Duli Yang Maha Mulia Tuanku sebentar nanti dan dapat dibahaskan oleh semua ahli Yang Berhormat dalam sesi perbahasan nanti.

Hadirin sekalian, saya seterusnya ingin memaklumkan bahawa Yang Berhormat Tuan Loke Siew Fook; Ahli Dewan Undangan Negeri Chennah, Negeri Kawasan Chennah telah sempurna mengangkat sumpah jawatan sebagai Ahli Dewan Undangan Negeri Sembilan bagi Penggal Dewan Undangan Negeri Ke-15 ini di hadapan saya sekitar jam 8:00 pagi tadi, selaras dengan Peraturan I, Peraturan dan Perintah-Perintah Tetap Dewan Undangan Negeri Sembilan tahun 1960.

Saya seterusnya ingin memaklumkan kepada Dewan yang mulia ini kelak, akan ketidakhadiran Yang Berhormat Dato' Seri Utama Haji Mohamad bin Haji Hasan; Ahli Dewan Undangan Negeri Kawasan Rantau tidak dapat hadir pada hari ini atas tugas di Parlimen bagi menjawab soalan lisan dan sesi *Minister Question Time* untuk Yang Berhormat Menteri Pertahanan. Saya telah mengaturkan agar Yang Berhormat ADUN Rantau untuk mengangkat Sumpah Jawatan di hadapan saya esok, iaitu hari Selasa, 10 Oktober 2023.

Saya juga ingin memaklumkan kepada Dewan Yang Mulia ini bahawa saya telah menerima notis daripada Yang Berhormat Dato' Seri Ahmad Faizal bin Azumu; Pengerusi Perikatan Nasional Negeri Sembilan melalui surat beliau kepada Setiausaha Dewan Undangan Negeri bertarikh 25 September 2023 berhubung penetapan Yang Berhormat Tuan Ridzuan bin Ahmad; Ahli Dewan Undangan Negeri Kawasan Gemas sebagai Ketua Pembangkang bagi sesi Dewan Undangan Negeri Sembilan Yang Ke-15 ini. Sehubungan itu juga, kedudukan kerusi Yang Berhormat ADUN Gemas, Yang Berhormat ADUN Paroi ditukarkan secara *one to one basis*. Manakala kedudukan kerusi bagi lain-lain ahli Yang Berhormat adalah kekal sebagaimana hari Persidangan Pertama pada 26 September 2023 lalu.

Hadirin sekalian, saya amat berharap dan sama-samalah kita berdoa kepada Allah agar persidangan kali ini dapat berjalan dengan lancar dan sempurna serta dalam keadaan penuh harmoni dan berharap ahli-ahli Yang Berhormat sekalian dapat menjaga nama baik dan etika sebagai ahli Yang Berhormat dalam Dewan Yang Mulia ini. Sekian dulu perutusan saya dan saya akhiri dengan lafaz *wabillahitaufik wal hidayah*

*wassalamualikum warahmatullahi taala wabarokatuh* selamat bersidang. Terima kasih.

3. **MENGESAHKAN PERINGATAN MESYUARAT**

**Setiausaha Dewan:** Perkara ketiga, Mengesahkan Peringatan Mesyuarat. Terdapat 2 Peringatan Mesyuarat untuk disahkan pada hari ini. Pertama, Mengesahkan Peringatan Mesyuarat Kali Kelima Penggal Kelima, Dewan Undangan Negeri, Negeri Sembilan Yang Ke-14 yang telah diadakan pada 8 Mei 2023.

**YB Yang Dipertua Dewan:** Ahli-ahli Yang Berhormat sekalian, Peringatan Mesyuarat Kali Kelima Penggal Kelima, Dewan Undangan Negeri, Negeri Sembilan Yang Ke-14 yang telah diedarkan pada 8, yang telah diadakan pada 8 Mei 2023 telah pun diedarkan salinannya. Oleh itu ada apa-apa teguran? Sekiranya tiada, diharap seorang ahli mencadangkan dan seorang ahli menyokong supaya disahkan.

**YAB ADUN Sikamat:** Yang di, Yang Dipertua, Berhormat Dato' Yang Dipertua, saya mohon izin mencadangkan supaya Peringatan Mesyuarat tersebut disahkan.

**YB ADUN Bahau:** Yang Berhormat Dato' Yang Dipertua, saya bangun menyokong cadangan tersebut.

**YB Yang Dipertua Dewan:** Ahli-ahli Yang Berhormat yang bersetuju Peringatan Mesyuarat disahkan, sila angkat tangan. Yang tidak bersetuju? Yang berkecuali? Peringatan Mesyuarat ini disahkan.

[Keputusan undian: semua 35 orang ahli Yang Berhormat yang hadir bersetuju]

**[Peringatan Mesyuarat Kali Kelima Penggal Kelima, Dewan Undangan Negeri, Negeri Sembilan Yang Ke-14 yang telah diadakan pada 8 Mei 2023 disahkan tanpa pindaan]**

**Setiausaha Dewan:** Kedua, Mengesahkan Peringatan Mesyuarat Kali Pertama (Khas) Penggal Pertama, Dewan Undangan Negeri, Negeri Sembilan Yang Ke-15 yang telah diadakan pada 26 September 2023.

**YB Yang Dipertua Dewan:** Ahli-ahli Yang Berhormat sekalian, Peringatan Mesyuarat Kali Pertama (Khas) Penggal Pertama, Dewan Undangan Negeri, Negeri Sembilan Yang Ke-15 yang telah diadakan pada

26 September 2023 telah pun diedarkan salinannya. Oleh itu ada apa-apa teguran? Sekiranya tiada, diharap seorang ahli mencadangkan dan seorang ahli menyokong supaya disahkan.

**YAB ADUN Sikamat:** Yang Berhormat Dato' Yang Dipertua, saya mohon izin mencadangkan supaya Peringatan Mesyuarat tersebut disahkan.

**YB ADUN Pertang:** *Bismillahirrahmanirrahim.* Yang Berhormat Dato' Yang Dipertua, saya bangun menyokong cadangan itu. Terima kasih.

**YB Yang Dipertua Dewan:** Ahli-ahli Yang Berhormat yang bersetuju Peringatan Mesyuarat ini disahkan, sila angkat tangan. Yang tidak bersetuju? Yang berkecuali? Peringatan Mesyuarat ini disahkan.

[Keputusan undian: semua 35 orang ahli Yang Berhormat yang hadir bersetuju]

**[Peringatan Mesyuarat Kali Pertama (Khas) Penggal Pertama, Dewan Undangan Negeri, Negeri Sembilan Yang Ke-15 yang telah diadakan pada 26 September 2023 juga disahkan tanpa pindaan. Seterusnya YB Yang Dipertua Dewan menandatangani kedua-dua Peringatan Mesyuarat yang telah disahkan]**

#### 4. **TITAH UCAPAN DIRAJA**

**Setiausaha Dewan:** Perkara keempat, Titah Duli Yang Maha Mulia Yang di-Pertuan Besar Negeri Sembilan Darul Khusus.

**YB Yang Dipertua Dewan:** Ahli-ahli Yang Berhormat, tuan-tuan, puan-puan sekalian, sebentar lagi Duli Yang Maha Mulia Yang di-Pertuan Besar Negeri Sembilan akan menyampaikan Titah baginda dalam Dewan yang mulia ini. Dan sekarang Dewan ditangguhkan sebentar untuk keberangkatan tiba Ke Bawah Duli Tuanku.

[YB Yang Dipertua Dewan meninggalkan Galeri Persidangan]

[Persidangan Dewan ditangguhkan seketika]

**Setiausaha Dewan:** Ketibaan Yang Teramat Mulia Tunku Besar Tampin. Ketibaan Yang Teramat Mulia Undang Luak Rembau. Ketibaan Yang Teramat Mulia Undang Luak Johol. Ketibaan Yang Teramat Mulia Undang Luak Jelebu.

Keberangkatan Duli Yang Maha Mulia Yang di-Pertuan Besar Negeri Sembilan. Duli Yang Maha Mulia Tunku Ampuan Besar Negeri Sembilan.

**YB Yang Dipertua Dewan:** Mengadap Ke bawah Duli Yang Maha Mulia Yang di-Pertuan Besar Negeri Sembilan, ampun Tuanku, patik memohon perkenan Ke Bawah Duli Tuanku untuk melafazkan Titah kepada sidang hadirin dalam Dewan yang mulia ini. Mohon perkenan Tuanku.

[YAB ADUN Sikamat menyembahkan Teks Titah Ucapan DiRaja kepada DYMM Yang di-Pertuan Besar Negeri Sembilan]

[DYMM Yang di-Pertuan Besar Negeri Sembilan menyampaikan Titah baginda]

[YAB ADUN Sikamat mengambil semula Teks Titah Ucapan]

## 5. **PENANGGUHAN MESYUARAT**

**YB Yang Dipertua Dewan:** Menjunjung kasih Tuanku. Ahli-ahli Yang Berhormat sekalian, Dewan ditangguhkan. Dewan akan disambung semula pada hari Selasa; 10 Oktober 2023 bersamaan 24 Rabiulawal 1445 Hijrah mulai jam 10.00 pagi.

Keberangkatan Duli Yang Maha Mulia Yang di-Pertuan Besar Negeri Sembilan. Duli Yang Maha Mulia Tunku Ampuan Besar Negeri Sembilan. Yang Teramat Mulia Undang Yang Empat serta Yang Teramat Mulia Tunku Besar Tampin meninggalkan Dewan.

[Bentara Dewan menanggung Cokmar mendahului DYMM Yang di-Pertuan Besar Negeri Sembilan]

[YTM Undang Yang Empat serta YTM Tunku Besar Tampin meninggalkan Dewan]

[YB Yang Dipertua Dewan meninggalkan Galeri Persidangan]

**Mesyuarat Dewan Undangan Negeri ditangguhkan pada jam 11.03 pagi.**

## **PENYATA DEWAN**

### **PERSIDANGAN KEDUA (PERASMIAN) PENGGAL PERTAMA DEWAN UNDANGAN NEGERI, NEGERI SEMBILAN YANG KE-14 PADA 10 OKTOBER 2023 (SELASA)**

#### **HADIR:**

<b>BIL.</b>	<b>NAMA</b>	<b>KAWASAN</b>
1.	YANG DIPERTUA DEWAN UNDANGAN NEGERI, NEGERI SEMBILAN: YB Dato' M K Ibrahim bin Abd Rahman	
2.	MENTERI BESAR NEGERI SEMBILAN: YAB Dato' Seri Haji Aminuddin b. Haji Harun	Sikamat
3.	YB Datuk Seri Haji Jalaluddin bin Haji Alias	Pertang
4.	YB Tuan Teo Kok Seong	Bahau
5.	YB Puan Noorzunita Begum binti Mohd Ibrahim	Pilah
6.	YB Dato' Haji Ismail bin Lasim	Senaling
7.	YB Tuan Arul Kumar a/l Jambunathan	Nilai
8.	YB Tuan Haji Mustapha bin Nagoor	Palong
9.	YB Puan Nicole Tan Lee Koon	Bukit Kepayang
10.	YB Tuan Veerapan a/l Superamaniam	Repah
11.	YB Datuk Mohd Faizal bin Ramli	Linggi
12.	YB Tengku Hajah Zamrah binti Tengku Sulaiman	Ampangan
13.	YB Dato' Seri Utama Haji Mohamad bin Haji Hasan	Rantau
14.	YB Tuan Loke Siew Fook	Chennah
15.	YB Dato' Ir. Haji Bakri bin Sawir	Klawang
16.	YB Dato' Haji Zaifulbahri bin Haji Idris	Chembong
17.	YB Tuan Gunasekaren a/l Palasamy	Seremban Jaya
18.	YB Tuan Choo Ken Hwa	Lukut
19.	YB Tuan Chew Seh Yong	Lobak
20.	YB Tuan Mohd Razi bin Mohd Ali	Sungai Lui
21.	YB Puan Sri Bibi Sharliza binti Mohd Khalid	Juasseh

<b>BIL.</b>	<b>NAMA</b>	<b>KAWASAN</b>
22.	YB Tuan Ng Chin Tsai	Temiang
23.	YB Tuan Haji Saiful Yazan bin Sulaiman	Johol
24.	YB Tuan Yap Yew Weng	Mambau
25.	YB Dato' Mohd Zaidy bin Abdul Kadir	Jeram Padang
26.	YB Dr. Rajasekaran a/l Gunnasekaran	Sri Tanjung
27.	YB Tuan Muhammad Sufian bin Maradzi	Seri Menanti
28.	YB Tuan Siau Meow Kong	Rahang
29.	YB Tuan Suhaimi bin Aini	Kota
30.	YB Tuan Yew Boon Lye	Chuah
31.	YB Datuk Haji Mohd Asna bin Amin	Lenggeng
32.	YB Tuan Suhaimizan bin Bizar	Gemencheh
33.	YB Tuan Haji Ridzuan bin Ahmad	Gemas
34.	YB Tuan Mohd Fairuz bin Mohd Isa	Serting
35.	YB Tuan Mohamad Hanifah bin Abu Baker	Labu
36.	YB Tuan Haji Kamarol Ridzuan bin Mohd Zain	Paroi
37.	YB Tuan Abdul Fatah bin Zakaria	Bagan Pinang

**HADIR MENGIKUT FASAL 37(3) UNDANG-UNDANG  
TUBUH KERAJAAN NEGERI SEMBILAN**

1. SETIAUSAHA KERAJAAN NEGERI, NEGERI SEMBILAN  
(YB Dato' Mohd Zafir bin Ibrahim)
2. PENASIHAT UNDANG-UNDANG NEGERI, NEGERI SEMBILAN  
(YB Dato' Muzalmah binti Mustapha Kamal)
3. PEGAWAI KEWANGAN NEGERI, NEGERI SEMBILAN  
(YB Dato' Mohd. Khidir bin Majid)

**TURUT HADIR**

1. SETIAUSAHA DEWAN UNDANGAN NEGERI, NEGERI SEMBILAN  
(Mohd Amin bin Ludin)
2. KETUA PENOLONG SETIAUSAHA  
(Mohd Zamri bin Md Saad)

[Setiausaha Dewan mengumumkan ketibaan YB Yang Dipertua Dewan]

[Mesyuarat dimulakan pada jam 10.03 pagi]

**1. MEMBACA DOA**

**Setiausaha Dewan:** Susunan Mesyuarat, perkara pertama, Membaca Doa. Dipersilakan Yang Berhormat ADUN Johol.

[YB ADUN Johol telah membacakan doa di bawah Peraturan IX, muka surat 11 di dalam Peraturan-Peraturan dan Perintah-Perintah Tetap Dewan Negeri]

**2. PERUTUSAN YANG BERHORMAT YANG DIPERTUA DEWAN**

**Setiausaha Dewan:** Perkara kedua, Perutusan Yang Berhormat Dato' Yang Dipertua Dewan.

**YB Yang Dipertua Dewan:** *Bismillahirrahmanirrahim, assalamualaikum WBT dan salam sejahtera. Alhamdulillahirabbil 'alamin wassolatu wassalamu'ala asrofil ambiya iwalmursalin wa'ala alihi wasohbihi ajma'in. Rodhitubillahirobba, wabil islamidiina, wabimuhammadin nabiyya warosuula. Alhamdulillah, segala puji bagi Allah Tuhan Pencipta Alam, selawat dan salam ke atas junjungan Nabi Muhammad SAW, ahli keluarga dan para sahabat Baginda.*

Yang Amat Berhormat Dato' Seri Haji Aminuddin bin Haji Harun, Menteri Besar Negeri Sembilan; Yang Berhormat Ahli-Ahli Majlis Mesyuarat Kerajaan Negeri, ahli-ahli Yang Berhormat, ketua-ketua jabatan, Dato'-Dato', Datin-Datin, tuan-tuan, puan-puan hadirin yang dihormati sekalian.

Hadirin sekalian, *alhamdulillah*, saya mengambil kesempatan ini untuk mengucapkan selamat datang ke sidang mesyuarat bagi persiapan kedua, Persidangan Kedua Penggal Pertama, Dewan Undangan Negeri, Negeri Sembilan Yang Ke-15. Hari ini, 10 Oktober 2023 bersamaan 24 Rabi'ulawal 1445 Hijrah dan kita telah masuk hari kedua persidangan.

Saya seterusnya ingin memaklumkan bahawa Yang Berhormat Dato' Seri Utama Haji Mohamad bin Haji Hasan; Ahli Dewan Undangan Negeri Kawasan Rantau telah sempurna mengangkat sumpah jawatan sebagai Ahli Dewan Undangan Negeri, Negeri Sembilan bagi Penggal Dewan

Undangan Negeri Ke-15 ini di hadapan saya tadi, sekitar jam 9:30 pagi tadi, selaras dengan Peraturan I, Peraturan-Peraturan Dan Perintah-Perintah Tetap Dewan Undangan Negeri, Negeri Sembilan tahun 1960.

Hadirin sekalian, sebagaimana maklum, agenda persidangan ini, kita adalah pada hari ini selain Menyusun mesyuarat utama, kita juga akan mula membahas usul Menjunjung Kasih Ke bawah Duli Yang Maha Mulia Yang di-Pertuan Besar Negeri Sembilan atas titah ucapan Baginda ketika merasmikan pembukaan Penggal Pertama pada hari semalam, 9 Oktober 2023. Saya amat berharap semua ahli-ahli Yang Berhormat dapat mengambil bahagian dalam perbahasan itu nanti.

Saya juga ingin memaklumkan bahawa Dewan Undangan Negeri Sembilan juga sedang dalam persediaan untuk bersidang, untuk persidangan Belanjawan Tahun 2024 yang dijadualkan pada 1, 4 hingga 7 dan 11 Disember 2023 nanti.

Hadirin sekalian, sebagaimana biasa, saya ingin menyeru kepada semua hadirin agar sentiasa mematuhi Peraturan-Peraturan Dan Perintah-Perintah Tetap Dewan serta tatakelakuan dan etika sebagai ahli Yang Berhormat sepanjang persidangan. Dipohon kerjasama semua hadirin untuk memastikan persidangan ini, kita pada kali ini berjalan dengan lancar dan sempurna. Sekian, terima kasih. Selamat bersidang.

### **3. MEMBENTANGKAN KERTAS DEWAN**

**Setiausaha Dewan:** Perkara ketiga, Membentangkan Kertas Dewan. Dipersilakan Yang Amat Berhormat ADUN Sikamat.

**YAB ADUN Sikamat:** Yang Berhormat Dato' Yang Dipertua, saya mohon izin membentangkan Kertas Dewan yang ada di hadapan ahli-ahli Yang Berhormat sekalian iaitu Kertas Dewan Bil. 2/2023; Anggaran Perbelanjaan Mengurus Tambahan Tahun 2023.

**YB Yang Dipertua Dewan:** Ahli-ahli Yang Berhormat, ahli-ahli Yang Berhormat sekalian, Kertas Dewan bahagian kedua Tahun 2023 adalah dibentangkan.

### **4. MEMBENTANGKAN LAPORAN DAN PENYATA KEWANGAN**

**Setiausaha Dewan:** Perkara keempat, Membentangkan Laporan Dan Penyata Kewangan.

**YB Yang Dipertua Dewan:** Ahli-ahli Yang Berhormat sekalian, tiada Laporan dan Penyata Kewangan untuk dibentangkan di persidangan kali ini.

## 5. PERTANYAAN-PERTANYAAN

### 5.1 **Pertanyaan-Pertanyaan Yang Berkehendakkan Jawapan Lisan (Hari Kedua).**

**Setiausaha Dewan:** Perkara kelima, Pertanyaan-Pertanyaan. Yang pertama, Pertanyaan-Pertanyaan Yang Berkehendakkan Jawapan Lisan (Hari Kedua).

**YB Yang Dipertua Dewan:** Saya menjemput Temiang, Yang Berhormat Temiang, untuk soalan ya. Ni mana? Oh. Mintak maaf. Saya menjemput Yang Berhormat Rantau.

**YB ADUN Rantau:** Terima kasih Dato' Yang Dipertua, saya ingin bertanyakan soalan nombor 1 berkenaan dengan status Pusat Rekreasi Air Panas Pedas. Nombor 1, mengapa ia ditutup? Nombor 2, bila dia nak bukak balik? Terima kasih.

**YB ADUN Bukit Kepayang:** Terima kasih Yang Berhormat Dato' *Speaker*. Terima kasih juga kepada Yang Berhormat Rantau atas soalan berkenaan dengan mengapa pusat rekreasi air panas ditutup dan apakah perancangan Kerajaan Negeri Sembilan di atas tapak air panas tersebut. Sebelum tu ingin saya memberi serangkap pantun.

Mari kita pergi ke Dungun,  
Sambil bawa barang sepeti,  
Daerah Rantau pesat membangun,  
Marilah kerja bersatu hati.

Sebenarnya saya berasal daripada Pedas. Saya berasal dari Pedas, di mana ibu saya memaksa saya menghabiskan kebanyakan masa cuti sekolah saya untuk menoreh getah bersama-sama beliau supaya tidak, tidak hilang daratan. Oleh saya rasa saya ingin nak, memang ingin melihat kawasan Pedas ini dibangunkan.

Jawapan saya adalah, Wet World Air Panas Pedas tidak beroperasi sepenuhnya sekitar tahun 2019 apabila pandemik COVID-19 melanda. Impak dari pandemik tersebut, pihak pemaju tidak dapat beroperasi semula atas faktor kekangan kewangan. Pihak pemaju Wet World Air Panas Pedas telah berbincang dengan Kerajaan Negeri dan juga Majlis

Daerah Rembau dengan cadangan pelaburan baru di tapak tersebut. Rentetan dari cadangan tersebut, pihak pemaju memohon untuk lanjutan pajakan dari perjanjian asal yang tamat pada 2058 iaitu lanjutan selama 30 tahun. Melalui permohonan tersebut, beberapa siri rundingan telah dibuat dan sehingga kini proses rundingan sedang dijalankan dan perjanjian belum dapat dimeterai. Terima kasih.

**YB ADUN Rantau:** Soalan tambahan Dato' Yang Dipertua. Terima kasih kepada Yang Berhormat Keparang ya. Yang Berhormat Keparang di atas penerangan berkenaan dengan status Pusat Rekreasi Air Panas Pedas. Dato' Yang Dipertua, seperti mana yang kita maklum Pusat Rekreasi Air Panas Pedas ni merupakan salah satu daripada tarikan pelancong datang ke Negeri Sembilan. Malahan pulak, ia berhampiran dengan *exit tol* kita ya. Dan ia merupakan salah satu daripada produk pelancongan Negeri Sembilan, dulu. Walaupun diuruskan dengan serba kekurangan, tetapi ini adalah merupakan salah satu produk pelancongan. Saya berharap ya, supaya Kerajaan Negeri benar-benar melihat Pusat Rekreasi Air Panas Pedas ini kerana ia akan dapat menambah nilai produk pelancongan di negeri kita. Dan pelancongan adalah merupakan salah satu daripada sumber pertumbuhan GDP kita yang perlu kita beri tekanan ya. Kerana pelancongan ini dia merupakan satu orang kata, bukan sahaja kalau perkilangan itu dia banyak kepada *machineries*, tapi pelancongan ini semua orang akan dapat merasa, orang jual makan, macam-macam ya, produk-produk kraftangan.

Saya nak tanya satu, bila boleh kita memuktamadkan perundingan ini kerana saya rasa, Dato' Dipertua, perundingan ini banyak bergantung dan jugak berkisar kepada untuk menambah tahun untuk mereka menyewa tanah tersebut 30 tahun, dan dia nak membesarkan sebab operator ni operator yang amat besar, dia merupakan pemegang kepada produk *Smurfs* dan yang lain-lain seperti di Genting Highland. Dia operator, dia untuk Asia Tenggara. Bagi mereka, mereka amat berminat untuk memulakan semula dan membesarkan kawasan yang mereka nak buat sebab dia nak *Smurfs world* di situ. Jadi saya harap ya, dan saya mintak Kerajaan Negeri segerakan perundingan ini ya, 30 tahun untuk mereka tambah dia punya *lease hold* tersebut, saya rasa Majlis Daerah Rembau mesti memberikan suatu orang kata, sokongan kuat kepada Kerajaan Negeri untuk kita pastikan produk pelancongan untuk Negeri Sembilan, menambah pendapatan, menambah GDP negeri kita itu, dapat direalisasikan kerana kita lihat GDP kita banyak bergantung kepada sektor pelaburan awam dan jugak kepada perkilangan. Pelancongan dan *agriculture* ini perlu kita beri penekanan untuk kita ada satu *sustainable* yang mampan ya, produk ataupun pemangkin GDP kita yang *sustainable*. Terima kasih Dato' Dipertua.

**YAB ADUN Sikamat:** Terima kasih yang, Yang Berhormat Rantau. Memang dalam perbincangan kita tempoh hari adalah mengenai tempoh lanjutan ya. Mereka mohon untuk 60 tahun, kita bagi 30 tahun. Jadi perbincuan, perbincangan ini kita telah luluskan, dan perbincangan di peringkat, ini adalah di antara Majlis Daerah Rembau dengan pihak Wet World Air Panas Pedas dan ketika mereka memohon tambahan itu, kita telah luluskan 30 tahun. Tetapi pihak pemaju inginkan 60 tahun tambahan. Jadi kita akan balik kepada Majlis Daerah Rembau untuk mereka mohon semula, untuk mohon semula supaya kita tambah lagi 60 tahun, supaya ada pembangunan yang lebih besar di situ. Seperti yang dinyatakan tadi oleh Yang Berhormat Rantau, memang dalam perbincangan kita di peringkat awal, tetapi kelulusan itu menyebabkan, 30 tahun itu mereka kurang bersetuju. Dan *insyaAllah* kita akan minta supaya Majlis Daerah Rembau supaya memohon semula tambahan lagi 30 tahun, menjadikan 60 tahun, *insyaAllah*. Terima kasih.

**YB Yang Dipertua Dewan:** Saya menjemput Yang Berhormat Gemas.

**YB ADUN Gemas:** Terima kasih Tuan Yang Dipertua. Saya bertanyakan soalan Jalan Gemas – Tampin. Jalan Gemas – Tampin merupakan jalan utama dari utara Johor dan laluan utama kenderaan angkatan tentera dari Kem Tentera Gemas. Kem Tentera Gemas ini merupakan kem yang terbesar di Asia Tenggara. Apakah perancangan tindakan pihak Kerajaan Negeri berkaitan dengan pelebaran jalan bagi menjimatkan masa perjalanan dan jugak penambahbaikan pencahayaan sepanjang perjalanan antara .....

[pencelahan oleh ADUN Seremban Jaya]

**YB ADUN Gemas:** Soalan dia, soalan, soalan 1. Soalan 1. Penambahbaikan untuk berkaitan pelebaran jalan dan pencahayaan. Terima kasih Dato' Yang Dipertua.

**YAB ADUN Sikamat:** Terima kasih Yang Berhormat ADUN Gemas. Dato' Yang Dipertua, untuk makluman, cadangan pelebaran Jalan Gemas – Tampin masih dalam pertimbangan pihak negeri sebelum diangkat permohonan ke Kementerian Kerja Raya untuk kelulusan. Pelebaran jalan Gemas – Tampin ini penting bagi kita kerana ia juga melibatkan keluar masuk ya, angkatan tentera yang, yang kita sedia maklum ada Kem Gemas di sana, dan banyak kemudahan-kemudahan ketenteraan ada di sana, yang memerlukan satu jalan yang lebih baik, lebih besar. Dan saya yakin bahawa ini akan dibawa sekali oleh Yang Berhormat Rantau untuk pastikan bahawa jalan tersebut memudahkan gerakan pihak-pihak tentera untuk keluar masuk di kawasan ini.

Dan jalan yang dinyatakan adalah Jalan Persekutuan FT001, Jalan Gemas – Tampin. JKR Negeri sedang dalam tindakan mengenal pasti lokasi penambahbaikan untuk sementara waktu dan menyediakan anggaran kos untuk permohonan peruntukan bagi, pada tahun 2024 ini. Terima kasih Dato' Yang Dipertua.

**YB ADUN Rantau:** Soalan tambahan, boleh saya mintak soalan tambahan, bagi pihak ya? Dato' Dipertua, Dato' Yang Dipertua, soalan tu amat baik. Dan saya mohon kepada Yang Amat Berhormat Sikamat supaya Kerajaan Negeri Sembilan memberikan penekanan yang kuat kepada isu membesar dan melebarkan jalan daripada Seremban – Tampin kerana bagi pihak angkatan tentera mereka menghadapi banyak masalah kerana mereka nak bawak, kalau ada apa-apa *emergency* Dato' Yang Dipertua, kalau kita nak bawak *battle tank* tu Dato' Dipertua, kita terpaksa pakai *loader*. Kalau *loader* tu jalan Dato' Dipertua, jalan terpaksa tutup, dia satu sorang je jalan. Jadi *in case of emergency*, perkara begini perlu kita lihat. Dan saya mintak Yang Amat Berhormat beri sokongan kuat dan saya akan menyokong saranan Kerajaan Negeri untuk kita melebarkan dan membesarkan jalan Seremban – Tampin untuk kita pastikan supaya jalan yang lama ini dinaik taraf dan tidak lagi sesuai untuk kegunaan kecemasan dan yang lain-lain. Terima kasih.

**YAB ADUN Sikamat:** Terima kasih Dato' Yang Dipertua. Saya rasa cadangan tu amat baik dan saya rasa keperluan yang harus diutamakan pada tahun hadapan adalah untuk pembesaran daripada Seremban ke Tampin, ke Gemas, sampai Gemas-lah. Sampai ke Gemas. *Insyallah* ini akan menjadi keutamaan Kerajaan Negeri dalam permohonan untuk Rancangan Malaysia Yang Ke-12. Terima kasih.

**YB Yang Dipertua Dewan:** Saya jemput Yang Berhormat Klawang kemukakan soalan yang pertama.

**YB ADUN Klawang:** Terima kasih Dato' Yang Dipertua. Saya pilih soalan nombor 2.

**YAB ADUN Sikamat:** Dato' Yang Dipertua, terima kasih kepada soalan nombor 2 daripada ADUN Klawang. Pihak Jabatan Pengairan Dan Saliran (JPS) telah meletakkan piawaian di dalam spesifikasi kerja kepada pihak kontraktor di bawah item pembersihan tapak di mana pihak kontraktor wajib membersihkan tapak pembinaan sekitar jajaran sungai sebelum Perakuan Siap Kerja dikemukakan kepada kontraktor. Ini isu dia adalah apabila mereka membuat kerja, diletakkan pasir-pasir sungai di tebing-tebing. Dan apabila hujan, dia turun balik. Jadi ini antara yang diperkatakan oleh ramai masyarakat. Dan soalan ini baik

untuk pastikan bahawa teknik menggali dasar sungai berpasir ini harus mestilah mengikut SOP yang telah ditetapkan.

Pihak Kerajaan Negeri juga bersama-sama pihak JPS telah melaksanakan satu kaedah langkah pembaikan dengan kaedah timbal balik pasir di mana segala kerja penyelenggaraan Sungai yang terlibat dalam timbal balik tan, pasir akan dilaksanakan oleh kontraktor tanpa sebarang peruntukan atau kos oleh pihak Kerajaan Negeri dan JPS. Ini sedang berjalan, dan *alhamdulillah* nampaknya dapat membantu mengurangkan risiko banjir kilat di kawasan-kawasan tertentu. Terima kasih Dato' Yang Dipertua.

**YB ADUN Klawang:** Soalan tambahan yang, Dato' Yang Dipertua. Saya mencadangkan perlunya ada kajian kedalaman sungai-sungai terpilih supaya satu proses mendalamkan sungai dapat kita dalamkan ke kedalaman asal ya, untuk mengurangkan risiko banjir kilat ini ya. Itu cadangan.

Soalan yang kedua, tambahan, ini kita dah bulan Oktober, Dato' Yang Dipertua, musim tengkujuh menghampiri kita. Jadi bagaimanakah persediaan ataupun siapsiaga kita untuk menghadapinya di, di, apabila masanya datang kelak, *insyaAllah*.

**YAB ADUN Sikamat:** Terima kasih Klawang atas soalan tambahan. Dan kita sedia maklum bahawa cadangan supaya mereka gali sampai ke asal, dasar asal, itu adalah perkara yang harus diberi kajian oleh pihak JPS ya. Dan saya rasa itu adalah perkara yang sebetulnya, kalau tak dia makin lama makin dalam, makin lebar sungai kita. Dan, dan ini antara yang perlu diberi perhatian oleh pihak JPS supaya mereka tidak terlalu mendalamkan sungai-sungai yang ada.

Dan yang keduanya tadi tentang persediaan. Memang kita dalam *mode* persediaan. Dan kita sedia maklum bahawa bencana ya, telah di *mode* bersedia oleh SUK sendiri, di bawah Dato' Setiausaha Kerajaan Negeri. Dan ini antara yang akan diberi tumpuan di semua daerah dan di mana Pegawai-Pegawai Daerah adalah merupakan Pengerusi Bencana di peringkat daerah. Terima kasih Dato' Yang Dipertua.

**YB Yang Dipertua Dewan:** Saya menjemput YB Klawang, YB Paroi.

**YB ADUN Paroi:** *Auzubillah himinasyaitan nirrajim, bismillahirrahmanirrahim.* Terima kasih Dato' Yang Dipertua. Soalan daripada Paroi nombor 1, yang pertamanya ialah tentang apakah dasar Kerajaan ya, Negeri tentang permohonan baru lesen menjual minuman keras ya, di Negeri Sembilan, iaitu berkenaan *liquor*-lah 35% ke atas.

Yang tu, yang keduanya, nyatakan pecahan mengikut kategori lesen yang telah dikeluarkan di peringkat daerahlah ya, di Negeri Sembilan.

**YB ADUN Nilai:** Terima kasih Dato' Yang Dipertua. Berkaitan dengan statistik jumlah lesen penjual minuman keras yang diluluskan oleh Lembaga-Lembaga Pelesen di daerah-daerah Negeri Sembilan sehingga tahun, bulan Ogos tahun 2023 di bawah Pejabat Daerah Dan Tanah Seremban adalah 55, di bawah Pejabat Daerah Dan Tanah Port Dickson – 34, di bawah Pejabat Daerah Tanah Dan Jelebu – 24, pejabat tanah, Pejabat Daerah Dan Tanah Rembau – 6, Pejabat Daerah Dan Tanah Jempol – 9, Pejabat Daerah Dan Tanah Kuala Pilah – 9. Dan ini adalah berkaitan dengan lesen yang diluluskan oleh lembaga pelesen, Lembaga-Lembaga Pelesen di semua daerah.

Berkaitan dengan dasar, merujuk kepada sidang media yang diadakan pada bulan Jun tahun 2020, yang dipengerusikan oleh Yang Amat Berhormat Menteri Besar pada masa, Menteri Besar, menerima permohonan memperbaharui lesen arak dan juga untuk permohonan-permohonan baru. Syarat-syarat yang lebih ketat dikenakan setelah mendapat ulasan daripada pihak Polis, daripada Kastam dan juga Pihak Berkuasa Tempatan dan keputusan itu diambil dalam Mesyuarat Lembaga Eksais di setiap daerah tersebut. Sama jugak, walaupun diberi kelulusan, tetapi ada juga beberapa permohonan yang tidak patuhi syarat ditamatkan juga, ada juga beberapa kes seperti itu dalam permohonan ataupun *renew* lesen-lesen berkaitan dengan lesen arak. Terima kasih.

**YB ADUN Paroi:** Okey soalan tambahan ya. Berkenaan dengan penjualan arak ni, ia berkisar kepada *liquor*. Kalau kita tengok dalam Akta Eksais Seksyen 35 tu, maknanya, soalan saya ialah bagi minuman *bir* yang 5% yang banyak dijual ya, di Speedmart, apa dasar Kerajaan. Boleh mengurang kadang-kadang kita tengok di kedai-kedai, banyak yang menjual arak yang *bir, bir ya, beer*. Dan ini saya rasa kena ambil di peringkat kerajaan kena ambil perhatianlah. Kadang dia ada di di Speedmart, di kawasan berpenghuni orang Islam ya, kadang 90% pun ada di situ, saya rasa kena ambil perhatian tentang perkara tersebut. Kalau mengikut Akta Eksais Seksyen 35 ni, memang pada dasarnya benda tu tidak, tidak ada lesen yang 5% tu. Tetapi tindakan kerajaan sebab benda ni, benda yang memabukkan, *wallahualam*.

**YB ADUN Nilai:** Okey, terima kasih atas cadangan. Memang penjualan *bir* itu adalah tidak termasuk dalam mendapatkan kelulusan kebenaran daripada Lembaga-Lembaga Pelesen di semua daerah. Tetapi yang berkaitan dengan barang, kedai-kedai 24 jam seperti 7-Eleven ataupun ini, memang pada hari ini pun di beberapa kawasan

yang penduduknya adalah, majoritinya adalah beragama Islam, memang tidak jugak di, ada juga beberapa yang tidak dibenarkan. Dan kita mengambil cadangan tersebut untuk kita melihat kembali. Sekian, terima kasih.

**YB Yang Dipertua Dewan:** Saya jemput Yang Berhormat Chembong.

**YB ADUN Chembong:** Dato' Dipertua, saya kemukakan soalan nombor 1 berkenaan jalan jugak, Jalan FT001 Seremban – Tampin tapi khususnya Dato' Yang Dipertua, jajaran antara Sungai Gadut ke Rembau ataupun Sungai Gadut ke Pedas, Dato' Dipertua. Terima kasih. Kesesakan yang melampau terutamanya di hujung minggu dan jugak hari-hari perayaan, Dato' Yang Dipertua.

**YAB ADUN Sikamat:** Terima kasih Dato' Yang Dipertua. Terima kasih Chembong, tadi kita dah sedia maklum bahawa kita telah jawab soalan untuk Seremban ke Gemas. Dan ini akan kita beri tumpuan untuk pastikan bahawa jalan ini akan diberi keutamaan kerana ini adalah sambungan ya, sambungan untuk kita pastikan jalan ini dapat diteruskan ya, dari Seksyen 298.00 hingga Seksyen 302.00 Daerah Rembau, Negeri Sembilan di bawah peruntukan Rancangan Malaysia Ke-12, *Rolling Plan* Ke-5 (RP5) akan datang. Ni akan, antara keutamaan tadi yang kita katakan jajaran jalan tersebut sampai ke Gemas akan diberi tumpuan. Terima kasih Dato' Yang Dipertua.

**YB Yang Dipertua Dewan:** Tak ada tambahan?

**YB ADUN Chembong:** Dato' Yang Dipertua, saya nak, nak tekankan perkara ini sangat penting saya rasa, sepertimana yang juga telah dipanjangkan, disebut oleh Gemas dan jugak ADUN Rantau pun sokong, Yang Amat Berhormat Sikamat pun nampak keperluannya Dato' *Speaker*. Cumanya saya nak sebut FT001 ini panjang, daripada utara ke selatan Dato' Dipertua. Jadi, dulu pada era zaman Kerajaan sebelum ini telah dibuat, dilebarkan, dinaik taraf antara pekan Seremban ke Sungai Gadut. Pandangan saya, Dato' Yang Dipertua, kalau nak dinaiktarafkan haruslah bermula daripada Sungai Gadut hingga ke Rembau dulu, dan diikuti, Dato' Dipertua. Sebab di Sungai Gadut menjadi satu orang panggil *bottle neck* Dato' Yang Dipertua. Jadi saya harap Kerajaan Negeri memberi penekanan terhadap perkara ini Dato' Dipertua. Terima kasih. Tak ada soalan tambahan. Ianya merupakan pengharapan yang tinggi oleh masyarakat, Dato' Dipertua. Terima kasih.

**YB Yang Dipertua Dewan:** Saya mohon ap ani, ahli-ahli Yang Berhormat bila mengemukakan soalan, hanya sebut nombor saja ya. Kalau kita nak baca semua soalan tu balik, nanti ambil masa yang panjang. Kita ada

sejam lebih sikit je untuk sesi soal jawab lisan ni. Jadi saya jemput Yang Berhormat Serting.

**YB ADUN Serting:** *Assalamualaikum* dan selamat sejahtera. Dato' Yang Dipertua, soalan nombor 1. Terima kasih.

**YB ADUN Pilah:** *Assalamualaikum*, salam sejahtera. Terima kasih Dato' Yang Dipertua. Terima kasih YB Serting atas soalan. Okey di sini saya akan menyatakan statistik kes anak tak sah taraf serta kes buang bayi di Negeri Sembilan. Melalui rekod Polis Diraja Malaysia Negeri Sembilan, pada tahun 2018 sehingga 2022 ia melibatkan mangsa bawah 16 tahun iaitu Negeri Sembilan berjumlah, seluruh daerah ya, 8 daerah berjumlah 52 kes. Di mana pada tahun 2018 dan 2019 mencatatkan kes tertinggi iaitu 14 kes. Manakala bagi tahun 2022 adalah sebanyak 9 kes dan tahun 2020 – 8 kes serta tahun 2021 sebanyak 7 kes.

Statistik anak tidak sah taraf ini melibatkan yang belum berkahwin iaitu mangsa atas 16 tahun, dari tahun 2018 hingga 2022 berjumlah 9 kes iaitu mela, merangkumi 8 daerah di Negeri Sembilan. Melalui statistik ini mencatatkan 6 kes pada tahun 2018 dan kes, dan pada tahun 2020 sehingga 2022, ia melibatkan 1 kes.

Bagi kes buang bayi, tahun 2018 hingga tahun 2022 berjumlah 15 kes. Berdasarkan statistik Polis Diraja Malaysia, kes buang bayi tertinggi adalah pada tahun 2018 dan 2019. Ni masing-masing me, merangkumi 5 kes. Jadi, pa, bagi tahun 2021 sebanyak 3 kes, manakala bagi tahun 2020 dan 2022, masing-masing sebanyak 1 kes. Di mana pada tahun 2018 sehingga 2022, apa ni, kes ataupun yang laporan yang diterima daripada statistik Polis Diraja Malaysia melibatkan tangkapan hanya 1 kes. Pada tahun 2018, sebanyak 1 kes pembuangan bayi iaitu pembuangan bayi matilah ya, yang ber, mempunyai tangkapan pelaku melibatkan bawah umur. Pada tahun 2019, sebanyak 2 kes pembuangan bayi dan mem, mempunyai tangkapan iaitu 1 kes buang bayi iaitu bayi hidup. Manakala pada tahun 2021, sebanyak 1 kes buang bayi iaitu hidup dan mepu, dan mempunyai tangkapan. Dalam kejadian ini, pelaku melibatkan bangsa India-lah, berumur 25 tahun dan tiada pengakuan daripada pelaku iaitu ayah kandung. Pada tahun 2022, sebanyak 1 kes buang bayi iaitu mati dan mempunyai tangkapan.

Bagi statistik Jabatan Kebajikan Masyarakat Negeri Sembilan, merekodkan statistik kes, apa, pembuangan bayi ini. Bagi tahun 2018 hingga Ogos 2022, JKM telah merekodkan sebanyak 5 kes buang bayi. Kes tertinggi direkodkan iaitu pada tahun 2021 sebanyak 2 kes manakala bagi tahun 2018, 2019 dan 2022 sebanyak 1 kes. Dan tahun 2020, tiada rekod catatan.

Melalui Jabatan Pendaftaran Negara Negeri Sembilan, pendaftaran anak tak sah taraf terbahagi kepada 2 kategori iaitu Kategori 1, Pendaftaran bagi kelahiran hasil perhubungan tanpa ikatan perkahwinan yang sah tetapi ada orang mengaku sebagai bapa atau kelahiran berlaku selepas ada perkahwinan yang sah bagi pasangan Islam tetapi kelahiran dalam tempoh kurang dari 6 bulan Qamariah dari tarikh nikah.

Mengikut statistik Pendaftaran Negara Negeri Sembilan, dia berbeza statistik Dato' Yang Dipertua, melalui 3 agensi. Melalui Jabatan Pendaftaran Negeri Sembilan, ia melibatkan statistik pendaftaran kelahiran anak tak sah taraf ini di bawah Seksyen 13 Akta 299 di JPN Negeri Sembilan, sebanyak 2,998 statistik kelahiran anak tak sah taraf. Jadi mengikut pecahan ini, statistik Daerah Seremban mencatatkan jumlah tertinggi iaitu sebanyak 1,671 diikuti dengan Daerah Port Dickson – 390, Daerah Jempol – 328, Daerah Tampin – 268, Daerah Kuala Pilah – 175, Daerah Rembau – 102 dan Daerah Jelebu – 64.

Di mana soalan 1.2, Kerajaan Negeri melalui Polis Diraja Malaysia mengambil langkah-langkah untuk mengekang dan mengawal masalah-masalah ini dengan mengadakan Program Kesedaran iaitu program kesedaran, dengan izin, *Woman Awareness Campaign* dan *Child Awareness Campaign* di peringkat sekolah/ institusi, institusi, institusi pengajian tinggi dan juga masyarakat di bandar dan di luar bandar. Tujuannya untuk menyampaikan maklumat, mesej, isu-isu semasa kepada pelajar, masyarakat melalui kempen bersemuka, ceramah dan pameran. Selain itu, memberi nasihat kepada ibu bapa untuk memantau, mengasah, mengawasi pergaulan anak-anak dan menerangkan penyampaian trend jenayah terkini.

Selain itu, pihak PDRM melaksanakan program, program *walkabout* iaitu melibatkan lebih mendekati masyarakat melalui konsep turun padang, memberi informasi serta pendedahan kepada orang ramai serta mengedarkan risalah kesedaran berkaitan isu gejala sosial dan pergaulan bebas remaja.

Selain itu, ada juga, kesedaran, program *Baby Hatch* di mana *baby hatch* ni diwujudkan untuk mene, menempatkan bayi dari hasil hubungan luar nikah di mana dapat diselamatkan di *baby hatch* di KPJ Seremban bagi tujuan me, tidak, untuk menggalakkan remaja supaya tidak melakukan hubungan bebas ini.

Selain itu, di peringkat Kerajaan Negeri melalui Jabatan Kebajikan Masyarakat Negeri Sembilan, dengan mengambil langkah mengekang dan mengawal dengan mengadakan apa, program advokasi iaitu jabatan atau agensi terus kepada maklumat pengawasan dan pemantauan

kanak-kanak oleh ibu bapa ataupun penjaga yang permulaannya untuk mencegah berlakunya perkara-perkara yang tidak diinginkan ini. Selain itu JKM juga memberi kesedaran kepada ibu bapa bahawa amat penting dalam era zaman ini mendidik anak-anak mencabar terutamanya ibu bapa dan penjaga yang sukar membahagikan masa terutamanya dalam mencari nafkah keluarga untuk meneruskan kehidupan seharian. Jadi, oleh yang demikian, hubungan kekeluargaan perlu dieratkan dan institusi kekeluargaan diperkukuhkan kembali melalui penganjuran program keibubapaan secara kolaboratif dengan jabatan/agensi seperti LPPKN, PDRM, Jabatan Agama Islam dan Jabatan Pendidikan.

Peranan komuniti dalam Perlindungan Kanak-Kanak iaitu PPKK, Pusat Aktiviti Kanak-Kanak (PAKK), Pasukan Kebajikan Kanak-Kanak (PKKK) sangat penting untuk menjadi mata dan telinga serta bertindak melalui pelaksanaan program pencegahan di peringkat komuniti setempat.

Selain itu, Jabatan Kebajikan Masyarakat mengadakan program Pasukan Pelindungan Kanak-Kanak di mana 9 buah PPKK dan PAKK telah diwujudkan di Negeri Sembilan. PPKK merupakan satu program yang menjalankan, yang dijalankan oleh pihak JKM di komuniti bersama komuniti untuk komuniti. Manakala PAKK berperanan bagi menyediakan perkhidmatan sokongan advokasi kanak-kanak yang berisiko tinggi dalam aspek penderaan, pengabaian dan pemulihan dalam sesebuah komunikasi. PAKK berperanan untuk mengurangkan masalah sosial dengan mengadakan pelbagai aktiviti kanak-kanak remaja seperti membanteras jenayah seksual kanak-kanak dalam talian, program ziarah kasih, program kecerdasan, kecerdasan minda, Sambutan Hari Kanak-Kanak, lawatan sambil belajar, lawatan muhibbah, dan *Body Safety*, Jom Mengaji.

Selain itu, Jabatan Kebajikan Masyarakat mengadakan program menyelaraskan perkhidmatan setempat kepada keluarga dan kanak-kanak. Selain itu Jabatan Kebajikan Masyarakat mengadakan Majlis Perwakilan Kanak-Kanak di mana ia telah ditubuhkan pada 2011 bertujuan memberi penghormatan dan pengiktirafan kepada potensi kanak-kanak serta penyertaan, penyertaan untuk menyumbang idea atau pendapat dalam menyuarakan hak-hak selari dengan prinsip utama *Convention On The Rights of The Child* di mana MPKK yang dike, dianggotai oleh peserta berusaha, berusia 17 sehingga 17 tahun yang mewakili suara kanak-kanak di Malaysia.

Jadi, budaya prihatin dan ambi pedulu, ambil pedulu perlu diterapkan kembali di kalangan jiran, komuniti dan masyarakat sebagai langkah mengawal atau mencegah kejadian kanak-kanak hamil luar nikah atau buang bayi. Orang, orang awam disarankan melaporkan sekiranya

mengetahui seseorang kanak-kanak itu menjadi penderaan seksual dan terlibat dalam masalah sosial hingga menyebabkan hamil luar nikah atau buang bayi dengan menggunakan saluran berikut: dengan terus ke Pejabat Kebajikan Masyarakat Daerah, membuat aduan di Balai Polis ataupun hospital berhampiran, atau menghubungi Talian Kasih 1599 atau WhatsApp 019-2615999, ini di bawah Jabatan Kebajikan Masyarakat, di mana ahli Pasukan Kebajikan Kanak-Kanak, Pasukan Perlindungan Kanak-Kanak atau Pusat Aktiviti Kanak-Kanak yang terdapat di kawasan berlakunya pengabaian, seksual dan masalah. Okey sekian daripada itu, terima kasih Yang Dipertua, jawapan saya.

**YB Yang Dipertua Dewan:** Tak ada soalan tambahan ya. Dah panjang lebar tu.

**YB ADUN Serting:** Okey terima kasih.

**YB Yang Dipertua Dewan:** Saya menjemput Yang Berhormat Seremban Jaya.

**YB ADUN Seremban Jaya:** Dato' *Speaker*.

**YB Yang Dipertua Dewan:** Sebutkan nombor soalan je tuan.

**YB ADUN Seremban Jaya:** Dato' Yang Dipertua, selamat pagi, saya mengemukakan soalan nombor 1.

**YAB ADUN Sikamat:** Terima kasih Seremban Jaya. Terima kasih soalan mengenai kemudahan bank di DUN Seremban Jaya. Kita sedia maklum semua tempat memerlukan kemudahan bank dan bukan sahaja di Seremban Jaya, di kawasan-kawasan felda, di kawasan-kawasan pedalaman juga memerlukan sebuah bank. Namun begitu, pihak bank tidak dapat menyediakan semua kemudahan kerana ia bergantung kepada kesesuaian perancangan perniagaan sesebuah bank. Kerana itu, pihak bank menawarkan, contohnya Affin Bank ada berjumpa saya dalam 2 - 3 minggu lepas, jika ada kawasan-kawasan yang sesuai, yang di mana terdapat pam minyak ataupun stesen petrol, boleh mencadangkan kepada Affin Bank untuk mengadakan mesin ATM di sana. Jadi itu yang mereka boleh lakukan kerana mereka juga melihat bahawa keperluan sebenar di satu-satu kawasan dan jarak di antara satu kawasan dengan bank-bank yang berhampiran juga menjadi keutamaan mereka. Terima kasih Dato' Yang Dipertua.

**YB ADUN Seremban Jaya:** Dato' *Speaker*, soalan tambahan. Dato' *Speaker*, waktu pilihan raya 15 Parlimen, kita jalan ke rumah-rumah, kedai-kedai, mereka tanya ini satu masalah yang besar. Pilihan raya 15

DUN, serupa masalah macam ni. Mereka tanya. Tapi saya mahu beritahu dalam Dewan yang mulia, Taman Seremban Jaya, 1 hingga Fasa 10, satu fasa ada lebih kurang 500 rumah, 10 fasa sudah 5,000 rumah. Lagi satu Taman Senangin, Taman Seremban Jaya Idaman, Bandar Seremban Selatan, Taman Tuanku Jaafar, Taman Bukit Seri Senawang, Taman Tuanku Ampuan Najihah, Taman Pinggiran Senawang, Taman Bukit Senawang Perdana, Taman Senawang Perdana dan taman, taman baru dalam proses pembinaan, sebab itu banyak taman di keliling di Seremban Jaya. Sebab itu, saya rayu dan mintak tolong ADUN Sikamat boleh satu bank-lah, satu bank. Saya tolong rayu. Terima kasih.

**YAB ADUN Sikamat:** Terima kasih, ADUN Sikamat dia tak ada bank ya. Kalau ada bank, saya buat satu bank di Seremban Jaya. Tapi seperti yang saya katakan tadi, dia bergantung kepada kesesuaian logistik. Dan kita sedia maklum yang dulu ada berhampiran situ ada CIMB. CIMB berhampiran dengan Seri Mawar, dia pun pindah ke, ke kawasan perindustrian, kawasan apa, di, di Paroi, di Senawang. Ini menunjukkan bahawa mereka membuat kajian ya, tentang pasaran mereka dan juga saingan mereka kerana itu kita lihat bahawa CIMB berpindah daripada kawasan Seremban Jaya, dulu ya. Itu, iaitu di Seri Mawar. Dan ini antara faktor mereka berpindah. Contohnya di Chuah dulu ada CIMB, sekarang dah tutup. Nak kena ke Lukut ataupun ke Sepang, ataupun ke Sungai Pelek, memang itu antara yang berlaku. Di Tampin ya, tak silap saya sebuah bank, CIMB jugak tutup ya, di Tampin. Jadi ini antara faktor perkiraan mereka kerana bank-bank banyak tumpukan ke hari ini untuk keuntungan ya. Jadi itu antara yang menyebabkan mereka menutup bank-bank yang ada. Jadi ini antara perkara yang memang menjadi masalah kepada masyarakat, bukan sahaja di Seremban Jaya tetapi di kawasan-kawasan lain terutama di kawasan-kawasan felda ya, yang kita sedia maklum mereka hari ini juga memerlukan kemudahan-kemudahan bank bagi keperluan mereka untuk pinjaman, kemudahan-kemudahan yang lain. Terima kasih Dato' Yang Dipertua.

**YB Yang Dipertua Dewan:** Ada soalan kedua? Tak ada lagi, okey. Saya menjemput Yang Berhormat Labu.

**YB ADUN Labu:** *Assalamualaikum WBT* dan salam sejahtera. Dato' Yang Dipertua, saya bangun untuk bertanya masalah sampah pukal, soalan nombor 1. Terima kasih.

**YB ADUN Nilai:** Dato' Yang Dipertua, semua premis di bawah pentadbiran Pihak Berkuasa Tempatan dan diserahkan beserta sumbangan Kumpulan Wang Pengurusan Sisa Pepejal dan Pembersihan Awam kepada Perbadanan Pengurusan Sisa Pepejal dan Pembersihan Awam (SWCorp) akan diberi perkhidmatan kutipan sisa pepejal dan

pembersihan awam. Frekuensinya adalah 2 kali kutipan sisa isi, isi rumah dan 1 kali adalah kutipan sisa kebun, sisa pukal dan sisa boleh kitar semula dalam seminggu. Papan Tanda Perkhidmatan telah dipasang di setiap kawasan dan juga penduduk, dan penduduk boleh merancang untuk mengeluarkan sisa sehari sebelum atau pada hari kutipan dijalankan khususnya untuk sisa pepejal.

Selain itu, pihak atau agensi yang bertanggungjawab di kawasan luar tanggungjawab PBT boleh membuat lantikan kontraktor kutipan sisa pepejal yang berlesen dengan Jabatan Pengurusan Sisa Pepejal Negara (JPSPN) dan juga boleh berurusan terus dengan pihak kontraktor kutipan sisa pepejal yang akan dilantik bagi menentukan kadar bayaran, frekuensi kutipan, bilangan tong, jenis tong dan saiz tong.

Bagi kawasan luar pentadbiran PBT, yang ditanya oleh ADUN, Yang Berhormat Labu, pihak SWCorp bersedia memberi khidmat nasihat dan juga pandangan dalam aspek penyediaan kemudahan penstoran, kutipan, pengangkutan dan pelupa, pelupusan sisa pepejal. Sebagai contoh, pihak SWCorp telah memberi pandangan, cadangan serta anggaran kos yang terlibat bagi penyediaan perkhidmatan kutipan di beberapa buah kampung di kawasan Lenggeng seperti *pilot project* di bawah Pejabat Tanah Dan Daerah Seremban. Pihak SWCorp sentiasa bekerjasama dengan Pejabat Daerah Dan Tanah, Kementerian Pembangunan Luar Bandar, UPEN bagi memudahkan proses perancangan penyediaan kemudahan berkenaan dapat dilaksanakan.

Seterusnya bagi kawasan yang sedang dalam pembinaan, pemaju atau kontraktor pembinaan bagi kon, tapak projek berkenaan bertanggungjawab untuk melantik kontraktor sendiri.

Mengikut rekod Majlis Bandaraya Seremban, sebanyak 66 kampung telah pun diserahkan untuk perkhidmatan kutipan sisa pepejal oleh pihak SWCorp. Sehubungan dengan itu, tindakan mengatasi masalah sampah-sampah longgok adalah di bawah tanggungjawab pihak SWCorp termasuk tindakan penguatkuasaan. Antara, daripada 66 kampung di kawasan Majlis Bandaraya Seremban yang telah pun diberikan kepada SWCorp untuk mengutip kutipan sisa, kutipan adalah seperti Kampung Penghulu, Kampung Limbok Atas, Kampung Bukit Temiang, Kampung Tersusun Galla, Kampung Pasir dan juga 66 kampung di bawah kawasan ini. Dan semua kawasan ini apabila di, di, di, diambil tindakan untuk pengutipan sampah, sudah tentu kawasan-kawasan ini adalah kawasan-kawasan yang dikenakan Cukai Taksiran oleh Majlis Bandaraya Seremban. Sekian, terima kasih.

**YB ADUN Labu:** Isu sampah pukal ini sebenarnya kita perlu ada penekanan segera. Di kawasan saya, di kawasan Labu, ia adalah kawasan pinggiran bandar. Jadi, kalau kita lihat kebiasaannya di kawasan pinggiran bandar ni, kampung-kampung ni, orang-orang kampung ni sampah dia tak banyak, tapi isunya adalah sampah-sampah peniaga dalam kawasan kampung. Jadi, peniaga-peniaga dalam kawasan kampung ni, mereka berlesen, tapi mereka tidak ada sampah, tong sampah di dalam kawasan perniagaan mereka. Jadi apa yang berlaku, mereka akan letak, kumpulkan sampah di satu kawasan yang menjadikan kesan tu kepada penduduk-penduduk kampung. Jadi, saya setuju SWCorp bersedia untuk memberi tong sampah, tetapi masalahnya adalah untuk menempatkan tong sampah tu. Jadi, saya minta kerajaan jika dapat memberi arahan kepada Pejabat Tanah untuk menyediakan, memberikan tanah-tanah rizab kerajaan ni supaya tong sampah ini dapat diletakkan.

Jadi isu ini sebenarnya telah berlaku sejak 2018. 5 tahun. So 5 tahun masalah ni terus berlanjutan sehingga sekarang. Jadi masalah yang berkaitan dengan sampah ni pulak, sampah-sampah orang-orang kampung dah mula rasa, rasa mungkin dah *fed up* ataupun sebaliknya dah mula membuang sampah di dalam kawasan sungai. Jadi itu pun akan menjadi satu kos tambahan kepada Kerajaan Negeri ya, jika perkara ini tidak boleh diselesaikan. Jadi saya rasa kalau kerjasama SWCorp, Majlis Perbandaran dan jugak Pejabat Tanah, isunya adalah hanya tempat saja. *insyaAllah*, terima kasih.

**YB ADUN Nilai:** Dato' Yang Dipertua, sepertimana yang dinyatakan, memang penyediaan kawasan untuk kita buat kutipan sampah ini, kita juga menghadapi beberapa cabaran, terutamanya di kawasan-kawasan kampung di mana jalannya adalah jalan yang sangat sempit dan juga lori yang ambil sampah tu tidak sampai, tidak dapat ke semua rumah kalau kita sediakan sampah, tong sampah individu kepada setiap rumah. Dan satu lagi cadangannya adalah untuk menyediakan satu tong sampah di sesuatu kawasan yang membolehkan penduduk kampung dapat membuang di tong sampah itu jugak, ada beberapa masalah yang terpaksa dihadapi. Contohnya SWCorp telah buat satu *pilot project* di kawasan kampung di Lenggeng, di mana atas permintaan telah pun dibuat tetapi isunya adalah apabila disediakan satu tong sampah di kawasan kampung, orang luar pula yang datang buang dekat kawasan itu. Ini selepas itu, penduduk kampung sendiri meminta untuk supaya tidak diteruskan. So ini adalah satu cabaran yang kita terpaksa hadapi tetapi pada masa yang sama, kita cuba untuk kenal pasti satu jalan supaya dapat disediakan dan pada masa yang sama kita juga dapat mengelakkan pembakaran sampah secara terbuka yang biasa berlaku di beberapa kawasan kampung dan juga yang terus buang ke sungai. Sudah

tentu ini juga akan memberikan kesan negatif dalam aspek pencemaran. Dan kita harap kita dapat bekerjasama dan kita cari satu jalan untuk kita membolehkan.

Dan sepertimana yang tadi saya nyatakan, 66 kampung yang telah pun diserahkan untuk perkhidmatan kutipan sisa pepejal kepada pihak SWCorp di kawasan Majlis Bandaraya Seremban adalah kawasan-kawasan yang dikenakan Cukai Taksiran. Dikenakan Cukai Taksiran, tidak ada masalah, pihak SWCorp akan membuat kutipan sampah setelah diserahkan kepada mereka. Tetapi yang masalah yang kita hadapi adalah kawasan-kawasan kampung yang tidak dikenakan Cukai Taksiran. Tapi sepertimana yang tadi saya katakan, kita akan berbincang untuk melihat kesesuaian untuk menyediakan beberapa tapak sampah di beberapa kawasan kampung mengikut kesesuaiannya. Sekian, terima kasih.

**YB Yang Dipertua Dewan:** Terima kasih. Saya sebelum saya jadi Yang Dipertua ni, saya Ahli Majlis Bandaraya Seremban. Benda ni saya faham, bagi dua-dua pihak yang bertanya dan menjawab ya, sama-sama kita selesaikan. Jadi saya jemput YB Lukut.

**YB ADUN Lukut:** Terima kasih Yang Dipertua, Lukut kemukakan soalan nombor 2.

**YAB ADUN Sikamat:** Dato' Yang Dipertua, terima kasih kepada ADUN Lukut atas soalan bekalan air di Port Dickson. Dato' Yang Dipertua, bekalan air di Port Dickson sehingga hari ini berada pada paras yang sederhana. Pengoperasian LRA Sawah Raja Fasa 2 berkapasiti 150MLD pada April '23 adalah untuk memenuhi keperluan pembangunan baru dan permintaan sedia ada sebahagian dari, Daerah Port Dickson pada masa kini. Kerajaan Negeri melalui SAINS dalam usaha untuk mempertingkatkan dan memperluaskan lagi rangkaian sistem agihan bekalan dari LRA Sawah Raja menerusi projek pembinaan paip baharu dari LRA Sawah Raja ke Kolam Teluk Kemang yang di, akan dilaksanakan di dalam Pelan Perniagaan ke-6 SAINS bermula tahun 2024 sehingga 2028. Dan *alhamdulillah* beberapa perkara telah di, kita telah buat di Lukut untuk memastikan air dapat, bekalan yang agak stabil sehingga hari ini. Terima kasih Dato' Yang Dipertua.

**YB ADUN Lukut:** Soalan tambahan. Terima kasih kepada Sikamat yang menjawab soalan. Soalan tambahan Yang Dipertua. Baru-baru ini saya dikunjungi hormat oleh beberapa *developer*, pemaju dekat kawasan Port Dickson yang mengatakan Kebenaran Merancang dekat OSC, mereka telah diminta untuk ditangguhkan pembangunan, pembangunan ataupun permohonan Kebenaran Merancang mereka (KM), okey,

disebabkan bekalan air tak cukup sehingga tahun, ada yang, yang, ulasan mereka sampai tahun '25, 2025 dan ada ulasan yang dibagi sampai 2028. Mintak mereka tangguhkan apa, pembangunan mereka. So saya tak tahu apa, adakah ini sah atau benar. Kalau macam tu, Port Dickson, adakah Pembangunan Port Dickson untuk beberapa tahun ni akan ditangguhkan. Ini soalan saya.

**YAB ADUN Sikamat:** Okey, terima kasih ADUN Lukut. Perkara tersebut merupakan satu salah, salah maklumat. Saya telah berjumpa balik kepada SAINS dan saya telah panggil teknikal untuk pastikan bahawa apa yang ditulis itu adalah tidak tepat kerana pembangunan boleh diteruskan di Port Dickson, dan kita telah mengambil langkah khususnya menyambung kolam tadahan, kolam takungan air di, daripada, daripada Teluk Kemang ke Si Rusa, itu antara yang kita sedang lakukan segera. Dan juga kita sedang dalam program untuk menyiapkan TAPS di Kampung Barisan. Itu antara perkara-perkara yang sedang kita laksanakan dan *insyaAllah* dalam usaha yang sama juga, pembangunan boleh dijalankan terus di Port Dickson. Dan kita telah panggil pemaju-pemaju ataupun mereka yang ingin bangunkan kawasan tersebut dan kita telah bagi taklimat kepada mereka semula. Dan kita telah ambil maklum tentang perkara tersebut. Terima kasih atas soalan tambahan daripada Lukut, terima kasih.

**YB Yang Dipertua Dewan:** Lukut, YB Lukut, ada soalan lagi? Nombor 3, nombor 4, tak ada? Satu je. Saya jemput Yang Berhormat Lobak.

**YB ADUN Lobak:** Terima kasih Dato' Yang Dipertua, saya kemukakan soalan nombor 1.

**YB ADUN Nilai:** Dato' Yang Dipertua, maklumat mengenai jumlah kereta dan motosikal yang terbiar yang ditarik oleh PBT setiap daerah Negeri Sembilan hingga Jun 2023 adalah seperti berikut:

- Majlis Bandaraya Seremban – 43 kereta, 43 kereta dan 5 jumlah motosikal.
- MPPD tidak ada, motosikal pun tidak ada.
- Majlis Perbandaran Jelevu, kereta – 0, motosikal – 0.
- Majlis Daerah Tampin – 1 kereta.
- Majlis Daerah Kuala Pilah, Majlis Daerah Rembau dan Majlis Daerah Jempol – tidak ada.

Jumlah tempat penyimpanan kereta terbiar di setiap daerah di Negeri Sembilan untuk soalan kedua, adalah disimpan di Pusat Penyimpanan Kereta serta tindakan selanjutnya yang diambil adalah:

- Di bawah Majlis Bandaraya Seremban, ada 2 tempat. Jumlah bilangan yang, kereta yang tersimpan setakat hari ini adalah 236. Jika tiada tuntutan, barang sitaan akan dilupuskan secara lelongan lupus sisa.
- Bagi Majlis MPPD, jumlah penyimpan, tempat adalah, jumlah Pusat Penyimpan Kereta Terbiar adalah 1. Kosong, tiada, tiada mana-mana kereta yang disimpan setakat hari ini.
- Majlis Perbandaran, Majlis Perbandaran Jempol pun kosong.
- Majlis Daerah Tampin tidak ada tempat, tetapi ada 1 kereta disimpan. Kenderaan terbiar diletakkan di kawasan parkir Pejabat Majlis Daerah Tampin.
- Majlis Daerah Kuala Pilah, Majlis Daerah Rembau dan Majlis Daerah Jelebu tidak ada tempat dan juga tidak ada kenderaan yang disimpan setakat hari ini.

Terima kasih.

**YB ADUN Lobak:** Dato' Dipertua, terima kasih Nilai dengan jawapan yang jelas sekali. Tetapi khasnya kawasan di MBS, saya dimaklumkan bahawa pusat simpan kereta tu, makluman saya, sudah penuh. So jadi, yang aduan tu, kereta terbiar khasnya di kawasan perumahan, hanya di DUN Lobak saja, jikalau tak salah saya, saya pernah buat aduan, masih tak kurang dari 20 kes kereta tu masih disimpan di tepi jalan, ataupun di tapak-tapak perumahan. So saya nak tanya, berapa lelong sudah ada, diadakan dan kereta-kereta terbiar, apa tindakan selanjutnya kerana saya dimaklum dan buat, masih kereta, walaupun aduan lebih setahun atau 2 tahun, kereta tu masih simpan tempat yang sama ataupun dia sudah keluar notis yang surat merah tu, lepas tu tindakan selanjutnya tak ada. So saya pun ada dapat makluman dari Perbandaran Kajang, saya cadangkan mungkin MBS boleh, boleh kaji cara Perbandaran Kajang atau dengan cara yang kesan sekali, lantik agensi atau kontraktor meselesai, menselesaikan masalah-masalah kereta-kereta terbiar yang di kawasan MBS. Dan bukan kereta saja, sebagai contoh, motosikal di rumah pangsa. Rumah pangsa kawasan Lobak, aduan sudah buat, tapi motosikal yang rosak atau macam-macam tu, masih simpan tempat yang sama. Ini pertanyaan saya. Terima kasih.

**YB ADUN Nilai:** Okey, terima kasih. Setakat maklumat yang saya terima daripada Majlis Bandaraya Seremban, sepertimana yang tadi saya nyatakan, MBS ada 2 tempat penyimpanan kereta terbiar. Dan jumlah kereta yang disimpan setakat hari ini, yang belum dilupus secara lelongan lupus sisa ini adalah 236, yang masih ada dalam stor mereka.

Sudah tentu ini juga adalah salah satu halangan yang menyebabkan operasi yang berterusan dilaksanakan. Kerana kita buat operasi, kita tidak ada tempat untuk kita simpan. Dan kita harap dalam masa ini, kita dapat laksanakan proses lelongan lupus sisa ini dipertingkatkan dan bila ada tempat, notis yang kita telah serahkan itu, kita akan ambil tindakan sitaan. Dan setakat ini, bilangan kenderaan terbiar yang dilupuskan oleh Majlis Bandaraya Seremban adalah sebanyak 388 buah. Terima kasih.

**YB ADUN Lobak:** Dato' *Speaker*, terima kasih Nilai, dengan jelas sekali. Kami harap tindakan lelong diadakan dengan segera. Terima kasih.

**YB Yang Dipertua Dewan:** Dijemput YB Sungai Lui.

**YB ADUN Sungai Lui:** Dato' Yang Dipertua, saya kemukakan soalan nombor 3.

**YB ADUN Pertang:** *Bismillahirrahmanirrahim. Assalamualaikum WBT* Dato' Yang Dipertua, saya mengucapkan terima kasih kepada Yang Berhormat Lui di atas soalan yang berkaitan dengan felda sebagai hab penternakan. Dato' Yang Dipertua, suka saya nyatakan Kerajaan Negeri sentiasa komited dalam memastikan industri penternakan khususnya di Negeri Sembilan ini terus berkembang pesat bagi menjamin bekalan makanan terutamanya yang berasaskan kepada daging, yakni hasil ternakan mencukupi untuk kegunaan rakyat.

Oleh yang demikian, pelbagai inisiatif jangka masa panjang telah direncanakan khusus di bawah Jabatan Perkhidmatan Veterinar, Dato' Yang Dipertua. Ada 11 elemen penting yang nak kita beri kepada rakyat di Negeri Sembilan dan tidak terkecuali kepada golongan peneroka yang ada di 47 kawasan felda. Saya nak baca satu persatu, panjang Dato' Yang Dipertua, tapi saya pendekkan.

Yang pertama: bantuan ternakan dalam bentuk Geran Pemandan. Yang kedua: bantuan menaik taraf premis ternakan. Yang ketiga: bantuan menaik taraf kolam kumbahan. Yang keempat: bantuan mesin perincih. bantuan penyediaan petak ragutan persendirian. Bantuan pam air pun kerajaan ada siapkan, Dato' Yang Dipertua. Bantuan pagar elektrik. Bantuan *surveillance* dan kawalsan penyakit kebangsaan. Latihan penternakan. Naik taraf premis ataupun peralatan Industri Asas Ternakan. Dan Transformasi Industri Desa. Ini semua kita bagi Dato' Yang Dipertua untuk penternakan di kampung tradisional termasuk di kawasan felda.

Cumanya yang penting Dato' Yang Dipertua, saya nak mintak tolong kepada Yang Berhormat Lui dan jugak ahli-ahli Yang Berhormat bagi 47

kawasan felda ni, nak jelaskan kepada peneroka felda terutamanya golongan muda felda ni Dato' Yang Dipertua, program untuk asas pertanian, ataupun program daging ni, penternakan Dato' Yang Dipertua, Kerajaan Pusat dan Kerajaan Negeri seiring di dalam memberikan bantuan semaksima mungkin. Cumanya mereka ini perlu dijelaskan ini adalah antara program suntikan Kerajaan Perpaduan yang boleh menjamin masa depan mereka bagi tempoh 5 dan 10 tahun.

Jadi kerana itu Dato' Yang Dipertua, saya nak mintak tolong kepada ahli-ahli Yang Berhormat, terutamanya bagi kawasan felda dan jugak ahli Yang Berhormat di kawasan pembangkang, supaya penjelasan yang dibuat ini program kerajaan. Ini adalah program Kerajaan Perpaduan yang boleh memberi manfaat kepada mereka, bagi masa depan dan keluarga mereka. Tapi Dato' Yang Dipertua, saya nak baca yang penting, ni ada yang penting ni untuk felda ni. Pada Pelan Ruminan FELDA (PRF) yang telah mula dirancang bermula pada tahun 2022. PRF ini akan melihat potensi tapak projek khas ternakan sedia ada di felda dan kawasan pengembangan yang sesuai di kawasan felda dengan menggunakan *business model* ataupun model bisnes yang baharu. Secara keseluruhan Pelan Ruminan FELDA melibatkan anggaran peruntukan sebanyak 312 juta ringgit untuk pelaksanaan bagi tempoh 10 tahun yang akan datang. Ekosistem yang terlibat di dalam PRF adalah bentuk Pembangunan Ladang Nukleus, Ladang Satelit, Ladang Pastura, Ladang Fidlot dan jugak bentuk ladang, ataupun bentuk yang lain.

Ladang Nukleus ini Dato' Yang Dipertua, akan memfokuskan kepada aktiviti pembiakan bakaan dan ia akan dikembangkan melalui pembangunan ladang satelit di beberapa kawasan yang dikenal pasti di tanah FELDA/ termasuk tanah peneroka dan luar mengikut kesesuaian topografi kawasan.

Dan suka saya nak nyatakan untuk rekod di dalam Dewan yang mulia ini, Dato' Yang Dipertua, bagi pembangunan PRF di Negeri Sembilan, terdapat beberapa projek yang bernilai tinggi yang sedang di dalam perancangan. Antaranya ialah di kawasan Parlimen Yang Berhormat Lui jugak, kawasan Parlimen sayalah, Projek Khas GMN ataupun Gedung Makanan Negara yakni di, yang ada di kawasan felda Titi akan dibangunkan sebagai ladang nukleus khusus untuk bebiri baka dorper. Manakala Projek Khas Kampung Londah di kawasan Parlimen, ataupun DUN Gemas, ini pun Kerajaan Perpaduan buat ni DUN Gemas, kita dah buat banyak di Kampung Londah, tapi .....

**YB ADUN Gemas:** Terima kasih.

**YB ADUN Pertang:** ..... ADUN Gemas kena jaga jugaklah .....

**YB ADUN Gemas:** Sokong.

**YB ADUN Pertang:** .... kena bagi tahu jugalah yang ini adalah projek dan program yang dilakukan oleh Kerajaan Perpaduan Barisan Nasional dan Pakatan Harapan.

**YB ADUN Gemas:** Baik EXCO Kanan. Saya yang menurut perintah.

**YB ADUN Pertang:** Manakala, terima kasih Yang Berhormat. Manakala projek khas di Kampung Londah ni Dato' Yang Dipertua, akan dibangunkan sebagai pusat fidlot lembu dan terdapat juga pembangunan semula ladang fodder di, dan jugak di, di kawasan Projek Napier Raja Alias 5. FELDA kini di dalam proses penyediaan kertas kerja yang komprehensif untuk kelulusan Lembaga FELDA dan selulus, seterusnya kelulusan penggunaan dana kerajaan di bawah Program Pembangunan Peneroka. Terima kasih Dato' Yang Dipertua.

**YB ADUN Sungai Lui:** Soalan tambahan. Perlu tak, apa ni, supaya kita, dicadangkan supaya penternak-penternak ni kita gabungkan dan kita beri pendedahan kepada khususnya kepada penternak-penternak yang ada supaya mereka boleh menjalankan sistem penternakan yang lebih baik khususnya untuk meningkatkan pendapatan pada penternak-penternak khususnya di kalangan warga muda ni lah Datuk Seri.

**YB ADUN Pertang:** Dato' Dipertua, ini memang program yang berterusan yang dijalankan oleh Jabatan Perkhidmatan Veterinar, kerana selain daripada bantuan sokongan kepada semua penternak-penternak yang menerima bantuan dan bahan sokongan daripada pihak kerajaan, kita tidak lepaskan mereka sebagai penternak tipikal atau penternak biasa. Tentunya Jabatan Veterinar akan di, bantuan akan diikuti dengan latihan-latihan yang komprehensif untuk memastikan kesemua penternak-penternak terutamanya di dalam bentuk komersial ini untuk memberikan pendapatan sampingan kepada mereka untuk diberi latihan yang sewajarnya. Cumanya yang penting bagi kerajaan, ialah supaya bantuan ini dapat dimaksimakan penggunaan dan jugak penghayatan oleh mereka yang telah dipilih ataupun yang telah diberi bantuan oleh pihak kerajaan. Terima kasih Dato' Yang Dipertua.

**YB Yang Dipertua Dewan:** Saya menjemput YB Juasseh.

**YB ADUN Juasseh:** Dato' Yang Dipertua, soalan saya nombor 1.

**YB ADUN Bukit Kepayang:** Terima kasih Dato' Yang Dipertua. Terima kasih juga kepada Yang Berhormat Juasseh atas soalan berkenaan pelancongan di DUN Juasseh. Berdasarkan maklumat daripada Jabatan

Perhutanan Negeri Sembilan, ada 2 pusat pelancongan rekreasi iaitu yang pertamanya di Taman Eko Rimba Jeram Tengkek dan juga kawasan pendakian Bukit Baginda. Di Jeram Tengkek telah selesai dilaksanakan penyelenggaraan laluan pejalan kaki manakala di Bukit Baginda akan diselenggarakan kemudahan infrastruktur, infrastruktur pada 2024.

Dan LPNS dan Majlis Daerah Kuala Pilah dalam usaha merangka pakej-pakej pelancongan di mana mereka akan keluarkan pakej pelancongan dengan kerjasama agensi pelancongan supaya kita boleh membina pakej-pakej sekurang-kurangnya 2 malam 3 hari. Di mana kita ada banyak produk tapi masalah dia kita tak ada satu fokus untuk mengadakan pakej dan di mana agensi pelancongan juga tidak memberi kerjasama. So itu sebabnya kita ada usaha untuk mendapatkan kerjasama daripada agensi pelancongan untuk membina pakej-pakej ini supaya kita dapat membina pakej *eco challenge*, *eco tourism*, dengan izin, pakej warisan budaya di Daerah Kuala Pilah. Dan ini secara tidak langsung akan menggerakkan ekonomi masyarakat setempat di mana ada, kita ada satu perancangan untuk mengadakan kampung taman budaya di Terachi, *one stop center*, kita ada jual produk, ada persembahan, ada F&B, dan juga banyak juga perancangan supaya kita dapat tarik pelancong.

Bagi Pembangunan Pelancongan Vot P62 Tahun 2023, sebanyak 18 projek diluluskan yang melibatkan kerja-kerja menaik taraf dan juga baik pulih produk pelancongan dengan peruntukan sebanyak 5.1 juta. Di samping itu, Kerajaan Negeri turut memperuntukkan sebanyak 500,000.00 bagi projek *camper van*. Manakala bagi tahun 2024, Kerajaan Negeri sedang dalam peringkat penelitian ke atas cadangan penambahbaikan sektor pelancongan Negeri Sembilan bagi tujuan Belanjawan Negeri tahun 2024.

Mari cari kedai makan,  
Kedai tutup hari cuti,  
Jeram Tengkek mengasyikkan,  
Jemputlah datang untuk nikmati.

Terima kasih.

**YB ADUN Juasseh:** Saya ada soalan tambahan. Kita ambil contoh kepada Negeri Melaka. Negeri kecil tetapi banyak kawasan pelancongan yang dijadikan menarik dan ramai pelancong yang akan datang, dan datang ya. Jadi, saya nak bertanya kepada ADUN Bukit Kepayang, adakah pihak Kerajaan Negeri Sembilan mempunyai kawasan tumpuan pelancongan ataupun membuka kawasan-kawasan baru untuk pelancongan seperti di luar bandar iaitu di kawasan saya untuk menjadikan pelancongan ini

lebih menjadi penyumbang ekonomi kepada Kerajaan Negeri Sembilan ya.

**YB ADUN Bukit Kepayang:** Terima kasih Yang Berhormat Juasseh atas soalan tambahan. Memang Kerajaan Negeri, kita ada, sedia ada 200 lebih produk di dalam 9 daerah kita. Tapi masalah dia sepertimana yang saya terangkan tadi, kita tak ada pakej-pakej pelancongan. Fokus, tak ada fokus untuk membina pakej pelancongan dengan agensi pelancongan. Itu sebabnya sekarang kita sudah ada usaha di setiap daerah kita bina pakej pelancongan dan kerjasama, kita, LPNS akan buat *matching* dengan agensi pelancongan supaya kita dapat mempromosikan pakej-pakej ini.

Pada masa yang sama, memang ada banyak usaha untuk menaik taraf, penambahbaikan produk-produk pelancongan sedia ada. Pada tahun 2024, pelancongan Vot 62 melibatkan 6 projek iaitu:

- pembersihan infrastruktur dan kemudahan produk pelancongan di semua taman eko rimba di Negeri Sembilan termasuk Jeram Tengkek;
- menaik taraf struk, infrastruktur dan kemudahan produk pelancongan Jeram Enggang dan Jeram Tiga Lapis di Daerah Jelebu;
- menaikkan taraf infrastruktur dan kemudahan produk pelancongan eko rimba di Ulu Bendul, Daerah Kuala Pilah;
- menaik taraf infrastruktur dan kemudahan produk pelancongan Taman Eko Rimba Jeram Tengkek, Daerah Kuala Pilah;
- menaikkan infrastruktur dan kemudahan produk pelancongan Taman Eko Rimba Lenggeng, Daerah Seremban; dan juga
- kerja menaik taraf Rumah Penginapan dan kemudahan produk pelancongan Taman Negeri Kenaboi di Daerah Jelebu.

Selain dari itu, Jabatan Perhutanan juga telah membuat permohonan bagi peruntukan inisiatif Belanjawan 2024, Kementerian Kewangan cadangan inisiatif oleh negeri melalui UPEN iaitu Unit Perancang Ekonomi Negeri Sembilan, untuk melaksanakan 2 projek iaitu kerja-kerja menaik taraf dan membina baru infrastruktur dan bangunan dan lain-lain kerja berkaitan di Taman Eko Rimba Batu Maloi, Daerah Tampin; dan menaik taraf Taman Eko Rimba Jeram Toi, Daerah Jelebu. Terima kasih.

**YB Yang Dipertua Dewan:** Saya jemput Yang Berhormat Temiang.

**YB ADUN Temiang:** Terima kasih Dato' Yang Dipertua Dewan. Saya kemukakan soalan nombor 2.

**YAB ADUN Sikamat:** Dato' Yang Dipertua, terima kasih ADUN Temiang. Tajuk dia perlombongan nadir bumi di Negeri Sembilan. Kita sedia maklum bahawa, mengikut laporan bahawa Kerajaan Negeri ataupun Negeri Sembilan ini mempunyai simpanan nilai NR-REE ini bernilai lebih kurang 30 bilion ya. Kalau kita proses sehingga habislah, kita boleh dapat sekitar, Kerajaan Negeri boleh dapat 4.5 bilion daripada hasil royalti. Jadi ini adalah satu perkara yang amat besar yang Kerajaan Negeri harus beri tumpuan tahun hadapan untuk memastikan bahawa lesen dan perlombongan ini dapat mengikut SOP yang ditetapkan dan juga kita berharap bahawa ia tidak akan memberi kesan kepada alam sekitar. Itu keutamaan yang kita berikan.

Untuk menjawab soalan ini, buat masa ini tiada kelulusan perlombongan NR-REE yang diberikan oleh Kerajaan Negeri Sembilan sehingga kini. Namun begitu, satu kelulusan Lesen Penjelajahan telah diluluskan kepada satu syarikat dalam tempoh kelulusan bermula 27 Oktober 2020 hingga 26 Oktober 2022. Kelulusan Lesen Penjelajahan ini adalah untuk membolehkan syarikat menjalankan penjelajahan bagi mendapatkan kawasan yang berpotensi untuk dijalankan aktiviti perlombongan NR-REE jika diberikan kelulusan oleh Kerajaan Negeri. Selain itu juga, perkongsian maklumat rizab REE yang diperolehi membolehkan Kerajaan Negeri untuk membuat anggaran kasar bagi perolehan hasil yang akan didapati jika aktiviti perlombongan NR-REE ini dijalankan. Namun, oleh kerana, oleh kerana ketika itu berlaku COVID, maka syarikat ini juga tidak dapat menjalankan Lesen Penjelajahan tersebut.

Sehingga 20 September 2023, terdapat 2 perlombongan haram nadir bumi telah dikesan di Negeri Sembilan iaitu Kampung Sikai, Mukim Seri Menanti, Daerah Kuala Pilah dan Mukim Glami Lemi, Daerah Jelevu pada bulan Mei 2023. Kedua-dua kes perlombongan haram ini sedang disiasat oleh PTGNS (Pejabat Tanah Galian Negeri Sembilan), pejabat daerah tanah, Pejabat Daerah Dan Tanah Jelevu dan Pejabat Daerah Dan Tanah Kuala Pilah di bawah Seksyen 158 Enakmen Mineral tahun 2002 iaitu melombong tanpa lesen ataupun pajakan dan Seksyen 169 Enakmen Mineral Negeri Sembilan 2002 iaitu bersubahat melakukan kesalahan. Sekiranya disabit kesalahan, boleh dihukum denda tidak melebihi 500,000 atau penjara tidak melebihi 10 tahun atau kedua-duanya atau tawaran kompaun tidak melebihi 250,000 ringgit di bawah Seksyen 174(1) Enakmen Mineral Negeri 2002. Terima kasih Dato' Yang Dipertua.

**YB ADUN Temiang:** Dato' Yang Dipertua Dewan, soalan tambahan. Tadi yang ber, Yang Amat Berhormat memaklumkan ada 2 perlombongan haram telah berjaya dikesan oleh Kerajaan Negeri. Jadi saya nak tanya, adakah sebarang tangkapan berjaya di, di, dijalankan. Kalau tidak, saya takut kegiatan-kegiatan haram ini akan berlanjutan dalam, kalau sekiranya tiada apa-apa tangkapan berjaya ditangkap.

**YAB ADUN Sikamat:** Dato' Yang Dipertua, pihak Polis juga telah menjalankan siasatan selain daripada, selain daripada Pejabat Tanah dan PTG ya. Jadi untuk makluman YB ADUN Temiang, memang tidak ada tangkapan ketika operasi dijalankan. Kita tak jumpa, mereka lari, mungkin ke dalam. Dan kita ketika itu juga, yelah, hanya, tidak ada kemudahan untuk kita buat, buat pengesanan, dan apabila kita tapak tersebut, tapak tersebut kosong, apabila kita buat rampasan, terdapat banyak barang-barang perlombongan yang Kerajaan Negeri telah rampas dan letak di Pejabat Daerah Tanah Jelebu dan juga di Kuala Pilah. Dan rampasan tersebut telah dilakukan mengikut peraturan yang telah ditetapkan. Dan untuk jawapan tadi, memang tidak ada satu pun tangkapan tetapi pengesanan sedang dijalankan oleh pihak Polis. Terima kasih Dato' Yang Dipertua.

**YB Yang Dipertua Dewan:** Saya jemput YB Johol.

**YB ADUN Johol:** Terima kasih Dato' Yang Dipertua, Johol soalan nombor 2.

**YB ADUN Pilah:** Okey, terima kasih Dato' Yang Dipertua. Terima kasih YB Johol atas soalan. Okey, Kerajaan Negeri melalui Pejabat Kebajikan Masyarakat Daerah Kuala Pilah telah menyalurkan bantuan kewangan Jabatan Kebajikan Masyarakat di kawasan Johol pada Ogos 2023 berjumlah 482 kes dengan jumlah perbelanjaan sebanyak Ringgit Malaysia 195,180.00.

Berdasarkan statistik, penerima Bantuan Warga Emas adalah yang paling ramai iaitu seramai 181 orang, diikuti dengan Bantuan OKU Tidak Berupaya Bekerja seramai 113 orang. Seterusnya iaitu Bantuan Elaun Pekerja Orang Kurang Upaya iaitu seramai 75 orang, Bantuan Am seramai 73 orang, Bantuan Penjagaan Pesakit/OKU Terlantar – 19 orang dan bagi Bantuan Anak Pelihara adalah seramai 1 orang. Jumlah perbelanjaan adalah sebanyak seperti yang saya sebut tadi, Ringgit Malaysia 195,180.00 iaitu melibatkan kewangan JKM kawasan Johol.

Manakala bagi jumlah penerima bantuan kewangan JKM yang ditamatkan dari Januari hingga Ogos 2023 adalah sebanyak 30 kes. Antara sebab penamatan disebabkan pelbagai faktor ya, Yang Dipertua,

iaitu meninggal dunia sebanyak 13 kes, berpindah ke luar daerah sebanyak 8 kes, tidak layak melebihi PGK JKM iaitu pendapatan dari Ringgit Malaysia 1,169.00 sebanyak 5 kes dan kanak-kanak telah capai umur 18 tahun, bagi kanak-kanak melibatkan 4 kes. Penamatan dari JKM ini melihat daripada pendapatan isi rumah itu, peningkatan ekonomi mereka daripada anak yang sudah di bawah tanggungan 18 tahun ke atas dah, dan mereka telah bekerjaya membantulah sedikit sebanyak membantu ekonomi keluarga. Jadi, JKM membuat kajian dan pemantauan, jadi keluarga tersebut ditamatkanlah daripada menerima bantuan JKM, okey.

Kerajaan Negeri melalui Majlis Agama Islam Negeri Sembilan merekodkan penerima bantuan tunai bulanan Majlis Agama Islam Negeri Sembilan daripada dana zakat seramai 197 orang dan tiada penerima yang ditamatkan namun pemutihan yang telah dibuat oleh MAINS didapati seramai 8 orang yang telah meninggal dunia dan 24 orang telah melebihi had kifayah yang telah ditetapkan oleh MAINS.

Jadi had kifayah ini yang ditetapkan oleh MAINS adalah Ringgit Malaysia 2,418.00 dan bantuan minima untuk kewangan bulanan bagi fakir dan miskin bermula Ringgit Malaysia 250.00 untuk seorang. Manakala bantuan maksima untuk kewangan bulanan fakir hingga Ringgit Malaysia 800.00 sebulan. Bagi bantuan maksima untuk kewangan bulanan bagi fakir miskin pula sehingga 550.00 ringgit sebulan.

Jadi pecahan menerima bantuan daripada MAINS ini mengikut kariah masjid di kariah kawasan Johor-lah. Ia terdiri daripada, ada beberapa kariah masjid ni lah: Masjid Kariah Kampung Geduhum – 22, Masjid Kariah Kampung Tulang Rimau – 3, Masjid Kariah Ulu Inas – 21, Masjid Kariah Kampung Gating – 4, Masjid Kariah Kampung Kabong – 5 kes, Masjid Kariah Kampung Dingkir – 18 kes, Masjid Kariah Kampung Melekai – 10 kes, Masjid Kariah Jamek Pekan Johor – 15 kes, Masjid Kariah Kampung Nuri – 5 kes, Masjid Kariah Kampung Tanggai – 11 kes, Masjid Kariah Tangkoh – 13, Masjid Kariah Gemencheh Ulu – 8, Masjid Kariah Dato Undang keramat – 7, eh, Masjid Kariah Undang Kamat – 22, maaf Dato' Yang Dipertua. Kamat ya. Masjid Kariah Nursalbiah Selaru – 7 kes, Masjid Kariah Kepis Ulu – 11 kes, Masjid Kariah Kepis Hilir – 8 .....

**YB ADUN Johor:** YB, YB Kuala Pilah, saya rasa jawapan tu susah nak baca.

**YB ADUN Pilah:** Okey.

**YB ADUN Johor:** Biar saya mintak data ni dibagi jawapan bertulis.

**YB ADUN Pilah:** Okey, baik Yang Berhormat Johor

**YB ADUN Johol:** Sebab apa ni, saya nak tanya berapa yang ditamatkan yang utamanya. Itulah aduan kita kepada ADUN biasanya ya .....

**YB ADUN Pilah:** Okey baik, terima kasih.

**YB ADUN Johol:** Yang kata data *detail* tu mungkin boleh dibagi jawapan bertulis. Kesian dia.

**YB ADUN Pilah:** Okey, terima kasih YB Johol.

**YB Yang Dipertua Dewan:** Ada, soalan tambahan tak ada ya? Soalan tambahan tak ada ya?

**YB ADUN Pilah:** Ada lagi 2 masjid, tak payah ya? Okey, okey, baik. Okey. Terima kasih Dato' Yang Dipertua.

**YB Yang Dipertua Dewan:** Soalan.....

**YB ADUN Rantau:** Dato' Yang Dipertua, soalan daripada Johol tu tadi, mengapa ditamatkan. So, buat jawapan bertulislah, dah panjang sangat dah tu.

**YB ADUN Pilah:** Terima kasih YB Rantau.

**YB Yang Dipertua Dewan:** Okey, jadi ahli-ahli Yang Berhormat sekalian, masa bagi pertanyaan .....

**YB ADUN Mambau:** Dato' Yang Dipertua, minta izin. Dato' Yang Dipertua, minta izin. Bolehkah bagi peluang kepada Mambau untuk mengemukakan soalan seterusnya? Saya rasa soalan ini penting untuk rakyat jelata.

**YB Yang Dipertua Dewan:** Soalan nombor berapa?

**YB ADUN Mambau:** Saya minta izin.

**YB Yang Dipertua Dewan:** Soalan nombor? Kita sebenarnya masa tak banyak. Kita banyak agenda ni.

**YB ADUN Mambau:** Okey, terima kasih. Jadi Dato' Yang Dipertua, Mambau kemukakan soalan pertama.

**YB Yang Dipertua Dewan:** Okey, okeylah.

**YAB ADUN Sikamat:** Okey, terima kasih Mambau. Dia pendek, saya jawab pendek. Dato' Dipertua, Kerajaan Negeri sedang memperhalusi dan meneliti setiap usul yang dicanangkan dalam Manifesto Aspirasi Perpaduan Negeri Sembilan. Walau apa pun yang terjadi, inisiatif bantuan khususnya kepada rakyat tetap akan diteruskan dan semua inisiatif daripada Kerajaan Negeri masih disambung ketika ini tanpa ada sebarang pengecualian. Dan kita juga sedang selaraskan dengan bajet yang akan kita buat pada bulan November ini, *insyaAllah*. Terima kasih Dato' Yang Dipertua.

**YB ADUN Mambau:** Dato' Yang Dipertua, soalan tambahan. Bagaimanakah tindakan pihak Kerajaan Negeri untuk memudahkan serta mencari jalan penyelesaian agar permohonan inisiatif ini berjalan dengan lancar? Terima kasih.

**YAB ADUN Sikamat:** Okey, saya rasa tadi saya dah maklumkan tadi bahawa kita sekarang bersama dengan UPEN sedang mengkaji satu persatu daripada manifesto yang kita telah maklumkan, untuk kita letakkan di dalam bajet kita pada tahun 2024 yang akan kita bentangkan pada bulan November ini. Terima kasih Dato' Yang Dipertua.

**YB Yang Dipertua Dewan:** Okey. Ahli-ahli Yang Berhormat, masa bagi Pertanyaan Lisan Hari Kedua telah pun tamat. Semua pertanyaan yang tidak sempat dijawab akan diberikan jawapan secara bertulis.

## 5.2 Pertanyaan-Pertanyaan Bertulis

**Setiausaha Dewan:** Pertanyaan-pertanyaan yang berkehendakkan jawapan bertulis. Dipersilakan Yang Amat Berhormat ADUN Sikamat.

**YAB ADUN Sikamat:** Yang Berhormat Dato' Yang Dipertua, saya bangun membentangkan jawapan bagi pertanyaan-pertanyaan bertulis yang telah diberitahu terlebih dahulu seperti dibentang di hadapan ahli-ahli Yang Berhormat sekalian.

**YB Yang Dipertua Dewan:** Ahli-ahli Yang Berhormat sekalian, jawapan bagi pertanyaan-pertanyaan bertulis adalah dibentangkan.

## 6. USUL DI BAWAH PERATURAN XVI

**YAB ADUN Sikamat:** Yang Berhormat Dato' Yang Dipertua, saya bangun memohon izin mencadangkan supaya Dewan ditangguhkan menurut Peraturan XVI, Peraturan-Peraturan dan Perintah-Perintah Tetap dalam

dewan, Perhimpunan Dewan Undangan Negeri, Negeri Sembilan 1960 untuk saya mengemukakan usul khas dan mustahak dalam Persidangan Dewan yang mulia ini seperti berikut “Bahawa Dewan ini, menzahirkan pendirian menolak dan mengutuk tindakan kejam dan jenayah aparteid Rejim Israel yang mencetuskan pergolakan terkini di Palestin.”

**YB ADUN Pertang:** Yang Berhormat Dato’ Dipertua, saya bangun cadangan yang dikemukakan oleh Yang Amat Berhormat Sikamat.

**YB Yang Dipertua Dewan:** Ahli-ahli Yang Berhormat sekalian, Yang Amat Berhormat ADUN Sikamat telah mengemukakan cadangan untuk menanggung Dewan bagi membolehkan Usul: Bahawa Dewan ini, menzahirkan pendirian menolak dan mengutuk tindakan kejam dan jenayah aparteid Rejim Israel dan, yang mencetuskan pergolakan terkini di Palestin, dibentangkan kepada Dewan. Cadangan ini telah disokong oleh Yang Berhormat ADUN Pertang.

Saya berpuas hati bahawa perkara yang dibangkitkan oleh Amat Berhormat Sikamat ini memenuhi kehendak-kehendak di bawah Peraturan XVI Peraturan-Peraturan dan Perintah-Perintah Tetap bagi Dewan Undangan Negeri Sembilan sekaligus membolehkan perkara ini ditimbang, ditimbangkan oleh sidang Dewan pada hari ini jugak. Oleh itu, saya kemukakan perkara ini kepada sidang Dewan. Ahli-ahli Yang Berhormat yang bersetuju Usul ini dibentangkan sila angkat tangan. Jadi cadangan tersebut diterima ya? Dipersilakan Yang Amat Berhormat ADUN Sikamat.

[Keputusan undian: semua 34 orang ahli Yang Berhormat yang hadir bersetuju. YB ADUN Linggi dan YB ADUN Chennah tiada di dalam Galeri Persidangan ketika undian dijalankan]

**YAB ADUN Sikamat:** Yang Berhormat Dato’ Yang Dipertua, saya bangun mengemukakan Usul yang pertama yang berbunyi “Bahawa Dewan ini, menzahirkan pendirian menolak dan mengutuk tindakan kejam dan jenayah aparteid Rejim Israel yang mencetuskan pergolakan terkini di Palestin.”

Sebagaimana sidang hadirin maklum, sesungguhnya dunia terkesan dengan perkembangan terbaru konflik di Semenanjung Gaza, Palestin yang menggugat keselamatan dan keamanan rakyat di sana. Dewan yang mulia ini memohon untuk menyatakan penegasan kita menolak dan mengutuk siri keganasan, kekejaman dan jenayah apartied Rejim Israel yang dengan terang melanggar undang-undang dan hak

kemanusiaan termasuk mencemar kesucian Masjidil Aqsa yang merupakan salah satu Kota Suci penganut Agama Islam.

Yang Berhormat Dato' Yang Dipertua, Dewan Yang Mulia pada hari ini dimohon untuk turut menuntut masyarakat antarabangsa supaya bertanggungjawab untuk mengambil tindakan segera mengatasi krisis ini. Satu tekanan antarabangsa perlu dilaksanakan segera bagi menghentikan segala kegiatan yang melanggar undang-undang dan hak kemanusiaan seperti ini; dan semua pihak hendaklah menghormati hak dan kedaulatan rakyat Palestin di atas muka bumi mereka sendiri.

Yang Berhormat Dato' Yang Dipertua, atas prinsip inilah, saya menyeru Dewan yang mulia ini turut sama menggerakkan suatu usaha menyalurkan sebarang bentuk bantuan kemanusiaan dengan kadar segera. Justeru, saya mencadangkan Dewan yang mulia ini meluluskan penubuhan Tabung Amanah bagi mengutip sumbangan di segenap lapisan masyarakat Negeri Sembilan ini yang ingin menyumbang untuk membantu perubatan rakyat Palestin.

Saya dengan ini sekali lagi mencadangkan suatu usul "Bahawa Dewan ini, menzahirkan pendirian menolak dan mengutuk tindakan kejam dan jenayah apartyed Rejim Israel yang mencetuskan pergolakan terkini di Palestin". Sekian, terima kasih. Terima kasih Yang Berhormat Yang Dipertua, saya mohon mencadang.

**YB ADUN Pertang:** Yang Berhormat Dato' Yang Dipertua, saya bangun untuk menyokong usul yang telah dikemukakan oleh Yang Amat Berhormat Sikamat. Sebelum saya meneruskan ucapan, untuk memberikan sedikit input berkaitan dengan usul yang dikemukakan oleh Yang Amat Berhormat Sikamat, suka saya nak nyatakan bahawa Kerajaan Negeri Sembilan pada hari ni juga mengambil ketetapan untuk melahirkan rasa dukacita di atas pemergian 2 pelajar siswazah dan juga 20 ahli keluarga mangsa akibat serangan bom Rejim Zionis di Gaza, Palestin pada hari Ahad yang lalu.

Saya baru saja menerima e-mel berkaitan dengan kejadian yang menimpa siswazah USIM, antara yang terkorban di dalam keganasan Rejim Israel di Gaza pada Ahad yang lepas. Mohammed Alzaanin, calon Doktor Falsafah Pengurusan Sumber Manusia dan isterinya, Kholoud Elzaneen pelajar Program Sarjana Sains, Fakulti Sains dan Teknologi USIM, terkorban di dalam serangan bom yang berlaku di perkampung mereka di Bait Hanon pada ketika jam 8.00 pagi. Perkara ini telah disahkan oleh Presiden Kesatuan Umum Pelajar Palestin di Malaysia; Ammar Mahariq. Turut terkorban di dalam peristiwa yang amat sedih ini adalah 4 orang anak mangsa. Hanya seorang, hanya seorang anak

mangsa, yang dilaporkan terselamat. Menurut Badereddin Seyam, Pengerusi Pertubuhan Kebudayaan Palestin Malaysia, turut terkorban adalah 20 ahli keluarga mangsa di dalam serangan bom oleh Rejim Zionis di Gaza ini. Mohammed Alzaanin baru sahaja selesai menjalani sesi viva di USIM pada 5 Julai yang lalu. Manakala isterinya dijadualkan untuk menduduki ujian viva pada 20 Oktober, 20 Oktober ini. Ini adalah antara perkara dan kezaliman yang melampau terhadap masyarakat Islam di kawasan Palestin oleh Rejim Zionis, Israel.

Saya bangun pada pagi ini, di Dewan yang bertuah ini, di Dewan yang mulia ini, untuk bersolidariti dan menyokong pendirian Kerajaan Negeri Sembilan seja, serta Kerajaan Perpaduan yang dibawa oleh Yang Amat Berhormat Dato' Seri Menteri Besar; ADUN Sikamat sebentar tadi. Pada kesempatan ini saya juga ingin mengucapkan syabas kepada Kerajaan Perpaduan terutamanya bagi, kepada kerajaan, Kerajaan Negeri yang tidak menunggu lama untuk membawa isu ini di Dewan Undangan Negeri supaya dapat dibincangkan dan bersolidariti bersama antara kerajaan dan pihak pembangkang.

Saya juga ingin mengambil kesempatan untuk mengucapkan tahniah kepada Kerajaan Malaysia di bawah pimpinan Yang Amat Berhormat Datuk Seri Anwar Ibrahim yang telah membawa usul melalui Yang Amat Berhormat Datuk Seri Dr. Ahmad Zaid Hamidi; Timbalan Perdana Malaysia di dalam Dewan Rakyat pada petang semalam. Semalam, untuk makluman ahli-ahli Yang Berhormat, di Dewan Rakyat, kita dapat melihat satu solidariti yang penuh di antara pihak kerajaan dan pembangkang yang bersatu hati menyokong penuh Palestin di dalam isu ini. Bila berkait isu kemanusiaan, Dato' Yang Dipertua, kita perlu mengeneppikan sebarang perbezaan politik yang ada di antara kita.

Tindakan zalim, kejam dan ganas yang menimpa rakyat Palestin selama ini tidak boleh dimaafkan sama sekali. Siapa sangka tanah Palestin yang begitu luas sebelum tercetusnya konflik, sudah menjadi sekecil-kecilnya. Serangan roket Hamas baru-baru ini yang mengakibatkan lebih daripada 123,000 rakyat Palestin di Gaza, hilang tempat tinggal dan sekitar 74,000 orang ditempatkan di pusat pemindahan adalah merupakan satu situasi yang amat membimbangkan. Penceroohan demi penceroohan darat yang dilakukan oleh Israel ke atas Gaza serta pendirian Israel untuk menjadikan Palestin sebagai padang jarak padang tekukur, sememangnya perlu ditentang. Hakikatnya Israel itu merupakan sebuah negara haram kerana pembentukannya telah menindas dan menganiaya rakyat Palestin sejak beberapa dekad sehinggalah hari ini.

Untuk, umum mengetahui, Dato' Yang Dipertua, Israel sudah lama mengimpikan tanah Palestin dan mahu menjadikannya sebagai negara mereka dengan alasan kepentingan dari segi sejarah kaum mereka. Oleh sebab itu, mereka sanggup berbuat apa sahaja demi mencapai matlamat dan tujuan mereka. Saya percaya, pelbagai lagi tindakan zalim yang akan dilakukan oleh rejim ganas ini selepas ini. Perkara ini akan menjadi lebih parah, Dato' Yang Dipertua, apabila terdapat pihak yang berkepentingan yang menyorok di belakang Israel dan memberikan sokongan. Rentetan itu, Israel menjadi semakin berani dengan mengambil langkah eskترم untuk mencapai impian mereka.

Sehubungan itu, Dato' Yang Dipertua, saya ingin mengambil kesempatan ini untuk menyeru seluruh rakyat Malaysia khususnya rakyat Negeri Sembilan agar bersama-sama memberikan sokongan dan bersolidariti terhadap malapetaka yang menimpa rakyat Palestin. Misi-misi bantuan kemanusiaan hendaklah digerakkan dengan segera. Kita juga perlu memperbaharui komitmen Malaysia di dalam menyokong perjuangan Palestin seperti yang pernah dilakukan oleh Datuk Seri Najib Razak; selaku mantan Perdana Menteri Ke-6, yang telah menjadi Perdana Menteri pertama yang menjejakkan kaki ke lokasi konflik di bumi Palestin. Kita juga perlu bersama-sama memberikan sokongan penuh terhadap mana-mana NGO di dalam misi kemanusiaan yang dianjurkan.

Dato' Dipertua, akhir sekali, saya juga ingin menggesa kepada kuasa-kuasa besar dunia supaya tidak lagi mendiamkan diri dan menjadi penakut serta pengecut dengan hanya menjadi pemerhati. Mereka ini juga sepatutnya campur tangan dan mempertahankan kedaulatan Negara Palestin melalui PBB, OIC dan sebagainya demi hak asasi manusia.

Tuan Yang Dipertua, sekian sahaja daripada saya. Dan saya menyokong sepenuhnya usul dan ketetapan yang dikemukakan oleh Yang Amat Berhormat ADUN Sikamat sebentar tadi. Terima kasih.

**YB Yang Dipertua Dewan:** Terima kasih ADUN Pertang. Ahli-ahli Yang Berhormat sekalian, Usul sebagaimana yang telah dibacakan oleh Yang Amat Berhormat ADUN Sikamat sebentar tadi sudah dicadang dan disokong. Sekarang saya kemukakan jika ada apa-apa perbincangan. Saya benarkan 2, kalau siapa-siapa nak, kalau ada Yang Berhormat.

**YB ADUN Rantau:** Dato' Dipertua.

**YB Yang Dipertua Dewan:** Ya, Rantau.

**YB ADUN Rantau:** Terima kasih kerana mengizinkan saya mengambil bahagian dalam perbahasan mengenai usul tergepar yang dibawak oleh Yang Amat Berhormat daripada Sikamat iaitu menyatakan betapa dahsyatnya rejim Zionis Israel yang telah pun selama 78 tahun masuk ke negara yang mana ketika dulu sebuah negara yang amat aman damai, tetapi disebabkan oleh kuasa-kuasa besar yang mahu melihat supaya keadaan di Timur Tengah tersebut diimbangkan dan meletakkan sebuah negara kecil yang bernama Israel, pada tahun 1948. Bermula daripada tahun 1948, Dato' Dipertua, maka terjajallah tanah air Palestin yang mana penduduknya hidup dalam keadaan damai. Dan penderitaan rakyat Palestin bermula daripada tahun tersebut. Mana-mana rakyat Palestin yang berumur 75 tahun ke bawah adalah merupakan anak bangsa yang terjajah negaranya, yang dihalau daripada kampung halamannya, yang dibunuh tanpa ada berasa belas kasihan. Seolah-olah nyawa orang Palestin ini tidak ada satu sen pun berharga.

Dato' Yang Dipertua, inilah yang telah dilalui oleh rakyat Palestin. Isu Palestin ini, Dato' Dipertua, bukan berkenaan isu agama. Jangan kita silap faham ya. Orang Palestin bukan semua orang Islam. Palestin ada orang Kristian, Arab Kristian dan macam-macam, ramai ya, kerana mereka mempunyai satu kelompok rakyat yang hidup secara aman damai, orang Islam dan jugak orang-orang Kristian di situ. Jadi, jangan kita pulak bercakap nanti orang kata, oh ini Malaysia ni kerana kita mengangkat kerana Islam. Bukan, ini adalah isu kemanusiaan. Seperti yang disebut oleh Yang Berhormat daripada Pertang tadi ya, dan jugak Yang Amat Berhormat Sikamat.

Isu kemanusiaan yang telah berlangsung, yang telah berlaku selama 78 tahun, orang-orang Palestin, rakyat Palestin terhina, negara mereka dijajah, mereka terhalau dan dikeluarkan daripada kampung halaman tanpa sebarang pembelaan. Berpuluh-puluh resolusi daripada sama ada Pertubuhan Bangsa-Bangsa Bersatu mahupun Majlis Keselamatan Bangsa-Bangsa Bersatu tetapi semuanya tidak diendahkan. Tidak siapa pun, tidak ada mana kuasa pun yang mahu menguatkuasakan resolusi Majlis Keselamatan Bangsa-Bangsa Bersatu. Ini yang menyebabkan ramai suara-suara negara ketiga telah menyuarakan supaya Bangsa-Bangsa Bersatu ini perlu dirombak semula bahawa keberadaan Bangsa-Bangsa Bersatu sekarang ini tidak mencerminkan hasrat ataupun niat negara-negara yang merdeka menubuhkan Bangsa-Bangsa Bersatu. Kerana Majlis Keselamatan cuma dikuasai oleh 5 negara. Dan mereka mempunyai kuasa veto. Dan apa sahaja resolusi yang dibawak oleh Majlis Keselamatan dan jugak majlis, Bangsa-Bangsa Bersatu, Dewan Bangsa-Bangsa Bersatu, semuanya diveto oleh mereka-mereka yang mempunyai kuasa-kuasa yang mempunyai kepentingan-kepentingan yang tertentu di kawasan Timur Tengah.

Dato' Dipertua, kita tak boleh mengatakan bahawa ini pengganas daripada Hamas. *We cannot term them as a terrorist* kerana mereka ini bukan mengganas. Mereka nak mendapatkan tanah air mereka semula. Mereka mahukan supaya tanah air mereka yang dijajah selama 78 tahun oleh penubuhan negara Zionis Israel ini, dan mereka mendapat pembelaan. Mereka telah pun bersetuju pada satu ketika untuk ada genjatan senjata, tetapi apa yang berlaku? Apakah pihak rejim Zionis Israel menghormati genjatan senjata yang telah pun diuruskan oleh beberapa negara Timur Tengah dan jugak Eropah? Tidak. Mereka terus menekan bahawa daripada 250,000 pendudukan, mereka telah pun menjadi hampir lebih daripada 700,000. Berpuluh-puluh kampung, bahkan pihak-pihak yang ada di dalam negara Israel sekali pun tidak bersetuju dengan cara iaitu *settlers-settlers* yang mengambil alih ataupun menghalau orang-orang Palestin daripada kampung halaman mereka.

Jadi Dato' Dipertua, amat bertepatan, Dewan Undangan Negeri Sembilan yang bersidang hari pertama hari ini, Dato' Yang Dipertua, usul Yang dibawak oleh Yang Amat Berhormat daripada Sikamat dan disokong oleh Yang Berhormat daripada Pertang ini dibahas dan kita perlu membuat satu resolusi hari ini. Di Dewan yang mulia yang bersidang pada 10 haribulan 10 hari ini, Dato' Dipertua, mesti memutuskan dan membuat satu resolusi mengutuk sekeras-kerasnya bahawa apa yang berlaku, apa yang dilakukan oleh pihak rejim Zionis Israel ini mesti dikutuk dan campur tangan pihak Bangsa-Bangsa Bersatu, OIC, GCC, NATO dan yang lain-lain perlu mengambil bahagian dan menentukan supaya pembunuhan tanpa belas kasihan terhadap rakyat Palestin ini dapat dihentikan segera dan satu genjatan senjata yang perlu dilakukan oleh semua pihak. Pihak daripada Hamas ke, daripada Gaza ke, daripada Westbank, mereka bukan pengganas Dato' Dipertua, mereka nakkan pembelaan. Mereka nak negara mereka semula. Telah pun diadakan. Bayangkan terkurung dalam penjara yang paling besar dalam dunia. Mereka terkurung Dato' Yang Dipertua, mereka tak boleh keluar daripada kawasan mereka. Kalau kita lihat terdapatnya tembok, terdapatnya jaring besi yang mengawal mereka dan mereka boleh duduk dalam kawasan mereka sahaja. Dan sekarang mereka ditembak bertalu-talu tanpa belas kasihan seperti apa yang disebut oleh YB Pertang tadi, satu keluarga, 2 pelajar kita daripada USIM telah pun meninggal dunia bersama-sama dengan keluarga besar mereka. Apakah Malaysia dan jugak negara-negara yang merdeka di dalam dunia ini, hanya menutup mata dan berdiam diri melihat kekejaman Zionis Israel melakukan pembunuhan tanpa belas kasihan terhadap orang-orang Palestin?

Saya berharap supaya Dewan yang mulia hari ini, Dewan Undangan Negeri Sembilan bersama-sama sebulat suara, ini bukan masalah kerajaan ataupun pembangkang, ini masalah kemanusiaan sejagat, masalah Palestin yang ditindas begitu lama, berpuluh-puluh tahun. Maka seharusnya Dewan yang bersidang hari ini membuat satu resolusi mengutuk dan mengecam pembunuhan beramai-ramai. Dato' Dipertua, terima kasih.

**YB ADUN Gemas:** Dato' Yang Dipertua. *Bismillahirrahmanirrahim.* Terima kasih Dato' Yang Dipertua, tak, saya mewakili 5 ADUN Perikatan Nasional menyokong usul yang dibawa oleh DUN Sikamat, yang disokong oleh DUN Pertang, ditambah pula dengan isi-isi yang cukup baik, berinfo daripada DUN Rantau. Bagi kami ini adalah yang kita lahirkan di sini pada hari ini, kesepakatan kita untuk meminta Wisma Putra dan Kementerian Luar menghantar satu mesej kepada PBB, mengatakan ini adalah daripada Dewan Undangan Negeri bersama Kerajaan Pusat seiring membantah untuk resolusi mengatakan tindakan kejam daripada pihak Zionis ini adalah satu tindakan di luar kemanusiaan yang sewajarnya. Mohon, kami pihak DUN daripada Perikatan Nasional menyokong usul yang dibawa sebentar tadi. Terima kasih.

**YB Yang Dipertua Dewan:** Terima kasih. Ahli-ahli Yang Berhormat sekalian, usul sebagaimana yang dibacakan oleh Yang Amat Berhormat ADUN Sikamat sebentar tadi sudah dicadang dan disokong. Sekarang saya, ada yang ingin berbahas, tolak? Tak ada. Jadi, berkecuali? Tak ada .....

**YB ADUN Paroi:** *Assalamualaikum WBT. Assalamualaikum,* ADUN Paroi. Tuan Yang Dipertua, sedikit penambahan daripada usul yang dicadangkan oleh DUN Sikamat. Saya me, me, bersetuju ya, mengutuk dan jugak mengecam. Tapi saya mintak dibuat penambahan membantu ya, membantu rakan-rakan kita, Kerajaan Negeri Sembilan, rakan-rakan kita di Palestin, penduduk mereka. Saya rasa dibuat sedikit penambahan untuk membantu rakan-rakan kita di Palestin. Itu salah satu cadangan daripada, daripada DUN Paroi.

**YB Yang Dipertua Dewan:** Menambah macam mana, dia punya tadi? Yang Berhormat Paroi. Paroi. Menambah macam mana? Teks dia?

**YB ADUN Paroi:** Tadi kita mengecam, mengutuk, mengecam ya. Dan satu lagi penambahan ialah kita kena membantu rakan-rakan kita di Palestin. Mungkin Kerajaan Negeri Sembilan, mungkin beri, memberi bantuan ya, kepada rakan-rakan kita ya. *Wallahu'alam.*

**YB Yang Dipertua Dewan:** Saya tanya, boleh tambah daripada pencadang usul. Okey. Jadi, dengan demikian, kita dah bentangkan, telah bahas dan semua telah setuju. Maka usul ni diluluskan. Kita terus ke agenda yang seterusnya. Silakan Setiausaha.

**Setiausaha Dewan:** Perkara keenam .....

**YB Yang Dipertua Dewan:** Biar, nanti. Ya?

**YAB ADUN Sikamat:** Sebelum kita menerima usul tersebut, saya mencadangkan juga kepada Jabatan Agama Islam untuk menyediakan khutbah Jumaat minggu ini bertajuk Palestin yang kena tinas hari ini supaya tajuk, khusus untuk Palestin diadakan untuk Khutbah Jumaat minggu ini. Keduanya tabung masjid, saya harap dapat disegerakan, dapat digerakkan ya, di masjid-masjid selama sebulan. Dan bacaan Qunut Nazilah di semua masjid dan solat-solat hajat boleh diteruskan di masjid-masjid.

Keduanya, sumbangan daripada syarikat berkait dengan Kerajaan Negeri dan MAINS amat diwajibkan. Dan juga menggalakkan pihak-pihak swasta untuk sama-sama memberi sumbangan kepada tabung yang kita ingin sediakan. Ini kepada Tabung Amanah. Dan kita, ini akan memberikan satu sokongan secara keseluruhan daripada kita keseluruhannya.

Kita maklum perkara ini, harus disegerakan memandangkan 2.0 juta lebih penduduk yang terkesan memerlukan banyak keperluan terutamanya perubatan ya, kita tahu memang keperluannya perubatan hanya ada sebuah hospital untuk 2.0 juta penduduk. Dan ini merupakan satu perkara yang cukup menyedihkan kita dan kalau kita boleh di peringkat awal ini, boleh segerakan sumbangan mengenai perubatan itu amat-amat kita raikan kepada seluruh rakyat Negeri Sembilan. Itu tambahan saya, Dato' yang Dipertua, terima kasih.

**YB Yang Dipertua Dewan:** Setiausaha.

**Setiausaha Dewan:** Perkara keenam, Usul menjunjung kasih titah .....

**YB ADUN Rantau:** Dato' Yang Dipertua. Baik usul yang digazetkan, diwartakan untuk dibahas ataupun usul tergepar, mesti diundi ya, sebelum kita terima. Sebelum kita terima, Dato' *Speaker* nanti, bila dah undi, kita kata usul diterima, usul tergepar diterima ya. terima kasih.

**YB Yang Dipertua Dewan:** Tadi macam saya dah sebut dah, undi. Jadi kita buat sekali lagi. Bagi yang bersetuju dengan usul ini, sila angkat tangan. Berkecuai? Yang tak setuju? Usul ini diluluskan.

**YB ADUN Rantau:** Lulus dengan sebulat suara, Dato' Yang Dipertua. Itu me, mem, memperkuatkan

**YB Yang Dipertua Dewan:** Sebulat suara, semua angkat tangan sebulat suara ya.

[Keputusan undian: semua 36 orang ahli Yang Berhormat yang hadir bersetuju.]

7. **USUL:**

***“Bahawa Dewan ini mengambil ketetapan menjunjung kasih Ke bawah Duli Yang Maha Mulia Yang di-Pertuan Besar Negeri Sembilan atas Titah Ucapan Baginda bagi merasmikan Pembukaan Penggal Pertama, Dewan Undangan Negeri, Negeri Sembilan Yang Ke-15.”***

**Setiausaha Dewan:** Perkara keenam, Usul Menjunjung Kasih Titah Ucapan DiRaja.

**YB ADUN Johol:** *Bismillahirrahmanirrahim. Assalamualaikum WBT.* Yang Amat Berhormat Menteri Besar; Sikamat, barisan EXCO Kerajaan Negeri serta Yang Berhormat – Yang Berhormat di barisan kerajaan dan pembangkang yang hadir pada persidangan hari ini. Yang Berhormat Dato' Yang Dipertua, saya bangun mengemukakan Usul yang berbunyi “Bahawa Dewan ini mengambil ketetapan menjunjung kasih Ke bawah Duli Yang Maha Mulia Yang di-Pertuan Besar Negeri Sembilan atas Titah Ucapan Baginda bagi merasmikan Pembukaan Persidangan Kedua Penggal Pertama, Dewan Undangan Negeri, Negeri Sembilan Yang Ke-15”.

Pertamanya, saya ingin mengambil kesempatan ini untuk mengucapkan tahniah kepada Yang Amat Berhormat Sikamat kerana telah sekali lagi dilantik sebagai Menteri Besar Negeri Sembilan untuk penggal seterusnya. Tidak dilupakan ucapan tahniah kepada Yang Berhormat Pertang kerana telah dipilih sebagai Exco Kanan. Pelantikan bersejarah ini adalah satu manifestasi kepada kerjasama di antara parti-parti dalam Kerajaan Perpaduan. Tahniah Yang Berhormat Pertang.

Juga ucapan tahniah kepada semua, kesemua Yang Berhormat sekalian kerana telah dipilih untuk mewakili rakyat di kawasan masing-masing melalui satu proses demokrasi yang telah dilaksanakan dengan telus dan yang paling penting dalam suasana yang begitu aman dan harmoni tanpa sebarang kejadian-kejadian yang tidak mahu berlaku sewaktu tempoh berkempen tempoh hari. Tahniah kepada semua.

Yang Berhormat Dato' Yang Dipertua, dengan secara rasminya, kita yang ada di dalam Dewan ini telah pun dipilih oleh rakyat di kawasan masing-masing untuk berkhidmat kepada mereka. Mereka memilih kita untuk mewakili mereka bagi menentukan segala dasar yang terbaik untuk dibincangkan di Dewan yang mulia ini. Maka, dengan menjunjung kasih, menjunjung titah Kebawah Duli Yang Maha Mulia Yang di-Pertuan Besar, saya menyeru kepada rakan-rakan Yang Berhormat sekalian, tunaikanlah tanggungjawab ini dengan sebaiknya. Kita bincanglah apa jua yang perlu dibincangkan di Dewan ini secara berhemah. Janganlah kita amalkan provokasi atau mengadu domba dengan melemparkan pelbagai tuduhan tidak berasas kepada kerajaan. Sama-samalah kita sebagai Ahli Dewan Undangan Negeri ini tunjukkan contoh yang baik dalam kita mendebatkan sesuatu isu dengan penuh kematangan. *Insyallah*.

Yang Berhormat Dato' Yang Dipertua, Keputusan Pilihan Raya Negeri ke-15 lalu, menunjukkan bahawa rakyat di Negeri Sembilan terutamanya masyarakat Melayu dapat menerima formula acuan Kerajaan Perpaduan ini dengan baik. Jumlah pembahagian kerusi antara komponen Barisan Nasional dan Pakatan Harapan juga nampak seimbang. Daripada 31 kerusi yang dimenangi oleh parti kerajaan, 17 datangnya daripada Pakatan Harapan dan 14 lagi dari Barisan Nasional. Oleh kerana itu, Negeri Sembilan boleh menjadi contoh kepada keberkesanan pemerintahan Kerajaan Perpaduan ini.

Saya yakin, formula Kerajaan Perpaduan ini adalah formula yang terbaik. Dan rakyat akan dihidangkan dengan pentadbiran Kerajaan Negeri yang camerlang dan gemilang menerusi kerjasama erat antara gabungan Pakatan Harapan dan Barisan Nasional ini. *Insyallah*, gelombang perpaduan ini akan kita mulakan di negeri kita ini. Yakinlah, menerusi gabungan kepimpinan yang baik antara Yang Amat Berhormat Sikamat dan Yang Berhormat Pertang, rakyat di negeri kita ini akan terus memberikan sokongan yang padu kepada Kerajaan Perpaduan yang ada pada hari ini.

Yang Berhormat Dato' Yang Dipertua, penggal ini adalah penggal kedua saya diberi kepercayaan oleh warga Johor untuk berkhidmat kepada mereka. Dan daripada kali pertama saya menjadi wakil rakyat sekali

pun, saya telah beberapa kali membangkitkan mengenai isu tanah terbiar melibatkan tanah-tanah adat di negeri kita ini. Kita di Negeri Sembilan ini amat bertuah dan beruntung kerana mempunyai Raja yang sangat prihatin dan sentiasa mengambil berat mengenai tanah-tanah adat ini.

Semalam, Baginda juga menyentuh mengenai tanah-tanah terbiar dan ini membuktikan bahawa Kebawah Duli Yang Maha Mulia Yang di-Pertuan Besar sentiasa cakna dan prihatin mengenai isu ini. Bagi tujuan itu, walaupun saya menyambut baik inisiatif Kerajaan Negeri yang memperkenalkan pelaksanaan Enakmen Rang Undang-Undang pemegang, Pemegangan Tanah Adat Luak Tanah Mengandung Dan Tanah Adat Lingkungan tahun 2022 dan RUU Enakmen Undang-Undang Tubuh Kerajaan Negeri Sembilan (Pindaan) tahun 2022, tetapi pada masa yang sama saya merasakan perlaksanaannya perlulah dilakukan dengan lebih menyeluruh lagi.

Titah Kebawah Duli Yang Maha Mulia Yang Dipertuan Besar ini harus dijunjung dengan memastikan Enakmen yang diperkenalkan ini bersifat lebih inklusif supaya permasalahan tanah-tanah terbiar dapat diselesaikan dengan penglibatan pihak-pihak yang berkenaan seperti To'-To' Adat dan lain-lain lagi. Jika perlaksanaannya dimudahkan, ini akan memudahkan untuk tanah-tanah yang melibatkan tanah-tanah adat yang terbiar ini dapat dimajukan sekaligus memberi manfaat kepada negeri kita secara keseluruhannya.

Yang Berhormat Dato' Yang Dipertua, seperti yang saya nyatakan di awal perbahasan saya tadi, negeri kita ini mempunyai poten, pelbagai potensi untuk dibangunkan. Bukan sahaja daripada sektor hartanah tetapi juga dari beberapa sektor lain termasuk pelancongan. Untuk itu, saya minta supaya Kerajaan Negeri dan Kerajaan Pusat melakukan kerjasama erat bagi mempromosi negeri kita ini untuk menarik pelabur-pelabur besar untuk melabur di negara kita. Dengan pelaburan yang besar daripada luar ini, ia sekali gus mampu mewujudkan peluang pekerjaan yang berkualiti tinggi kepada rakyat di Negeri Sembilan. Kita semua telah sedia maklum bahawa Kerajaan Negeri sebelum ini telah pun mengorak langkah untuk menerokai pelaburan dalam bidang aeroangkasa dan maritim. Dan *alhamdulillah*, beberapa tahun ini kita dapat melihat hasilnya. Syabas dan tahniah saya ucapkan kepada Yang Amat Berhormat Sikamat di atas inisiatif menarik pelaburan ke Negeri Sembilan menerusi sektor ini.

Tetapi hari ini, saya juga ingin mencadangkan supaya Kerajaan Negeri juga dapat menerokai pelaburan daripada pemain-pemain antarabangsa daripada sektor seperti *Renewable Energy*, dengan izin, mewujudkan

*Data Centre* di negeri kita selain menjadikan Negeri Sembilan sebagai Hab Logistik dengan mengambil kesempatan di atas faktor geografi negeri kita, yang berhampiran dengan sebuah lapangan terbang bertaraf antarabangsa iaitu KLIA di Sepang. Jika potensinya ada, saya mencadangkan supaya kita terokai kedua-dua bidang ini. Bangunkan infrastruktur yang bersesuaian dengan, dengannya agar pelabur luar dalam bidang ini minat untuk ke negeri kita. Dan akhirnya, sudah pasti rakyatlah yang akan mendapat manfaat besar hasil daripada pelaburan mereka.

Yang Berhormat Dato' Yang Dipertua, dalam kita bercakap mengenai menarik kemasukan pelaburan luar untuk datang ke negara, negeri kita, suka untuk saya menarik perhatian Dewan yang mulia ini supaya Kerajaan Negeri dapat memberi perhatian untuk memperkesakan syarikat-syarikat milik Kerajaan Negeri supaya ia lebih inovatif dan progresif. Misalnya, kita ada Perbadanan Kemajuan Negeri Sembilan atau PKNNS yang sentiasa menjadi peneraju kepada pembangunan di negeri kita ini. Antara lain objektifnya adalah untuk menggalakkan pembangunan di Negeri Sembilan. Ia juga merupakan agensi amanah bagi melaksanakan dasar-dasar kerajaan terutama di bawah Dasar Ekonomi Baru dan Dasar Pembangunan Nasional serta Rangka Rancangan Jangka Panjang 2. Ia memainkan peranan yang cukup besar terutamanya dalam soal Pembangunan ekonomi di negeri kita ini. Peranan yang sama dengan apa yang ada di Selangor menerusi Perbadanan Kemajuan Negeri Selangor atau PKNS dan di Johor menerusi Johor Corp, Johor Corporation. Kedua-duanya ada, yang ada di Selangor dan Johor ini memainkan peranan yang amat penting kepada usaha membangunkan ekonomi di negeri masing-masing.

Namun, Yang Berhormat Dato' Yang Dipertua, saya merasakan PKNNS masih jauh ketinggalan jika hendak dibandingkan dengan kedua-dua ini. Malah, setakat semalam, maklumat yang saya terima menerusi carian di laman web rasminya, jawatan Ketua Eksekutif PKNNS masih belum diisi. Sebaliknya, ia disandang oleh seorang pemangku yang saya dimaklumkan bahawa pemangkuan ini telah dibuat sejak lebih dari setahun lalu. Saya tidak tahu di mana silapnya Dato' Dipertua, tetapi pada saya, dengan ketiadaan Ketua Eksekutif sepenuh masa ini seolah-olah memberi gambaran bahawa kita tidak serius dalam soal pengurusan agensi pembangunan di bawah kita. Sedangkan ini adalah perkara yang perlu kita perlihatkan.

Bercakap mengenai PKNNS ini juga, saya mencadangkan supaya agensi ini diberi pendekatan untuk bertindak lebih agresif dalam soal pembangunan perniagaannya. Mereka perlu berani menerokai bidang-bidang perniagaan konvensional yang berpotensi memberi keuntungan

maksimum kepada mereka. Kita ambil contoh, Johor Corporation sekali lagi, bagaimana mereka berani melebarkan sayap perniagaan dalam bidang kesihatan melalui KPJ Healthcare yang mempunyai beberapa hospital di seluruh negara. Ini belum kita cakap mengenai perniagaan perladangan kelapa sawit mereka yang terbaru mereka sedang mengintai potensi kerjasama pelaburan dengan syarikat gergasi antarabangsa dalam penubuhan Data Centre di negeri itu.

Dato' Yang Dipertua, mengambil contoh daripada itu, saya mencadangkan supaya PKNNS dan lain-lain agensi Kerajaan Negeri perlu diperkasakan untuk menjadi peneraju kepada pembangunan sosio ekonomi di negeri ini. Ini bermakna, kita mahu PKNNS memainkan peranan penting untuk membantu golongan usahawan-usahawan tempatan terutama golongan belia dan bumiputera di negeri ini. Kita mahu agensi-agensi Kerajaan Negeri tidak melupakan *social obligation* mereka kepada negeri ini.

Yang Berhormat Dato' Yang Dipertua, jika kita mampu tarik pelaburan berimpak tinggi selain dapat memperkasakan lagi agensi di bawah Kerajaan Negeri, kita dapat membina lebih banyak peluang pekerjaan untuk rakyat kita. *Insyallah*. Ketahuilah bahawa rakyat-rakyat di Negeri Sembilan perlukan lebih banyak peluang pekerjaan. Mereka mahu berbakti di negeri mereka sendiri. Kita juga tidak mahu, bakat-bakat yang ada di dalam negeri kita ini mencipta nama dalam kerjaya mereka di negeri-negeri lain. Biarlah mereka kekal di Negeri Sembilan. Tinggal di bawah negeri ini dan bersama-sama membangunkan negeri yang kita cintai ini.

Yang Berhormat Dato' Yang Dipertua, seterusnya, saya ingin menarik perhatian Dewan Yang Mulia ini untuk membangkitkan mengenai pembangunan belia dan sukan. Seperti yang kita sedia maklum, pembangunan infra untuk belia dan juga Pembangunan sukan di kawasan-kawasan bandar terutamanya di Seremban berada pada keadaan yang baik walaupun ia memerlukan beberapa penambahbaikan. Saya melihat kemudahan untuk belia kita di luar bandar masih berada dalam keadaan serba kekurangan. Mereka tidak disediakan dengan program-program keusahawanan yang membolehkan untuk mereka menceburkan diri dalam bidang perniagaan.

Justeru, saya mencadangkan supaya satu pusat belia diwujudkan di setiap daerah di negeri ini. Pusat ini menyediakan beberapa kemudahan kepada belia untuk berniaga roduk mereka sendiri. pusat ini juga boleh diwujudkan studio rakaman yang percuma supaya mereka dapat berniaga secara bersiaran langsung di media-media sosial dengan

memanfaat teknologi *e-commerce* yang sedang berkembang ketika ini. Dato' Yang Dipertua, di kemudahan ini juga, kerajaan boleh menganjurkan program-program latihan kepada belia kita selain menganjurkan program promosi bagi membantu mereka berniaga.

Untuk kemudahan sukan pula, saya melihat ia masih memerlukan satu perhatian khusus daripada Kerajaan Negeri terutamanya di kawasan-kawasan luar bandar. Sebagai contoh adalah kemudahan bola, gelanggang bola sepak, gelanggang serbaguna untuk permainan sepak takraw, bola keranjang dan badminton masih di tahap yang tidak memuaskan. Dalam kita mahu menggalakkan rakyat mengamalkan cara hidup sihat melalui penyertaan dalam sukan, kita perlu serius melakukan penambah bagi tujuan infrastruktur sukan di negeri kita. Taman-taman awam untuk rakyat beriadah perlulah diperbanyakkan bukan sahaja di dalam bandar tetapi juga di luar bandar.

Yang Berhormat Dato' Yang Dipertua, bercakap mengenai kawasan luar bandar pula, jurang kemajuan antara bandar dan luar bandar di negeri kita perlu dirapatkan. Kemajuan di kawasan kampung, luar bandar dan kampung baru perlu dipertingkatkan lagi. Ini terutamanya melibatkan pembangunan infra di kawasan-kawasan luar bandar itu sendiri. Kita akui bahawa pengurusan Sistem Maklumat Rekod Jalan Raya Malaysia (MARRIS) di Negeri Sembilan ini adalah antara yang terbaik di negara kita. Tetapi ia boleh diperhebatkan lagi dengan mewujudkan satu jaringan kemudahan infra yang lebih menyeluruh dan inklusif. Pembangunan infra di kawasan luar bandar ini adalah penting kerana ia adalah cerminan kepada kemajuan sesebuah negeri. Kita tidak mahu negeri kita hanya gah di kawasan bandar sahaja, sebaliknya pembangunan di negeri kita, di negeri kita ini perlulah seimbang di antara kawasan bandar dan luar bandar.

Yang Berhormat Dato' Yang Dipertua, cadangan terakhir saya adalah mengenai menjadikan Negeri Sembilan sebagai destinasi pelancongan di negara kita. Untuk makluman semua, pada Pilihan Raya Negeri yang lalu, saya telah memperkenalkan Tekad Hebatkan Johol pada satu, dan salah satu daripadanya adalah mengenai menjadikan Johol sebagai lokasi pelancongan pilihan. Saya ambil contoh Johol adalah kerana di kawasan saya sendiri banyak lokasi-lokasi menarik yang mampu menarik pelancong domestik dan antarabangsa. Antaranya adalah kewujudan lebih banyak kawasan yang berstatus *outdoor adventure*. Cuma ia perlu mendapat sokongan daripada Kerajaan Negeri untuk membantu mempromosikannya lagi secara agresif. Kita tidak boleh terlalu selesa dengan menjadikan hanya Port Dickson sebagai produk pelancongan kita. Walhal, ada banyak lagi tempat-tempat menarik di daerah lain di negeri ini misalnya di Jelebu, di Rembau, Kuala Pilah,

Tampin dan lain-lainnya lagi yang berpotensi untuk diketengahkan sebagai destinasi pelancongan di negeri kita.

Bagi tujuan itu, saya mencadangkan kepada Kerajaan Negeri supaya satu *Masterplan*, dengan izin, pelancongan dapat diwujudkan dan dilancarkan dalam masa terdekat supaya satu strategi pemerksaan produk pelancongan di negeri dapat dikenalpasti dan ditingkatkan. Jika ini dapat dijayakan, percayalah bahawa aspirasi untuk menjadikan Negeri Sembilan sebagai destinasi pelancongan pilihan akan dapat dijayakan. *Insya-Allah*.

Yang Berhormat Dato' Yang Dipertua, secara rumusnya, rumusannya, perbahasan saya kali ini mempunyai fokus untuk mencadangkan kepada Kerajaan Negeri supaya membawa negeri ini lebih dinamik, berdaya maju dan mampan. Seperti mana yang dititahkan beberapa kali oleh Kebawah Duli Yang Maha Mulia Yang Dipertuan Besar semalam, Baginda mahu melihat negeri ini menjadi sebuah negeri yang berpendapatan tinggi. Saya yakin dan percaya, jika kena pada strateginya. Kena pada caranya, aspirasi ini akan dapat kita laksanakan bersama. *InsyaAllah*.

Yang Berhormat Dato' Yang Dipertua, akhir sekali, saya mengambil kesempatan ini untuk mengucapkan jutaan terima kasih kepada seluruh warga Johol kerana memberi kepercayaan kepada saya untuk berkhidmat kepada mereka bagi penggal kedua untuk saya ini. Sesungguhnya, saya berjanji akan sedaya upaya saya untuk mewakili warga Johol di Dewan yang mulia ini bagi membangkitkan segala permasalahan dan membincangkan apa jua perkara secara berhemah demi kebaikan mereka secara keseluruhannya. Sekali lagi saya ajak semua rakan-rakan seperjuangan saya di Dewan ini termasuk di blok pembangkang supaya kita dapat berbakti kepada rakyat dengan baik. Janganlah kita cemarkan dewan ini dengan perkara yang tidak sepatutnya yang akhirnya akan merugikan kita. Ingatlah, kita orang adat. Orang adat ni ada adab dan budi pekertinya.

Sopan dan santun pekerti mulia,  
Sombong dan takbur jangan diamal,  
Masyarakat Madani penuh ceria,  
Negari harmoni terus terkenal.

Dengan ini Yang Berhormat Dato' Yang Dipertua, saya mohon mencadang. Sekian, *assalamualaikum WBT*.

**YB Yang Dipertua Dewan:** Saya jemput YB Chennah untuk menyokong.

**YB ADUN Chennah:** Terima kasih kepada Dato' Dipertua. Dato' Dipertua saya bangun untuk menyokong usul yang dibawa oleh Yang Berhormat ADUN Johol untuk mengambil ketetapan menjunjung kasih Ke Bawah Duli Yang Maha Mulia Yang di-Pertuan Besar Negeri Sembilan atas titah ucapan baginda bagi merasmikan pembukaan Penggal Pertama, Dewan Undangan Negeri, Negeri Sembilan Yang Ke-15.

Sebelum saya memulakan perbahasan saya, Dato' Dipertua, saya juga ingin menyatakan semangat solidariti bersama dengan rakyat Palestin yang ketika ini menghadapi satu keadaan yang cukup mencabar. Apa yang berlaku di Palestin beberapa hari ini tidak boleh dilihat dalam konteks hanya 3 hari ini, tetapi konteks yang lebih lama iaitu sejarah yang berlaku di bumi Palestin selama lebih 75 tahun. Jadi, saya bersetuju dengan pandangan Yang Berhormat Rantau bahawa apa yang berlaku ini tidak boleh dilihat ataupun bukannya satu isu pertembungan agama tetapi satu isu kemanusiaan. Mengapa ada berlakunya pertelingkahan ataupun keganasan ini, ia berpunca daripada pencerobohan dan penjajahan tanah di kawasan tersebut selama berpuluh tahun dan rakyat Palestin dikurung di Gaza dengan begitu teruk sekali. Dan sudah tentu keamanan di Timur Tengah tidak akan dapat dicapai sehinggalah tanah ataupun bumi Palestin ini dibebaskan daripada penjajahan. Jadi saya menyatakan solidariti terhadap rakyat Palestin dan juga menyokong pendirian yang telah pun dibawa oleh Kerajaan Malaysia selama ini.

Dato' Dipertua, terlebih dahulu saya ingin merakamkan ucapan terima kasih dan penghargaan kepada pengundi-pengundi di DUN Chennah yang telah pun sekali lagi memberikan mandat kepada saya untuk menjadi Ahli Dewan Undangan Negeri bagi kawasan DUN Chennah, bagi penggal ke-3 untuk DUN Chennah. Dan justeru itu, penggal ke-5 sebagai ahli dalam Dewan yang mulia ini selepas dipilih dalam Pilihan Raya Negeri baru-baru ini. Saya berasa amat merendah diri dan boleh dikatakan amat menghargai dan tersentuh dengan sokongan yang telah diberikan oleh pengundi-pengundi di DUN Chennah. Malah majoriti saya di kawasan tersebut telah pun meningkat satu kali ganda daripada 1,100 undi, majoriti, meningkat kepada majoriti lebih daripada 2,000 undi. Dan saya merasakan bahawa ini adalah satu kepercayaan dan satu mandat yang besar daripada pengundi-pengundi untuk terus saya berkhidmat dan juga membawa suara pengundi Chennah dalam Dewan yang mulia ini. Dan seterusnya untuk memberikan bakti dan juga khidmat kepada Negeri Sembilan khususnya.

Saya juga mengambil peluang ini untuk mengucap, merakamkan ucapan tahniah kepada Yang Amat Berhormat Sikamat kerana sekali lagi diberikan mandat untuk menerajui Kerajaan Negeri Sembilan bagi

penggal yang kedua. Seperti titah ucapan Tuanku semalam, landskap dan juga corak pentadbiran Negeri Sembilan mengalami satu perubahan yang cukup drastik, satu perubahan yang cukup besar selepas Pilihan Raya Umum Ke-15 dan khususnya selepas PRN Ke-15. Kerajaan Negeri yang terbentuk selepas Pilihan Raya Negeri Ke-15 baru-baru ini merupakan Kerajaan Negeri yang paling kuat dan paling kukuh sejak tahun 2008.

Kalau kita mengimbas kembali rekod dalam Dewan ini, sejak tahun 2008, tidak ada Kerajaan Negeri yang mempunyai sokongan majoriti 2/3. Pada penggal DUN Yang Ke-12, iaitu selepas Pilihan Raya Umum tahun 2008, pembangkang mempunyai 15 kerusi berbanding dengan pihak kerajaan 21 kerusi pada ketika itu. Buat kali pertama, Kerajaan Negeri hilang majoriti 2/3. Selepas itu dalam penggal ke-13, Pilihan Raya Umum tahun 2013, walaupun pihak kerajaan pada ketika itu meningkat kerusi mereka, daripada 21 menjadi 22, namun begitu masih kurang daripada majoriti 2/3. Dalam penggal ke-14, apabila kerajaan bertukar tangan, Pakatan Harapan mengambil alih Kerajaan Negeri, kita hanya menguasai Kerajaan Negeri dengan majoriti yang tipis. Di pihak kerajaan – 20 kerusi, berbanding dengan pihak pembangkang 16 kerusi. Tetapi Kerajaan Negeri yang terbentuk pada hari ini, adalah kerajaan yang mempunyai 31 daripada 36 kerusi dalam Dewan un, yang mulia ini. Maksudnya kita mempunyai majoriti lebih daripada 2/3. Dan ini sudah tentu merupakan satu kekuatan baru dalam Kerajaan Negeri Sembilan di mana buat kali pertamanya kita ada gabungan di antara 2 gabungan politik besar di Negeri Sembilan iaitu Barisan Nasional dan Pakatan Harapan. Dan menunjukkan bahawa perpaduan itu membawa kekuatan kepada Kerajaan Negeri. Kita mempunyai 31 kerusi di blok kerajaan pada hari ini.

Namun, saya juga mengambil peluang ini untuk merakamkan ucapan tahniah kepada Yang Berhormat Gemas, yang telah pun dipilih sebagai Ketua Pembangkang. Pembangkang mempunyai peranan mereka sebagai semak dan imbang. Pembangkang, blok pembangkang pada penggal kini ada 5 kerusi. Jadi Yang Berhormat Gemas saya nak katakan, 5 kerusi itu agak bertuahlah. Ketika pada satu ketika saya menduduki kerusi Ketua Pembangkang, saya seorang saja. Ketua Pembangkang pun saya, penyokong pembangkang pun saya. Apabila saya cadang usul, tak ada penyokong, saya tak boleh bawa usul sebab hanya saya seorang, pada satu ketika. Saya duduk kerusi di sana hampir 14 tahun, daripada tahun 2004 sehingga tahun 2018. Jadi Yang Berhormat Gemas ada rakan yang boleh menyokong usul Yang Berhormat pada hari ini. Jadi, saya tidak memperkecilkan, walaupun 5 ahli Dewan pembangkang, saya tidak memperkecilkan sama sekali peranan yang dimainkan oleh pembangkang. Sudah tentu kita mengharapkan bahawa pembangkang

pada hari ini meneruskan tradisi pembangkang dulu iaitu kita membawa satu semangat dan juga peranan dan tanggungjawab dengan penuh berhemah.

Dan kita selalunya amat berbangga dengan budaya dalam Dewan Undangan Negeri di Negeri Sembilan kerana kita antara DUN Negeri Sembilan, DUN yang paling harmoni di negara kita. Tak ada pertelingkahan, tak ada pergaduhan dalam Dewan. Dan apa sahaja perbezaan pendapat itu kita sampaikan dengan berhemah. Dan kita me, mem, mempunyai satu perasaan hormat menghormati antara satu sama lain. Jadi saya berharap semangat ini terus dibawa oleh pembangkang pada hari ini. Kalau dulu, masa saya Ketua Pembangkang, saya duduk bertentangan dengan Yang Berhormat Rantau. Yang Berhormat Rantau; Menteri Besar, saya Ketua Pembangkang. Dia duduk sini, saya duduk saya. Di kerusi Gemas. Tapi hari ini, kita dah duduk bersebelahan. Jadi ini, ini dinamiknya politik, dan bahawa kita menampakkan bahawa politik negara kita mempunyai satu perubahan yang cukup besar. Dan kita mengharapkan bahawa perubahan ini membawa kepada satu kekuatan baru kepada negara dan kepada negeri kita.

Dato' Dipertua, dengan kekuatan politik pada hari ini, di mana Kerajaan Persekutuan telah pun berjalan dengan lancar selama hampir 10 bulan, dengan kekuatan majoriti di Dewan Rakyat. Dan Kerajaan Negeri mempunyai kekuatan majoriti lebih daripada 2/3. Kita mengharapkan dengan kestabilan dan kekuatan politik pada hari ini, kita dapat sama-sama memfokus kepada pertumbuhan negara kita. Kepada kemajuan negara kita. Apa yang penting ialah kita mesti menggunakan keamanan dan kestabilan politik dalam negara kita untuk kemajuan negara dan juga kepada pertumbuhan ekonomi. Kalau kita lihat negara-negara yang mempunyai konflik pada hari ini, umpamanya apa yang berlaku di Timur Tengah, apabila tidak ada kestabilan, tidak ada keamanan, maka ti, sudah tentu rakyat tidak boleh hidup dengan baik. Jadi apa yang ada dalam negara kita pada hari ini ialah ada keamanan, kita ada kerajaan yang dipilih melalui sistem pilihan raya, melalui sistem demokrasi. Dan kita mesti menggunakan faktor ini demi pertumbuhan negara yang lebih baik. Jadi, dengan adanya kerajaan yang stabil dan kukuh pada hari ini, kita mesti fokus kepada pertumbuhan ekonomi.

Saya amat bersetuju dengan apa yang dilontarkan oleh Yang Berhormat Johol tadi, bahawa kita mesti fokus kepada pelaburan kerana tanpa pelaburan, pertumbuhan ekonomi tak boleh berkembang. Dan Negeri Sembilan, walaupun negeri kita bukannya sebuah negeri yang besar, kita ada kekuatan kita tersendiri. Kita mempunyai kelebihan dari segi kedudukan geografi. Banyak sektor-sektor yang boleh kita terokai. Dan sudah tentunya selama ini banyak juga pelaburan yang telah dibawa

masuk ke Negeri Sembilan. Termasuklah sektor-sektor yang telah pun dinyatakan oleh Yang Berhormat Johol tadi, termasuk sektor aero angkasa, sektor maritim, sektor berteknologi tinggi dan sebagainya. Pada hari ini kita lihat bahawa beberapa kawasan perindustrian sudah penuh sesak dan sudah semakin berkembang termasuklah bukan saja di Senawang, di Nilai, di Bandar Enstek, di Sendayan, penuh dengan kilang-kilang yang berteknologi tinggi. Dan juga ada antaranya adalah syarikat-syarikat pelaburan daripada sektor aero angkasa.

Dan saya juga amat bersetuju bahawa kita mesti menggunakan kedudukan geografi kita yang dekat dengan Lembah Kelang, dengan sebaik-baiknya iaitu untuk kita memperkembangkan Negeri Sembilan sebagai satu hab logistik, logistik. Dalam perkara ini sudah tentu saya amat berminat kerana ia berkaitan dengan portfolio saya di peringkat Persekutuan sebagai Menteri Pengangkutan iaitu sektor logistik itu memainkan satu peranan yang cukup penting dalam pertumbuhan ekonomi kerana tanpa sokongan logistik yang baik, perindustrian negara kita tak boleh berkembang. Eksport dan import negara kita tak boleh tumbuh sekiranya tanpa satu sokongan logistik yang baik.

Jadi Negeri Sembilan mempunyai kelebihan dari segi menjadikan kawasan kita ini sebagai satu hab logistik terutamanya di kawasan-kawasan strategik di Negeri Sembilan. Di kawasan Nilai umpamanya, Bandar Enstek, dan di kawasan-kawasan bersempadan dengan KLIA. Itu merupakan kawasan-kawasan yang sangat strategik untuk dibangunkan sebagai hab logistik negara kita. Terutamanya di kawasan Nilai kerana ianya merupakan satu kawasan persimpangan Lebuhraya Utara Selatan yang menghubungkan antara kawasan-kawasan ataupun negeri-negeri di selatan dengan negeri-negeri di utara. Di mana kita ada hubungan Lebuhraya Elite yang menghubungkan daripada Nilai, daripada selatan terus ke utara tanpa melalui Kuala Lumpur. Jadi kawasan tersebut merupakan satu kawasan yang cukup strategik. Dan sudah tentu kita boleh menggunakan kekuatan ini, kelebihan ini untuk menarik pelaburan-pelaburan daripada industri logistik ataupun syarikat-syarikat logistik ini untuk menubuhkan pangkalan mereka ataupun menubuhkan *warehouse* mereka di kawasan-kawasan tersebut.

Saya tahu bahawa umpamanya selama ini, banyak syarikat logistik, mereka berpusat di kawasan Shah Alam, di kawasan *Klang*, kerana berdekatan dengan Pelabuhan Kelang. Tetapi di kawasan-kawasan seperti Shah Alam dan *Klang* sekarang ini sudah begitu sesak, penuh, tak ada tanah lagi untuk dibangunkan. Jadi saya mengharapkan pihak UPEN, Kerajaan Negeri Sembilan, boleh memberikan fokus bersama-sama dengan Invest Negeri Sembilan untuk cuba mendapatkan pelaburan dalam, daripada sektor logistik di kawasan-kawasan ini. Dan kita kenal

pasti kawasan-kawasan tapak-tapak perindustrian ataupun tapak-tapak yang boleh dibina *warehouse* ini, gudang-gudang besar ini untuk kita menarik pelaburan dalam sektor tersebut.

Baru semalam saya juga dibentangkan satu kertas cadangan daripada sebuah syarikat tempatan yang merupakan pengasasnya orang Seremban, untuk menubuhkan satu fasiliti *cold chain* ataupun satu gudang yang memberikan kemudahan pembekuan sejuk kepada, kepada kilang-kilang di, di kawasan sekelilingnya. Jadi, *facilities* seperti ini amat penting dan kita mengharapkan bahawa ada tapak-tapak yang sesuai dapat dikenal pasti untuk tujuan itu.

Kita juga mesti terus memberikan fokus kepada perindustrian, pertumbuhan perindustrian. Dan pertumbuhan perindustrian yang kita nak kenal pasti ialah berteknologi tinggi yang dapat mem, meningkatkan daya saing negara kita untuk dieksport ke luar negara. Dan selama ini salah satu kekurangan di Negeri Sembilan ialah bahawa kita tidak ada *port*, tak ada *airport* ataupun *port*. Kita tak ada pelabuhan mahupun lapangan terbang. Lapangan terbang sudah tentu Negeri Sembilan tak perlu sebab kita berdekatan dengan KLIA. Malah kita antara negeri yang paling dekat dengan KLIA. Jadi, tidak ada keperluan lapangan terbang di Negeri Sembilan.

Tetapi saya rasa bahawa ada pelbagai cadangan, pelbagai permintaan supaya pelabuhan diadakan. Saya nak memaklumkan kepada Dewan yang mulia ini, kepada Kerajaan Negeri, bahawa di atas kapasiti saya sebagai Menteri Pengangkutan, baru-baru ini ada sebuah syarikat swasta yang telah berhubung dengan saya, untuk menyatakan cadangan untuk membina sebuah pelabuhan kecil di Port Dickson, secara usahasa, usaha swasta. Saya mengalu-alukan cadangan tersebut kerana ia pertamanya bukannya permohonan daripada kerajaan untuk membina pelabuhan itu, sebab pelabuhan-pelabuhan negara kita ini secara umumnya telah pun diswastakan. Jadi sebarang pembinaan pelabuhan itu adalah usaha daripada pihak swasta. Dan ada minat daripada sebuah syarikat swasta ini yang mempunyai sebuah, sebidang tanah yang besar di Port Dickson untuk mereka membina satu pelabuhan kecil ataupun *mini port* di Port Dickson. Mereka telah bentang kepada Kementerian Pengangkutan tetapi pihak Kementerian Pengangkutan memohon mereka supaya terlebih dahulu mendapatkan sokongan daripada pihak Kerajaan Negeri, merujuk perkara ini kepada UPEN dan juga kepada Pejabat Menteri Besar.

Jadi saya mohon supaya pihak Yang Amat Berhormat Menteri Besar dan juga pihak Unit Perancang Ekonomi Negeri untuk melihat kepada kertas cadangan ini, adakah ia bersesuaian dengan Negeri Sembilan. Sekiranya

pihak Kerajaan Negeri memberikan sokongan secara prinsip, maka di pihak Kementerian Pengangkutan, kita akan memberikan *facilitation* untuk membantu merealisasikan projek ini. Sudah tentu ia tertakluk kepada kajian-kajian teknikal yang perlu di .....

**YAB ADUN Sikamat:** Pada dasarnya Kerajaan Negeri telah menyokong permohonan ini. Dan saya telah, minta untuk UPEN untuk buat kajian perkara tersebut.

**YB ADUN Chennah:** Ya, terima kasih Yang Amat Berhormat Sikamat. Saya mengalu-alukan sokongan daripada Kerajaan Negeri ini. Jadi di peringkat Kementerian Pengangkutan, sudah tentu apabila ada sokongan daripada Kerajaan Negeri, kita akan cuba bantu. Tapi ia tertakluk, masih tertakluk kepada kajian-kajian fizikal, sama ada ia sesuai *feasibility* dan sebagainya. Termasuklah kajian alam sekitar, sama ada ia bersesuaian untuk di, dibina sebuah pelabuhan mini di kawasan tersebut. Namun begitu, saya rasa sekiranya projek ini dapat direalisasikan, ia merupakan satu nilai tambah kepada Negeri Sembilan kerana dengan adanya infrastruktur seperti ini, ia dapat menarik minat syarikat-syarikat pelaburan ataupun syarikat-syarikat perindustrian untuk membinakan kilang-kilang di kawasan tersebut.

**YB ADUN Rantau:** Boleh mencelah? Mohon mencelah Dato' Dipertua ya. Saya amat tertarik dengan apa yang disebutkan oleh ADUN Chennah ya, rakan saya di Kabinet, yang menyatakan bahawa Negeri Sembilan akan ada, akan mendapat dan disokong oleh Yang Amat Berhormat Sikamat, pelabuhan. Tetapi saya ingin mencadangkan ya, Yang Berhormat Chennah, bahawa pelabuhan yang nak kita adakan itu jika boleh jangan pelabuhan biasa. Buat pelabuhan yang mana memberikan kemudahan kepada kapal-kapal yang telah pun memunggah barang-barang mereka di Pelabuhan Kelang ataupun di Singapura. Pelabuhan di Port Dickson ini sebagai *feeder port* yang boleh memberikan kemudahan untuk mereka *replenish* apa sahaja ya. Dan kalau boleh, jadikan ianya jugak sesuai untuk mana-mana sebagai *port on call* oleh kapal-kapal tentera yang besar kerana jika mereka berlabuh di satu-satu tempat itu, dekat 1,000 ke 2,000 anggota akan turun, duduk dalam seminggu dan hotel-hotel dan perniagaan akan menjadi, mendapat banyak peluang-peluang perniagaan. Saya cadangkan supaya cadangan yang dibuat oleh Menteri Pengangkutan tadi itu kita jangan buat bersaing dengan pelabuhan yang dah ada kerana Westport dan jugak Pelabuhan Utara pun akan membesarkan dia punya terminal, dia punya *wharf* tambah lagi 3 ke 4. Singapura dan Pasir Gudang pun ada jadi kita, kita ambil satu *niche* yang berlainan iaitu pelabuhan yang menyediakan kemudahan kepada mereka nak *replenish* dia punya bahan-bahan ataupun apa sahaja. Terima kasih.

**YB ADUN Chennah:** Terima kasih Yang Berhormat Rantau. Memang apa yang dikatakan oleh Yang Berhormat Rantau itu amat tepat sekali. Kita tidak bercadang untuk *reinvent the wheel*, dengan izin, iaitu kita memang sudah tentu kita tahu bahawa di sepanjang Selat Melaka ini kita sudah ada banyak pelabuhan. Dan pelabuhan utama negara kita adalah Pelabuhan di *Port Klang*, iaitu *Westport* dan juga *North Port* di Pelabuhan Kelang dan juga Pelabuhan Tanjung Pelepas di Johor. Itu 2 pelabuhan yang besar. Dari segi *container terminal* memang kapasitinya besar dan mereka memang sudah *establish* dari segi kapasiti mereka. Jadi apa yang nak dilaksanakan di Port Dickson ini, nak dicadangkan oleh pihak syarikat swasta ini, dia merupakan satu *dedicated port*. Satu *port* yang kecil, bukannya besar, bukannya dengan kren yang besar, sebab kapasitinya kita tak boleh bersaing dengan *Port Klang* sebab *Port Klang* pun bukan jauh sangat, ataupun dengan PTP. PTP sudah ada *niche* dia. Dia ada usahasama dengan syarikat perkapalan terbesar dunia, Maersk.

Jadi apa yang dicadangkan di Port Dickson ini ialah satu *dedicated port*, satu *port* yang bersifat *smart port*, dengan menggunakan teknologi baru dan sebagainya. Dan saya mengambil maklum apa yang dicadangkan oleh Yang Berhormat Rantau yang juga Menteri Pertahanan, sekiranya ada dibenarkan kapal-kapal tentera yang boleh berlabuh untuk mendapatkan bahan mereka untuk kru mereka bertukar, untuk mereka bercuti sekejap ataupun turun untuk beriadah dan sebagainya. Kalau itu dibenarkan oleh pihak Kementerian Pengangkutan, Pertahanan, saya rasa itu merupakan satu nilai tambah kepada apa yang dicadangkan. Kerana itu juga merupakan satu ekonomi tambahan kepada, kepada negeri kita terutamanya di Port Dickson.

Dan sudah tentu pelabuhan, apabila ada satu kemudahan tersebut, dia banyak lagi yang boleh dibuat, dilaksanakan selain daripada *supply* untuk kapal-kapal. Satu lagi, satu lagi sektor yang penting juga ialah kapal-kapal Persiaran. Kapal-kapal persiaran yang pernah dia, mereka berlabuh di Port Dickson, tak ada port. Dia terpaksa buat *tender boat* untuk masuk melalui jeti. Jadi, sebab dia tak ada satu pelabuhan yang boleh mereka berlabuh. Melaka sekarang ini juga nak bangunkan *cruise terminal*. Jadi Port Dickson ini juga ada, ada tarikan dia sendiri sekiranya ada kemudahan seperti ini, ia boleh ada pelbagai kegunaan dan juga kita harap ia dapat mem, mem, membantu dari segi pertumbuhan ekonomi di Port Dickson khususnya, dan juga Negeri Sembilan.

Jaga, jadi saya mengharapkan bahawa *facilitation* seperti ini dapat kita usaha secara bersama. Dan itulah saya nak nyatakan bahawa apabila kita ada kestabilan politik, kita ada kerjasama yang baik di antara persekutuan dengan negeri, banyak projek pembangunan seperti ini dapat dilaksanakan. Kerana yang pentingnya apa yang kita lihat ialah

kita memberikan keyakinan kepada pelabur. Tak ada pelabur yang akan nak melabur dalam sesuatu negeri itu sekiranya tidak ada satu kedudukan kerajaan yang kukuh. Kalau dasar-dasar kerajaan berubah dari masa ke semasa tanpa, tanpa berhenti ataupun tanpa satu kepastian, sudah tentu tak ada sesiapa nak melabur. Tetapi mereka melihat bahawa kerajaan pada hari ini sudah kukuh, sudah stabil, dan sudah ada minat-minat seperti ini yang lebih serius pada ketika ini. Dan mereka mengharapkan bahawa kelulusan dapat diberikan dengan lebih segera. Jadi kita sudah tentu memberikan *facilitation* kepada Kerajaan Negeri.

Dato' Yang Dipertua, yang kedu, perkara yang kedua yang saya nak nyatakan sedikit ialah berkenaan dengan Bandaraya Seremban, okey. Seremban telah dinaik taraf sebagai bandar raya. Kita status kita ini sekarang ini bukan saja sebagai bandar biasa, kita merupakan ibu negeri, kita juga merupakan status bandar raya. Jadi, dengan status bandar raya ini, saya mengharapkan bahawa pihak Kerajaan Negeri dapat memberikan tumpuan yang lebih kepada menaiktarafkan kemudahan-kemudahan di Bandaraya Seremban. Dan juga mengindahkan, memberikan satu semangat ataupun satu persekitaran yang lebih indah, lebih cantik kepada Seremban. Sebab Seremban selama ini orang tak begitu tengok kita sebagai satu bandar raya yang menarik sebab dari segi aktivitinya tak banyak. Dari segi perhiasan-perhiasan bandar raya kita tak begitu menarik. Jadi saya mengharapkan bahawa pihak Kerajaan Negeri memberikan lebih banyak perhatian termasuklah kepada pihak Majlis Bandaraya Seremban. Saya tengok dalam titah ucapan Tuanku semalam ada menyebut bahawa tahun lepas pun, daripada defisit, kita menjadi *surplus*, jadi kita ada peruntukan lebihan sebab hasil kita meningkat. Jadi Kerajaan Negeri bolehlah membelanjakan sedikit tambahan untuk menghiaskan Bandaraya Seremban terutamanya untuk musim-musim perayaan; Hari Raya Aidilfitri, Deepavali, Tahun Baru Cina, akhir tahun dan sebagainya. Hiaslah Bandaraya Seremban kita ini supaya ada sedikit *mood* yang lebih baik, *mood* yang positif. Supaya apabila *mood* yang positif, rakyat pun gembira, rakyat pun bahagia. Jadi saya mengharapkan bahawa ada tumpuan kepada perkara-perkara seperti ini. Dan saya mengharapkan Majlis Bandaraya Seremban dapat membantu dan memberikan fokus kepada mengindahkan dan menghiaskan Seremban ini.

Saya juga ada, sebagai Ahli Parlimen Seremban, saya juga cuba mendapatkan sokongan dan juga peruntukan daripada pihak Kementerian Pembangunan Kerajaan Tempatan. Baru-baru ini memang ada beberapa projek yang telah pun diluluskan termasuklah membina Dataran Lobak, kita memberikan kemudahan riadah tambahan kepada warga di Bandaraya Seremban ini.

Satu perkara yang saya nak sebut di sini, dan memberikan cadangan ialah kita di Bandaraya Seremban ini ada 2 *landmark* yang penting. Kerana bandar, pertumbuhan sesuatu bandar itu, dia amat berkaitan dengan pengangkutan. Seremban ini sejarahnya ada kereta api. Stesen Keretapi Seremban ini merupakan antara stesen yang paling bersejarah di negara kita. Dan stesen kereta api itu merupakan nadi kepada pertumbuhan Seremban ini selama berpuluh tahun ini. Tetapi stesen kereta api pada hari ini memang amat mundurlah dari segi fizikalnya, dari segi bangunannya. Dia bangunan bersejarah yang kita kekalkan tetapi saya sudah tentu sebagai Menteri Pengangkutan akan membuat, memainkan peranan untuk cuba menaik taraf Stesen Keretapi Seremban.

Tetapi apa yang saya nak cadangkan kepada pihak Kerajaan Negeri ialah melihat secara strategik bagaimana kita membangunkan semula kawasan, boleh dikatakan kawasan segi tiga di Bandaraya Seremban ini. Iaitu antara Stesen Keretapi Seremban dengan Terminal 1, bas Seremban dan juga tapak Sekolah Convent dulu. Yang merupakan Dataran Seremban pada hari ini, tetapi kita ada satu kolam renang yang paling besar dalam dunia yang tak boleh renang. Yang dah ber, dah berapa, 30 tahun dah. Kita nampak pun sedih ya. Tapak yang besar itu, di tengah-tengah Bandaraya Seremban, tetapi tak dapat dimajukan. Saya difahamkan ada pelbagai cubaan nak menghidupkan semula projek itu. Tetapi masih belum berjaya. Saya harap pihak Kerajaan Negeri tidak berputus asa, terus cuba mendapatkan pihak tuan punya tanah ataupun ada pihak yang lain yang nak memajukan kawasan itu, sebagai satu *commercial center* yang penting kepada Seremban, kepada Bandaraya Seremban. Tetapi projek itu tidak boleh *stand alone*, dia mesti diintegrasikan dengan hab pengangkutan kita iaitu ada Terminal 1, ada jaringan bas, dan juga kereta api, Stesen Keretapi Seremban ini bakal menjadi satu stesen yang penting. Walaupun HSR belum lagi. Tetapi stesen keretapi ini yang pertamanya ada beberapa projek yang sedang dilaksanakan oleh Kerajaan Persekutuan. Kita sedang menaik taraf landasan berkembar antara Lembah Kelang dengan Seremban. Jadi apabila landasan berkembar ini siap kelak dinaik taraf semula, dibaiki semula, kita akan dapat menambah *trip commuter* di antara Seremban dengan Kuala Lumpur. Itu pertama yang sudah tentu saya akan laksanakan.

Yang keduanya ialah, di antara Gemas ke Johor Bahru landasan berkembar sedang pun dilaksanakan dan akan siap tak lama lagi. Dalam, mungkin dalam setahun lagi dia akan mula beroperasi. Maksudnya daripada Seremban kita boleh terus ke Johor Bahru. Kalau dulu-dulu memang daripada Seremban boleh terus ke Singapura, tetapi sekarang ini sebab telah dinaiktarafkan kepada landasan berkembar, jadi ETS pada ketika ini dia hanya sampai ke Gemas. Tetapi apabila siap di antara

Gemas dengan Johor Bahru, ETS ini akan dapat disambung sehingga ke Johor Bahru. Jadi daripada Johor Bahru boleh datang ke Seremban ataupun ke utara. Jadi, di antara utara dengan selatan, Seremban ini di tengah-tengah. Jadi Stesen Keretapi Seremban ini amat penting untuk kita naik tarafkan dan mengintegrasikannya dengan Terminal 1. Dan juga saya berharap kita boleh membawa semula projek pembangunan di Dataran Seremban, terutamanya sebagai satu *commercial center*.

Apa yang saya harapkan daripada Kerajaan Negeri ialah supaya pastikan supaya pihak Majlis Bandaraya Seremban memastikan projek untuk menaik taraf Terminal 1 itu dapat dilaksanakan dengan baik. Setakat ini walaupun saya difahamkan bahawa sudah ada pelantikan syarikat baru untuk menaik taraf semula Terminal 1 itu, tetapi projek itu masih belum dapat dilaksanakan. Saya harap ini dapat diberikan fokus ataupun diberikan perhatian.

Satu jang, projek jangka pendek yang telah pun saya bantu untuk laksanakan ialah menaik taraf terowong pejalan kaki di antara Stesen Keretapi Seremban dengan Terminal 1. Di antara, Dato' Dipertua, di antara stesen keretapi boleh jalan kaki sampai ke Terminal 1 melalui satu terowong bawah, terowong pejalan kaki bawah tanah. Tetapi terowong itu amat teruk sekali, banyak *vandalism* berlaku dan sebagainya. Saya telah pun memihak, meminta pihak Perbadanan Aset Keretapi (RAC) untuk membelanjakan peruntukan ratus ribu untuk naik taraf terowong itu. Dan kita bakal merubah wajah terowong tersebut supaya menggalakkan lebih ramai orang menggunakan terowong itu sebagai penghubung di antara stesen kereta api dengan Terminal 1. Jadi projek itu akan disiapkan menjelang akhir tahun ini, satu projek jangka pendek, mengambil masa beberapa bulan saja. Kita tambah landskap, tambah *design*, naik tarafkan terowong itu menjadikan dia lebih selamat, lebih indah dan lebih selesa digunakan oleh pihak orang ramai.

Satu lagi perkara yang saya nak sebut di sini berkenaan dengan perkhidmatan pengangkutan di Seremban ialah MyBAS. MyBAS Seremban ini memang telah dimulakan sejak 7 – 8 tahun yang lalu. Yang Berhormat Rantau pun tahu bahawa MyBAS ini antara MyBAS pertama di negara kita di bawah Program SBST di mana pihak Kerajaan Persekutuan membelanjakan satu jumlah yang besar setiap tahun untuk memastikan kita ada perkhidmatan bas berhenti-henti yang lebih efisien. Jadi kontrak itu pun hampir tamat akhir tahun ini. Kita akan buat tender untuk, untuk kita apa ni, memanjangkan ataupun kita melantik kon, pihak operator yang baru untuk memastikan MyBAS ini dapat terus berjalan.

Tetapi kita apabila melantik ataupun ada kontrak yang baru untuk MyBAS ini, yang pertamanya kita sudah tentu ada beberapa syarat baru. Kita nak bas yang lebih baru. Bas yang lebih efisien. Kalau tengok MyBAS hari ini, memang basnya dah agak usang, dah agak lama. Kita nak memperbaharui *flick* tersebut, kalau boleh kita juga nak memastikan juga ada bas EV yang dapat digunakan di Bandaraya Seremban ini, sebab semua orang bercakap pasal *sustainability*, semua orang bercakap pasal EV. Kita juga perlu pastikan bas awam kita ke arah bas EV.

Dan satu lagi perkara yang telah pun dilaksanakan baru-baru ini, untuk makluman Dewan yang mulia ini ialah kita telah memulakan dasar untuk memberikan pas konsesi secara percuma kepada warga emas berumur 60 tahun ke atas dan juga pelajar-pelajar sekolah di bawah, pelajar sekolah rendah ataupun sekolah menengah. Hampir 4,000 pas konsesi ini telah pun dipohon oleh warga Negeri Sembilan. Jadi untuk makluman Dewan yang mulia ini, Kerajaan Persekutuan telah pun memberikan perkhidmatan ini secara percuma. Mengapa kita buat begitu sebab kita tahu bahawa SBST, berapa penumpang pun kita bayar kadar yang sama. Jadi saya apabila mengambil alih Kementerian Pengangkutan, saya kata lebih baik kita bagi percuma. Sebab telah membelanjakan satu, satu jumlah yang besar. Berapa penumpang pun kita kena bayar yang sama. Kita hanya dapat balik sedikit daripada kutipan tambang. Jadi kita merasakan bahawa kita membantu golongan OKU, golongan warga emas dan juga golongan pelajar. Jadi kita bagi pas konsesi secara percuma. Apabila mereka ada pas konsesi itu, mereka boleh menggunakan perkhidmatan MyBAS secara percuma. Jadi ini merupakan satu *complimentary service* kepada pihak Kerajaan Negeri dan kita sama-sama memberikan bantuan kepada rakyat Negeri Sembilan.

Dato' Dipertua, *point* yang terakhir berkenaan, sedikit berkenaan dengan kawasan iaitu di Chennah khususnya dan di Jelebu secara umumnya satu faktor yang penting yang mesti diberikan perhatian oleh Kerajaan Negeri ialah pembangunan sektor eko pelancongan. *Eco tourism* itu merupakan satu sektor yang sangat berpotensi khususnya di Daerah Jelebu. Kerana Jelebu ini ada, ada persekitaran semulajadi yang sangat baik, ada banyak gunung, bukit dan juga udaranya nyaman. Dan ramai yang, orang yang suka Jelebu ini sebab alam semulajadinya. Ada air terjun, ada sungai dan sebagainya. Jadi saya mengharapkan bahawa Kerajaan Negeri memberikan fokus bagaimana untuk membangunkan sektor *eco tourism* di Jelebu ini.

Khususnya di kawasan DUN Chennah, eko pelancongan ini juga amat diberikan perhatian. Banyak juga pihak swasta yang telah membeli tanah di kawasan tersebut yang menjadikan tanah mereka sebagai tapak untuk eko pelancongan. Tetapi apa masalah yang dihadapi ialah, di

pihak PBT dia tak ada satu garis panduan yang jelas bagaimana untuk meluluskan projek-projek eko pelancongan ini. Umpamanya nak buat *camping site* ataupun nak buat tapak untuk *caravan* dan sebagainya. Dia tak ada satu garis panduan. Kita tak mahu apa yang berlaku di Batang Kali pada tahun lepas berulang. Jadi mesti ada garis panduan yang jelas supaya kita pastikan aspek keselamatan mesti terjamin dan kita sama-sama dapat bangunkan, memberikan kelulusan dengan lebih cepat bagaimana eko pelancongan itu dapat diluluskan.

**YAB ADUN Sikamat:** Mintak izin Yang Berhormat Chennah. Mengenai garis panduan untuk pelancongan ni, kita sedang menunggu garis panduan dari Kementerian Pelancongan untuk kita selaraskan di seluruh negara. Dan PLANMalaysia sedang, sedang me, menyiapkan perancangan tersebut. Terima kasih.

**YB ADUN Chennah:** Ya, kita harap dapat dipercepatkan supaya projek-projek yang nak dibawa oleh pihak swasta ini dapat kita hidupkan sebab apabila mereka menyediakan resort, tapak penginapan dan sebagainya ia dapat menarik lebih ramai orang untuk, untuk bermalam di Jelebu. Antara masalah yang berlaku di Jelebu sekarang ini ialah walaupun ada pengunjung, walaupun ada pelancong nak datang, tetapi tak, kawasan penginapan tak banyak. Hotel pun tak banyak, tak ada hotel pun. Ada hotellah, hotel bajet dan sebagainya, 1, 2. Kebanyakannya kalau pergi dia buat *homestay* saja. Tapi dia perlukan tapak untuk mereka bermalam, menginap 2, 3 malam dan sebagainya. Itu akan menambah pendapatan kepada rakyat Jelebu.

Satu perkara cadangan khusus yang saya nak juga cadangkan kepada pihak Kerajaan Negeri, dan saya akan mem, memberikan sokongan sebagai ADUN, ialah bagaimana kita dapat memasarkan produk-produk pertanian di kawasan sekeliling untuk dijual terus kepada, kepada pengunjung. Satu perkara yang saya nak laksanakan di kawasan DUN Chennah iaitu kita sudah naik taraf Dewan Orang Ramai Titi. Di luar Dewan Orang Ramai Titi itu ada satu tapak parkir, *parking* yang besar, yang telah pun diturap dengan cantik. Itu sebenarnya di bawah kawasan Klawang. Ramai orang Titi menggunakan dewan orang ramai itu, tetapi dewan itu berada di kawasan Hosapa, di kawasan Klawang. Saya nak cadangkan bersama-sama dengan Kerajaan Negeri khususnya Jabatan Pertanian melalui FAMA dan sebagainya, boleh mengumpulkan petani-petani ataupun mana-mana orang yang ada hasil pertanian, termasuk masyarakat orang Asli untuk mereka membuat pasar tani secara mingguan di tapak dewan orang ramai itu.

Saya berharap bahawa mendapat sokongan daripada Exco Pertanian; Yang Berhormat Pertang yang juga Ahli Parlimen Jelebu, juga

Yang Berhormat Klawang; mantan Exco Pertanian, sama-sama kita bekerjasama, dapat menghidupkan satu tapak pasar tani. Sebab di sana, yang pertamanya tapak itu cukup besar untuk disediakan pasar tani itu secara mingguan, pada hari Sabtu ataupun hari Ahad setiap pa, setiap minggu. Yang keduanya, sudah ada pasaran sedia ada. Sebab setiap hujung minggu ramai orang daripada Lembah Kelang, mereka pergi ke Titi, pergi ke Klawang untuk bersarapan pagi, membeli produk-produk pertanian dan sebagainya. Jadi apabila kita ada satu pasar tani yang menghimpunkan petani-petani ini, kita ada satu pasaran yang lebih besar. Jadi saya mengharapkan bahawa mendapat sokongan daripada pihak FAMA supaya mengumpulkan petani-petani ini. Dari segi prasarana, kemudahan dan sebagainya pihak Pejabat ADUN boleh memberikan bantuan, menyediakan khemah dan sebagainya. Dan kita akan buat promosi secara besar-besaran supaya ia mendapat perhatian daripada lebih ramai orang, luar daripada Jelevu supaya datang ke Jelevu pada hujung minggu. Dan mereka juga boleh dapatkan produk-produk pertanian. Silakan.

**YB ADUN Klawang:** Celahan yang, Dato' *Speaker*. Saya ingin membangkitkan sedikit apa nama ni, satu isu, jalan yang antara DUN Chennah jugak ke Hulu Langat. Masih lagi tidak di, boleh dilalui oleh kenderaan 4 roda. Saya mintak perkara ini perlu di, di, dipercepatkan di belah Selangor, *insyaAllah*.

**YB ADUN Chennah:** Ya, terima kasih. Memang itu satu masalah yang besar jugak sebab kawasan jalan yang menghubungkan ja, Daerah Jelevu, Negeri Sembilan dengan Daerah Hulu Langat di Selangor, ia terputus sejak banjir besar berlaku tahun 2021 lagi. Banyak kawasan tanah runtuh di sepanjang jalan tersebut yang belum diperbaiki. Dan saya mengharapkan bahawa pihak Kerajaan Negeri dapat memberikan perhatian supaya cuba mendapatkan kerjasama daripada pihak persekutuan dan Kerajaan Negeri Selangor supaya membaiki tebing-tebing tanah runtuh di sepanjang jalan tersebut. Ia amat menyusahkan orang Jelevu sekarang sebab orang Jelevu menggunakan jalan itu untuk balik ke Kuala Lumpur ataupun daripada Kuala Lumpur balik ke Jelevu pada hujung minggu. Tanpa jalan itu, mereka terpaksa menggunakan sama ada Lebu Raya Utara Selatan ataupun LEKAS sahaja. Jadi kalau ada jalan pintas itu, yang menghubungkan Jelevu dengan Hulu Langat, ia amat memudahkan perjalanan di antara 2 kawasan itu dan juga memudahkan lebih ramai pengunjung daripada Lembah Kelang ke Jelevu pada hujung minggu. Jadi saya mengharapkan bahawa pihak Kerajaan Negeri dapat membantu dalam perkara ini dan kita dapat meningkatkan taraf sosio ekonomi di Daerah Jelevu dan DUN Chennah secara khususnya.

Tuan Yang Dipertua, saya sekali lagi mengucapkan terima kasih atas peluang yang diberikan. Dan saya mengharapkan bahawa kerjasama kita pada hari ini, di antara 2 gabungan politik besar; Pakatan Harapan dan Barisan Nasional yang membentuk Kerajaan Perpaduan di Negeri Sembilan ini dapat berjalan dengan baik, berjalan dengan lancar. Ini hanya permulaan. Banyak perancangan yang boleh kita buat sekali. Dan banyak pelaksanaan projek-projek yang memberikan manfaat kepada rakyat yang kita yakin akan membawa kesejahteraan dan kemajuan kepada Negeri Sembilan. Dengan kata-kata itu, Dato' Dipertua, saya menyokong usul yang dibawa oleh Yang Berhormat Johol. Terima kasih.

**YB Yang Dipertua Dewan:** Terima kasih Yang Berhormat. Ahli-ahli Yang Berhormat, tuan-tuan dan puan-puan, Dewan ditangguhkan dan bermula semula pada pukul 2:30 petang ini bagi menyambung bahas, perbahasan usul menjunjung kasih titah Duli Tuanku ya, tangguh.

**[Mesyuarat Dewan ditangguhkan pada jam 1.05 petang]**

---

**[Mesyuarat Dewan disambung semula pada jam 2.30 petang]**

**YB Yang Dipertua Dewan:** *Assalamualaikum WBT.* Ahli-ahli Yang Berhormat sekalian, serta hadirin sekalian, seterusnya Dewan menyambung semula perbahasan usul menjunjung kasih titah ucapan Diraja. Dipersilakan YB Gemas.

**YB ADUN Gemas:** Terima kasih Yang Berhormat Dato' Yang Dipertua, *assalamualaikum WBT*, salam sejahtera. *Bismillahirrahmanirrahim.* Yang Berhormat Dato' Yang Dipertua; Dato' M K Ibrahim Abd Rahman, Dato', ADUN Sikamat belum masuk lagi, ahli-ahli Kerajaan Negeri, rakan-rakan Yang Berhormat, tuan-tuan, puan-puan yang, hadirin yang dihormati sekalian. *Alhamdulillah* pertamanya saya meluahkan kesyukuran dengan izinNya kita masih lagi diberi kesempatan dan kesihatan untuk sama-sama hadir ke Dewan yang mulia untuk meneruskan tugas dan tanggungjawab kita. Walaupun negeri kita dilanda dengan kualiti udara jerebu di sesetengah tempat, tapi kita masih hadir hari ini untuk bersama-sama meneruskan sidang pada hari ini.

Yang Berhormat Dato' Yang Dipertua, terima kasih kerana memberi ruang kepada saya untuk memberikan ucapan menjunjung kasih selaku Ketua Pembangkang sempena Persidangan Kedua Penggal Pertama, DUN Negeri Sembilan Yang Ke-15 ini. Saya juga ingin mengucapkan tahniah kepada Dato' Yang Dipertua di atas pelantikan yang di, sebagai

Yang Dipertua Negeri, negeri, Negeri Sembilan pada kali ini. Tahniah Dato'.

**YB Yang Dipertua Dewan:** Terima kasih.

**YB ADUN Gemas:** *Alhamdulillah*, kita memanjatkan kesyukuran ke hadrat Ilahi atas rahmatNya kesejahteraan dan kemakmuran yang telah kita nikmati di negara Malaysia khususnya di negeri beradat Perpatih ini. Berkat kepimpinan terdahulu, kini gabungan Kerajaan Perpaduan malah dikuatkan lagi dengan 5 wakil rakyat daripada Perikatan Nasional ini. Kami ini datang sebagai semak dan imbang untuk bersama-sama tuan-tuan dalam memajukan negeri ini.

Tahniah Kerajaan Negeri yang diterajui Yang Amat Berhormat Sikamat yang telah berjaya meningkatkan hasil negeri, mengurus kewangan dengan penuh integriti. Kutipan hasil sebanyak 521 juta bersamaan 20.6% melebihi sasaran tahun lalu iaitu 432 juta. Malah tahniah juga atas pencapaian merekodkan pelaburan yang tertinggi sebanyak 8.9 bilion berbanding pada tahun 2021 iaitu sebanyak 5.8 bilion sahaja. Keluaran negeri, Dalam Negeri Kasar negeri ini juga berjaya mencatat kadar pertumbuhan sebanyak 6.4% berbanding 2021. Tahniah kepada semua agensi-agensi kerajaan yang bertungkus lumus bersama dengan kita dalam menjana kemajuan dan pendapatan untuk negeri ini. Tahniah tuan-tuan.

Dalam pada itu, Gemas serta 4 lagi Yang Berhormat Perikatan Nasional daripada Paroi, daripada Labu, Bagan Pinang dan Serting menjunjung titah Yang di-Pertuan Negeri Sembilan; Tuanku Muhriz ibni Almarhum Tuanku Munawir berkenaan perkara utama yang perlu diterjemahkan dalam setiap pencapaian cemerlang negeri kita ini. Kesannya kepada rakyat yang masih dibelenggu dengan 3 perkara semalam, yang dibangkitkan oleh Baginda Tuanku.

Pertama: isu kos sara hidup. Kedua: peluang pekerjaan. Yang ketiga: jurang pendapatan antara kawasan bandar dan luar bandar. Oleh itu, kami bertegas mahu Kerajaan Negeri melaksanakan langkah proaktif dan tepat bagi menangani isu kos sara hidup terutamanya berkaitan makanan untuk mendapatkan beras yang jadi isu sekarang ini, lain-lain seperti minyak masak dan segala keperluan di rumah hari ini. Sebagai permulaan, isu ini diketengahkan akibat keresahan rakyat dalam mendapatkan bekalan terutamanya golongan berpendapatan rendah. Izinkan saya berkongsi serangkap pantun.

Kalau tuan pergi ke Gemas,  
Lihat-lihatlah sawah di Londah,  
Kalau isu beras dan barangan ini membuatkan rakyat cemas,  
Marilah kita di Dewan, Dewan Rakyat ini kita pastikan kita  
mencari nokhtah.

Jadi saya percaya semua pihak di peringkat pentadbiran Yang Amat Berhormat Menteri Besar, Exco Kerajaan Negeri yang berkaitan, dan kita semua wakil rakyat ini bersama untuk menjamin kesejahteraan rakyat di bawah ini. Kos barangan yang melambung tinggi ini perlu kita atasi bersama. Kita akui kos ini memang setiap tahun akan meningkat, tapi kita berilah khabar gembira kepada rakyat di bawah ini.

Masalah rakyat seperti mendapatkan kediaman mampu milik dan peluang pekerjaan adalah perkara isu yang tidak pernah diberhentikan oleh semua wakil rakyat. Tapi hari ini, isu ini lebih kepada isu kemanusiaan di mana, kalau kita katakan isu kemanusiaan, sukarnya keluarga-keluarga kita di desa, keluarga-keluarga kita yang berpendapatan rendah untuk mendapatkan bekalan barangan.

Kesukaran membeli beras putih tempatan (BPT) dengan harga kawalan antara RM26.00 ringgit bagi 10 kilo di setiap kampung daerah perlu diatasi dengan segera. Untuk langkah pendek dan jangka masa panjang perlu kita bersama-sama dalam Dewan ini memastikan kesinambungan bekalan beras ini tidak terganggu, bekalan minyak masak ini tidak terganggu. Kita jadikan negeri kita ini ibarat kata YB Chennah tadi, negeri kita ni tak besar. Kita ada 36 DUN sahaja. Kita dudukkan sekali, kita bincang di meja yang sama, bagaimana kita nak atasi, sebab rakyat tidak membeli beras mengikut hari yang ditentukan oleh agensi. Rakyat membeli beras bila mereka perlu, bila mereka rasakan. Jadi janganlah kita jadikan rakyat sebagai eksperimen untuk kita mengagihkan beras ini. Biar rakyat memilih bila masa mereka nak membeli seperti biasa dahulu.

Memang saya akui langkah yang diambil oleh pihak kerajaan melalui *outlet* Lembaga Pemasaran Pertanian Persekutuan dan usahawan terpilih dalam menjual 100 kampil atau lebih bagi individu-individu di kawasan melalui harga, Jualan Harga Ladang Negeri Sembilan Prihatin dapat membantu rakyat. Cuma keadaan jualan ini hanya di tempat-tempat tertentu, hari-hari tertentu. Katakan buat di pekan Tampin, cuma kampung yang jauh sikit, kalau di Gemas itu, bayangkan Kampung Pasir Besar, Kampung Kurnia Diraja yang jaraknya 20 kilometer pergi dan balik semata-mata nak dapatkan hanya sekampil beras. Bukan boleh beli 2 kampil, Dato' *Speaker*. Sekampil saja Dato' *Speaker*. Ini yang dikatakan jarak yang mungkin mengganggu perbelanjaan isi rumah

mereka. Nak jimat, katakan beras sekarang 40.00 ringgit beras import, nak dapat 26.00 ringgit, kos untuk masa, kos untuk duit minyak menyebabkan kos tu hampir sama. Dan ada rakyat-rakyat di luar sana memikirkan takkan nak berbaris 2 jam semata-mata nak dapat beras 10 kilo ini. Bayangkan dengan jumlah penduduk kita yang seramai 1,132,000 orang, rakyat yang sukar mendapat akses untuk membeli, mendapatkan beras ini, seperti golongan warga emas, orang Asli, miskin tegar. Mereka ini benar-benar terhimpit dengan, untuk mendapatkan beras dan barang kawalan yang lain. Jadi kita kena putuskan bersama-sama, bersama-sama dengan, di Dewan ini untuk memastikan barangan di Negeri Sembilan ini kekal relevan untuk kita pastikan rakyat kita tidak dibelenggu dengan permasalahan ini. Masih belum terlambat untuk agensi kerajaan melalui FAMA ini, jangan buat hanya di setengah tempat saja, tumpukan kawasan yang berpendapatan rendah seperti Desa e-Kasih, kawasan PPRT dan kawasan-kawasan yang sewajarnya.

Antara cadangan kami, 2 cadangan antara jangka masa pendek dan jangka masa panjang untuk kita bincangkan bersama dengan Yang Amat Berhormat Sikamat. Satu: Kerajaan Negeri untuk, harus mengetengahkan kepada Kerajaan Pusat untuk meletakkan harga siling bagi beras import. Beras tempatan dah tak ada yang, Dato' Yang Dipertua. Harga beras import perlu dikawal, ada harga siling sebab 2 minggu lepas harga beras import 33.00 ringgit, minggu lepas, 2 minggu lepas 33.00, minggu lepas 38.00, minggu ini kalau Dato' Yang Dipertua, orang rumah suruh boli bogheh, dah jadi 40.00 ringgit. Bogheh yang samo, cap yang samo, boghek yang samo. Jadi kita samo-samo memikirkan. Hari ini bukan nak cari salah siapa, tapi kita bina balik kerajaan ini, yang sama dititahkan semalam, bersama dalam satu pasukan yang dipimpin oleh CEO untuk kerajaan ini, iaitu Yang Amat Berhormat Sikamat, kita pastikan permasalahan rakyat ini. Sejahteralah negeri kita ini, dapatlah rakyat dia hidup dengan sejahtera, lagi banyak pendapatan untuk negeri ini nanti.

Yang kedua: mohon kerajaan memanggil dan berjumpa dengan semua pengilang dan pemborong. Hari ini di media sosial asyik menyalahkan mereka. Kita di Negeri Sembilan ini kita panggil mereka. Kita mintak Yang Amat Berhormat Sikamat melalui agensi-agensi atau Exco Kerajaan Tempatan memanggil, berjumpa dengan semua pengilang dan pemborong ini, kita akui permasalahan mereka, kita dengar permasalahan mereka, kita dengar daripada sudut lain mengatakan mereka untuk diberikan 20% untuk kempitkan beras tempatan. Tapi mereka elakkan, ada yang mengatakan keuntungan yang kurang, ada yang mengatakan tak untung. Tapi kita dengar, mungkin Kerajaan Negeri boleh membantu pengilang dan pemborong ini. Difahamkan daripada pertanyaan saya kepada pengilang, mereka hanya untung tidak

lebih daripada 1.00 ringgit untuk 10 kilo. Mana mungkin. Ibarat tadi Chennah dan Rantau mengatakan, kalau orang nak datang berniaga ke Negeri Sembilan ni pun, dia nak mengaut keuntungan, tapi ia tidak keterlaluan. Saya bukan nak mempertahankan pengilang atau pemborong, kita nak berlaku adil kepada mereka, mereka boleh berniaga dengan baik, bekalan berterusan. Isunya sekarang, apabila mereka tidak *packing* beras ini, beras ini tidak berada di pasaran.

Dan yang ketiga: mohon pihak FAMA jangan mengambil kuota daripada pemborong yang, untuk mengadakan jualan rakyat. Mohon pihak FAMA mengambil ko, adakan kuota mereka sendiri daripada pusat. Sebab apabila saya tanyakan kepada pekedai-pekedai kecil, di kampung-kampung, mengapa bekalan beras tempatan tak ada, mereka mengatakan pemborong yang menghantar beras mengatakan beras ini telah diambil kuota. Kalau saya salah, saya mohon maaf, pihak FAMA. Tapi pihak FAMA dikatakan telah mengambil kuota beras daripada, untuk dihantar ke kedai-kedai *outlet-outlet* ini tapi dijadikan sebagai tempat jualan berpusat di suatu kawasan yang lain. Tapi dalam daerah yang sama. Jadi maksud saya tadi, orang Kurnia Diraja, orang Pasir Besar, terpaksa bergerak, bukan membeli di Pasir Besar atau di Kurnia Diraja itu. Jarak di antara satu-satu kawasan ini adalah 10 ke 15 kilometer, agak membelenggu mereka untuk bergerak untuk membeli beras ini.

Yang keempat: mohon apa saja tindakan kita ini, kita dahulukan rakyat tempatan. Kita akui tanpa pendedahan, pendedahan tanpa izin, pendedahan izin ke, yang ada di tanah air kita, terutamanya di Negeri Sembilan ini, mereka pun nak makan, tapi apa solusinya untuk kita bekalkan keutamaan jualan beras tempatan ini untuk rakyat tempatan. Mungkin kita gunakan penggunaan cip kad pengenalan, itu yang diketengahkan. Tapi kita fikirkan bersama di Dewan yang mulia ini untuk pastikan di Negeri Sembilan ini tiada permasalahan bekalan beras ini.

Untuk jang, langkah jangka masa panjang, mohon Yang Berhormat, Yang Amat Berhormat Sikamat melalui Kerajaan Negeri yang, ini mengambil langkah ke hadapan dengan merizabkan tanah pertanian sawah padi sebagai jaminan sekuriti makanan di negeri ini. Saya bimbang tanah-tanah ini akan diubah menjadi taman perumahan, atau ditukar menjadi, jika kita tidak rizabkan, ia akan ditukar kepada penempatan atau ditukar tanaman kepada sawit atau getah. Ini perlu kita buat segera supaya ia tidak menjejaskan akan datang. Kita tidak boleh mengharap lagi import beras daripada Vietnam, daripada India, tapi kita mempunyai sumber tempatan itu sendiri.

Mengikuti rekod dikongsi Lembaga Pertubuhan Peladang (LPP) Negeri Sembilan, lebih kurang 500 hektar tanah sawah diusahakan bagi tanaman padi berbanding keseluruhan 1,194,000 hektar. 1,194.49 bukan 1.0 juta. 1,194 hektar. Menunjukkan separuh daripada tanah-tanah ini, Yang Berhormat, tidak diusahakan. Jadi, di kesempatan ini, contohnya Kuala Pilah membabitkan keluasan 541 hektar, Jempol – 265 hektar. Jadi kita hasilkan, kawasan penanam padi kita usahakan untuk Kerajaan Negeri. Bina satu entiti syarikat berasaskan Kerajaan Negeri untuk mengambil tanah-tanah ini menjadi orang tengah. Jika kita mampu menjemput kontraktor atau operator daripada luar yang berpengalaman daripada Sekinchan, daripada Tanjung Karang untuk mengusahakan tanaman ini, tapi mereka mesti melalui Kerajaan Negeri kita sendiri, iaitu anak syarikat. Kalau batu pun kita boleh jual melalui anak syarikat, kalau pun pasir kita boleh jual melalui anak syarikat, kenapa padi yang menjadi makanan utama rakyat di Malaysia, terutamanya kita ini, kita tak letakkan satu entiti kerajaan yang kita buat sendiri.

Sebab hari ini, yang nombor 2 yang saya maksudkan, kita boleh merealisasikan kilang beras sendiri. Hari ini kalau kita mampu, kilang beras hari ini tidak ada diswastakan. Memang siapa-siapa boleh mohon daripada Kawalan Beras Negara, untuk memohon. Tapi kalau kita ada anak syarikat kita sendiri, *insyaAllah* kita mampu mengawal ini semua. Dan untuk Kerajaan Negeri, setiap bulan Yang Amat Berhormat Sikamat, kita ada pembeli kita yang tetap iaitu Pusat Zakat dengan kebajikan masyarakat. Setiap bulan Yang Amat Berhormat menghantar bekalan kepada penerima-penerima asnaf. Kenapa kita tak buat sendiri kilang atau merealisasikan kilang beras sendiri sebelum 2025. Ini cadangan kami.

Yang ketiga: mohon Institut Penyelidikan Kemajuan Pertanian (MARDI) menghasilkan benih padi yang tahan lasak dan berkualiti bagi mendapat tuaian lebih tinggi. Benih juga yang sesuai dengan sawah padi di, di negeri ini. Contohnya, Sarawak bakal mempunyai kemampuan memenuhi 80% daripada keperluan berasnya melalui Projek Perintis Penanaman Padi Secara Benih Hibrid. Mungkin tak sesuai di negeri kita, tapi benih daripada, yang dikeluarkan dikaji oleh MARDI ini mesti tahan lasak. Maksud saya tahan lasak dari serangan serangga. Yang kedua, dengan cuaca. Saban tahun kita akan disajikan kalau jerebu atau elnino, jumlah hasil tuaian akan merosot. Jadi kita mahon, kita mahon yang bijak pandai di MARDI hasilkan. Buek kajian. Jangan buek kajian di Sekinchan. Jangan buat kajian di Hulu Perak. Jangan buat kajian di Besut, Terengganu. Tapi buat kajian di tanah Negeri Sembilan ini. Sesuai tak benih ini untuk dijadikan menjadi benih yang berkualiti tinggi, menghasilkan kualiti padi yang baik dan menghasilkan tuaian yang baik.

Ini dapat menghasilkan jumlah padi yang berkekalan cukup tinggi untuk bekalan rakyat di Negeri Sembilan. Kita wajib duduk bersama untuk rakyat di Negeri Sembilan ini.

Itu saja yang saya nak sentuh tentang permasalahan rakyat pada Dewan hari ini. Cuma Yang Berhormat Dato' Yang Dipertua, perkara kedua, ini agak perlahan sikit. Nak mintak, titah Yang di-Pertuan Besar semalam, sidang Dewan ini menyatakan bahawa ahli-ahli Yang Berhormat perlu fokus kepada agenda membangunkan negeri, mensejahterakan rakyat. Harus diingat Kerajaan Negeri perlu menyediakan peruntukan semua, buat semua rakyat di negeri ini tanpa bersikap pilih kasih, kerana rakyat mempunyai hak dalam mendapatkan kesamarataan dalam pelbagai aspek. Ianya tidak boleh dipertikaikan oleh mana-mana pihak hanya kerana DUN berkenaan diwakili oleh pembangkang seperti kami, selepas kami mendapat mandat daripada Kerajaan Negeri Sembilan. Hari ini, dengan rendah hati, Yang Amat Berhormat Sikamat, Yang Amat Berhormat pernah duduk di sini, Yang Berhormat Rantau pernah duduk di sini, Yang Berhormat Chennah pernah duduk di sini. Hari ini jangan kita ulangi. Hari ini bukan kita mintak untuk saya, hari ini mungkin saya berada di sini, mungkin akan datang, mungkin tuan-tuan jugak mungkin berada di sini. Mungkin satu hari nanti, kawan kita, kawan kita yang baru pun mungkin duduk di sini. Hari ini bukan untuk saya, bukan untuk 5 yang sahabat-sahabat saya ini. Saya mohon, sebagai CEO, saya katakan CEO Kerajaan Negeri Sembilan; Yang Amat Berhormat Sikamat, bantu-bantulah kami ini. Kami faham, kami akan mengadap Yang Amat Berhormat tidak lama lagi. Kami mohon kesejahteraan ini kita berlaku, kita akan bersama Yang Amat Berhormat untuk menjamin Kerajaan Negeri Sembilan ini sebuah kerajaan yang stabil dan kekal hingga 5 tahun ini.

**YB Yang Dipertua Dewan:** 2 minit Yang Berhormat. 2 minit, boleh?

**YB ADUN Gemas:** Saya gulung yelah. Boleh, habiskan, boleh habiskan. Pendek dah. Bagi Kerajaan Negeri, kita mohon Yang Amat Berhormat bantu kami sebab, sebab di negeri lain, contoh di Pulau Pinang yang ditadbir oleh Kerajaan Perpaduan jugak, untuk pembangkang mereka bagikan bantuan untuk pengurusan sebanyak 6,000.00 ringgit, untuk di Perak, mereka diberikan pengurusan 7,000.00 ringgit dan bantuan mensejahterakan rakyat iaitu sebanyak 30,000.00 ringgit sebulan. Jadi jika ini boleh membantu kami, kami amat bersyukur kepada Allah SWT dan terima kasih kepada Kerajaan Negeri atas kepimpinan Yang Amat Berhormat Sikamat. Kita tak ulangi perkara ini perkara yang sama. Dahulu perkara ini dibawa oleh Chennah, Chennah pulak diteruskan oleh Sikamat, Sikamat pulak diteruskan oleh, dia berada dalam Dewan yang mulia ini.

Semalam juga, apabila saya dinamakan sebagai Ketua Pembangkang, ada sahabat yang bertanya; apakah kelebihan sebagai Ketua Pembangkang. Saya katakan; tiada. Sebab Negeri Sembilan belumewartakan apa-apa kelebihan kepada Ketua Pembangkang. Hari ini saya katakan seperti yang tadi, semua tuan-tuan yang saya hormati tadi berada di sini, hari ini saya mohon jika ada ruang dan peluang bantulah Ketua Pembangkang ini untuk bersama-sama berada bersama sebaris dengan tuan-tuan untuk memajukan negeri ini.

Akhir kata, sebelum saya mengundur diri, izinkan saya menyusun 10 jari mohon maaf sekiranya tersalah silap dalam ucapan saya sebentar tadi. Kali pertama bergelar Yang Berhormat ni banyak keterlanjuran yang kurang kemampuan untuk menjadi jurucakap yang baik. Kita di Negeri Sembilan ni cukup bersyukur, kita ada 4 pemimpin hebat yang berada di peringkat pusat. Tidak hilang rasa hormat dan kasih saya kepada Yang Berhormat, Yang Amat Berhormat Sikamat merangkap Ahli Parlimen Port Dickson; Yang Berhormat Dato' Seri Mohamad Hasan selaku Ahli Parlimen Rembau, selaku Menteri Pertahanan; Yang Berhormat Chennah merangkap Ahli Parlimen Seremban sebagai Menteri Pengangkutan; Yang Berhormat Datuk Seri Jalal, Exco Kanan merangkap Ahli Parlimen Jelebu. Segala isu dalam Dewan ini, saya nampak tadi kita boleh berada lebih tinggi daripada negeri lain, sebab boleh dibawa ke peringkat pusat dengan lebih segera. Salah silap, saya mohon maaf. Dengan rendah hati, dengan segala kekurangan saya mohon mendapat pertimbangan sewajarnya daripada Yang Amat Berhormat dan barisan Exco-Exco Kerajaan Negeri Sembilan. Terima kasih. *Assalamualaikum WBT.*

**YB Yang Dipertua Dewan:** Menyokong usul tak? Usul tu. Menyokong usul.

**YB ADUN Gemas:** Maaf Tuan Yang Dipertua, Dato' Yang Dipertua, saya menyokong usul yang dibawa oleh jo, Yang Berhormat Johol tadi. Terima kasih.

**YB Yang Dipertua Dewan:** Ya, terima kasih. Selepas ini para pembahas dibenarkan bercakap 10 minit ya, kerana kita kekurangan masa. Jadi, selepas saya jemput Yang Berhormat Seremban, Seremban Jaya, ia akan terbuka kepada siapa yang ingin berbahas. Jadi, saya jemput Seremban Jaya.

**YB ADUN Seremban Jaya:** Terima Kasih Yang Berhormat Dato' Yang Dipertua. Saya ingin mengambil kesempatan ini untuk menjunjung kasih ke atas Duli Yang Maha Mulia Yang di-Pertuan Besar Negeri

Sembilan atas titah ucapan baginda merasmikan Istiadat Pembukaan Persidangan Kedua (Perasmian) Penggal Pertama Dewan Undangan Negeri Yang Ke-15 Negeri Sembilan.

Dato' Yang Dipertua, titah ucapan Duli Yang Maha Mulia Yang di-Pertuan Besar Negeri Sembilan telah menyatakan bahawa Pilihan Raya Umum Negeri Ke-15 telah pun berlalu dan dilaksanakan dalam suasana yang aman dan harmoni. Baginda juga menzahirkan ucapan terima kasih kepada Suruhanjaya Pilihan Raya Malaysia dan semua agensi kerajaan dan rakyat yang telah melaksanakan kewajipan masing-masing.

Dato' Yang Dipertua, Baginda juga mengucapkan tahniah kepada Yang Amat Menteri Besar; Dato' Seri Haji Aminuddin bin Harun yang telah mendapat semula mandat untuk mengetuai kepimpinan Kerajaan Negeri Sembilan. Tahniah juga kepada semua wakil rakyat yang telah dipilih. Baginda telah menyentuh berbagai aspek seperti ekonomi dan prestasi kewangan negeri, pembangunan dan penyampaian perkhidmatan, ke, kebaikan dan kesejahteraan rakyat di mana saya tertarik titah baginda yang turut menyentuh bahawa Kerajaan Negeri Sembilan telah melaksanakan pelbagai inisiatif bagi memastikan rakyat tidak terlalu terbeban dengan kenaikan harga barang dan rakyat memperoleh bekalan makanan yang mencukupi. Untuk tujuan tersebut, pelbagai program pemeriksaan [pemeriksaan] ekonomi rakyat telah dilaksanakan meliputi pembangunan tanah-tanah terbiar.

Dato' Yang Dipertua, bila mana sebut sahaja tanah-tanah terbiar yang dimiliki oleh pihak Kerajaan Negeri atau tanah-tanah milik agensi-agensi lain yang boleh diusahakan untuk pertanian, penternakan, penternak ikan dan sebagainya, bukan sahaja boleh meningkatkan sosio ekonomi pengusaha tetapi hasil keluarannya akan turut membantu meningkatkan sosio ekonomi pihak Kerajaan Negeri sendiri tanpa bergantung kepada pihak luar. Dalam mencapai matlamat, pihak Kerajaan Negeri atau mana-mana agensi yang mempunyai tanah terbiar seharusnya memberi galakan dan sokongan padu kepada pengusaha tanpa meletakkan syarat yang terlalu ketat atau bertanyakan pengalaman sehingga niat untuk mendapatkan tanah terbiar terhalang.

Saya selaku ADUN Seremban Jaya sering berhadapan dengan masalah bagi mendapatkan tanah-tanah terbiar kepada para permohonan yang sering kali datang ke pejabat saya untuk mencari dan memohon tanah-tanah terbiar untuk diusahakan. Permohonan-permohonan saya bagi pihak permohonan sering ditolak dan tidak mendapat sebarang maklum balas bagi kadar masa yang terlalu lama. Kita lebih suka agaknya tanah-tanah terbiar ini ditumbuhi semak samun tanpa dimajukan dan tidak

mendatangkan sebarang hasil. Jika tanah-tanah terbiar ini dimajukan, pihak Kerajaan Negeri akan mendapat banyak manfaat yang juga boleh digunakan semula dalam membantu me, meringankan bebanan rakyat yang kini berhadapan dengan kenaikan harga barang kerana produk tempatan boleh dijual dengan harga yang lebih murah dan menjamin bekalan makanan berterusan.

Manakala bagi penternak ikan pelbagai inisiatif dan bantuan boleh disalurkan agar pembiakan ikan secara komersial yang dilakukan dalam kawasan terkawal untuk menjamin bekalan ikan. Teknik-teknik menternak ikan juga boleh dipergiatkan agar hasil meningkat.

Sini mahu terima kasih, saya ingin mengucapkan tahniah kepada Dato' MK Ibrahim bin Abd Rahman atas perlantikan sebagai Yang Dipertua Dewan Undangan Negeri Sembilan pada 26 September 2023 dan tahniah juga kepada semua pemimpin kerajaan gabungan PH dan BN yang diberi mandat.

Dato' Yang Dipertua, Kerajaan Negeri di bawah Pakatan Harapan telah melaksanakan pelbagai inisiatif dan insentif kepada rakyat Negeri Sembilan dalam tempoh 5 tahun yang lepas. Dalam 5 tahun, dalam 5 tahun, kira:

- pengurusan kewangan berhemah tanpa ketirisan dan pembaziran
- rizab Kerajaan Negeri Ringgit Malaysia 734 juta pada tahun terakhir 31 Disember 2022
- sistem tender terbuka
- meningkatkan pelaburan asing FDI RM23.51 bilion dengan lebih 17,227 peluang pekerjaan dapat ditawarkan
- menaikkan elaun daripada Ringgit Malaysia 900.00 sebulan kepada Ringgit Malaysia 950.00 sebulan untuk 1,100 Guru KAFA
- Elaun Bilal daripada 200.00, Ringgit Malaysia 200.00 dinaikkan kepada Ringgit Malaysia 500.00
- 6: Elaun Siak daripada Ringgit Malaysia 200.00 dinaikkan kepada Ringgit Malaysia 450.00
- 7: bantuan sara hidup mahasiswa Ringgit Malaysia 100.00 setiap bulan golongan B40.
- 8: peruntukan Ringgit Malaysia 3.0 juta setiap tahun kepada pusat tahfiz swasta, SJKC dan SJKT
- 9: bantuan *one off* Ringgit Malaysia 200.00 kepada 4 ribu 500 ribu tunggal
- 10: menaikkan bantuan bulanan OKU daripada 140.00 kepada 200.00 sebulan untuk 2,491 penerima manfaat

- 11: Program *Powerhouse* Wanita Gemilang (PH GEM) 30,000 peserta telah mendapat manfaat
- 12: Tabung Pembangunan Usahawan Negeri Sembilan (TUNS) dan RM15 juta – 5,147 usahawan kecil mendapat manfaat
- 13: Tabung Pembangunan Usahawan Negeri Sembilan Plus (TUNS Plus) dana Ringgit Malaysia 6.0 juta – 413 usahawan kecil mendapat manfaat
- 14: menukar status tanah kediaman daripada pajakan kepada hak milik kekal
- 15: menyelesaikan projek perumahan yang terbengkalai sejak zaman Kerajaan Negeri yang terdahulu tempatan hingga Kuala Pilah
- 16: tidak kenaikan Cukai Tanah dan Cukai Taksiran selama 5 tahun.
- Perkhidmatan bas percuma.

Saya ucapkan ribuan terima kasih dalam 4 tahun dalam Kerajaan Pakatan Harapan. Terima kasih. Akhirnya Kerajaan Negeri di bawah Pakatan Harapan telah melaksanakan pelbagai inisiatif insentif kepada rakyat Negeri Sembilan dalam 5 tahun yang lepas. Kerajaan gabungan PH dan BN di bawah Kerajaan Malaysia Madani akan terus maju ke hadapan jika kita mempelbagai lagi bantuan, inisiatif dan intensif demi rakyat yang mana rakyat akan terus memberi sokongan kepada Kerajaan Malaysia Madani. Saya sokong oleh, ucapan, titah ucapan, terima kasih.

**YB Yang Dipertua Dewan:** Okey. Terima kasih. Saya buka kepada Dewan siapa nak. Klawang?

**YB ADUN Temiang:** Terima kasih Yang Berhormat Dato' Yang Dipertua Dewan kerana memberi peluang kepada saya mengambil bahagian dalam sesi menjunjung kasih titah ucapan oleh Duli Yang Maha Mulia Yang di-Pertuan Besar Negeri Sembilan yang telah merasmikan persidangan kali ini. Yang Berhormat Dato' Yang Dipertua Dewan, saya mengambil peluang ini mengucapkan terima kasih kepada Tuanku atas penghargaan baginda, yang telah diberikan oleh Baginda kepada Kerajaan Pakatan Harapan yang telah memegang kerajaan pada penggal lepas. Penghargaan ini adalah amat penting dan membuktikan pihak, pilihan rakyat pada, pada masa lepas adalah tepat sekali.

Saya juga ucapkan syabas dan tahniah kepada semua anggota pentadbiran negeri yang telah membantu Kerajaan Negeri mengutip, berjaya mengutip hasil sebanyak Ringgit Malaysia 521 juta dan angka ini telah melebihi sasaran tahun lepas. Di samping itu, pada penggal lepas Kerajaan Pakatan Harapan telah banyak menjalankan inisiatif seperti yang dikatakan oleh ADUN Seremban Jaya tadi, rakyat telah menerima inisiatif-inisiatif tersebut dan bolehlah meringankan beban mereka.

Di sini Tuanku telah, amat menyokong usaha agar pendidikan dan latihan teknikal dan vokasional iaitu TVET perlu diperkasakan di negeri ini. Jadi satu ketika dahulu, dahulu, kerajaan telah mewujudkan satu majlis iaitu Majlis Perundingan TVET Negeri Sembilan. Jadi saya nak tahu, apakah perkembangan Majlis Perundingan ini dan fungsinya. Dan juga kewangan yang disalurkan kepada, kepada Majlis ini, sekiranya ada bagi mengerakkan gerak kerjanya.

Yang kedua adalah Dato' Yang Dipertua Dewan, saya juga mengambil peluang ini mengucapkan ribuan terima kasih kepada Kerajaan Negeri yang mana telah memperuntukkan hampir kurang, lebih kurang 8.0 juta peruntukan untuk menjalankan kerja-kerja naik taraf infrastruktur di kawasan Teming, yang meliputi 3 kerja di kawasan Temiang. Jadi, ketiga-tiga projek ini memang telah ditunggu lama oleh penduduk-penduduk kawasan Temiang dan boleh menyelesaikan masalah-masalah kawasan Temiang terutamanya banjir kilat. Jadi saya berharap usaha ini boleh diteruskan supaya kawasan Temiang ini boleh di, boleh dimajukan dari semasa ke semasa. Kerana telah ditinggalkan lama. Kemudahan asasnya lama ditinggal. Jadi saya berharap kerajaan baru ini boleh meneruskan usaha ini.

Yang pertama adalah projek menyeng, menyelenggara longkang di Jalan Temiang, iaitu sebanyak 4.0 juta. Yang kedua: projek naik taraf jalan Kampung Bukit Merbah sebanyak 3.0 juta dan yang ketiga, yang ketiga adalah projek rancangan tebatan banjir Sungai Temiang sebanyak 1.0 juta. Jadi saya amat gembira dan teruskan usaha ini di kawasan Temiang.

Dato' Yang Dipertua Dewan, saya juga mengambil peluang ini untuk menyeru pihak MBS supaya melihat satu permohonan saya iaitu menambah lampu-lampu awam di kawasan perniagaan Jalan Seng Meng Lee dan sekitar Temiang. Mengikut jawapan yang saya terima, jawapan bertulis yang saya terima, memang semua lampu, tiang TNB telah dipasang lampu, tetapi tidak mencukupi. Dan ia hanya adalah di sebelah kiri sahaja. Jadi amatlah, amatlah gelap pada waktu malam. Dan kawasan-kawasan jalan Taman Unian, Jalan Seng Meng Lee ini adalah kawasan perniagaan. Jadi penduduk-penduduk dan peniaga amat harap, amat mengharapkan permohonan ini dapat diluluskan supaya mereka boleh menjalankan perniagaan pada waktu malam.

Yang seterusnya, saya juga nak tanya berkenaan dengan status permohonan membina sebuah kolam takungan air di kawasan Temiang yang saya telah bercadang pun sejak 2019. Saya difahamkan pihak JPS Malaysia berkenaan dengan cadangan ini, sedang membuat kajian. Saya

rasa cadangan, saya rasa kajian tersebut pun telah siap di, dikaji untuk semua pengaliran sungai di Negeri Sembilan. Jadi saya nak tahu, sama ada cadangan ini diterima ataupun tidak. Dan ini bukan untuk menyelesaikan masalah Temiang sahaja, dia boleh menyelesaikan masalah, masalah banjir di kawasan Rahang dan Rantau ataupun Siliu yang telah terletak di bahagian bawah Sungai Linggi.

Perkara seterusnya adalah saya nak tanya apakah usaha untuk pem, pembelian, permohonan pemilikan tanah hak milik kekal untuk penduduk-penduduk Kampung Baru di mana ini adalah Manifesto Kerajaan Pakatan Harapan dan kerajaan penggal lepas, kita pun telah berjaya memberikan pemilikan hak milik kekal kepada pemilik-pemilik tanah berstatus kediaman di taman-taman sahaja. Jadi saya berharap usaha ini boleh diteruskan oleh Kerajaan Perpaduan, dan Kerajaan Persekutuan dan Kerajaan Negeri pun adalah Kerajaan yang sama. Jadi saya nak tahu apakah status terkini dan perkembangan dengan perkara ini. Jadi dengan ini saya menyokong usul ini. Sekian, terima kasih.

**YB Yang Dipertua Dewan:** Terima kasih.

**YB ADUN Klawang:** *Assalamualaikumhitaala WBT.* Terima kasih Dato' Yang Dipertua. *Bismillahirrahmanirrahim, alhamdulillahillobbil 'alamin wabihi' nasta'in wassolatu wassalamu 'ala ashrofil 'anbiyaa'i walmursalin, wa'ala alihi wasohbihi ajma'in.* *Bismillahirrahmanirrahim* [melafazkan bacaan ayat 21 surah Al-Ahzaab] Masih lagi di dalam, Dato' Yang Dipertua, bulan kelahiran Rasulullah SAW. Ayat yang saya bacakan tadi; demi sesungguhnya, adalah bagi kamu pada diri Rasulullah itu satu contoh ikutan yang baik iaitu bagi orang-orang yang sentiasa mengharap keridaan Allah dan balasan yang baik di Hari Akhirat serta ia pula menyebut dan mengingati Allah dengan sebanyak-banyaknya.

Hadis Rasulullah SAW yang mungkin perlu kita perhatikan di dalam kita menjalankan tugas kita sebagai wakil rakyat ataupun sebagai pejuang di dalam politik [melafazkan hadith Riwayat Abu Daud: 5121]. Bukan dari golongan kami sesiapa saja yang mengajak kepada *assobiyah* iaitu kebangsaan. Dan bukan pula dari golongan kami orang-orang yang berperang kerana kebangsaan. Dan tidak juga termasuk golongan kami, Rasulullah kata, yang mati kerana kebangsaan.

Dato' Yang Dipertua, Yang Amat Berhormat Dato' Seri Aminuddin Haji Harun, barisan Ahli Mesyuarat Kerajaan Negeri, ahli-ahli Yang Berhormat, pengarah-pengarah jabatan Kerajaan Negeri dan Persekutuan, wakil-wakil jabatan, hadirin hadirat yang dirahmati Allah sekalian. Di kesempatan ini, ingin saya mengucapkan tahniah, walaupun

dah banyak yang mengucapkannya, saya nak ucap jugaklah ya, tahniah kepada yang, Dato' Yang Dipertua kita yang dilantik sebagai Yang Dipertua penggal ini. Tahniah juga kepada Dato' Seri Yang Amat Berhormat MB yang dilantik semula untuk penggal kedua. Tahniah juga kepada Datuk Seri, Yang Berhormat Pertang yang dilantik sebagai Exco Kanan, tahniah kepada semula Ahli Majlis Kerajaan yang telah dilantik. Moga-moga kesemua kita berusaha dan bertambah keberkatan kepada negeri kita ini. Dan tidak lupa jugak saya mengucapkan jutaan terima kasih kepada pengundi-pengundi di Klawang yang memberikan kepercayaan kepada saya sekali lagi untuk mewakili mereka di dalam Dewan yang mulia ini.

Dato' Yang Dipertua, sudah tentunyalah tahniah kepada semua ADUN yang dipilih oleh rakyat di kawasan mereka, walaupun kita pada sebelum pilihan raya itu, kita canang-canangkan 36-0 ya, tetapi *alhamdulillah* kita dapat 31-5. Kemenangan kepada Kerajaan Perpaduan. Itulah keputusan Allah SWT, apa pun, pasti ada hikmahnya. Memang dalam politik, Dato' Yang Dipertua, tiada kawan, tiada lawan yang kekal, tetapi pastikan untuk kita beristiqamah di dalam prinsip yang betul. Prinsip ini tidak akan berubah-ubah mengikut masa, kawan ataupun lawan bersama kita. Ini satu sikap yang perlu dikikis sekiranya prinsip diubah-ubah terutamanya di dalam apa juga keadaan kita tidak sampai memfitnah. Janganlah tabur fitnah dulu, kemudian bila kono saman, Dato' Yang Dipertua, mintak maafah ya, sebab apabila kita fitnah itu telah lepas, Rasulullah kata apa; ibarat anak panah terkeluar daripada busarnya.

Dato' Yang Dipertua dan semua ahli Dewan yang mulia ini, tadi YB Pertang ada menyebutkan, eh YB Chennah ada yang menyebutkan tentang mini pelabuhan yang akan dicadangkan dan disokong oleh Yang Berhormat Rantau tadi. Tetapi peringatan beliau adalah supaya kita tidak bersaing dengan pelabuhan-pelabuhan yang ada di, di Malaysia ini ataupun di negara asing. Maka mungkin saya boleh cadangkan di sini, untuk kita fokus jugak pelabuhan mengambil kira pesatnya e-Dagang yang sedang ada di dalam pasaran memandangkan lokasi yang begitu strategik di Negeri Sembilan ini.

Dato' Yang Dipertua, saya nak bawak Dewan ini ke Jelebu-lah ya. Sebab saya kira Jelebu merupakan salah satu daerah yang agak amek perlahan-lahan dalam pembangunan. Walaupun pada satu ketika dulu sinar pembangunan itu amat cerah dan terang apabila adanya cadangan stesen ECRL di DUN Chennah. Tetapi oleh kerana kerajaan tebuk atap pada ketika itu, maka ianya terbantut dan terus terbatal ya. Walau bagaimanapun, kita harus maju ke hadapan. Jelebu kalau kita perhatikan ianya merupakan laluan utama kenderaan dari Lembah

Kelang iaitu di barat ke timur. Kalau hujung minggu Dato' Yang Dipertua, berderet kenderaan terutamanya petang Sabtu ataupun petang Jumaat dan petang Ahad. Lalan di sini memang sibuk ya, tapi tidaklah sampai *jammed* macam di, di Kuala Pilah saya kira ya, tetapi mereka lalu saja, tidak ada apa-apa tempat ataupun persinggahan yang boleh mereka manfaatkan. Kadang-kadang aktiviti santai berbasikal pun ada, motoran yang besar yang kocik, malah kereta antik lalu.

Oleh itu saya telah mencadangkan supaya ada, adanya pembangunan ala R&R di satu lot 2328, Mukim Ulu Klawang. Moga-moga, dan terima kasih kepada Kerajaan Negeri pada, pada yang lepas apabila telah meluluskan sebidang tanah lebih kurang, dekat lot itu, lebih kurang 10 ekar dengan premium yang istimewa. Terima kasih Yang Amat Berhormat. Cuma saya mengharapkan sebarang proses di masa akan datang dapat dipercepatkan sebab sehingga sekarang masih lagi belum dapat diselesaikan.

Dato' Yang Dipertua, Ke Bawah Duli Yang Maha Mulia Tuanku telah menitahkan bahawa kerajaan kita jangan hanya memfokuskan pembangunan fizikal. Mestilah jugak pembangunan modal insan perlu dipergiatkan. Sekarang kita li, agak gusar kenaikan kes mental amat tinggi. Statistik menyatakan, kalau dibandingkan bilangan pada 2020 berbanding dengan 2022, ianya meningkat sehingga 5 kali ganda. Sumber daripada Portal Majlis Keselamatan Negara.

Dato' Yang Dipertua, rosak rakyat maknanya rosak negara. Malah Pusat Kecemerlangan Kesihatan Mental Kebangsaan, Kementerian Kesihatan jugak melalui program talian ban, bantuan perkhidmatan sokongan psikososial telah mencatatkan peningkatan ini jugak. Penyelesaian hos, holistik perlu dirancang dan dilaksanakan di peringkat awal pembangunan insan itu sendiri. Malah kes melibatkan kanak-kanak pun jugak amat membimbangkan. Statistik menunjukkan kanak-kanak yang melebihi 16 tahun ke atas 1/3 daripada mereka mengalami masalah mental. Ini kalau tidak ditangani dengan berkesan ianya akan menjadi barah, Dato' Yang Dipertua. Bagi saya, setelah saya berkhidmat sebagai wakil rakyat lebih dari 5 tahun ini, tidak ada jalan keluar kecuali kita mengamalkan agama dan pastikan ianya ibadah. Selari dengan Rukun Negara nombor *wahid* kita iaitu "Kepercayaan Kepada Tuhan". Ini bermakna, rakyat di Malaysia ini keseluruhannya pasti, pastikan ianya beragama dan tiada agama yang menyuruh kepada perkara-perkara yang mungkar. Di sinilah titik pertemuan kita jugak sebagai Kerajaan Perpaduan.

Bagi orang Islam kembali ke sumber asalnya, garis panduan kehidupan yang telah diberikan oleh Allah SWT melalui Al Quran dan al hadis.

Rasulullah SAW telah bersabda [melafazkan bacaan hadis berkenaan]; Aku tinggalkan kepada kamu dua perkara dan kamu sekali-kali tidak akan sesat *lantadillu*. Allah menggunakan, Rasulullah menggunakan perkataan "*lan*" di situ, iaitu jaminan 100%, tidak akan sesat apabila kamu berpegang dengan Al Quran dan al hadis.

Dato' Yang Dipertua, kita di dalam menjalani kehidupan kita ini, tidak lain tidak bukan untuk kita menuju ke alam akhirat. Tanpa kita memfokuskan bagaimana keadaan kita di sana besok, sudah tentulah kita akan banyak tersasar. Oleh itu, saya menyeru semua lapisan masyarakat, kita memahami roh Rukun Negara itu, *insyaAllah* kita akan dapat mengharungi kehidupan ini walaupun berlainan pendapat, walaupun berlainan pandangan, sudut pandang kita, daripada sisi kita mungkin berlainan dengan yang lain, tetapi objeknya itu jugak sama. Jadi tak perlulah kita menggunakan apa-apa yang tidak sesuai berkait, berkaitan di dalam politik oleh kerana politik, kita tidak menjaga tatasusila yang perlu kita jaga.

Dato' Yang Dipertua, saya tak banyak nak, nak tu, sebab, kebanyakannya telah disentuh tadi. Oleh kerana yang, apa nama ni, yang disebut oleh Ke Bawah Duli Tuanku, pembangunan modal insan ni tidak disebut, itu sebab saya ambil *point* ini untuk kita sama-sama menghayati. Semoga kita diju, dirahmati oleh Allah SWT dan *insyaAllah* kita bertemu di syurga kelak. Sekian, dengan ini saya menyokong usul Yang Berhormat Johol. Sekian kita berjumpa lagi, *wabillahitaufik walhidayah, assalamualaikum WBT*.

**YB Yang Dipertua Dewan:** Terima kasih Yang Berhormat. Mintak, mintak, mintak Yang Berhormat yang nak berucap untuk membahaskan usul. Atau saya sebut je nama? Haa ya, Labu. 10 minit ya.

**YB ADUN Labu:** Baik. *Assalamualaikum WBT* dan selamat sejahtera. Menjunjung kasih titah Duli Tuanku. Yang dihormati Yang Dipertuan Dewan Undangan Negeri, Yang Amat Berhormat Dato' Seri Menteri Besar; Dato' Seri Aminuddin Harun dan rakan-rakan Yang Berhormat Negeri Sembilan. Pertama, saya mengucapkan terima kasih kepada pengundi-pengundi di DUN Labu yang telah mengun, memberi peluang kepada saya dan Perikatan Nasional untuk mewakili suara mereka di Dewan Undangan Negeri.

Yang Dipertua, saya jugak mengucapkan tahniah kepada Sikamat atas pelantikan sebagai Menteri Besar Negeri Sembilan bagi penggal yang kedua. Jugak ucapan tahniah saya kepada Yang Dipertua Dewan atas pelantikan sebagai Yang Dipertua Dewan Undangan Negeri yang baru.

Yang Dipertua, negara dan negeri ini menghadapi cabaran ekonomi pada masa sekarang dan pada masa hadapan. Keadaan pada masa lalu, orang-orang yang lebih dahulu daripada kita berjuang untuk merdekakan negara, negeri ini dan membangunkan negara ini. Pada masa akan datang, anak-anak cucu kita akan berjuang untuk kehidupan. Rakyat meng, me, merupakan keutamaan dalam semua perkara dalam apa sahaja perancangan yang dibawa oleh pihak kerajaan. Dalam cabaran ekonomi masa kini, budi bicara ketika menyelesaikan permasalahan rakyat perlu lebih diguna pakai.

Yang Dipertua, akhir ini masalah kampung tradisional menjadi satu masalah yang serius. Labu ingin mengambil perhatian Dewan yang mulia berke, berkenaan kawasan kampung-kampung tradisional yang jauh daripada kawasan pembangunan. Jika kita perhatikan, taraf ekonomi penduduk kampung kini amat rendah kerana punca pendapatan mereka hanya bergantung kepada kerja-kerja kampung. Jika tiada usaha membantu mereka dalam masalah, masa terdekat, Labu berpandangan kampung-kampung tradisional ini akan luput ditelan zaman. Saya mengambil contoh di Kampung Tengkek, Batu Kikir, Negeri Sembilan. Sebab ayah saya berasal daripada sana, ada rumah dekat sana kan. Jadi banyak rumah-rumah kampung sudah kosong sekarang di Kampung Tengkek ni. Penghuni, selepas peneroka asal ataupun ibu bapa meninggal dunia, ini kerana anak-anak mereka memilih hidup di bandar kerana peluang pekerjaan di kampung-kampung tradisional ini agak terhad dan jugak tiada pembangunan di kawasan sekitar. Jadi mereka tak ada pilihan kecuali berpindah ke kawasan-kawasan bandar. Jadi apa yang berlaku akhirnya kampung-kampung tradisional ini akan luput. Jadi sebenarnya perkara ini bukan satu perkara yang, yang remeh. Kalau kita perhatikan dalam tempoh 20 tahun akan datang, kalau tidak ada pemantauan ataupun kerjasama bantuan daripada Kerajaan Negeri, dan agensi yang berkaitan, saya yakin kita akan kehilangan kampung-kampung ini dan tak ada apa yang nak kita wariskan kepada anak-anak kita satu masa nanti.

Jadi bagi mengatasi masalah ini, Labu mencadangkan kawasan-kawasan kampung tradisional diberi perhatian dan bantuan kerajaan yang secukupnya dari sokongan kewangan dan kemudahan agar mereka kembali menjalankan kerja-kerja kampung selaras dengan kepakaran dan kemahiran mereka. Yang kedua, Labu mencadangkan pembangunan di kawasan sekitar kampung, kalau contoh kita ambil di Jempol, Rembau atau mungkin di Kuala Pilah, kita jadikan satu kawasan pembangunan supaya ada kilang-kilang berdekatan. Jadi anak-anak muda di kampung ni boleh bekerja di kawasan berhampiran. Jika mereka tidak bekerja kampung, mereka boleh bekerja di kawasan berhampiran agar mereka terus kekal tinggal di kawasan kampung.

Yang kedua, yang kedua, Yang Dipertua, saya juga ingin menyentuh berkenaan pekerja asing di Negeri Sembilan. Tindakan penguatkuasaan kepada pekerja asing ini haruslah lebih ketat memandangkan mereka kini lebih menyalahgunakan permit kerja mereka malah ramai antara mereka adalah pendatang asing haram. Dan mereka terlibat aktif dalam perniagaan-perniagaan di kawasan-kawasan PBT. Jadi kalau kita lihat, saya ulas sedikit, kalau kita lihat hari ini kalau kita lihat dalam sektor pembinaan, kebanyakan sektor-sektor pembinaan dikuasai oleh pekerja-pekerja asing. Mereka tidak mempunyai syarikat, mereka tidak berdaftar dengan SSM, mereka tidak berdaftar dengan CIDB. Tetapi mereka boleh membina rumah daripada rumah tu kosong, sampai siap. Yang saya hairan, di mana penguatkuasa di kawasan Negeri Sembilan ataupun di peringkat Persekutuan?

Jadi, mereka ini jugak tidak perlu membayar apa-apa cukai daripada keuntungan mereka kepada negeri dan jugak negara. Keseluruhan keuntungan mereka dibawak pulang kepada kampung, negara asal mereka. Jadi apa keuntungan kepada Kerajaan Negeri dan jugak negara ini? Malahan kadang-kadang kita di peringkat PBT lebih keras kepada penduduk-penduduk tempatan. Kalau kita lihat hari ini, kita sentuh sikit di tapak pasar malam, setahu saya tapak pasar malam ni, yang boleh berniaga adalah penjaja tempatan sahaja. Malahan kalau penjaja menggunakan pekerja asing pun tidak dibenarkan. Tapi kalau kita tengok di pasar-pasar malam, dulu mereka berniaga taghuk ikan saja di jalan, hari ini mereka dah letak meja berniaga ikan.

Jadi baru-baru ini saya ada rujuk di taman, pasar malam Taman Cempaka, bila saya bertanya, mereka menunjukkan lesen perniagaan daripada warga tempatan. Persoalannya hari ini, bila perkara sama dibuat peniaga-peniaga kecil berniaga di kaki-kaki lima ataupun di tepi-tepi jalan, saya masih ingat lagi Rantau semasa memegang jawatan Menteri Besar, pernah mengatakan jangan gogham sangat dengan peniaga-peniaga tepi jalan ni. Tapi hari ini apa yang kita tengok, peniaga-peniaga di tepi jalan mula ya, yang berniaga nasi lemak di tepi jalan mula telah diganggu. Tetapi peniaga-peniaga asing ni tidak diganggu langsung. Mungkin boleh pergi tengok di pasar malam Cempaka. Bagaimana mereka berniaga tanpa apa-apa gangguan dalam tempoh yang lama. Jadi, mustahil kalau tak ada, tidak dilindungi, mustahil mereka akan seberani itu.

Jadi, perkara yang seterusnya saya nak sentuh berkenaan isu pendidikan sedikit. So kalau saya rujuk pada YB Rafizi dulu, dia pernah mengatakan pada tahun 2018, masa dia berkempen; IPTA *last* sekali ditubuhkan adalah pada tahun 2016. Jadi saya tidak pastilah, selepas daripada itu ada IPTA baru ditubuhkan ke tidak. Jadi kalau tidak ditubuhkan

bermaksud dah hampir 20 tahun kita tak ada IPTA baru. Jadi pada masa sekarang budak-budak makin ramai, makin cerdik. Jadi kita terhad, terhad untuk kemasukan budak-budak ataupun pelajar-pelajar ni ke IPTA. Jadi saya mohon di peringkat Negeri Sembilan, saya tengok di kawasan Nilai, kita banyak universiti-universiti. Jadi apa kata kalau Negeri Sembilan kita jadikan satu pusat pelajaran, mungkin kerajaan boleh mohon kepada Kementerian Pengajian Tinggi untuk menambah IPTA di Negeri Sembilan supaya peluang kepada anak-anak, anak-anak muda ni lebih tinggi untuk mereka melanjutkan pelajaran mereka.

Dalam masa yang sama, mungkin satu persoalan yang telah dibangkitkan kepada PM-X, boleh terjawablah. Sebenarnya anak-anak muda untuk yang bukan beragama Islam, *non-bumi*, kita tahu kuota mereka tu kurang. Kuota mereka kurang. Jadi nak atasi masalah tu, sepatutnya penambahan IPTA ni adalah cara terbaik ataupun membesarkan IPTA yang sedia ada. Dalam masa yang sama, tidak akan mengacau kuota yang bumiputera dan jugak boleh menambah kuota kepada *non-bumi* iaitu cadangan daripada Labu.

Jadi, seterusnya saya mengucapkan tahniah kepada Kerajaan Negeri Sembilan di atas penubuhan Kerajaan Perpaduan. Ini adalah satu Sejarah dalam politik Negeri Sembilan melihat kerjasama antara PH dan Barisan Nasional. Tahniah saya ucapkan. Ini jelas menunjukkan tanpa sokongan antara satu sama lain, mustahil Kerajaan Negeri dapat ditubuhkan. Kejayaan PN baru-baru ini memenangi 5 DUN di Negeri Sembilan menunjukkan kami semakin hampir. Justeru itu, Labu memohon Sikamat dapat mempertimbangkan dan jugak meluluskan cadangan daripada Ketua Pembangkang agar permohonan peruntukan kepada ADUN-ADUN Pembangkang dipertimbangkan dan diluluskan. Sikamat pasti memahami kesukaran berada di pihak pembangkang tanpa peruntukan. Yang pernah merasa sudah pasti memahami termasuk di pihak Barisan Nasional jugak. Jadi kerajaan sedia ada, PH dan BN sudah berdepan kesukaran sebagai pembangkang, saya percaya politik lebih terbuka tanpa ada sikap balas dendam. Dan percayalah jugak, di kawasan Labu saya menang dengan majoriti 11,000 *sorry*, dengan undi 11,000 tetapi ada jugak penyokong PH 10,000 di kawasan tu. Tetapi saya yakin, dengan *live* ni mungkin Sikamat akan mempertimbangkan permohonan daripada pihak pembangkang. *Insyallah* suatu masa apabila PN menjadi kerajaan, kami akan bersikap adil dalam hal peruntukan kepada pembangkang pada masa hadapan. Sekian, terima kasih.

**YB Yang Dipertua Dewan:** Terima kasih. Kalau saya jemput, boleh? Mambau, belum? Jeram Padang, besok?

**YB ADUN Jeram Padang:** Besok, besok, sebab saya tak bersedia lagi.

**YB Yang Dipertua Dewan:** Chuah, besok? Siapa nak besok angkat tangan. Senang saya nak tu, eh, lepas ni kita tangguhlah nampaknya.

**YB ADUN Jeram Padang:** Barisan atas semua besok Yang Dipertua. Bermula sebelah kanan.

**YB Yang Dipertua Dewan:** Sungai Lui. Sungai Lui, bersedia untuk berucap?

**YB ADUN Sungai Lui:** *Bismillahirrahmanirrahim. Assalamualaikum WBT.* Terima kasih Dato' Yang Dipertua kerana bagi peluang kepada saya untuk mengambil bahagian dalam ucapan menjunjung kasih atas titah Duli Yang Maha Mulia Tuanku dalam perasmian ya, Persidangan Kedua Penggal Pertama, Dewan Undangan Negeri Ke-15 pada 9 haribulan 10, 2023 yang lalu.

Dato' Yang Dipertua, Duli Yang Maha Mulia Tuanku sangat-sangat menyambut baik semangat muafakat yang telah ditunjukkan di dalam pembentukan Kerajaan Negeri Sembilan selepas PRN yang telah berlangsung iaitu dengan mengambil kira roh pembentukan Kerajaan Perpaduan daripada pusat di mana Baginda menyarankan supaya kerajaan ini akan berdiri utuh kekal sehingga ke akhirnya dan jugak untuk sama-sama kita sebagai Ahli Dewan Undangan Negeri untuk sama-sama bekerja di dalam kita memacu Kerajaan Negeri Sembilan ini untuk menjamin kesejahteraan dan juga pembangunan Kerajaan Negeri Sembilan dalam keadaan yang ter, dalam keadaan yang baik.

Dato' Yang Dipertua, saya nak mengambil peluang di sini untuk membawak permasalahan di kawasan saya sendiri ya, bersempena dengan semangat kita untuk menjamin kesejah, kesejahteraan negeri yang, yang sangat kita cintai ini. Pertama sekali tentang masalah yang telah dialami iaitu kita menghadapi masalah tentang kekerapan gangguan bekalan air di mana berlaku kebocoran ataupun paip pecah sehinggakan mengganggu kehidupan masyarakat khususnya di kawasan felda, di kawasan DUN Sungai Lui, di mana ini disebabkan oleh keadaan paip yang telah lama dan juga usang. Dan ini memerlukan bantuan ataupun bajet yang besar untuk kita mengatasi masalah paip, air paip ini khususnya di kawasan-kawasan felda, di kawasan Negeri Sembilan ini.

Dato' Yang Dipertua, seterusnya untuk makluman Yang Dipertua, DUN Sungai Lui ni merupakan pintu masuk daripada Pahang ya, bersempadan dengan Bera dan diharapkan jugak kita pembesaran tadi kita dah tengok tentang jalinan, jaringan jalan raya khususnya di, di

mana sebelum PRN itu, kalau kita tengok kemampuan ataupun kapasiti jalan antara Bahau – Kemayan tu merupakan satu, sekarang ni menjadi jalan tumpuan utama yang telah digunakan oleh kenderaan perdagangan. Dan jugak di hujung-hujung, di hujung-hujung minggu di mana menjadi jalan pintas di antara LEKAS untuk, kepada timur jugak ya. Dan jalan ni kalau boleh kita naik taraf supaya dia dapat diperbesarkan dan jugak keadaan bahu jalan yang merbahaya, ada lubang dan sebagainya. Supaya jalan ni dapat dinaik taraf dalam keadaan yang sempurna.

Dato' Yang Dipertua, satu permasalahan, saya mengambil, mengucapkan ribuan terima kasih jugak kepada Kerajaan Negeri yang telah mengadakan khususnya di kawasan felda jugak, iaitu pemberian lot-lot bagi penempatan bagi generasi kedua ataupun generasi baru dalam kawasan felda. Saya ucapkan ribuan terima kasih kepada Kerajaan Negeri yang telah mengumumkan dan juga ingin melaksanakan program penyerahan lot perumahan generasi kedua ataupun generasi baru felda ini. Diharapkan ianya akan dapat direalisasikan secepat mungkin untuk kita membuktikan bahawa ini merupakan janji kita dalam pilihan raya untuk terus menjamin kesejahteraan masyarakat khususnya dalam kawasan felda.

Dato' Yang Dipertua, satu lagi ya. Tentang pembangunan belia ataupun untuk menjadikan supaya belia-belie ini merupakan satu ataupun merupakan generasi penerus kepimpinan pada masa akan datang, akan datang, saya sebenarnya kalau kita tengok supaya pembangunan belia ni akan lebih bersifat holistik keseluruhannya supaya apa, kita dapat menyediakan pemimpin-pemimpin pelapis yang mempunyai jati diri, semangat cintakan tanah air pada masa akan datang. Justeru itu, saya sebenarnya menyokong penuhlah segala program pembangunan belia ke arah bersifat, bersifat patriot, apa ni, semangat kenegaraan, cintakan tanah air dan juga bagi membentuk kepimpinan belia untuk sebagai pelapis pada masa akan datang melalui persatuan-persatuan belia khususnya di kawasan felda supaya persatuan-persatuan belia ni akan terus diperkasakan.

Dato' Yang Dipertua, seterusnya Jempol sebagai pusat bandar permotoran supaya aktiviti-aktiviti permotoran ni yang dapat menarik persa, anak-anak muda khususnya akan dapat kita laksanakan, kita galakkan lagi supaya apa, supaya dapat membentuk generasi muda khususnya di dalam bidang permotoran ni, dapat, dapat apa tu, mengalih ataupun dapat menjadikan sukan permotoran tu sebagai satu sukan permotoran yang sihat kepada generasi muda, mahupun generasi belia pada masa akan datang. Dan seterusnya dapat mencegah belia-belie ni daripada aktiviti-aktiviti yang tidak sihat contohnya lumba haram dan

sebagainya. Dan ini kalau boleh kita lakukan ataupun kita perbanyakkan aktiviti-aktiviti permotoran di kawasan Jempol, khususnya di Bandar Baru Serting.

Dato' Yang Dipertua, saya jugak nak bawak satu isu tentang isu pencahayaan di mana jalan hubungan antara simpang kampung ke kampung yang lain, kalau boleh ini dapat kita perbanyakkan lagi apa, dengan limpahan lampu dan sebagainya supaya, kadang-kadang kita tengok jalan Lui Selatan ke, ke Serting Hilir dan sebagainya tu kadang-kadang malam bahaya, lembu dan sebagainya, ini boleh membantu kepada pengguna-pengguna untuk mereka melalui jalan-jalan yang gelap ini.

Dato' Yang Dipertua, saya jugak ya, memohon seperti yang telah sedia maklum supaya kita jugak mengambil perhatian jugak kepada rumah-rumah generasi ataupun projek-projek yang terbengkalai tadi. Saya setujulah seperti yang telah diperkatakan tentang rumah-rumah terbengkalai termasuk rumah-rumah dalam kawasan felda, PGF dan sebagainya supaya kita menjadi pendesak ataupun kita membantu supaya rumah-rumah ini akan dapat dilaksanakan ataupun disiapkan untuk kesejahteraan masyarakat kita khususnya golongan-golongan generasi muda ataupun generasi baru yang ada di tanah-tanah rancangan. Dato' Yang Dipertua, saya mohon menyokong.

**YB Yang Dipertua Dewan:** Terima kasih saya ucapkan. Saya masih buka lagi kalau ada ahli Yang Berhormat yang sedia untuk beri, berbahas. Saya tanya YB Lobak, boleh?

**YB ADUN Lobak:** Okey, terima kasih Dato' Yang Dipertua. Lobak akan mensuarakan bahawa Jalan Lingkaran Tengah, MRRS, iaitu sepanjang 20.5 kilometer. Ini projek ni *start* sejak tahun, RMK-8. Ini projek ni *start* sejak RMK-8. Sekarang kami sudah RMK-12. So pandangan saya, kerana sebahagian besar tu, jalan yang belum sambung tu ialah sebahagian besar di DUN Lobak. So saya nak mohon supaya kerajaan atau bantuan dari Kerajaan Pusat bahawa Jalan Lingkaran Tengah ini kena diutamakan kerana Jalan Lingkaran Tengah ni bukan sahaja khasnya bukan untuk memajukan bandar raya, Bandaraya Seremban dan amnya sekali ekonomi Negeri Sembilan. Kerana Jalan Lingkaran Tengah ni, ini mula sejak tahun lepas, tahun, RMK-8 tu, hanya tiggal sebahagian. So kami harap, harap kerajaan sekarang, Kerajaan Perpaduan kena dengan mohon atau bantuan dari pusat supaya, supaya jalan yang ini boleh dapat disambung. Bukan sahaja untuk membangunkan kawasan Lobak, dan sambungkan ekonomi utara Negeri Sembilan sama ertinya Mantin, Ulu Beranang sambung ke Jalan Templer. So jadi yang dengan *Highway LEKAS* ni kami akan, dengan lebih cepat kesan sekali membangunkan

ekonomi di sebahagian utara Negeri Sembilan. Inilah permintaan dan cadangan dari Lobak.

Dato' Yang Dipertua, yang tentang manifesto. Pagi tadi yang disuarakan untuk Mambau, dan dijawab oleh Sikamat, saya ada sikit pandangan. Bahawa memang manifesto ni ditawarkan oleh Kerajaan Perpaduan, ramai yang tanya-tanya tu, yang khas sekali yang bantuan warga emas, umur 70 ke atas. Kerana yang warga emas ini memang di PRN lepas jikalau tak salah saya, semua DUN ni kasi sokongan penuh untuk semua DUN kita ni. Barulah kita memenang dan memerintah di Negeri Sembilan. So kami harap bawah bimbingan Sikamat, kami jangan tunggu lagi, ataupun kami secara bukaan mulakan pendaftaran, kerana mereka pun tunggu-tunggu, tahun ni 2023 ada ke tak ada, wangnya walaupun hanya 200.00 ringgit sahaja. Tapi bagi orang warga emas tu, 200.00 memang utama untuk mereka.

So kami harap, jangan tunggu lagi, kami mungkin sediakan borang, setiap DUN boleh usahasama, biarlah orang warga emas ni tak payah selalu tanya-tanya, kami bantuan mereka isi borang. Tapi saya punya harap tahun 2023 jangan dikecualikan, kena bagi. Tapi jikalau tak nak bajet tahun 2023, kami masuk bajet 2024, '24 kasi jumlah 400.00, pun tak ada masalah. Tapi sekarang setiap hari pusat khidmat saya ditanya setiap hari, setiap hari berpuluh-puluh orang tanya. Selain daripada pusat khidmat tanya, pun telefon, telefon tanya lagi. Tadi, sidang sini pun sudah terima 3 panggilan. YB, ramai ini baik Bahau, Mambau saya, semua orang cakap ada warga emas, boleh dapat 200.00. Semua tanya bila boleh dapat ni. Janji ni boleh ditunaikan ni. Ini paling utama.

Tapi yang dikahwin tu, saya beritahu tak apa. Kahwin ni lain. Kahwin hanya satu umur sekali saja. Tak apa. Kahwin tu pun berikan mereka daftar, isi borang, hantar itu *copy* sijil perkahwinan, simpan dulu. Lepas tu, ini sekali, bagi sekaligus saja. Kami bayar tahun '24 tak salah. Tapi jangan mereka tanya. Kami kena sediakan borang untuk setiap DUN, kami tolong dia isi, hantar, beritahu mereka kena proses. SOP-nya kena 3 bulan ke, ataupun 4 bulan. Biarlah kan mereka senang hati kerana mereka memang sokong Kerajaan Perpaduan. Jikalau mereka fikir perpaduan, sampai borang pun tak dapat di sini, kerana mereka kena tunggu tak ada satu gambar yang positif. So ini kena diutamakan.

Dato' Dipertua, selain tu Lobak kena men-*highlight* sikit tentang PPRT. Rumah PPRT, Lobak ada 1. Saya ucap terima kasihlah kepada Sikamat bahawa dapat sokongan dari Sikamat, PPRT yang rumah 60 biji ni sudah rosak. Fasa 1, sudah diuruskan. 20 buah ni sudah akan siap bulan November. Tapi pusat saya dengan kerjasama dengan Bandaraya, kami buat pendaftaran. Hingga hari ini, walaupun hanya 20 unit saja, tapi

permintaan 3 ganda, mintak. So kami harap Fasa 1 ni jikalau siap dari November, yang lain Fasa 2 dengan Fasa 3, 2020 lagi tambah, boleh dapat dijalankan, diuruskan dalam bajet akan datang. Iaitu bajet 2024. So harap PPRT ini macam tunggu durian, cakap ni, orang miskin kena diutamakan kerana mereka sekarang sewa rumah di satu perumahan yang mahal ribu-ribu, yang rumah teres pun 700.00/600.00 kena bayar sebulan. PPRT Lobak ni, hanya kena dibayar 150.00 sahaja, tapi ramai lagi yang di luar yang pun sokongan kita ni atau rakyat-rakyat yang miskin ni, mereka memang mintak rumah untuk diduduk saja. Mereka pun ada anak. Kita pun anak kita. Kami harap yang orang miskin ni, golongan miskin ini, golongan miskin tegar ni kena diutamakan. Walaupun yang siap yang lain tu, 20 rumah tu satu rumah baik untuk berbaik usaha ni hanya 10,000.00. 20 unit hanya 200,000.00 saja. So kami harap boleh tambah dana lagi untuk membaiki rumah murah yang, yang rosak lagi supaya dapat mengisikan orang-orang miskin, khas sekarang ekonomi ni bolehlah kasi peluang mereka pindah masuk, tinggal di rumah PPRT. Jangan mereka tinggal sana tak bayar, dihalau, tinggal di rumah teres ni, walau 400.00 pun tak dapat dibayar pun dihalau. Jadi DUN-DUN atau ahli-ahli Dewan, bukan saya Lobak saja, saya pun fahamkan lain ADUN pun menghadapi masalah yang sama.

Dato' Dipertua, kami harap lagi selain geran JMC dan MC, inilah saya, lagi nak ucap tahniah dan terima kasih bahawa kerajaan masa tu Kerajaan PH sokong dari Sikamat, kami dapat geran JMC dan MC. Jikalau tak salah saya hanya satu Negeri Sembilan yang adakan dana geran JMC/MC ini. Geran JMC ini tahun pertama 5,000.00 untuk setiap rumah pangsa untuk mohon. Walaupun ini wang kecil, 5,000.00 setahun, tapi projek-projek kecil yang tinggal rosak, yang kebersihan, yang keselamatan tu, semua dapat dirancangan dengan teliti. Lepas tu tahun kedua, dapat 7,000.00, dapat 7,000.00. So cadangan saya ini, kena bajet kena sediakan tahun '24 ni, kami harap, harap dari 7,000.00 boleh meningkat hingga 12,000.00. Sekurang-kurang sebulan dapat 1,000.00 untuk MC, untuk menguruskan kerja-kerja mereka. Kerana MC ini semua ni pengerusi atau setiausaha, dia tak ada elaun macam MPKK, MPKK, atau ketua kampung atau ketua kampung Cina, mereka langsung tak dapat untuk elaun. *Meeting allowance* pun tak ada. Tapi mereka kerja sebagai *volunteer*. *Volunteer*. Walaupun *volunteer* pun dimarah oleh penduduk penghuni-penghuni rumah pangsa. So kami harap ini satu langkah yang, geran JMC, MC yang baik ini boleh ditambah lagi geran ini supaya, supaya masalah-masalah di rumah pangsa khususnya yang kos rendah dan kos sederhana ni masalah yang paling lumayan ni, dapat diselesaikan dengan licin sekali.

Dato' Yang Dipertua, tentang yang tu, satu perkara yang lain tu, ialah pembangunan di Lobak. Pagi tadi walaupun DUN Chennah tu dia bukan

kawasan Lobak saya, tapi dia Ahli Parlimen Seremban. DUN Lobak bawah kawasan Ahli Seremban. Bahawa pekan Seremban nampak satu pekan yang lama dan tak ada kurang aktiviti. So kami usaha dengan Ahli Parlimen Seremban, berusahasama supaya sekurang-kurang tu yang Lobak ni, Jalan Tan Sri Manickavasagam boleh menceriakan satu pekan jalan atau satu jalan ni. Sekarang Dataran Lobak akan siap dibina tu. Lepas tu, kami kerjasama dengan Ahli Parlimen kami akan cuba menceriakan lampu-lampu macam yang hari itu, di Lake Garden, tu, Luna. Kami cuba buat satu jalan yang penuh dengan lampu-lampu Luna tu. So jadi sekurang-kurang tu, pelancong yang dari lain tempat boleh masuk ke, ke pekan lama Seremban ni. Inilah kami berharap dapat sokongan dari pelancongan Exco atau Kerajaan Tempatan, sumbangan sikit dana untuk memajukan Jalan Tan Sri Manickavasagam ni. Memang kertas kerja sudah ada. Kami harap dapat sikit sumbangan dari kerajaan atau Exco Pelancongan.

Dato' Yang Dipertua, selain itu, dengan HEBI (Hal Ehwal Bukan Islam), kerana saya pernah pegang jawatan ni hanya tak sampai 5 bulan, walaupun tak sampai 5 bulan, saya faham yang masalah Hal Ehwal Bukan Islam ni amat penting, amat penting untuk diperhatikan. Kerana yang kuil, yang tokong, yang *church* yang bukan Islam tu, memanglah banyak sekali. Jikalau tak salah saya anggaran *church* lebih kurang di Negeri Sembilan ni 100 lebih. Yang kuil, yang daftar pun ada 200 lebih. Yang tidak daftar sama jugak 200 lebih. Yang tokong-tokong berdaftar tu, lebih kurang 300 lebih. Selain tu, kepu, perkuburan, kuburan India lebih kurang 100, eh lebih kurang 40 lebih. Yang Cina - 77. Tapi yang tanah untuk perniagaan memang tak cukup. Walaupun tahun ni, dapat 1.8 juta, tapi tangan saya dinasihatkan, kami sudah pakai habis, PRN 15. Sebelum PRN 12, bukan PRN-lah, ini bukan kempenlah. Tapi sebelum PRN telah sudah habiskan pakai. Tapi sekarang Teo angkat *post* ni, dia marah saya, mengapa wang cepat-cepat pakai habis. Tapi, Bahau dapat banyak ada. So kami harap .....

**YB ADUN Bahau:** Yang Berhormat Lobak, saya tak pernah marah Yang Berhormat.

**YB ADUN Lobak:** Yelah, kami faham kerana permintaan banyak sekali. Walaupun tangan saya pun tak sampai nak sampaikan permintaan.

**YB Yang Dipertua Dewan:** Dia kata .....

**YB ADUN Lobak:** So saya akan tolong .....

**YB Yang Dipertua Dewan:** ..... Bahau marah, tapi *you* tunjuk atas.

**YB ADUN Lobak:** Saya tolong Bahau, jikalau nanti besok ke tu, ada bajet tambahan, jangan tunggu '24, kena tambah sikit untuk HEBI. Sekurang-kurangnya tu pembiayaan boleh dapat diselesaikan tahun ini jugak. Kami harap. Kerana Lobak kawasan saya, kurang dapat. Walaupun masa tu, saya Lobak, kawasan saya kurang dapat. Saya bagi DUN-DUN lain.

Dato' Yang Dipertua, lagipun yang masalah di rumah pangsa. Dato' Dipertua, rumah pangsa memang satu masalah yang sudah lama, dan masalah tu memang banyak sekali, kebersihan, keselamatan dan harmoni atau macam-macam tu. Dan kerosakan tu, *maintenance* dana memang tak ada. Setiap tahun kena mohon dari KPKT. Tapi bila KPKT, kadang kala dapat, kadang kala tak dapat. So kami mohon kerana kerajaan ada dana perniagaan rumah swasta kos rendah, ada dana itu. Kami harap bajet akan datang, boleh, boleh menambah sikit dana sekurang-kurang sejuta untuk 180 skim rumah pangsa di seluruh Negeri Sembilan. Bukan untuk Lobak saja, untuk semua. Kami harap ini boleh dapat di, disalurkan.

Dato' Dipertua, selain tu, saya pernah suara di Dewan yang mulia ni, bahawa DUN Lobak walaupun satu DUN yang paling lama dengan perumahan, tapi saya sudah ulang-ulang banyak kali nak dapat satu dewan, dewan hingga sekarang tak berjaya. Walaupun tapaknya kami dapat bola keranjang di Desa Temiang tu, kami sudah bantuan dari DO, DO ada sini? Ada. Dia walaupun kerana perbezaan har, yang tu, kos dia, sudah meningkat sampai ratus-ratus ribu, tapi belum dapatlah peruntukan tu. Kami harap, harap bajet akan datang, '24 ni, kami harap kerajaan bolehlah kesian sikit untuk penduduk-penduduk di DUN Lobak ini kerana berbanding dengan DUN lain, setiap DUN pun kurang-kurang ada satu dewan yang besar sekali. DUN hanya ada balai raya saja, kecil saja, tak sampai boleh isi 100 orang. Satu dewan yang senonoh macam orang Melayu nak kahwin, di Mutiara dia selalu tanya saya mengapa Sikamat ada dewan besar, Lobak tak ada. Saya beritahu; *you* mesti tahulah. Saya ADUN kecil. Sikamat Menteri Besar, tentu ada beza dia. Tapi kami faham, ini, tak apa, janji kami kena *fight* di Dewan, kena *fight* di Dewan, kami faham setiap DUN sudah mintak, tak akan semua akan dibagi. Tapi Lobak sudah mintak lebih dari 5 tahun. Saya pun ada *lobby* dengan Kewangan, dengan *DO Office*, sampai Ahli Parlimen dia cakap; Chew *you* tak dapat ni, saya kena keluar wang sendiri. Dia akan cari korporat, orang ni akan dibuat. Tapi ini janganlah, kerana Lobak kena usaha, usaha kuat sekali. Jikalau boleh, janganlah Ahli Parlimen cari wang dari lain tempat. Kami harap wang ini, dana ini boleh disalurkan untuk DUN Lobak supaya dewan rakyat, dewan serbaguna ni boleh dijayakan di Desa Temiang. Sekarang sebagai satu tapak bola keranjang,

hanya tambah saja bumbung. Ini akan jadi dewan. Sekian, terima kasih. Dan saya sokong usul ini. Terima kasih.

**YB Yang Dipertua Dewan:** Terima kasih Yang Berhormat Lobak. Lukut, nak bercakap hari ini? Nak berbahas hari ni? Terima kasih.

**YB ADUN Lukut:** Terima kasih kepada Dato' Yang Dipertua. Diberi saya kesempatan untuk memba, mengambil bahagian dalam membahas usul titah junjung kasih, titah Tuanku, okey. Terutama sekali saya ingin mengucap ribuan terima kasihlah, selama saya jadi Exco sebelum ni, 5 tahun, saya ingin memberi kredit kepada semua pengarah-pengarah yang telah memberi kerjasama, yang telah memberi tunjuk ajar, yang telah ajar saya banyak benda. Saya dekat sini, saya ingin ambil kesempatan ini untuk ucap ribuan terima kasihlah kepada mereka. Banyak benda saya sudah belajar sebagai seorang Exco. Walaupun saya dah jadi *backbencher* tetapi saya rasa, saya rasa watak tu akan tukar pergi nak tanya soalanlah sekarang, okey. Mungkin banyak lagi benda saya boleh belajar, okey.

Dato' Yang Dipertua, saya ingin ucap tahniahlah kepada Kerajaan Pakatan Harapan yang 5 tahun lepas, yang telah mencapai kutipan hasil. Saya tengok kutipan hasil yang paling cemerlang pada *last year* iaitu 521.22 juta yang telah melebihi apa, sasaran 20, lebih daripada 20% daripada sasarannya. Saya ucap ribuan tahniah dan ribuan terima kasihlah kerana telah mencapai satu usaha, satu pencapaian yang begitu cemerlang, okey. Tahniah kepada mereka, okey.

Dan saya ingin juga membangkit beberapa isu dekat kawasan saya, dekat sini, okey. Terutama sekali yang sering saya, saya di, dihubungi berkaitan dengan *traffic light* ataupun *traffic jam* dekat kawasan Lukut. Memang kita faham kawasan Lukut memang merupakan satu pintu masuk ke Port Dickson, kawasan destinasi pelancongan Negeri Sembilan yang terkenal dalam negeri, mahupun dekat luar negara. Pintu masuk ke Lukut, pintu masuk ke Port Dickson, Lukut ni memang dalam *weekend* ataupun penghujung minggu, ataupun sebelum hari cuti, memang *jammed*. Orang Lukut takut nak keluar rumah pada masa tu.

So saya ada buat tanyalah beberapa penduduk; apakah perancangan ataupun cadangan daripada mereka. Mereka kata; YB memang yang buat *jammed* bukan pasal kereta, yang buat *jam* tu yang, yang, yang buat *traffic jam* tu pasal *traffic light* yang tak cukup *smart*, dengan izin. *Traffic light* yang, yang kurang cekap tu yang buat *jammed*. So saya mintak dekat sini, JKR kalau boleh bantu saya, mengkaji ataupun meng-*upgrade* okey, naik tarafkan *smart traffic light* dekat kawasan sepanjang Lukut. Sebab kalau nak masuk Lukut, masuk PD tu tak kurang daripada 10 *traffic*

*light* saya kena lalu. Masa kalau tak ada *traffic light*, mungkin 10 minit saya susah sampai Port Dickson. Tapi dengan ada *traffic light* tu mungkin *25 minutes* saya baru boleh sampai. Saya mohon jasa baik JKR, kalau boleh kaji macam mana kita boleh bertambah baikkan apa, *traffic* dekat kawasan Lukut terutama sekali masa apa, penghujung minggu, okey.

Dan seterusnya, masalah, masalah, kita faham, dekat Port Dickson merupakan satu kawasan pelancongan dan masalah burung gagak ini memang membawa satu masalah besar kepada saya. Mahu, mahupun kepada pelancong yang menga, datang mengadu saya. Saya minum dekat Starbuck pun ada burung gagak teman saya untuk minum Starbuck. Dekat kawasan Taman Bandar Spring, apa, Dataran Segar pun, kalau lewat petang, saya, saya boleh ajaklah sama-sama kita pergi tengok berapa banyak itu burung gagak pada lewat petang, dia balik rumah. Saya kereta *parking* sana, satu kereta boleh dipenuhi dengan taik burung gagak dekat bawah pokok. Ini benar. So saya mintaklah, saya mintak, masalah ni dah dibawak beberapa kali, mohon di, di, di, diselesaikan. Tapi jawapan yang saya bagi, dapat tu; peluru mahallah, kita tak dapat izin apa, PDRM dekat pusatlah. Macam-macam apa, alasan yang telah dibagi. Saya mohon sangat, kalau boleh kita selesaikanlah isu burung gagak walaupun nampak remeh, tapi dia membawa kesan kepada pelancong, sektor pelancongan kita, okey.

Dan seterusnya untuk merencanakan apa, pelancongan dekat kawasan Port Dickson. Saya ingin memberi cadangan kepada Kerajaan Negeri supaya mewujudkan 2 benda dekat Port Dickson untuk kita menaikkan nama lagi kawasan Port Dickson sebagai tapak pelancongan yang terkenal, okey. Saya ingin memohon, mencadang kepada Kerajaan Negeri supaya mendirikan ataupun wujudkan satu CCNS; *Convention Center* Negeri Sembilan di Port Dickson supaya ia dapat boleh apa, menarik *as a figure* ataupun yang membuat apa, pameran antarabangsa dekat Port Dickson. Dia secara tidak langsung akan membawa banyak pelancong ataupun membawak banyak orang peniaga masuk ke Port Dickson. Dan secara tidak langsung akan merencanakan lagi ekonomi dekat Port Dickson. Dan bila ada pertunjukan ataupun pameran antarabangsa dekat Port Dickson, ramai lagi akan nampak Port Dickson, seluruh dunia akan terkenal; oh Port Dickson kita akan datang sebab Lapangan Kapal Terbang KLIA memang dekat dengan Port Dickson. *45 minutes* daripada, dari KLIA, KLIA Tour boleh sampai ke Port Dickson. Saya percaya, kalau adalah *Convention Center* Negeri Sembilan, dapat dibina dekat Port Dickson, saya percaya dia boleh dapat membawa lagi pelancongan ataupun pelabur datang ke Port Dickson.

Selain tu, saya ingin juga mencadang kepada Kerajaan Negeri untuk mewujudkan satu pasar malam, *tourism night market*, dengan izin, pasar malam *tourist*, pelancong. Di mana dia bukan, sebelah malam saya, saya memang bawak, bawak pelancong datang ke PD, dia orang kata Port Dickson dekat malam tak ada tempat nak pergi, tak ada tempat nak, nak, nak pergi apa, nak *spent money*. Saya bawak duit, tapi tak ada tempat nak bagi saya untuk men, apa, menggunakan wang. Dekat malam, dia biasa kita pergi melancong, kita akan cari tempat-tempat mana kita boleh pergi. Kita pergi Taiwan, Taiwan jadikan pasar malam sebagai apa, satu destinasi pelancongan. Pelancong akan pergi cari makan dekat pasar malam. Kita pergi Thailand, kita ada pasar malam Chatuchak, kita boli cari makan dokat sano. Tapi Malaysia, kita, dekat Port Dickson, pelancong datang dekat PD tu, susah nak cari produk pelancongan yang sebegini, yang boleh menarik pelancong datang ke tempat tu. Saya rasa benda ni kita kena wujudkan supaya pelancong-pelancong boleh tertarik, ditarik untuk datang ke PD untuk *spent money* dekat PD pada waktu malam.

Dan, dan elemen-elemen dalam pasar apa, *night market* ni dia kena ada unsur kebudayaan, dia ada unsur tempatan, jual barang-barang tempatan, dia ada unsur jugak apa, elemen untuk *gamming*, dia, dia, untuk macam, *what is that, fun fair*-lah. Dia corak dia macam *fun fair*-lah, dia boleh main apa. So dia ada, ada, ada tarikan tersendiri, daya, apa, budaya Negeri Sembilan boleh dibawak dekat sana. Saya rasa pelancong lebih suka benda ni, kalau kita banding sekarang, waktu malam nak, nak pergi, pergi cari tempat untuk melancong tu sukar sikit untuk Port Dickson. So 2 cadanganlah saya ingin membawa kepada Kerajaan negeri untuk dipertimbangkan untuk mewujudkan produk pelancongan tersebut, okey.

Seterusnya saya ingin juga membawa isu keku, kekurangan tanah perkuburan *non muslim* yang saya rasa memang merupakan sa, satu asasi kemanusiaan ataupun dalam PLANMalaysia, perancangan kawasan tempatan tu memang kena dimasukkan untuk perancangan tanah-tanah perkuburan Islam dan selain Islam. Sekali ini, kali ni sekarang kita menghadapi masalah. Orang Cina, tak silap saya, saya ingin ceritakan, kalau orang Cina, tak ada duit jangan mati, sebab mati itu memakan banyak duit. Sebab tanah perkuburan untuk membeli satu tapak, 10K, 8K. Kalau, kalau letak pergi bakar, letak dalam abu tu, 8K. 6,000.00. Itu baru petak kecil je. Lagi-lagi itu petak besar apa, tanam dalam tanah. Saya rasa benda ni, sebagai Kerajaan Negeri saya rasa adalah tanggungjawab sebagai Kerajaan Negeri untuk fikirkan macam mana kita nak membawa kurang wang untuk apa, tanah-tanah perkuburan ini. Sebab benda ini adalah penting, ada hak asasi manusia. Dan UPEN mahupun PLANMalaysia kena duduk bersama, fikirkan

macam mana kita nak, nak, nak kurangkan kos pengebumian ataupun tanah perkuburan ini, okey.

Dan seterusnya saya ingin membawa isu jugak. Dasar Kampung Baru 99 tahun yang telah dikemukakan *last year*, sebelum apa, pembubaran DUN. Saya menyambut baik dasar ini, memang satu dasar yang bagus. Tapi kalau boleh di-*extend*-kan ditambahkan kepada kampung tradisi. Kampung tradisi tempat lain dia nampak kampung baru ada dapat, mereka, air, air liur mereka leleh saja, mereka tak dapat. Mereka tanya saya; YB kenapa kampung baru saja ada, kampung tradisi tak ada? So saya mohon pertimbangan Kerajaan Negeri supaya dimasukkan jugak kampung tradisi dalam dasar ini, okey.

Dan seterusnya saya nampak MBS dalam *Facebook*, media sosial dia, baru-baru ini ada mempamerkan tindakan yang telah diambil terhadap, dalam sistem SISPAA yang telah cara, yang sudah selesaikan masalah aduan rakyat. Dan di, diletakkan dalam FB untuk di, dimaklumkan kepada orang ramai. Saya rasa ini satu tindakan yang baik, satu, satu cara untuk maklumkan kepada *public*, kepada orang ramai bahawa kita telah ambil tindakan terhadap aduan mereka. Sebab saya rasa penyampaian maklumat adalah penting untuk semua agensi mahupun setiap jabatan. Selepas kita selesaikan masalah, ataupun masalah aduan rakyat, ataupun apa yang telah kita lakukan dalam jabatan ataupun agensi, saya rasa kita kena maklum pada orang ramai. Kita kena bagitahu kepada orang ramai supaya apa yang telah berlaku, mereka tahu. Contoh, kalau itu longkang dah rosak, ya kita dah ambil tindakan, kita telah lantik kontraktor, kita lantik apa, kena buat pengukuran semua, kita ambil masa mungkin 4 bulan, setengah tahun. Tapi rakyat bila dah 2 minggu; YB *you* tak nampak ke, longkang rosak tak buat ke? So benda mungkin salah faham akan berlaku. So saya rasa adalah penting penyampaian maklumat status terkini kepada orang ramai itu adalah penting supaya mereka ambil maklum, ambil tahu apa yang telah kita ambilkan, tindakan yang sudah diambil un, oleh jabatan-jabatan ataupun agensi untuk menolong mereka untuk selesaikan isu mereka. Saya rasa kita boleh contohi MBS yang baru-baru ini saya nampak FB mereka ada *update* apa, dalam aduan SISPAA mereka, dan kalau boleh tu, semua jabatan tu kalau ada terima aduan, kita *update* dekat FB, okey.

Seterusnya yang *last* sekali saya ingin membawak satulah, yang baru-baru, *last* sekali haa Dato' *Speaker*. *The last one*. Penerokaan sumber REE, *non-radioactive* yang perlu, yang telah saya nampak Kerajaan Negeri tiada halangan untuk menerima apa, garis panduan untuk penerokaan REE dekat Negeri Sembilan. Saya tiada bantahan untuk penerokaan apa, SOP penerokaan REE ini. Tapi saya ingin apa, memaklumkan dekat sini, memberi cadangan dekat sini, bahawa

penerokaan sumber REE ini perlukan penyele, penyelidikan yang lebih kukuh dan pertimbangan yang secukupnya kena dibagi. Sebab dia kena dipandukan dengan ilmu dan pengetahuan yang mantap. Dan selain disokong oleh apa, penyelidikan yang kukuh, dia, dia perlu pakar-pakar masuk, tengok, dia punya prosedur. Adakah dia betul-betul mematuhi SOP yang telah ditetapkan. Sebab saya kluatir, saya risau, kalau ketidakcekapan dalam proses penerokaan sumber REE ini, dia boleh menyebarkan, menyebabkan pencemaran melalui resapan ke dalam sistem ekologi okey. Dan seterusnya keseluruhan ekosistem termasuk rantaian makanan okey, yang akan membabitkan kema, manusia secara langsung ataupun tidak langsung pada masa hadapan. Ini, benda ni, dia terhadap cucu kita, terhadap cicit kita, kita tak tahu adakah dia akan membawa kesan pada masa akan datang. So saya mintak supaya penero, sebab benda ni adalah penting, saya mohonlah kita kena kaji betul-betul, tengok betul-betul, *set-kan law* yang ketat untuk mengawal penerokaan REE ini, okey. Dengan ini saya mohon, saya ingin menyokonglah usul yang dibawa oleh Johol, okey, sekian terima kasih.

## **8. PENANGGUHAN MESYUARAT**

**YB Yang Dipertua Dewan:** Terima kasih YB Lukut. Ahli-ahli Yang Berhormat sekalian, esok kita akan sambung perbincangan usul menjunjung kasih ucapan, titah ucapan Diraja. Jadi saya harap, ahli-ahli Yang Berhormat yang belum lagi beri, ambil bahagian hari ini, ambil bahagian, bersedia ya. Tapi dah bersedia pun, kita hanya hadkan 10 minit seorang. Jadi hari ini saya bebaskan apa ni, beri peluang apa ni, peluang besar kepada Lobak dan Lukut, pasal tak ada siapa lagi nak cakap. Jadi besok 10 minit seorang. Kita harap kita dapat tumpukan supaya kita dapat selesaikan agenda kita pada penggal inilah dengan sebaik-baiknya. Jadi ahli-ahli Berhormat sesi perbincangan Usul akan disambung esok dan kita akan sambung pada hari Rabu; 11 Oktober 2023 bersamaan 25 Rabiulawal 1445 Hijrah. Dewan ditangguhkan.

**Mesyuarat ditangguhkan pada jam 4.25 petang.**

## PENYATA DEWAN

### PERSIDANGAN KEDUA (PERASMIAN) PENGGAL PERTAMA DEWAN UNDANGAN NEGERI, NEGERI SEMBILAN YANG KE-15 PADA 11 OKTOBER 2023 (RABU)

#### HADIR:

BIL.	NAMA	KAWASAN
1.	YANG DIPERTUA DEWAN UNDANGAN NEGERI, NEGERI SEMBILAN: YB Dato' M K Ibrahim bin Abd Rahman	
2.	MENTERI BESAR NEGERI SEMBILAN: YAB Dato' Seri Haji Aminuddin b. Haji Harun	Sikamat
3.	YB Tuan Teo Kok Seong	Bahau
4.	YB Puan Noorzunita Begum binti Mohd Ibrahim	Pilah
5.	YB Dato' Haji Ismail bin Lasim	Senaling
6.	YB Tuan Arul Kumar a/l Jambunathan	Nilai
7.	YB Tuan Haji Mustapha bin Nagoor	Palong
8.	YB Puan Nicole Tan Lee Koon	Bukit Kepayang
9.	YB Tuan Veerapan a/l Superamaniam	Repah
10.	YB Datuk Mohd Faizal bin Ramli	Linggi
11.	YB Tengku Hajah Zamrah binti Tengku Sulaiman	Ampangan
12.	YB Dato' Ir. Haji Bakri bin Sawir	Klawang
13.	YB Dato' Haji Zaifulbahri bin Haji Idris	Chembong
14.	YB Tuan Gunasekaren a/l Palasamy	Seremban Jaya
15.	YB Tuan Choo Ken Hwa	Lukut
16.	YB Tuan Chew Seh Yong	Lobak
17.	YB Tuan Mohd Razi bin Mohd Ali	Sungai Lui
18.	YB Puan Sri Bibi Sharliza binti Mohd Khalid	Juasseh
19.	YB Tuan Ng Chin Tsai	Temiang
20.	YB Tuan Haji Saiful Yazan bin Sulaiman	Johol
21.	YB Tuan Yap Yew Weng	Mambau
22.	YB Dato' Mohd Zaidy bin Abdul Kadir	Jeram Padang

<b>BIL.</b>	<b>NAMA</b>	<b>KAWASAN</b>
23.	YB Dr. Rajasekaran a/l Gunnasekaran	Sri Tanjung
24.	YB Tuan Muhammad Sufian bin Maradzi	Seri Menanti
25.	YB Tuan Siau Meow Kong	Rahang
26.	YB Tuan Suhaimi bin Aini	Kota
27.	YB Tuan Yew Boon Lye	Chuah
28.	YB Datuk Haji Mohd Asna bin Amin	Lenggeng
29.	YB Tuan Suhaimizan bin Bizar	Gemencheh
30.	YB Tuan Haji Ridzuan bin Ahmad	Gemas
31.	YB Tuan Mohd Fairuz bin Mohd Isa	Serting
32.	YB Tuan Mohamad Hanifah bin Abu Baker	Labu
33.	YB Tuan Haji Kamarol Ridzuan bin Mohd Zain	Paroi
34.	YB Tuan Abdul Fatah bin Zakaria	Bagan Pinang

**TIDAK HADIR DENGAN IZIN**

1.	YB Datuk Seri Haji Jalaluddin bin Haji Alias	Pertang
2.	YB Dato' Seri Utama Haji Mohamad bin Haji Hasan	Rantau
3.	YB Tuan Loke Siew Fook	Chennah

**HADIR MENGIKUT FASAL 37(3) UNDANG-UNDANG  
TUBUH KERAJAAN NEGERI SEMBILAN**

1. SETIAUSAHA KERAJAAN NEGERI, NEGERI SEMBILAN  
(YB Dato' Mohd Zafir bin Ibrahim)
2. PENASIHAT UNDANG-UNDANG NEGERI, NEGERI SEMBILAN  
(YB Dato' Muzalmah binti Mustapha Kamal)
3. PEGAWAI KEWANGAN NEGERI, NEGERI SEMBILAN  
(YB Dato' Mohd. Khidir bin Majid)

**TURUT HADIR**

1. SETIAUSAHA DEWAN UNDANGAN NEGERI, NEGERI SEMBILAN  
(Mohd. Amin bin Ludin)
2. KETUA PENOLONG SETIAUSAHA  
(Mohd. Zamri bin Md. Saad)

Setiausaha Dewan mengumumkan ketibaan YB Yang Dipertua Dewan.

Mesyuarat dimulakan pada jam 10.05 pagi.

## 1. MEMBACA DOA

**Setiausaha Dewan:** Perkara pertama, Membaca Doa. Dipersilakan Yang Berhormat ADUN Seri Menanti.

[YB ADUN Seri menanti telah membacakan doa di bawah Peraturan IX, Peraturan-Peraturan dan Perintah-Perintah Tetap Dewan Negeri]

## 2. PERUTUSAN YANG DIPERTUA DEWAN

**Setiausaha Dewan:** Perkara kedua, Perutusan Yang Berhormat Dato' Yang Dipertua Dewan.

**YB Yang Dipertua Dewan:** *Bismillahirrahmanirrahim, assalamualaikum WBT dan salam sejahtera. Alhamdulillahirabbil 'alamin wassolatu wassalamu'ala asrofil ambiya iwalmursalin wa'ala alihi wasohbihi ajma'in. Rodhitsu billahi robba, wabil islami diina, wabimuhammadin nabiyya warosuula. Alhamdulillah, segala puji bagi Allah Tuhan Pencipta Alam, selawat dan salam ke atas junjungan Nabi Muhammad SAW, ahli keluarga dan para sahabat Baginda.*

Yang Amat Berhormat Dato' Seri Haji Aminuddin bin Haji Harun; Menteri Besar Negeri Sembilan, Yang Berhormat ahli-ahli Majlis Mesyuarat Kerajaan Negeri, ahli-ahli Yang Berhormat, ketua-ketua jabatan, Dato'-Dato', Datin-Datin, tuan-tuan dan puan-puan hadirin yang dihormati sekalian.

Hadirin sekalian, alhamdulillah, hari ini, 11 Oktober 2023 bersamaan 25 Rabi'ulawal 1445 Hijrah dan kita telah pun masuk hari ketiga persidangan. Selain sesi soalan lisan, hari ini kita akan sambung perbahasan usul menjunjung kasih titah perasmian Ke bawah Duli Yang Maha Mulia Yang di-Pertuan Besar Negeri Sembilan sempena pembukaan Penggal Pertama Dewan Undangan Negeri, Negeri Sembilan Yang Ke-15. Memandangkan masih ramai ahli Yang Berhormat yang belum mengambil bahagian, saya berharap kita dapat pastikan semua dapat mengambil bahagian membalas usul, membahaskan usul menjunjung kasih titah perasmian oleh Ke Bawah Duli Yang Maha Mulia Tuanku.

Saya seterusnya ingin memaklumkan ketidakhadiran Yang Berhormat Dato' Seri Utama, Haji Mohamad bin Haji Hasan; Ahli Dewan Undangan Negeri Kawasan Rantau tidak dapat hadir ke Persidangan Dewan Undangan Negeri pada 11 dan 12 Oktober 2023 iaitu hari ni, Rabu dan Khamis, esok kerana perlu menjalankan tugas rasmi luar negara. Manakala Yang Berhormat Datuk Seri Haji Jalaluddin bin Haji Alias; Exco Kanan pula tidak dapat hadir pada 11 Oktober 2023 hari ni kerana menghadiri Mesyuarat Penyelarasan antara Yang Amat Berhormat Menteri, Yang Berhormat Menteri Kemajuan Desa dan Wilayah dan Exco-Exco Luar Bandar di Sarawak.

Hadirin sekalian, sebagaimana biasa, saya ingin menyeru kepada semua hadirin agar sentiasa mematuhi Peraturan-Peraturan Dan Perintah-Perintah Tetap Dewan serta tata kelakuan dan etika sebagai ahli Yang Berhormat sepanjang persidangan. Dipohon kerjasama semua hadirin untuk memastikan persidangan kita pada kali ini berjalan dengan lancar dan sempurna. Sekian, terima kasih. Selamat bersidang

### 3. **PERTANYAAN-PERTANYAAN**

#### **Pertanyaan-Pertanyaan Yang Berkehendakkan Jawapan Lisan (Hari Ketiga)**

**Setiausaha Dewan:** Perkara ketiga, Pertanyaan-Pertanyaan. Pertanyaan-pertanyaan yang berkehendakkan jawapan lisan (Hari Ketiga).

**YB Yang Dipertua Dewan:** Saya menjemput Yang Berhormat Sri Tanjung.

**ADUN Sri Tanjung:** Terima kasih Yang Berhormat Dato' Yang Dipertua, soalan saya nombor 1. Apakah ada perancangan Kerajaan Negeri untuk memperkenalkan Program Insentif Perkahwinan Belia?

**YB ADUN Palong:** Terima kasih Yang Dipertua. Terima kasih ADUN Sri Tanjung. Untuk makluman ADUN Sri Tanjung, Jabatan Belia Dan Sukan Negeri Sembilan tiada perancangan ya, dalam memperkenalkan Program Insentif Perkahwinan Belia ya. JBS tak ada ya. Walau bagaimanapun dalam Manifesto Aspirasi Perpaduan Negeri Sembilan yang telah kita dokumenkan bahawa anak-anak Negeri Sembilan yang pertama kali mendirikan rumah tangga bakal menerima bantuan 500.00 ringgit ya. Cumanya yang ni Sri Tanjung tak ada *chance* lagilah ya.

**YB ADUN Gemas:** Yang atas umur boleh lagi?

**YB ADUN Palong:** Ya?

**YB ADUN Gemas:** Yang atas umur.

**YB ADUN Palong:** Ya. Jadi, mana-mana anak-anak Negeri Sembilan yang pertama kali mendirikan rumah tangga akan menerima bantuan 500.00 ringgit. Justeru itu, Kerajaan Negeri di bawah pimpinan Yang Amat Berhormat Menteri Besar akan merealisasikan ya, manifesto ini dengan baik terutama kepada anak-anak Negeri Sembilan yang baru melangsungkan perkahwinan. Cumanya buat masa ini, kita sedang meneliti kaedah pelaksanaan yang terbaik ya, kita teliti supaya ianya dapat dijalankan dengan bagus, tidak bertindan dan semua yang berhak menerima ini akan dapat kita laksanakan dalam, kita akan bawa dalam bajet datang untuk kita laksanakan dalam kadar masa secepat mungkin. Terima kasih.

**YB Yang Dipertua Dewan:** Terima kasih. Ada tambahan? Tak ada. Yang Berhormat Gemas, tak ada.

**YB ADUN Gemas:** Tak ada soalan tambahan, Dato' Dipertua, untuk soalan kedua? [merujuk kepada YB ADUN Sri Tanjung]

**YB Yang Dipertua Dewan:** Kedua, dia, soalan nombor 1, satu soalan saja. Tak ada.

**YB ADUN Gemas:** Tadi, tak ada soalan tambahan? Terus. Okey, terima kasih Dato' Yang Dipertua. Saya merujuk kepada soalan kedua saya, pertama saya, pintu gerbang dan landskap di Gemas, okey.

**YB ADUN Nilai:** Dato' Yang Dipertua, sepertimana yang dinyatakan, Gemas merupakan pintu utama dari selatan ke Negeri Sembilan, dari selatan ke negeri kita, iaitu Negeri Sembilan. Kerja-kerja yang berkaitan dengan pintu gerbang membersihkan dan mengecat pintu gerbang akan dilakukan oleh kontraktor pada penghujung tahun 2023 di bawah peruntukan Majlis Daerah Tampin. Kerja-kerja penyelenggaraan berjadual juga telah dijalankan setiap bulan oleh kakitangan Majlis Daerah Tampin melibatkan pemotongan rumput dan penyelenggaraan landskap di kawasan berkenaan. Namun sekiranya kerja naik taraf yang melibatkan kos yang, yang besar, Majlis Daerah Tampin bercadang untuk memohon peruntukan dari kementerian KPKT. Terima kasih.

**YB ADUN Gemas:** Soalan tambahan, Dato' Yang Dipertua. Saya mohon kerajaan bagi pintu masuk ini ada perbezaan cukup ketara antara Gemas, Negeri Sembilan dengan Gemas Baru, Johor. Jadi, apabila kita dari Johor melihat pencahayaan, dari segi landskap, dari segi, pintu

gerbang yang ada di negeri kita berkarat, memang saya akui rumput dipotong, cuma landskap tu landskap yang lama. Pintu gerbang berkarat. Pencahayaan untuk malam tiada di kawasan tersebut.

Bagi kita mengelakkan kerajaan mengeluarkan perbelanjaan tambahan, saya mencadangkan kawasan tersebut di, diberikan tawaran kepada syarikat McDonald's sebab syarikat McDonald's senang membina restoran sendiri *independent, independent restaurant*, bukan bergabung dengan kedai, yang berhadapan dengan pintu gerbang ini. Ini dapat mengurangkan kos kepada Kerajaan Negeri jika pihak PBT; Majlis Daerah Tampin dapat bekerjasama dengan pihak syarikat tersebut, saya rasa kawasan tersebut boleh dipindahkan dan kita berikan sesuatu kepada pihak McDonald's dari segi pengiklanan. Itu mohon kepada YB Nilai untuk *response*. Terima kasih YB.

**YB ADUN Nilai:** Okey, terima kasih. Satu cadangan yang baik. Memang kita mahukan setiap pintu masuk utama ke negeri kita adalah dalam keadaan yang baik dan juga dalam, dapat menarik perhatian. Kalau tidak, ia akan mencerminkan sesuatu yang tidak baik kepada negeri kita. Sepertimana yang dicadangkan, dan semalam pun telah maklumkan kepada saya, iaitu kita boleh berbincang ataupun Majlis Daerah Tampin dapat berbincang dengan McDonald's, McDonald's untuk sebagai satu projek CSR. Kerana di beberapa negeri, khususnya di Melaka dan juga di beberapa negeri seperti Pulau Pinang, saya, semasa kita lihat ada beberapa persimpangan itu dihiasi oleh beberapa pemaju ataupun beberapa syarikat swasta. So kita akan cuba untuk memastikan semua pintu masuk kita dalam keadaan yang baik. Terima kasih.

**YB Yang Dipertua Dewan:** Okey, terima kasih. Saya jemput Seri Menanti.

**YB ADUN Seri Menanti:** Terima kasih Dato' Yang Dipertua, soalan saya nombor 1.

**YAB ADUN Sikamat:** *Bismillahirrahmanirrahim*. Terima kasih Dato' Yang Dipertua. Terima kasih soalan daripada ADUN Paroi. Berkenaan kesesakan lalu lintas di Senawang. Kita sedia maklum bahawa ....

**YB ADUN Seri Menanti:** Seri Menanti.

**YAB ADUN Sikamat:** Seri Menanti. Mintak maaf. Seri Menanti. Mintak maaf Paroi. Okey. Okey, masalah kekerapan paip pecah di jalan utama Kuala Pilah – Seremban dan kawasan Seri Menanti. Terima kasih atas soalan ADUN Seri Menanti. Dato' Yang Dipertua, buat masa ini kita sedia bahawa mengawal tekanan air pada kadar yang paling optimum ya.

Pihak SAINS juga telah membuat cadangan gantian paip bagi laluan jalan Seremban ke Kuala Pilah yang kerap mengalami kero, kerosakan melalui peruntukan Pengurusan Aset Air Berhad (PAAB). Buat permulaan projek penggantian paip di kawasan Kampung Gedang ke Terachi sepanjang 3 kilometer dengan anggaran kos 1.69 juta akan dirancang di bawah Pelan Perniagaan ke-6 SAINS yang bermula pada tahun 2024 hingga 2028.

Kekerapan paip pecah ini berlaku disebabkan faktor usia paip yang telah lama melebihi 35 tahun dan dari jenis paip *asbestos cement* yang terletak di bahu atau bawah jalan dan tidak dapat menahan gegaran aliran trafik yang tinggi. Sepanjang 2023, bagi bulan Januari ada 4 paip pecah, Februari ada 6, Mac ada 4, April ada 1, Mei ada 17, Jun ada 3, Julai ada 9, Ogos ada 5 dan September ada 5. Jadi ini yang berlaku di Seri Menanti. Dan kita akan cuba perbaiki daripada masa ke semasa. Terima kasih Dato' Yang Dipertua.

**YB Yang Dipertua Dewan:** Soalan tambahan, tak ada? Saya jemput, Paroi.

**YB ADUN Paroi:** *Assalamualaikum WBT.* Terima kasih Dato' Yang Dipertua, soalan Paroi ya, nombor 1.

**YAB ADUN Sikamat:** Okey, terima kasih Yang Berhormat ADUN Paroi. Terima kasih Dato' Yang Dipertua. Kita sedia maklum bahawa kawasan di Paroi sekarang merupakan kawasan yang padat penduduknya dan bilangan taman juga agak besar. Kerajaan Negeri khususnya melalui Bahagian Siasatan Dan Penguatkuasaan Trafik (BSPT) berpenda, berpandangan bahawa kesesakan lo, di lokasi tersebut tidak begitu kritikal dan tidak melibatkan isu keselamatan ataupun menjadi punca kemalangan jika dibandingkan dengan beberapa lokasi sesak lain di dalam Daerah Seremban.

Namun demikian, pemantauan lalu lintas secara berkala sering dilakukan bagi mengelakkan kesesakan luar biasa yang, dari berlaku. Bagi isu yang sama, JKR Negeri, Negeri Sembilan akan mengangkat permohonan Kajian Trafik ke Bahagian Kejuruteraan Trafik, Cawangan Jalan, JKR Malaysia di bahagian persimpangan yang melibatkan Jalan Persekutuan FT001 untuk mendapatkan cadangan serta kaedah penyelesaian terbaik isu kesesakan di kawasan tersebut.

Walau bagaimanapun, Kerajaan Negeri melalui JKR Negeri Sembilan sedang melaksanakan projek jalan alternatif bagi menghubungkan penduduk TTJ ke Bandar Senawang, Bandar Baru Senawang melalui projek membina jalan baru dari Kem Senawang ke Taman Bandar

Senawang, Daerah Seremban. Pada masa ini sedang dalam fasa pelaksanaan pengambilan balik tanah. Projek ini dijangka akan ditender pada bulan September 2024 sebaik sahaja pengambilan tanah selesai sepenuhnya. Terima kasih Dato' Yang Dipertua.

**YB ADUN Paroi:** Dato' Yang Dipertua, soalan tambahan. Serba sedikit untuk, saya nak tahu tentang perancangan, tindakan jangka pendek. Sekarang ini kalau kita tengok di Taman Tuanku Jaafar, ada pembangunan di peringkat industri yang besar di sana. Dan pada 6 bulan lepas, kesesakan ni tidak seteruk sekarang ya. Apabila kita masuk ke Taman Tuanku Jaafar, dan soalan ni pun sama gak soalan daripada Dato' Mat ni sebenarnya. Kita tengok kesesakan bertambah-tambah. Bermula pukul 6:15 pagi sehingga dah sampai kepada 8:30 pagi atau 8:45. Itu di Taman Tuanku Jaafar. Saya rasa tindakan jangka pendek, kawalan Trafik dan juga *timer* lampu isyarat tu, saya rasa itu sedikit cadanganlah untuk, untuk dilihat.

Yang keduanya ialah berkenaan di Taman Pinggiran Senawang. Sama jugak. Dia bermula, dulu pukul 6:30 masih boleh, boleh lagi keluar, sekarang ni 6:15 terpaksa berkejar-kejar dan dia habis 7:30. Saya rasa jalan masuknya satu, aksesnya tak ada, aksesnya sama jugak. Dia pun perlukan akses yang, yang, yang banyak jugaklah di Taman Pinggiran Senawang Perdana. Itu dua, dua kawasan yang perlu, saya mohon diberi perhatian oleh pihak kerajaan. *Wallahualam.*

**YAB ADUN Sikamat:** Okey terima kasih atas soalan tambahan dan cadangan. Bagi TTJ tadi saya telah maklumkan bahawa kita sedang membuat pengambilan tanah untuk menyambung TTJ terus kepada Bandar Baru Senawang. Jadi dia akan mengurangkan trafik di kawasan sedia ada khususnya kepada pekerja-pekerja kilang ya. Yang keduanya tadi dijawab untuk, soalan untuk Taman Pinggiran Senawang, kita sedia maklum kesesakan disebabkan jambatan tu yang agak terhad. Dan kita sedang mengkaji sebab kajian, akan dibuat kajian mengenai jalan baru yang akan melibatkan kawasan-kawasan tersebut. Jadi, itu antara yang akan kita lakukan. Dan kita akan ambil perhatian perkara tersebut. Terima kasih Dato' Yang Dipertua.

**YB Yang Dipertua Dewan:** Saya menjemput Rahang.

**YB ADUN Rahang:** Terima kasih Dato' Yang Dipertua. Saya mengemukakan soalan nombor 3.

**YB ADUN Bahau:** Terima kasih Dato' Yang Dipertua. Terima kasih soalan daripada Yang Berhormat Rahang, yang berkenaan dengan dasar

Kerajaan Negeri Sembilan dalam membantu rumah ibadat dan persatuan bukan Islam dalam Negeri Sembilan.

Dato' Yang Dipertua, untuk makluman ahli Yang Berhormat, Kerajaan Negeri Sembilan telah mewujudkan Akaun Amanah Hal Ehwal Bukan Islam di bawah Pejabat Menteri Besar Negeri Sembilan bagi menyalurkan dana/bantuan mengikut permohonan yang diterima dan dipertimbang dengan sebaiknya oleh Pejabat Exco Hal Ehwal Bukan Islam. Selain itu, penyelenggaraan rumah ibadat dan pelaksanaan aktiviti keagamaan, peruntukan turut disalurkan kepada persatuan bukan Islam untuk menganjurkan aktiviti kebudayaan. Ini memang selaras dengan manifesto Kerajaan Perpaduan, Aspirasi Perpaduan kita, di mana pentabiran negeri yang inklusif dan menjamin kebebasan agama yang meliputi pelbagai kaum seperti yang termaktub dalam Perlembagaan Persekutuan. Terima kasih.

**YB Yang Dipertua Dewan:** Soalan tambahan? Tak ada. Okey saya jemput Serting. Yang Berhormat Serting. Yang Berhormat Serting.

**YB ADUN Serting:** *Asslamualaikum* dan juga selamat sejahtera. Soalan nombor 1, Tuan Yang Dipertua.

**YAB ADUN Sikamat:** Terima kasih Dato' Yang Dipertua. Terima kasih soalan ADUN Serting, adalah berhubung dengan kemalangan jalan raya serta lampu jalan. Terima kasih.

Sepanjang bulan Januari hingga Ogos 2023, sebanyak 23 kes kemalangan jalan raya kategori rosak sahaja dilaporkan pada waktu malam di Jalan Baru Seri Jempol menghala ke Serting Hilir Kompleks. Sepanjang jalan tersebut, tiada lampu jalan, tiada bahu jalan dan garisan pembahagi jalan yang kabur. Jalan ini ialah Bandar Baru Seri Jempol ke Bandar Serting Hilir FT1268 yang telah disenaraikan dalam rancangan, perancangan tahun 2024 untuk pemasangan lampu baru.

Pihak JKR juga sedang mengenal pasti beberapa lagi kawasan berisiko tinggi untuk permohonan peruntukan pada tahun 2024. Pada masa ini, Kerajaan Negeri melalui JKR Negeri Sembilan telah pun melaksanakan inisiatif pencahayaan negeri, bagi jalan-jalan utama di jalan-jalan di Negeri Sembilan dan Jalan Kampung.

Namun begitu, bagi Jalan Persekutuan pula, permohonan pemasangan lampu jalan perlu diangkat terlebih dahulu kepada Kementerian Kerja Raya untuk kelulusan. JKR Negeri Sembilan telah mengangkat permohonan pemasangan lampu jalan solar baharu dalam, di jalan FT1268, jalan yang dimaksudkan, sebanyak 20 buah batang pada 27

September 2023. JKR Negeri Sembilan juga telah mohon peruntukan sebanyak 250,000.00 pada 27 September 2023 yang lalu untuk pemasangan 20 lampu jalan tersebut dan kelulusan permohonan tersebut adalah tahun 2024. Pada tahun ini tiada lagi bilangan lampu jalan yang diluluskan. Walau bagaimanapun, JKR Negeri Sembilan akan mohon peruntukan pemasangan lampu jalan setiap tahun secara berterusan. Terima kasih Dato' Yang Dipertua.

**YB Yang Dipertua Dewan:** Yang Berhormat Kota.

**YB ADUN Kota:** Terima kasih Dato' Yang Dipertua. Soalan nombor 1 berkaitan dengan pembangunan ekonomi belia.

**YB ADUN Palong:** Terima kasih Dato' Yang Dipertua. Terima kasih YB ADUN Kota. Kerajaan Negeri Sembilan telah memperkenalkan beberapa program galakan usahawan yang berbentuk bantuan pembiayaan sejak 2019 lagi ya, melalui inisiatif yang kita panggil TUNS, TUNS Plus dan TUNS Extra di bawah seliaan PKNNS ataupun Perbadanan Kemajuan Negeri, Negeri Sembilan yang bertujuan agar lebih ramai penjaja dan peniaga kecil berjaya dikembangkan melalui bantuan pembiayaan ini.

Kumpulan sasar yang diberikan tumpuan adalah terdiri daripada Usahawan Belia, Usahawan Wanita, Usahawan Tani, Usahawan Luar Bandar dan Usahawan kurang, Orang Kurang Upaya. Inisiatif-inisiatif yang disediakan adalah seperti berikut:

- Yang pertama adalah Tabung Pembangunan Usahawan Negeri Sembilan ataupun TUNS yang diberikan dalam bentuk geran ya, geran berjumlah 3,000.00 ringgit bagi tujuan peningkatan kapasiti dan keupayaan perniagaan sedia ada yang disasarkan kepada penjaja dan peniaga kecil dalam jualan tahunan mereka kurang daripada 100,000.00 ringgit. Itu yang pertama, TUNS.
- Yang kedua, Tabung Pembangunan Usahawan Negeri Sembilan Plus ataupun TUNS Plus ya. Bantuan ini pula dalam bentuk pinjaman, pinjaman mudah tanpa faedah ya, yang tadi adalah geran 3,000.00 ringgit yang pertama. Yang kedua adalah pinjaman mudah tanpa faedah berjumlah di antara 5,000.00, 10,000.00 ataupun 15,000.00 dalam tempoh maksimum 5 tahun bagi tujuan peningkatan kapasiti dan keupayaan perniagaan yang disasarkan kepada perusahaan mikro yang mana nilai jualan tahunan mereka kurang daripada 300,000.00 ringgit ya.
- Kemudian yang ketiga, Tabung Pembangunan Usahawan Negeri Sembilan Extra ataupun TUNS Extra. Bantuan ini pulak merupakan

bentuk geran padanan (*matching grant*) pada nisbah 50:50, maksimum 30,000.00 ringgit ya. Kalau nilainya 40,000.00, kita akan beri 20,000.00. Kalau 60,000.00 – 30,000.00. Maksimumnya 30,000.00 ya. Bagi tujuan peningkatan kapasiti dan keupayaan perniagaan melalui pelaksanaan projek yang mempunyai ciri-ciri kreatif, inovatif dan nilai tambah di dalam perniagaan sedia ada yang disasarkan kepada usahawan Negeri Sembilan.

Selain daripada itu, bantuan pembiayaan, Kerajaan Negeri turut menyediakan platform pameran dan jualan untuk usahawan yang mempunyai produk atau perkhidmatan yang berpotensi melalui penganjuran Karnival Negeri Sembilan Fest. Karnival ini merupakan gabungan 3 program tahunan utama iaitu Arena Usahawan anjuran PKNNS; Hari Peladang, Penternak dan Nelayan Negeri Sembilan anjuran Lembaga Pertubuhan Peladang Negeri Sembilan; dan *Negeri Sembilan Food Festival* anjuran Lembaga Pelancongan Negeri Sembilan.

Manakala, Kementerian Belia dan Sukan (KBS) pula, tadi adalah PKNNS, KBS pula melalui Jabatan Belia dan Sukan pada tahun 2023 ini akan menganjurkan 2 program iaitu Jelajah Genta Belia dan Program MyPreneur. Ya, 2 program untuk ekonomi ni. Jelajah Genta Belia dilaksanakan di 3 buah daerah iaitu Seremban, Jempol dan Tampin. Program ini mengambil pendekatan *street market* sebagai konsep utama pelaksanaan. Antara aktiviti pengisian dalam program ini adalah seperti jualan komuniti yang memfokuskan usahawan belia untuk mengenengahkan produk mereka, aktiviti perkongsian ilmu dan maklumat oleh agensi-agensi kerajaan, NGO dan usahawan-usahawan yang dikenal pasti. Antara tujuan utama pelaksanaan program ini adalah untuk menyediakan platform janaan ekonomi secara langsung melibatkan belia dan komuniti setempat.

Manakala bagi program MyPreneur pula adalah sebuah kursus keusahawanan yang dilaksanakan di peringkat negeri. Kursus yang diadakan selama 2 hari ini akan membantu dalam menerapkan pembudayaan dan penggalakan keusahawanan serta menyediakan ekosistem sokongan kepada usahawan belia melalui kerjasama antara kementerian, agensi dan badan penguatkuasaan melalui penggunaan teknologi internet dan komunikasi masa kini. Kursus ini juga turut bertujuan untuk membimbing belia berkaitan pengurusan keusahawanan yang sistematik secara praktikal dan teori melibatkan asas keusahawanan. Terima kasih Dato' Dipertua.

**YB ADUN Kota:** Terima kasih Dato' Yang Dipertua. Terima kasih Yang Berhormat Palong. Soalan tambahan. Apakah cadangan untuk mempromosikan inisiatif yang baik ini, iaitu TUNS tersebut agar

manfaatnya dapat disampaikan kepada belia akar umbi, terutamanya belia-belia di kawasan kampung? Terima kasih.

**YB ADUN Palong:** Terima kasih Yang Berhormat Kota. Dato' Yang Dipertua, sekiranya program ini diteruskan lagi pada tahun hadapan, pandangan saya perkara-perkara yang kita boleh buat, kita boleh lakukan kita promosikan inisiatif TUNS ini ialah yang pertama, memperluas maklumat dan bantuan yang diberikan melalui TUNS ke semua Pusat Khidmat ADUN ya, ke semua Pusat Khidmat ADUN. Kerana rakyat di kawasan luar bandar terutamanya akan sentiasa berhubung dengan Yang Berhormat ADUN di pejabat ADUN masing-masing, pertama.

Yang kedua, menyebarkan maklumat TUNS melalui NGO belia, NGO belia yang mesra kerajaan, NGO belia yang mesra dengan Kerajaan Perpaduan Negeri Sembilan untuk mereka, kita laksanakan sesi libat urus untuk berikan maklumat dan pemahaman supaya mereka boleh sampaikan kepada belia-belia dalam kawasan kampung.

Yang ketiga, kita membudayakan semangat keusahawanan melalui penerapan elemen keusahawanan dan perniagaan dalam program dan aktiviti belia supaya golongan ini dapat melihat sektor ini sebagai salah satu bidang pekerjaan pilihan. Dengan cara ini, golongan belia akan dapat melihat faedah dan kepentingan TUNS dalam membantu memulakan atau memajukan lagi perniagaan ke satu tahap yang lebih baik.

Untuk maklumat tambahan Yang Berhormat Kota, berdasarkan kepada statistik permohonan TUNS bagi tahun 2023, sebanyak 61.7% penerima adalah daripada golongan belia berumur dari 18 hingga 40 tahun. Jumlah ini bersamaan dengan kira-kira 600 orang. Sebagai maklumat tambahan juga, TUNS diperkenalkan pada tahun 2019. Golongan belia adalah merupakan kumpulan umur majoriti yang menerima bantuan pembiayaan TUNS melebihi lebih 50% setiap tahun. Dan inisiatif TUNS ini jugak adalah terbuka kepada semua golongan belia tanpa mengira kelayakan akademik. Maknanya sama ada mereka ada kelayakan akademik ataupun tidak, mereka boleh mohon TUNS ini.

Untuk makluman juga, permohonan bagi tahun 2023 telah tutup. Tiada lagi. Yang Berhormat – Yang Berhormat, ahli Exco dan ADUN dipohon untuk sama-sama mempromosikan inisiatif TUNS ini, *insyaAllah* ia akan dibuka semula seperti maklum pada saya oleh PKNNS, akan dibuka semula pada awal tahun hadapan ya. Jadi, sama-samalah kita war-warkan program TUNS ini kepada semua. Terima kasih.

**YB Yang Dipertua Dewan:** Soalan seterusnya, daripada Yang Berhormat ADUN Labu. Saya nak maklumkan, bahawa soalan ni melibatkan Yang Berhormat Pertang yang tak bersama kita pada pagi inilah. Jadi saya akan *forward* ini, soalan ini ketika Yang Berhormat ada, esok ada ya. Jadi saya jemput, Chuah.

**YB ADUN Chuah:** Terima kasih Yang Berhormat Dato' Yang Dipertua, soalan nombor 2.

**YAB ADUN Sikamat:** Terima kasih Dato' Yang Dipertua. Terima kasih ADUN Chuah. Soalan mengenai pembinaan jalan, jambatan Sepang ke Chuah. Untuk makluman ahli-ahli Yang Berhormat, projek, jajaran projek telah dipersetujui oleh pihak Kementerian Kemajuan Desa Dan Wilayah serta jajaran projek ini juga telah dibentangkan dalam mesyuarat SPC ya. Dan, dibentangkan dalam Mesyuarat Jawatankuasa Perancangan Negeri, Negeri Sembilan Bil.6/2023 yang telah bersidang pada 19 September 2023 oleh Jabatan Kerja Raya Negeri Sembilan. Untuk tujuan pemakluman kepada Kerajaan Negeri. Jawatankuasa telah meneliti dan seterusnya membuat keputusan untuk mengambil maklum mengenai cadangan jajaran projek tersebut dengan kos siling sebanyak 160 juta dan diluluskan dalam Rancangan Malaysia ke-12 (*Rolling Plan Ke-3*) di bawah peruntukan Kementerian Kemajuan Desa Dan Wilayah ya. Jadi kita telah bersetuju pada dasarnya dan sekarang kita sedang menunggu keputusan untuk mereka ya, untuk pembinaan tersebut. Iaitu skop projek tersebut ialah membina jalan baru sepanjang 4.4 kilomter dengan piawaian R2 membina sebuah jambatan konkrit 1,300 meter, membina sistem perparitan dengan pembentung baru, kerja-kerja geoteknik, pengam, pengalihan utiliti, pengambilan balik tanah, kerja-kerja ukur dan siasatan tanah, kerja-kerja perlindungan alam sekitar dan lampu jalan. Okey terima kasih Dato' Yang Dipertua.

**YB ADUN Chuah:** Terima kasih Yang Amat Berhormat Sikamat. So nak dapat apa ni, info-info yang telah disampaikan. Tapi yang dibawa ni, ataupun di kalangan masyarakat, cuma yang lebih prihatin adalah agak-agaknya bila boleh jalankan sebab projek ni dah lama di, di, apa ni, mungkin dibincangkanlah. So dah lebih 2 tahun dengar khabar-khabar kata nak, nak buat nak, nak apa ni, pembinaan nak jalankan. So sehingga hari ini nampaknya masih lagi atas kerja sahaja. So adakah maklumat, bilakah agak-agak dapat dijalankan?

**YAB ADUN Sikamat:** Dato' Yang Dipertua, terima kasih soalan tambahan ya. Memang kita bukannya mudah nak, nak apa, nak siapkan sebuah jambatan. Kalau jambatan itu tidak disambungkan dengan jalan-jalan sedia ada. Dan kita sedia maklum bahawa tanah tersebut juga merupakan tanah milik orang. Jadi ada pengambilan tanah. Dan kerja

juga melibatkan negeri lain, bukan Negeri Sembilan sahaja. Jadi, dia akan melibatkan Kerajaan Negeri Selangor yang juga ada isu pengambilan tanah, apa, laluan ataupun jajaran tersebut ya. Jadi ini melibatkan 2 negeri, dia tak mudah. Kalau satu negeri tu lebih mudah ya. Jadi apabila melibatkan 2 negeri, Selangor kena buat kerja, Negeri Sembilan pun kena buat kerja. Dan dia melibatkan jajaran dan apabila dipersetujui dan bagaimana jajaran tersebut. Jadi ini juga melibatkan kos yang mana kita apabila kita dah selesai kita punya nampaknya dah tak ada masalah, tetepi kita sedia maklum bahawa ada kerja pengambilan tanah yang perlu diambil ya. Jadi mereka kena maklumlah. Kelulusan telah ada, bukannya apabila kelulusan terus buat ya. Tak ada kelulusan terus buat. Dan kita sedia maklum perkara tersebut ya. Dan kita harap penduduk di Chuah dapat tunggu sekejap. *Insyallah* tahun hadapan saya rasa banyak kerja-kerja yang boleh berjalan ya, apabila selesai pengambilan tanah dan juga persetujuan daripada Kerajaan Negeri Selangor tentang jajaran di sebelah Selangor. Terima kasih.

**YB Yang Dipertua Dewan:** Saya menjemput YB Lenggeng.

**YB ADUN Lenggeng:** Terima kasih Dato' Yang Dipertua, ada satu je soalan.

**YAB ADUN Sikamat:** Terima kasih Dato' Yang Dipertua, mengenai, terima kasih juga ADUN Lenggeng; naik taraf perparitan, pembersihan sistem aliran sungai di kawasan berisiko banjir iaitu di Pantai dan Lenggeng. Dato' Yang Dipertua, satu permohonan bagi pelaksanaan *Rolling Plan 4*, Rancangan Malaysia Ke-12 telah dimohon bagi Projek Rancangan Tebatan Banjir Sungai Lenggeng kepada Kementerian Sumber Asli, Alam Sekitar Dan Perubahan Iklim (NRECC), namun pihak kementerian belum memberikan keutamaan terhadap pelaksanaan projek tersebut bagi permohonan tahun semasa.

Walau bagaimanapun, pihak Jabatan Pengairan Saliran sentiasa melaksanakan rutin kerja-kerja penyelenggaraan sungai dan pembaikan tebing di jajaran Sungai Lenggeng. Setakat ini 12 kerja-kerja sebutbarga telah dikeluarkan dengan jumlah keseluruhan mencecah 3.07 juta.

Beberapa jajaran sungai seperti Sungai Batang Penar, Sungai Batang Jerlang dan Sungai Emi telah termasuk dalam perancangan kerja-kerja penyelenggaraan dan pemuliharaan sungai tanpa melibatkan kos ataupun peruntukan Kerajaan Negeri keadaannya melalui program Kaedah Timbal Balik. Kini, perolehan projek tersebut dalam proses pelantikan kontraktor. Bagi Projek Rancangan Tebatan Banjir Sungai Lenggeng, peruntukan bagi pelaksanaan yang dipohon melalui *Rolling*

*Plan 4*, Rancangan Malaysia Ke-12 adalah berjumlah 92.8 juta. Terima kasih Dato' Yang Dipertua.

**YB ADUN Lenggeng:** Terima kasih Menteri Besar. Soalan tambahan saya, di Pantai ada kawasan yang selalu banjir di, jadi, saya nak tanya kepada MB, di depan Veterinar tu ada satu restoran, saya rasa milik MBS. Dulu penuhlah pelancong datang situ, dia masuk dalam Veterinar, dia, burung unta ada, kuda dan sebagainya. Tapi selepas 2 kali dilanda apa, banjir melanda kawasan restoran d'Pantai itu, so dia orang semua tutup dan pindah. So soalan saya adakah, adakah apa-apa perancangan daripada Kerajaan Negeri untuk baik pulih ataupun *counter*-lah banjir supaya masuk balik apa, peniaga boleh masuk balik ke kedai MBS berkenaan. Sekian terima kasih.

**YAB ADUN Sikamat:** Terima kasih atas soalan tambahan tersebut. Tadi saya telah maklumkan bahawa kita ada program Timbal Balik ya, program Kaedah Timbal Balik yang mana kontraktor masuk, dia akan korek, akan buat tebing, mereka akan pastikan bahawa mereka ikut *spec* kerana mereka kena siapkan *drawing* sebelum mereka menjalankan kerja-kerja mengambil alih, mengambil pasir di kawasan tersebut, bersama dengan Yayasan Negeri Sembilan. Dan apa yang kita buat adalah di Sungai Batang Penar dan Sungai Batang Jerlang. Dan ini 2 sungai kalau kita dapat buat dengan segera, dia akan dapat membantu kawasan tersebut supaya tidak berlaku banjir kilat. Terima kasih Dato' Yang Dipertua.

**YB Yang Dipertua Dewan:** Dijemput Yang Berhormat Gemencheh.

**YB ADUN Gemencheh:** Terima kasih Yang Dipertua, soalan saya nombor 1.

**YAB ADUN Sikamat:** Terima kasih Dato' Yang Dipertua, soalan ADUN Gemencheh nombor 1 mengenai Kampung Orang Asli Kampung Sungai Lerek. Dato' Yang Dipertua, Kerajaan Negeri telah memperuntukkan tanah seluas 8.02 hektar bagi bertujuan kampung Orang Asli, Kampung Asli Sungai Lerek. Tanah yang berkeluasan 40 hektar (100 ekar) yang bersebelahan perkampungan tersebut adalah merupakan rizab Hutan Simpan Tebong.

Tanah yang diberimilik kepada masyarakat Orang Asli Sungai Lerek adalah kategori bangunan dengan syarat nyata kediaman dan menyebabkan mereka tidak mampu untuk membayar Cukai Tanah. Permohonan rayuan pengecualian denda dan tunggakan Cukai Tanah sebanyak 26,564.00 ringgit ini telah dikemukakan kepada Pejabat Pengarah Tanah Galian Negeri Sembilan pada 19 September 2023 dan

sedang dalam tindakan untuk mendapatkan pertimbangan Pihak Berkuasa Negeri. Jadi, itu yang berlaku. Dan kita tidak ganggu di tanah 100 ekar yang dimaksudkan tersebut. Terima kasih Dato' Yang Dipertua.

**YB Yang Dipertua Dewan:** Soalan tambahan, tak ada?

**YB ADUN Gemencheh:** Terima kasih Yang Dipertua. Soalan tambahan dia lagi satu di Kampung Orang Asli Ulu Pondo, terdapat tanah dekat digunakan tu lebih kurang 100 ekar, telah, kita sudah, dah lihat *plan* dan ada, dekat, ada tanah lot di atas tanah rizab Orang Asli tu. Tapi tu belum diwartakan. Lebih kurang 20 ekar termasuk, kita dapat maklum termasuk 20 ekar lebih saya ingat dah termasuk dalam kawasan rizab tu dan kena dengan kawasan kolam ikan Tok Jenang nilah, Kampung Orang Asli Ulu Pondo tu. Ada saya lihat ada lot-lot yang dah termasuk dalam kawasan rizab Orang Asli tu. Tapi kawasan tu belum diwartakan, mohon diwartakan, Yang Dipertua.

**YAB ADUN Sikamat:** Terima kasih Gemencheh. Saya mintak supaya Gemencheh boleh *detail*-kan dan tulis kepada pejabat saya untuk saya ambil tindakan segera perkara tersebut.

**YB ADUN Gemencheh:** Terima kasih Yang Amat Berhormat.

**YB Yang Dipertua Dewan:** Dijemput YB Klawang.

**YB ADUN Klawang:** Terima kasih yang, Dato' Yang Dipertua. Saya memilih soalan nombor 1.

**YB Yang Dipertua Dewan:** Soalan .....

**YAB ADUN Sikamat:** Soalan 1? Terima kasih Dato' Yang Dipertua, ADUN Klawang, soalan nombor 1 bertajuk Pembelajaran Hadis 40. Kementerian Pendidikan Malaysia (KPM) pada 19 Ogos lepas, telah melancarkan modul pembelajaran Hadis 40 karangan Imam An-Nawawi bertujuan untuk memupuk penghayatan hadis bermula di peringkat sekolah, selain memupuk semangat kasih sayang dan menerapkan kefahaman agama khususnya dalam kalangan pelajar dan guru-guru beragama Islam.

Program rintis modul itu akan dilaksanakan di 61 Sekolah Menengah Kebangsaan Agama (SMKA) dan 228 Sekolah Agama Bantuan Kerajaan (SABK) seluruh negara bermula pada tahun 2024. Semua pihak perlu faham bahawa modul ini hanya diajar kepada para pelajar beragama Islam sahaja dan bukan kepada pelajar bukan Islam. Konsep yang sama telah diterapkan saban tahun sejak tahun 90-an di mana Subjek

Pendidikan Moral diperkenalkan agar para pelajar selain daripada beragama Islam boleh diterapkan dengan nilai-nilai murni.

Kedua-dua mata pelajaran ini iaitu Pendidikan Islam serta Pendidikan Moral yang memberi tumpuan kepada pemupukan, penghayatan dan amalan nilai-nilai murni masyarakat Malaysia yang bertujuan untuk melahirkan murid yang berilmu pengetahuan, berperibadi mulia, serta rela dan sanggup berbakti kepada masyarakat dan negara sejajar dengan Falsafah Pendidikan Kebangsaan iaitu "Pendidikan di Malaysia adalah suatu usaha berterusan ke arah lebih memperkembangkan potensi individu secara menyeluruh dan bersepadu untuk melahirkan insan yang seimbang dan harmonis dari segi intelek, rohani dan emosi serta jasmani, berdasarkan kepercayaan dan kepatuhan kepada Tuhan."

Penetapan silibus bagi mana-mana mata pelajaran akan dikaji terlebih dahulu oleh pihak Kementerian dan sudah pastinya tidak akan berlaku unsur-unsur perpecahan perpaduan dan perkauman. Dengan kata lain, isu ini sebenarnya hanyalah isu kecil yang tidak perlu diperbesarkan kerana modul tersebut yang merupakan antara asas utama kepada masyarakat Islam tidak diajar kepada para pelajar bukan Islam. Perkara ini amat mudah dan jelas.

Atas kesempatan ini, saya menyeru kepada rakan-rakan ahli Yang Berhormat sekalian termasuk rakan-rakan daripada kaum Cina dan India untuk memperjelaskan isu ini dan platform kalian kepada masyarakat sekeliling agar tidak dipecah belahkan dengan sentimen perkauman dan agama.

Kita berdiri dan berikrar melaungkan Rukun Negara yang pertama iaitu "Kepercayaan Kepada Tuhan" dan dalam masa yang sama kita tidak menghalang sebarang agama untuk diamalkan di negara kita selagi mana ianya selari dengan prinsip dan nilai murni negara. Terima kasih Dato' Yang Dipertua.

**YB ADUN Klawang:** Soalan tambahan Dato' Yang Dipertua. Mungkin sudah tiba masanya untuk kita lebih terbuka di dalam anutan agama. Adakah rancangan pihak kerajaan untuk mengadakan forum-forum seperti *comparative religious* di masa hadapan?

**YAB ADUN Sikamat:** Kita sedia maklum bahawa kita tidak ada halangan ya, untuk program-program tersebut dijalankan dan harus mengikut tatasusila yang betul tentang negara kita dan tidak melanggar Rukun Negara kita. Terima kasih Dato' Yang Dipertua.

**YB Yang Dipertua Dewan:** Saya menjemput Yang Berhormat Chembong.

**YB ADUN Chembong:** Dato' Yang Dipertua, soalan nombor 1 daripada saya iaitu tentang apakah perancangan Kerajaan Negeri Sembilan untuk merencanakan aktiviti ekonomi dalam sektor pelancongan khususnya di Daerah Rembau, Dato' Dipertua.

**YB ADUN Bukit Kepayang:** Terima kasih Dato' Yang Dipertua. Terima kasih juga kepada Yang Berhormat Chembong atas soalan berkenaan dengan pelancongan di Daerah Rembau. Bagi merencanakan lagi ekonomi sektor pelancongan di Daerah Rembau, beberapa cadangan dan usaha sedang dilaksanakan. Antaranya dengan menjalankan promosi produk eko pelancongan secara berterusan di Daerah Rembau seperti Denai Alam Sungai Timun, Taman Eko Rimba Gunung Datuk, Kawasan Rekreasi Lubok Talan dan beberapa lagi kawasan tarikan pelancongan.

Selain daripada itu, Daerah Rembau juga sedang dalam usaha mempromosikan destinasi makanan tradisi seperti gulai kuning ataupun masak lemak cili api. Yang selaras dengan cadangan oleh Yang Berhormat ADUN Chembong untuk mengadakan, agar destinasi makanan tradisi masakan lemak salai tersebut dapat dijadikan *street food* atau zon destinasi masakan tradisi di sepanjang Jalan Pedas – Linggi (kawasan Kampung Kundur).

Antara lokasi berpotensi untuk dibangunkan ialah Pengkalan Nelayan Sungai Timun dengan mewujudkan pakej pelancongan aktiviti memancing udang sepih biru, yang saya rasa agak menarik, di samping menaiki bot melihat kelip-kelip. Di samping itu, pengumuman Acara Cabaran Sopit Biru Sungai Timun 2023 telah berjaya dijalankan pada 27 haribulan Ogos 2023 yang dapat menarik penduduk setempat untuk datang kerana memang tak ada banyak program di, di situ. Dan saya rasa program kita boleh masukkan ke dalam acara tahunan atau *calendar event*, dengan izin. Acara ini dicadangkan untuk dijadikan salah satu program ikon khas Daerah Rembau dan diadakan acara tahunan.

Selain itu, Rembau juga merupakan antara daerah yang mempunyai kepelbagaian hasil tani yang mampu menarik kedatangan pelancong. Antaranya adalah tanaman nanas di tanah berkeluasan 3.64 hektar yang diusahakan oleh Koperasi Pekebun Kecil Negeri Sembilan di Pedas. Ini seterusnya mampu menjadi tarikan dan menjana ekonomi penduduk Daerah Rembau. Terima kasih.

**YB ADUN Chembong:** Dato' Yang Dipertua, tadi Yang Berhormat Kepayang ada sebut tentang kawasan memancing Sungai Timun,

Gunung Datuk, Lubok Talan, itu semuanya Dato' Yang Dipertua, adalah kawasan-kawasan pelancongan semulajadi. Namun apa yang saya nak tekankan Dato' Dipertua, di Dewan Undangan Chembong, Dewan Undangan Negeri di kawasan Chembong, ada satu kawasan jajaran daripada Pedas melalui Kundur ke Pilin, Dato' Dipertua, sangat-sangat berpotensi untuk dinaikkan sebagai, dijadikan kawasan pelancongan berasaskan kawasan, berasaskan makanan Melayu tradisional Dato' *Speaker*. Jadi apakah Kerajaan Negeri boleh bersedia untuk memberikan bantuan-bantuan kepada pengusaha-pengusaha makanan ni Dato' Dipertua. Contohnya dari segi khidmat nasihat, peluang-peluang pembiayaan, Dato' Yang Dipertua, selain daripada mungkin kalau boleh dalam bentuk bagaimana kawalan mutu boleh dijalankan, Dato' Dipertua. Dan soalan saya Dato' Dipertua, adakah Kerajaan Negeri bersedia untuk mengambil usaha menghubungkan pengusaha-pengusaha makanan tradisional ni, Dato' Yang Dipertua, dengan agen-agen pelancongan. Bukannya pelancong-pelancong datang sendiri saja Dato' Dipertua. Kaitkan, hubungkan pengusaha ini dengan agen-agen pelancongan Dato' Yang Dipertua.

Dan keduanya, Dato' Dipertua, adakah Kerajaan Negeri bersedia ataupun boleh untuk kiranya membekalkan ataupun mengadakan latihan berkenaan pelancongan makanan ni kepada pengusaha-pengusaha yang sedia ada, Dato' Dipertua. Terima kasih banyak Dato' Dipertua, harap Kerajaan Negeri memberikan penekanan tentang perkara ini.

**YB ADUN Bukit Kepayang:** Terima kasih atas soalan tambahan, Yang Berhormat Chembong. Sepertimana yang saya jawab tadi, memang itu menjadi tumpuan Kerajaan Negeri iaitu jalan Pedas – Linggi, kawasan Kundur, makanan tradisi, di mana kita akan ada satu program, saya akan cadangkan satu program *training of trainers* di mana semua pengusaha tempatan, kita beri latihan untuk menda, mendalami pakej-pakej pelancongan. Seper, satu contoh, kalau singgah dekat kedai masak lemak salai, dia akan ada maklumat-maklumat tentang produk pelancongan yang lain. *So* itu memang menjadi satu daripada usaha atau inisiatif yang bakal akan kita usahakan.

Dan dari segi mengaitkan agen, agensi pelancongan itu juga di atas keprihatinan Yang Amat Berhormat Dato' Seri Aminuddin bin Harun, beliau sudah menetapkan supaya setiap daerah mengeluarkan pakej-pakej pelancongan. Di mana pakej pelancongan ini kita akan buat *matching*, dengan izin, dengan agensi-agensi pelancongan supaya pakej ini dapat kita promosikan kepada pelancong. Ada 3 jenis pelancong. Yang pertamanya adalah pelancong *local*. *Local* bermakna pelancong dari Negeri Sembilan. Kedua adalah pelancong domestik iaitu dari

negeri lain di Malaysia. Yang ketiganya adalah pelancong antarabangsa di mana kita akan war-warkan pakej-pakej pelancongan ini di luar negara. Dan memang sekarang setiap daerah sedang mengusahakan pakej-pakej pelancongan ini yang melibatkan juga bukan sahaja produk asas tani, di mana kita kalau musim durian, kita akan bawa mereka pergi ke dusun durian. Kalau ada produk nanas, dusun nanas, kita akan bawa mereka pergi ke ladang tersebut. Dan juga kita akan memberi khidmat nasihat supaya ladang tersebut buat produk. Misal kata kalau kita pergi ke Hawaii di ladang nanas tersebut dia bukan sahaja ada jual nanas, dia ada jual aiskrim nanas, *candy* nanas, kek nanas, macam-macam. So itu adalah satu, satu inisiatif supaya kita dapat membina produk-produk pelancongan yang lebih mantap dan supaya kita dapat tarik lebih ramai pelancong. Sekian, terima kasih.

**YB Yang Dipertua Dewan:** Okey Chembong, puas hati? Dia sebenarnya yang viral .....

**YB ADUN Chembong:** Saya mana tak pernah tak puas .....

**YB Yang Dipertua Dewan:** .... yang, yang *viral* .....

**YB ADUN Chembong:** Dato' *Speaker*, saya tak pernah tak puas hati dengan Dato' *Speaker*. Terima kasih.

**YB Yang Dipertua Dewan:** Kedai yang banyak *viral* ni di DUN Kota dengan Linggi. Lomak salai tu semua kan. Kita nak dekat Chembong-lah. Saya jemput Seremban Jaya.

**YB ADUN Seremban Jaya:** Tuan Dato' *Speaker*. Saya mengemukakan, patut saya ingat mahu kemukakan soalan nombor 3, tapi saya tengok Exco Pertanian tiada di dalam Dewan, sebab itu saya mengemukakan soalan nombor 1. Terima kasih.

**YAB ADUN Sikamat:** Terima kasih Dato' *Speaker*. Terima kasih soalan Seremban Jaya mengenai *duty free* ataupun bebas cukai di Port Dickson. Dato' Yang Dipertua, Zon Bebas meliputi Zon Perdagangan Bebas yang membenarkan aktiviti perdagangan termasuklah berniaga (kecuali perniagaan runcit), pecah pukal, menggred, pembungkusan semula dan melabel semula manakala Zon Perindustrian Bebas pula adalah khusus bagi aktiviti pengilangan.

Selain daripada Zon Perdagangan Bebas dan Zon Perindustrian Bebas, Kerajaan Persekutuan telah memberi status pulau bebas cukai kepada Labuan, Langkawi dan Tioman bagi merangsang lagi pembangunan di ketiga-tiga pulau tersebut dengan status pulau bebas cukai. Barang-

barang yang dibawa masuk dari Kawasan Utama Kastam ke Labuan, Langkawi dan Tioman selain daripada barangan yang diisyaratkan oleh Menteri Kewangan adalah dibebaskan daripada duti import, cukai jualan, duti eksais dan cukai perkhidmatan.

Dalam pembangunan sesuatu kawasan Zon Bebas, adalah penting agar perkara berikut dikenal pasti terlebih dahulu:

- Pertama: Kesesuaian kawasan meliputi lokasi, topografi, persekitaran dan milikan kawasan cadangan Zon Bebas;
- Kedua: Pihak Berkuasa Zon iaitu mana-mana badan berkanun atau syarikat atau jabatan bagi Kerajaan Malaysia atau bagi mana-mana negeri dalam Malaysia yang dilantik di bawah peruntukan subseksyen 3(2) Akta Zon Bebas 1990 untuk mentadbir, menyenggara dan mengendali mana-mana Zon Bebas;
- Ketiga: operator iaitu entiti yang telah diberikan kelulusan untuk menjalankan aktiviti dalam suatu Zon Bebas;
- Keempat: Pemain utama (*anchor tenant*);
- Kelima: Kos pembangunan infrastruktur berkaitan; dan
- Yang keenam: Penentuan langkah-langkah keselamatan (dari segi membentaras pelarian cukai);

Selain daripada itu, terdapat Kedai Bebas Cukai di Malaysia dilesenkan di bawah Seksyen 65D Akta Kastam 1967. KBC lazimnya beroperasi di lapangan terbang antarabangsa, pelabuhan, pusat bandar di sempadan-sempadan. KBC diwujudkan bertujuan untuk mempromosikan industri pelancongan di Malaysia, terutamanya kepada pelancong asing. Pelancong-pelancong asing dan juga pelancong-pelancong tempatan yang layak dan boleh membeli barang bebas dari duti dan Cukai Barang dan Perkhidmatan di mana KBC.

Pada dasarnya, terdapat beberapa jenis Kedai Bebas Cukai yang beroperasi di Malaysia seperti:

- KBC di lapangan terbang yang biasanya terletak di bahagian pinggir di bangunan terminal lapangan terbang. Ia bertujuan untuk membekalkan barang kepada krew dan penumpang pesawat.

- KBC di pelabuhan seperti di Pelabuhan Klang, Pelabuhan Tanjung Pelepas, Terminal Feri Pasir Gudang, Terminal Feri Tanjung Belungkor di Johor Bahru.
- Yang ketiga: KBC sempadan yang terletak di tempat pemeriksaan sempadan tertentu di Padang Besar dan Bukit Kayu Hitam, untuk membekalkan barang-barang bebas cukai kepada pelancong-pelancong.
- Keempat: KBC ataupun Kedai Bebas Cukai dalam negeri seperti di Rantau Panjang dan Pengkalan Kubor yang terletak dalam Kawasan Utama Kastam.

Kerajaan Negeri sentiasa mengambil berat akan kemajuan ekonomi di negeri ini dan perkara sebegini ada dalam penelitian perancangan pembangunan negeri khususnya potensi Port Dickson yang merupakan lokasi pelancongan utama Negeri Sembilan untuk menerima limpahan pelancong terutamanya pada hujung minggu. Untuk itu, pentadbiran Kerajaan Negeri akan meneliti kemungkinan kesesuaian membangunkan kawasan seumpamanya di Port Dickson dengan mengambil kira kriteria seperti faktor-faktor ekonomi yang berkaitan. Terima kasih Dato' Yang Dipertua.

**YB ADUN Seremban Jaya:** Dato' Yang Dipertua, DUN Seremban Jaya puas hati jawapan oleh ADUN Sikamat. Terima kasih.

**YB Yang Dipertua Dewan:** Mungkin kita tak akan mulakan trend itu ya. Okey saya jemput Lukut. YB Lukut.

**YB ADUN Lukut:** Okey, terima kasih Dato' Yang Dipertua. Saya, Lukut kemukakan soalan nombor yang pertama, nombor 1.

**YB ADUN Bukit Kepayang:** Terima kasih Tuan Yang Dipertua. Kepada, terima kasih juga kepada Yang Berhormat Lukut atas soalan berkenaan dengan eko pelancongan Kerajaan Negeri.

Buah naga isinya merah,  
Hidang banyak untuk dijamu,  
Lukut adalah tempat bersejarah,  
Pelancongannya hebat penuh berilmu.

Jawapannya adalah Kerajaan Negeri telah mewujudkan Rancangan Pembangunan Negeri Sembilan (RPNS) 2021-2025 yang menetapkan Pembangunan Pelancongan Negeri Sembilan pada nisbah 60:30:10 iaitu pelancongan pantai (60%), eko pelancongan (30%), pelancongan adat

dan warisan (10%). Pembangunan eko pelancongan Negeri Sembilan ini juga telah dimasukkan di dalam Pelan Eko Pelancongan Kebangsaan 2016-2025 oleh Kementerian Pelancongan, Seni Dan Budaya (MOTAC).

Dalam perkara ini, Kerajaan Negeri melalui Jabatan Perhutanan Negeri Sembilan telah menyenaraikan 4 fokus utama dalam konteks eko pelancongan iaitu PD Forest @ Sungai Menyala; nombor 2: Taman Negeri Kenaboi; nombor 3: Taman Eko Rimba; dan keempat: aktiviti pendakian.

Selain itu, Jabatan Perhutanan bekerjasama dengan pelbagai jabatan serta agensi sedang berusaha ke arah meningkatkan penarafan kawasan eko pelancongan di bawah seliaan Jabatan Perhutanan. Selain itu, ianya dijadikan sebagai destinasi eko pelancongan utama di Negeri Sembilan melalui pengiktirafan *MyParks Award 2023*, dengan izin, dan *Malaysian Tourism Quality Assurance*.

Pada tahun 2023, Kerajaan Negeri juga telah memperuntukkan sebanyak 1.6 juta bagi tujuan naik taraf dan penyelenggaraan Taman Eko Rimba adalah seperti berikut:

- Nombor 1: Kerja-kerja Menaiktaraf Infrastruktur Kemudahan Produk Pelancongan di PD Forest @ Sg. Menyala, Port Dickson sebanyak 200,000.00;
- Kerja Penyelenggaraan dan Pembersihan Infrastruktur Kemudahan Produk Pelancongan Taman Eko Rimba sebanyak 500,000.00;
- Ketiga: Kerja-Kerja Pembinaan Infrastruktur Kemudahan Produk Pelancongan Taman Eko Rimba Jeram Toi, Jelebu sebanyak 903,000.00.

Terima kasih.

**YB ADUN Lukut:** Okey, soalan tambahan. Terima kasih Bukit Kepayang memberi jawapan mantap. Sebagaimana yang kita tahu eko pelancongan merupakan satu pelancongan yang berasaskan alam semulajadi yang mempunyai, mempunyai potensi yang besar di Negeri Sembilan dengan Negeri Sembilan yang kaya dengan sumber biodiversiti. Dan banyak pelabur swasta yang berminat untuk melabur dalam bidang apa, eko pelancongan dekat Negeri Sembilan. Seperti jawapan yang Bukit Kepayang bagi tadi adalah kebanyakan adalah agensi kerajaan ataupun jabatan yang usahakan. So apa perancangan Kerajaan Negeri untuk membantu pelabur swasta ini yang, yang

berminat untuk melabur dalam, dalam sektor eko pelancongan ini? Terima kasih.

**YB ADUN Bukit Kepayang:** Terima kasih atas soalan tambahan. Memang kita ingin mempergiatkan lagi sektor eko pelancongan dan kita sedia maklum bahawa Jabatan Perhutanan mempunyai kekanganlah dari segi kerana kakitangan ataupun dari segi pengutipan yuran kemasukan dalam lokasi-lokasi. Cuma sekarang, kita kena kenal pasti apakah tatacara supaya kita dapat wujudkan produk-produk pelancongan seperti di China ataupun di Taiwan yang dikendalikan dan di, diuruskan oleh pihak swasta. Tapi ini masih dalam peringkat yang pra matang kerana kita belum buat apa-apa kajian.

Saya memang ber, berminat jikalau kita dapatlah *outsource* produk-produk ini. Saya bagi contoh seperti di Penang, di mana Penang Hill sudah menjadi *top-15, top-14* destinasi di dunia dan kerana ia sudah diswastakan. Tapi saya rasa sepertimana yang saya cadang, kata tadi, dia masih dalam peringkat pra matang kerana kita belum buat kajian tertentu. Dan saya harap ini adalah hala tuju supaya kita, kerana kerajaan bukan dalam *business of doing business*. Kalau kita dapat swastakan, maka mereka dapat menjalankan dan menguruskan produk eko pelancongan dengan lebih baiklah. Itu saja. Sekian, terima kasih.

**YB ADUN Lukut:** Sikit lagi Dato' Yang Dipertua. Apa yang saya nak dimaksudkan, maksudkan dekat sini, swasta ni sudah mempunyai sumber wang, kewangan. Dia dah *ready* nak masuk ke Negeri Sembilan. Dia nak melabur. Cuma kekangan yang mereka hadapi ataupun masalah yang mereka hadapi, mungkin dari segi tanah, permohonan tanah. Permohonan lesen dekat PBT. Adakah kita sedia untuk membantu mereka? adakah permohonan tanah untuk kegunaan sementara, mungkin dalam permohonan KMTT, kita bantu dari segi tu saja. Sebab mereka dah *ready* untuk masuk untuk bantu kita untuk mempromosikan sektor pelancong, eko pelancongan. Cuma adakah kita, agensi-agensi kerajaan, jabatan-jabatan yang berkenaan dah *ready* untuk bantu mereka untuk sama-sama kita merencanakan sektor ini? Itu saja. Sekian.

**YB ADUN Bukit Kepayang:** Terima kasih atas soalan tambahan yang kedua. Memang sepertimana yang dijawab oleh Yang Amat Berhormat Menteri Besar, bahawa SOP sedang kita tunggu daripada pihak pusat, Kerajaan Pusat se, kalau kita tak ada SOP tersebut, memang menjadi satu masalah, jikalau kita nak bantu tanpa garis panduan daripada Kerajaan Pusat. So saya harap kita dapatlah, dapat garis panduan tu dalam masa yang terdekat supaya kita dapat membantu merencanakan sektor pelancongan ni. Terima kasih.

**YB Yang Dipertua Dewan:** Saya menjemput Yang Berhormat Lobak.

**YB ADUN Lobak:** Terima kasih Dato' Yang Dipertua Lobak mengemukakan soalan nombor 2.

**YB ADUN Nilai:** Dato', Dato' Yang Dipertua, sehingga 31 Ogos 2023 terdapat 4 skim PPR di Negeri Sembilan di mana 2 daripadanya adalah terletak di daerah Seremban dan 2 daripadanya adalah di Daerah Port Dickson. Soalannya berkaitan dengan laporan terkini di mana di Seremban adalah PPR Senawang, jumlah rumah yang dibina adalah 420 rumah, unit dan telah diserahkan 420, diduduki 415 dan kosong adalah, yang belum diduduki adalah 5. Untuk PPR Rantau: yang dibina adalah 100, diserahkan 100, diduduki - 85 dan kosong adalah, masih belum diduduki adalah 15. Unit kosong akan dibuat pengisian oleh KPKT selepas senarai dikemukakan oleh SUK Negeri Sembilan.

Berkaitan dengan Daerah Port Dickson, PPR Ladang Siliau adalah 150 unit dibina, yang telah diserahkan juga adalah 150, yang diduduki adalah 145 dan 5 unit telah pun rosak. Di PPR Tanah Merah, yang dibina dan diserahkan adalah 100, belum diduduki, kosong adalah 100 kerana selepas buat pengundian, telah menerima surat bantahan daripada penduduk berkaitan dengan 49 nama. So masih dalam proses meneliti bantahan tersebut.

Dari segi kaum, PPR Senawang: kaum Melayu 396, Cina adalah 5, India adalah 13. PPR Rantau: 72 orang Melayu, 1 - Cina, 12 - India. PRT Ladang Siliau: 40 Melayu, kosong Cina, Cina - 0 dan India adalah 105. Terima kasih.

**YB ADUN Lobak:** Terima kasih Nilai. Soalan tambahan macam ni, kerana dengan masyarakat yang kami bangun hingga Malaysia Merdeka 66 tahun, so nampak ni golongan bujang yang semakin ramai. Masa dia muda, ibu pak dia ada lagi, boleh dia tanggung. Tapi sekarang masuk tahun merdeka yang 66, kami nampak permintaan yang bujang-bujang ni sekarang masuk warga emas, sampai mereka tempat duduk pun tak ada. Rumah pun tak ada. Adik beradik dia mereka menumpukan keluarga masing-masing. So jadi permintaan yang bujang-bujang ini khususnya yang warga emas tu, tak ada tempat nak duduk. So kami nak tanya, kerana syarat-syarat PPR tu, dia kena ikut, kena ikut syarat ada berkeluarga dengan anak sekali. So saya nak tanya adalah kerajaan sedia bantu yang golongan bujang-bujang ini dapat satu rumah atau tengok dengan cara apa tu, membantu yang golongan bujang yang semakin ramai ni dapat rumah tinggal. Terima kasih.

**YB ADUN Nilai:** Setakat ini, syarat yang dikenakan adalah diberi keutamaan kepada keluarga-keluarga yang sudah pun berumah,

berumahtangga, ataupun telah berkahwin kerana setiap rumah ini sudah tentu ada 3 bilik dan kalau kita bagi untuk seorang bujang saja tinggal dalam 1 bilik, ini kita tidak dapat memaksimumkan penggunaan rumah tersebut. Itu saja, terima kasih.

**YB ADUN Lobak:** Dato' Dipertua, cadangan. Kerana memang permintaan tu untuk golongan bujang ni, khas di DUN Lobak sebenarnya semakin serius, dengan izinnya, kerana mereka ni, makluman yang saya dapat tu, mereka sekarang kongsi tinggal di rumah swasta tu, dia cara dia, 3 orang atau 4 orang berkumpul satu tempat rumah papan ke atau rumah perumahan kawasan tu, tapi nampak cara ni nampak lagi mahal, mereka satu rumah ni 700.00. So dia kena tinggal 7 orang, seorang bayar 100.00. Jikalau makluman dari JKM tu, bantuan, bantuan tu JKM bujang, ramai sekali. Lagi pun, bila dia masuk warga emas tu, mereka tak dapat jadi, hidup pun *income* pun tak ada, dengan izinnya, so masalah tinggal dia akan jadi masalah komuniti dan masyarakat. Terima kasih.

**YB ADUN Nilai:** Terima kasih atas cadangan Yang Berhormat Lobak. Kita akan melihat kesesuaian tersebut setelah merujuk kepada KPKT kerana semua rumah PPR ini adalah di bawah KPKT. Dan kita ambil pandangan tersebut supaya orang yang tidak berkahwin, yang bujang pun dapat tinggal bersama.

**YB ADUN Lobak:** Terima kasih.

**YB Yang Dipertua Dewan:** Dijemput Yang Berhormat Sungai Lui.

**YB ADUN Sungai Lui:** Terima kasih Dato' Yang Dipertua. Saya sebenarnya nak kemukakan soalan nombor 1 berkenaan tentang lot perumahan generasi kedua felda di kawasan felda. Saya mohon sebab apa ini satu tajuk yang ditunggu-tunggu warga felda khususnya anak-anak peneroka.

**YB Yang Dipertua Dewan:** Soalan. Soalan nombor berapa?

**YB ADUN Sungai Lui:** Saya mohon soalan ni dibawak pada besok pagi. Untuk dijawab oleh Exco berkenaan pada besok pagi.

**YB Yang Dipertua Dewan:** Macam mana? Kita ada soalan nombor 2. Pasal Yang Berhormat Pertang tak ada.

**YB ADUN Sungai Lui:** Bawak kepada besok.

**YB Yang Dipertua Dewan:** Soalan yang ke, 2?

**YB ADUN Sungai Lui:** Saya mintak semula soalan ni dibawak kepada besok, okey.

**YB Yang Dipertua Dewan:** Ya ya ya. Hari ini?

**YB ADUN Sungai Lui:** Untuk hari ini kalau dibenarkan kepada apa, soalan tu dibawak kepada hari besok, dan kalau dibenarkan ....

**YB Yang Dipertua Dewan:** Ya ya ya.

**YB ADUN Sungai Lui:** ..... saya bawak kemukakan soalan nombor 2 untuk hari ini.

**YB ADUN Senaling:** Terima kasih YB Dato' Yang Dipertua, soalan daripada Lui berkaitan dengan bantuan komputer riba. Sebenarnya dari segi latar belakangnya, pembekalan peranti komputer melalui Program Cerdik telah dilancarkan pada April 2021 yang lalu yang bertujuan memberi bantuan bersasar kepada murid yang terpilih dalam kalangan kelompok B40 untuk menghadapi Pengajaran dan Pembelajaran (PdP) sewaktu Perintah Kawalan Pergerakan. Sewaktu tu COVID-lah kita mulakan bantuan komputer ni.

Jadi pada tahun 2021, program ini melibatkan peranti komputer disalurkan terus kepada 150,000 orang murid di seluruh Malaysia. Manakala pada tahun 2023, peranti komputer disalurkan ke sekolah terpilih sahaja yang mempunyai statistik pelajar B40 yang tertinggi untuk kegunaan pelajar sewaktu sesi PdP dalam kelas. Dato' Dipertua, pemilihan sekolah adalah berdasarkan kriteria yang telah ditetapkan oleh Bahagian Pengurusan Sekolah Harian dan dikawal selia oleh Kementerian Pendidikan Malaysia serta Yayasan Hasanah, pembekallah.

Di Negeri Sembilan pula, sebanyak 5,095 unit peranti telah diagihkan kepada murid-murid di 58 sekolah pada tahun 2021 yang lalu. Pembekalan peranti bermula pada 12 April 2021 dan berakhir pada 20 September 2021. Untuk makluman, di Negeri Sembilan 11 syarikat penyumbang peranti di Negeri Sembilan antaranya ialah Yayasan Sime Darby, TNB, RHB, MBSB dan jugak beberapa syarikat swasta yang lain.

Kalau dizinkan untuk saya baca sikit, pecahan sekolah-sekolah ya, mengikut daerah ya, yang telah menerima bantuan ini:

- 8 buah sekolah di PPD Seremban menerima 1,450 unit peranti;
- 21 buah sekolah di PPD Jempol & Jelebu telah menerima 1,454 unit peranti;

- 10 buah sekolah di PPD Port Dickson menerima 993 unit;
- 9 buah sekolah di PPD Kuala Pilah menerima 499 unit;
- 4 buah sekolah di PPD Tampin menerima 384 unit; dan
- 6 buah sekolah di PPD Rembau menerima 315 unit peranti.

Manakala pada tahun 2023, sebanyak 20 buah sekolah rendah di Negeri Sembilan yang terpilih yang mempunyai statistik pelajar B40 yang tertinggi masing-masing telah menerima 10 unit komputer riba untuk kegunaan pelajar di dalam kelas. Sumbangan 200 unit peranti ini adalah daripada Syarikat SNS Network menerusi peranan Yayasan Didik Negara yang telah dilaksanakan pada 13 Julai 2023.

Ini juga saya bacakan sedikitlah senarai yang menerima ni: pertama: Sekolah Kebangsaan Dato' Shah Bandar Abu Bakar, Labu Hilir; Sekolah Kebangsaan Batang Benar; Sekolah Kebangsaan Raja Melana; Sekolah Kebangsaan Dato' Ahmad Manaf; SJK(T) Ladang Regent; SK Air Kuning Selatan; SJK(T) Ladang Repah; SK Tuanku Abdul Rahman; SK Senaling; SK Rembang Panas; SK Ampang Tinggi; SK Palong 4; SK Undang Jelebu; SK Durian Tipus; SK Sungai Lui, sekolah kebangsaan YB, Sungai Lui pun dapat. Sekolah Kebangsaan Datuk Undang Abdullah; SJK(C) Chun Yin, Jelebu; SK Lukut; SK Kampung Gelam; dan juga SK Panglima Adnan. Terima kasih Dato' Dipertua.

**YB Yang Dipertua Dewan:** Dijemput Yang Berhormat Juasseh.

**YB ADUN Juasseh:** Terima kasih Dato' Yang Dipertua, soalan saya soalan nombor 1.

**YB ADUN Palong:** Terima kasih Dato' Yang Dipertua, terima kasih Juasseh. Soalan berkenaan dengan sukan wanita dan jugak berkenaan perancangan dengan Kerajaan Negeri menjadikan Negeri Sembilan sebagai negeri yang cemerlang dalam sukan.

Dato' Yang Dipertua, perancangan bagi program pembangunan sukan bukan hanya menumpukan penglibatan gender tertentu sahaja, ianya melibatkan penyertaan menyeluruh dari atlet lelaki dan wanita, kaum serta agama. Di Negeri Sembilan tiada program khusus untuk pembangunan sukan wanita. Walau bagaimanapun, Kementerian Belia Dan Sukan melalui Majlis Sukan Negara Malaysia telah melaksanakan program khas sukan wanita bersama Persatuan Sukan Kebangsaan. Antara sukan yang terlibat dalam projek khas pembangunan sukan wanita ini adalah bola jaring, hoki, bola sepak dan ragbi.

Persatuan Sukan Negeri yang proaktif sudah semestinya akan menyambut baik pelaksanaan program ini kerana pelbagai kemudahan diberikan antaranya bayaran elaun jurulatih, bayaran peralatan asas latihan, bantuan penyertaan ke kejohanan dan kursus serta kem latihan kepada atlet dan jurulatih. Latihan atlet lebih teratur menggunakan modul yang dibekalkan oleh jurulatih kebangsaan dan program ini akan dipantau serta diselia oleh jurulatih yang berkemahiran, mempunyai pengetahuan yang khusus dalam sukan berkenaan.

Secara keseluruhannya, penyertaan atlet wanita dalam temasya besar khasnya contohnya Sukan Malaysia tidak pernah berkurangan. Untuk rekod Yang Berhormat Juasseh, pada SUKMA 2018, seramai 120 atlet wanita menyertai temasya tersebut. Peningkatan telah berlaku pada tahun 2022 di mana seramai 145 orang telah menyertai SUKMA edisi ke-20 di Kuala Lumpur. Jadi maknanya ada peningkatan dari segi penglibatan wanita dalam sukan.

Dari segi pencapaian Pasukan Bola Keranjang Wanita pula ya, contohnya pada Temasya Sukan Malaysia 2022, Pasukan Bola Keranjang Wanita merupakan antara yang terbaik apabila berjaya menyumbangkan 1 emas dan 1 gangsa ya. Bagi sukan petanque, menembak, wushu, pencak silat dan, dan juga lain-lain, juga sukan termasuk gimrama, pingat emas, perak dan gangsa telah disumbangkan oleh sebahagian besar atlet wanita yang berasal dari Negeri Sembilan. Pemecah rekod kebangsaan juga adalah di kalangan atlet menembak wanita anak kelahiran Negeri Sembilan bagi acara 3 Posisi Berpasukan di Temasya Sukan Malaysia 2022 yang lalu dan yang lebih membanggakan atlet wanita dari sukan Pencak Silat juga telah memenangi Anugerah Khas dari Kerajaan Negeri Sembilan bagi pencapaian *hat-trick* emas untuk 3 kali berturut-turut bermula dari Temasya Sukan Malaysia 2016, 2018 dan 2022.

Harapan Kerajaan Negeri di masa akan datang supaya pemimpin-pemimpin sukan akan lebih proaktif dalam memastikan program-program pembangunan sukan dirancang dengan baik melalui persatuan-persatuan sukan yang aktif. Itu berkenaan dengan penglibatan wanita.

Keduanya, pelaburan Kerajaan Negeri kepada industri sukan memberikan impak yang besar dalam keseluruhan anggaran belanjawan kerajaan setiap tahun. Pengukuran prestasi kejayaan pasukan akan dinilai ke atas setiap pencapaian tertinggi yang dicapai khasnya melibatkan penyertaan kontinjen negeri di temasya besar khasnya Temasya Sukan Malaysia.

Kerajaan Negeri melalui Majlis Sukan Negeri telah membuat perancangan bagi program pembangunan sukan khasnya melibatkan sukan-sukan wajib yang akan dipertandingkan di Temasya Sukan Malaysia. Program ini perlu digerakkan bersama Persatuan Sukan Negeri dalam usaha memastikan bekalan tenaga jurulatih dan kepakaran teknikal berkaitan sukan berkenaan diperolehi dari Persatuan Sukan Negeri. Persatuan juga perlu mempunyai perancangan program pembangunan yang komprehensif dan struktur tadbir urus yang stabil bagi meyakinkan Kerajaan Negeri untuk menyalurkan dana.

Selain program usahasama bersama Persatuan Sukan Negeri, Kerajaan Negeri melalui Majlis Sukan Negeri telah menyambut baik program-program latihan yang dirancang oleh Majlis Sukan Negara Malaysia dalam usaha Pembangunan sukan terpilih. Pelaksanaan Program Pelapis dan Bakat di Negeri Sembilan melibatkan 13 jenis sukan yang secara konsisten di pertandingan di Temasya Sukan Malaysia. Melalui program ini, pihak Majlis Sukan Negara Malaysia menyalurkan geran bantuan elaun jurulatih, bantuan penyertaan ke kejohanan, bantuan sewaan *venue* latihan dan kemudahan peralatan asas latihan. Bagi memastikan kesinambungan program ini dapat dilaksanakan dengan baik, Kerajaan Negeri juga memberikan peruntukan tambahan mengikut keperluan sukan berkenaan.

Dato' Yang Dipertua, bagi sukan-sukan yang tidak tersenarai dalam program usahasama bersama Majlis Sukan Negara ini, Majlis Sukan Negeri ya, akan menubuhkan pusat-pusat latihan secara berfasa dalam usaha memastikan semua 28 jenis sukan wajib yang akan dipertandingkan di Temasya Sukan Malaysia akan mempunyai Pusat Latihan di negeri bersama struktur pembangunan sukan yang mampan.

Sukan-sukan yang berada dalam kategori sukan pilihan seperti silambam, e-Sports, muay thai, softball dan kriket, Majlis Sukan Negeri akan memberikan geran bantuan kepada persatuan sukan berkenaan mengikut permohonan yang dibuat. Biasanya jika permohonan untuk menyertai sesuatu kejohanan akan sentiasa mendapat perhatian dan bantuan dari Majlis Sukan Negeri dengan menepati syarat-syarat yang telah ditetapkan.

Dato' Yang Dipertua, penumpuan Kerajaan negeri untuk menjadikan Negeri Sembilan cemerlang dalam bidang sukan adalah kepada sukan-sukan yang telah menyumbang pingat secara konsisten di Temasya Sukan Malaysia. Antara sukan yang konsisten menyumbang pingat adalah sukan wushu, menembak, olahraga dan ragbi. Sukan-sukan ini telah mendapat peruntukan yang berbeza dari sukan-sukan lain

khasnya melibatkan peralatan latihan, program latihan dan bayaran jurulatih.

Antara usaha lain yang dilaksanakan oleh Kerajaan Negeri untuk memastikan kecemerlangan sukan diteruskan, Majlis Sukan Negeri telah mengadakan perkongsian pintar bersama Suruhanjaya Pencegahan Rasuah Malaysia, Akademi Kejurulatihan, Pesuruhjaya Sukan Malaysia dan universiti tempatan dalam program-program kursus dan bengkel pemantapan tadbir urus Persatuan Sukan Negeri. Kerjasama dan penyertaan dari Persatuan Sukan Negeri adalah amat digalakkan dalam usaha memberikan pengetahuan dalam tadbir urus persatuan.

Dan akhirnya, secara keseluruhannya, dalam usaha memastikan kecemerlangan sukan di negeri untuk terus cemerlang, untuk terus cemerlang faktor utama yang harus diberikan perhatian adalah tadbir urus persatuan yang cekap dari segi pengurusan, kejurulatihan, kepegawaian dalam pembangunan Persatuan Sukan Negeri. Ini secara tidak langsung akan meyakinkan Kerajaan Negeri melalui Majlis Sukan Negeri Sembilan untuk menyalurkan lebih banyak dana kepada Persatuan Sukan Negeri untuk lebih berjaya dan cemerlang di dalam bidang sukan masing-masing. Kerajaan Negeri akan sentiasa memberikan bantuan dan perhatian kepada Persatuan Sukan Negeri yang sentiasa cemerlang dan menyumbang pingat khasnya melibatkan Temasya Sukan Malaysia. Terima kasih Dato' Dipertua.

**YB ADUN Juasseh:** Tak ada soalan tambahan Dato', cukup jelas. Terima kasih YB.

**YB Yang Dipertua Dewan:** Terima kasih Juasseh. Saya persilakan Temiang.

**YB ADUN Temiang:** Dato', boleh kasi masa tambahan untuk saya? Nombor 2-lah Dato', soalan.

**YB Yang Dipertua Dewan:** Nombor 2.

**YB ADUN Repah:** Terima kasih Dato' Yang Dipertua. Terima kasih kepada ADUN Temiang yang bertanyakan soalan berkaitan kilang kitar semula. Dato' Yang Dipertua, berdasarkan rekod yang diterima daripada Pihak Berkuasa Tempatan (PBT) dan Jabatan Alam Sekitar Negeri Sembilan, jumlah kilang kitar semula sisa plastik yang berlesen di Negeri Sembilan adalah seperti berikut: di Daerah Seremban terdapat 2 kilang kitar semula sisa plastik yang berlesen, di Port Dickson terdapat 1 kilang kitar semula sisa plastik yang berlesen dan Jempol ada 1 kilang. Dan jumlah kilang kitar semula sisa plastik yang tidak berlesen adalah

seperti berikut: di Daerah Port Dickson terdapat 1, di Jempol ada 1, dan di Rembau ada 1.

Dari tahun 2019 hingga kini, sebanyak 2 kes kilang kitar semula sisa plastik yang telah dibawa ke mahkamah melibatkan kilang yang sama iaitu Zheng Xing Plastic Sdn. Bhd. Tarikh kesalahan dilakukan adalah 13 Julai 2020. Kesalahan adalah di bawah Peraturan 11(1)(b), Peraturan-Peraturan Kawalan Alam Sekeliling (Efluen Perindustrian) 2007. Keputusan Mahkamah dalam kes tersebut adalah pihak pendakwaan gagal menimbulkan kes prima facie. Dan kesalahan tarikh kedua adalah 12 Mei 2021. Kesalahan dilakukan di bawah Seksyen 34B, Akta Kualiti Alam Sekeliling 1974. Kes ini masih ditetapkan untuk perbicaraan pada 31 Januari 2024. Terima kasih.

**YB ADUN Temiang:** Terima kasih jawapan YB Exco dan soalan tambahan saya adalah dulu pernah satu ketika waktu dulu, pihak JAS banyak menjalankan operasi terhadap kilang-kilang yang menjalankan memproses plastik-plastik haram di negeri ini, yang dibawa masuk dari negara asinglah. Tapi sejak kebelakangan ini saya nampak usaha ini berkurangan dan saya tak apa yang telah berlaku. Saya tak pasti pihak JAS sedar ke atau tidak sedar bahawa terdapat ramai ini, sisa-sisa plastik haram yang telah dibawa masuk ke dalam negeri untuk diproses. Saya harap perkara ini perlu dipantau. Dan saya pun terperanjat tadi ada satu kes telah didakwa tapi tak berjaya. Jadi sesuatu yang amat mengejutkan sayalah mengapa terdapat bukti tapi tidak boleh didakwa.

**YB ADUN Repah:** Terima kasih kepada ADUN Temiang bertanyakan soalan berkaitan dengan pemeriksaan kilang-kilang haram sekiranya ada di Negeri Sembilan. Saya nak maklumkan bahawa ada satu kilang kitar semula sisa plastik yang tidak berlesen di Daerah Rembau telah diambil tindakan. Kilang ini telah dikompaun, walau bagaimanapun syarikat ini telah mendapat kelulusan bersyarat daripada Jawatankuasa Perancangan Negeri berdasarkan rayuan dari pihak mereka. Namun, sehingga kini mereka masih belum mengemukakan sebarang permohonan baru untuk pertimbangan pihak Majlis Daerah Rembau. Dan saya juga ingin menekankan di sini, Jabatan Alam Sekitar sentiasa membuat pemantauan dan pemeriksaan dan sekiranya ada kilang-kilang sisa plastik yang dijalankan secara haram, tindakan tegas akan diambil terhadap pengusaha kilang tersebut. Dan buat masa ini, sekiranya ahli-ahli Yang Berhormat ada aduan berkenaan kilang-kilang yang beroperasi, sila maklumkan kepada Jabatan Alam Sekitar dan kita akan ambil tindakan yang sewajarnya. Terima kasih.

**YB Yang Dipertua Dewan:** Dijemput Yang Berhormat Johol.

**YB ADUN Johol:** Terima kasih Dato' Yang Dipertua, Johol soalan nombor 1.

**YAB ADUN Sikamat:** Terima kasih Dato' Yang Dipertua. Apakah dasar Kerajaan Negeri untuk memajukan kawasan tanah adat dan tanah terbiar. Enakmen Pemegangan Tanah Adat Luak Tanah Mengandung dan Tanah Adat Lingkungan 2022 (Enakmen No. 20/2022) telah diwartakan dan dikuatkuasakan pada 29 Disember 2022 dan memansuhkan *Customary Tenure Enactment* (Lingkungan Adat) Enactment 1960 (*Enactment 12*). Enakmen ini diwujudkan bagi membolehkan Tanah Adat Luak Tanah Mengandung dan Tanah Adat Lingkungan dibangunkan dengan mengekalkan status tanah adat tersebut.

Enakmen ini mengemaskini peruntukan-peruntukan lama dengan mewujudkan peruntukan-peruntukan baru antaranya permohonan untuk mengubah syarat, sekatan dan kategori, Pihak Berkuasa Negeri untuk menetapkan atau mengubah syarat, sekatan dan kategori, pecah bahagi, penyatuan lot-lot tanah, kuasa Pihak Berkuasa Negeri untuk meluluskan penyerahan balik dan pemberimilik semula serta pengambilan tanah bagi Tanah Adat Luak Tanah Mengandung dan Tanah Adat Lingkungan. Peruntukan-peruntukan baru ini diwujudkan agar urusan hal ehwal Tanah Adat Luak Tanah Mengandung dan Tanah Adat Lingkungan selari dengan perkembangan pembangunan tanah masa kini.

Walau bagaimanapun, Enakmen No. 20/2022 ini hanya terpakai kepada Tanah Adat Luak Tanah Mengandung dan Tanah Adat Lingkungan di Daerah Kuala Pilah dan Jempol sahaja. Namun bagi tanah adat lain yang memakai *Customary Tenure Enactment (Chapter 215)*, undang-undang tersebut masih tidak memperuntukkan hal berkenaan dengan pembangunan tanah.

Bagi memajukan kawasan tanah terbiar termasuk tanah adat, Kerajaan Negeri melalui Jabatan Pertanian telah menyediakan Pakej dan skop Pembangunan merangkumi pembangunan infrastruktur pertanian seperti pembinaan jalan ladang, sistem pengairan dan perparitan. Selain itu, bekalan input pertanian seperti baja dan kelengkapan kecil pertanian seperti pam air dan jentera kecil turut dijadikan skop pembangunan. Pakej ini ditetapkan dengan kadar 15,000.00/hektar dengan maksimum keluasan 5 hektar dengan kaedah *reimbursement* iaitu bayaran balik kepada penerima insentif yang telah mendahului wangnya untuk menjelaskan bayaran atas bekalan dan perolehan skop pembangunan tanah terbiar.

Sepanjang pelaksanaan Inisiatif ini yang bermula pada tahun 2021 sehingga 2023, seramai 256 pengusaha sama pemilik tanah terbiar itu sendiri ataupun penyewa tanah telah menerima manfaat dengan keluasan pembangunan fizikal seluas 653 hektar berbanding sasaran awal keluasan iaitu 200 hektar. Terima kasih Dato' Yang Dipertua.

**YB ADUN Johol:** Dato' Dipertua, sedikit soalan tambahan ya. Berkaitan dengan tanah terbiar ya, yang bersifat pemilikan individu ya, apa yang saya lihat, contohnya di kawasan saya, pemilikan yang secara skala kecil, 2 ekar, 1 ekar, tapi kalau kita jumlahkan dah menjadi satu jumlah yang banyak ya. Inilah apa yang saya lihat timbul masalah untuk kita majukan kerana katalah yang 2 ekar tu bersetuju tapi 1 ekar tu tak bersetuju tapi kedudukan lokasinya mungkin di tengah-tengah di antara dan 2 dan 2, dia, dia apa ni, tanah-tanah tersepit dipanggil kan. Jadi, saya mencadangkan kepada Kerajaan Negeri ataupun pejabat Pentadbir Tanah Daerah Ya, supaya diwujudkan satu peraturan yang lebih tegas berkaitan dengan tanah terbiar ini. Kerana kalau di kawasan sayalah, tanah terbiar ini kebanyakan di jalan utama. Itu yang orang kata, memburukkan pandangan bila orang luar datang tengok kawasan di Negeri Sembilan ni penuh dengan tanah terbiar ya. Jadi saya mencadangkan diwujudkan satu peraturan yang lebih tegas kepada pemilik tanah ini supaya dapat kita usahakan ataupun ada jalan untuk kita majukan tanah-tanah yang bermilikan individu ini. Terima kasih.

**YAB ADUN Sikamat:** Terima kasih Dato' Yang Dipertua, atas pandangan daripada Yang Berhormat Johol. Dan kita sedia maklum inilah peranan yang harus dimainkan oleh pemimpin masyarakat khususnya Ahli Dewan Undangan Negeri ataupun ADUN dan juga ketua-ketua adat untuk memastikan bahawa mereka boleh bekerjasama bagi melaksanakan perkara ini. Untuk cadangan tersebut, saya akan lihat kesesuaian dan kebo, bagaimana untuk kita melaksanakan kalau ada berlaku perkara pertindihan seperti itu, supaya ia dapat kita bangunkan kawasan-kawasan khususnya yang berhampiran jalan-jalan utama. Dan ini kalau boleh akan mengurangkan lagi bilangan tanah-tanah terbiar di Negeri Sembilan ini. Jadi untuk tahun 2021 hingga 2023, kita dah bantu 256 pengusaha melibatkan 653 hektar, dan ini merupakan satu perkembangan yang terbaik. Terima kasih. Terima kasih Dato' Yang Dipertua.

**YB Yang Dipertua Dewan:** Ahli-ahli Yang Berhormat sekalian, masa bagi Pertanyaan Lisan (Hari Ketiga) telah tamat. Semua pertanyaan yang tidak sempat dijawab akan diberikan jawapan secara bertulis.

#### 4. USUL

##### [Sambungan Usul Menjunjung Kasih Titah Ucapan Diraja]

**Setiausaha Dewan:** Perkara keempat, Usul Menjunjung Kasih Titah Ucapan DiRaja.

**YB Yang Dipertua Dewan:** Ahli-ahli Yang Berhormat sekalian, kita masih lagi dalam sesi perbahasan Usul Menjunjung Kasih Titah Ucapan Diraja. Dipersilakan kepada ahli-ahli Yang Berhormat yang ingin mengambil bahagian. Saya jemput YB Mambau.

**YB ADUN Mambau:** Terima kasih Dato' Yang Dipertua, terima kasih YB Dato' Yang Dipertua Dewan, kerana memberi peluang kepada saya mengambil bahagian dalam sesi menjunjung kasih titah ucapan oleh Duli Yang Maha Mulia Yang di-Pertuan Besar Negeri Sembilan yang telah merasmikan persidangan kali ini.

Jadi saya ucapkan tahniah kepada Dato' Yang Dipertua, M K Ibrahim dilantik sebagai *Speaker*, Dato' Yang Dipertua, dalam Dewan yang mulia ini pada penggal ini jugak. Demikian juga saya ucapkan tahniah dan syabas kepada DUN, ADUN Sikamat dilantik sebagai Menteri Besar Negeri Sembilan, dan tahniah dan syabas kepada barisan pimpinan Exco. Demikian juga tahniah dan syabas kepada semua ADUN-ADUN yang dipilih pada 12 haribulan Ogos yang lepas. Dan kita haruslah menerima keputusan daripada rakyat jelata dan haruslah kita selaku ADUN menjala, menjalankan amanah kita untuk membantu, untuk membantu rakyat jelata.

Di sini saya mengambil peluang ini mengucapkan terima kasih kepada semua jabatan-jabatan yang terlibat untuk apa ni, menjayakan Pilihan Raya Umum yang, yang, 8, 12 haribulan Ogos ini. Kepada, saya terima kasih kepada jabatan SPR, barisan anggota PDRM dan semua pegawai-pegawai jabatan yang terbabit untuk memberi bantuan kepada apa ini, pilihan raya yang lepas ini.

Dato' Yang, Dato' Yang Dipertua, salam, salam sejahtera dan selamat, salam perpaduan kepada semua dan sebagai semua orang tahu sekarang kita sudah jadi Kerajaan Perpaduan. Jadi saya harap gelombang perpaduan ini dapat diteruskan demi kesejahteraan rakyat pada masa yang akan datang. Jadi, kita harus menerima keputusan pilihan raya ini dan jadi apa ni, Kerajaan Perpaduan dan saya di dalam, pernah di dalam Dewan ini, dekat 3 penggal. Saya pun tak sangka, saya pun tak sangka tempat duduk di sebelah kiri kanan sekarang adalah kawan daripada Barisan Nasional. Jadi, jadi saya rasa saya harap semua kita harus bekerjasama dan memberi kepentingan kepada rakyat.

Dato' Yang Dipertua, Dipertua, dalam titah ucapan Duli Yang Maha Mulia Yang di-Pertuan Besar ada menyuntuh, menyentuhkan supaya pihak Kerajaan Negeri melaksanakan lebih banyak atau pelbagai insentif bagi memastikan rakyat tidak terlalu terbeban dengan kenaikan harga barang dan rakyat memperoleh bekalan makanan keperluan yang mencukupi. Jadi kita, saya pun setuju dengan, dengan kenyataa, kenyataan ni dan saya rasa sekarang ekonomi makin hari makin merosot, boleh dikatakan apa yang kita selalu terima aduan daripada aduan awam bahawa menyatakan sekarang harga barang naik, gaji tak naik. Jadi mereka akan ada serba sedikit kesusahan dalam kehidupan harian mereka. Jadi untuk pengetahuan Dato' Yang Dipertua, sekarang apa barangan, betul, apa barangan pun sudah mahal. Kita satu sarapan pagi, sarapan pagi, pagi mi, satu mi kicap, satu kopi-O pun sudah dekat 10.00 ringgit. *Keep the change, no change.* Jadi ini memang inilah kuasa, kuasa rakyat jelita, mereka yang memberitahu, memberitahu kepada, kepada ADUN-ADUN sekalian.

Jadi Dato' Yang Dipertua, saya ingin memberi beberapa pandangan dan cadangan untuk meyakinkan penduduk-penduduk atau rakyat jelata dapat menandingi cabaran ekonomi yang kian meningkat setakat hari ini iaitu kita semua ketahui pada penggal yang lepas Manifesto Pakatan Harapan penggal yang lepas mendapat sambutan yang sangat baik di kalangan penduduk-penduduk di Negeri Sembilan. Seperti insentif TUNS untuk bantuan pembiayaan dalam bentuk geran berjumlah 3,000.00 ringgit seorang, seorang pemohon. Dan TUNS Plus berbentuk pinjaman mudah tanpa faedah sehingga 15,000.00 yang disasarkan kepada usahawan mikro di Negeri Sembilan.

Jadi saya berharap dan bercadang supaya pihak Kerajaan Negeri dapat meneruskan, dapat meneruskan atau melanjutkan insentif-insentif yang bagus, yang baik ini seperti TUNS dan TUNS Plus sekali lagi atau boleh lagi baik bertambah lagi geranlah, bertambah lagi banyak. Mungkin tambah sampai 5,000.00 kepada TUNS dan 20,000.00 kepada TUNS Plus. Jadi, untuk, ini semua untuk rakyat jelata yang ingin meneruskan perniagaan dan mencari rezeki mereka. Cara inilah salah satu pandangan daripada saya.

Dan nombor 2, iaitu Program Jualan Harga Ladang Negeri Sembilan Prihatin. Dan program ini pun dapat sambutan yang hebat daripada rakyat jelata sebab setiap bulan atau setiap 2 bulan, setiap DUN pun ada program macam ni dan mendapat sambutan yang ba, yang baik. Dan saya rasa, program dia mula pada pukul 8:30 tapi pukul 8:00 pun sudah ramai orang dah tunggu dah. Sampai sampai tunggu di sana dan apabila mula program pada 8:30, tak sampai setengah jam, pukul 9:00 sudah

habis jual barangan dapur ke, barangan keperluan, keperluan harian telah habis jual.

Jadi di, di pendirian, pendirian ADUN kawasan, saya rasa bukan sangat gembira, bukan sangat gembira, tidak, kerana ini menunjukkan, menunjukkan penduduk-penduduk mereka memerlukan, memerlukan harga barangan yang murah untuk, untuk menampung kehidupan mereka. Jadi, saya harap kalau boleh pada masa yang akan datang, kita, kita bagi tambahan barangan dapur. Maksud, contohnya kalau ayam tak cukup untuk 300 ekor, tapi kita boleh tambah sehingga 500 ekor ayam untuk orang awam. Kalau ayam tak cukup, tambah ayam. Kalau minyak tak cukup, tambah minyak. Kalau beras tak cukup, tambah beras. Itu, itu macam, macam ini punya, macam kaedah macam ni jadi, tambahan stok pembekalan, pembekalan ini mungkin boleh, boleh memberi bantuan kepada orang-orang awam yang per, yang betul-betul memerlukan, memerlukan ini barangan keperluan ini.

Jadi, seterusnya saya rasa dengan pelaburan asing supaya pihak Kerajaan Negeri dengan lebih menarik pelabur asing untuk menubuhkan kilang pelaburan di Negeri Sembilan supaya menyediakan industri hijau dan industri tek, berteknologi tinggi dan pekerja mahir, menambah baik peluang pekerjaan dan tahap gaji keseluruhan mereka, meningkatkan daripada ini, kita dapat meningkatkan pendapatan Kerajaan Negeri juga dan juga meningkatkan kebahagiaan rakyat. Jadi ini salah satu cara yang boleh kita mem, menangani apa ni, kos, kos hidup, kos apa ni, kos kehidupan yang tinggi pada, pada masa setakat ini. Jadi saya harap lebih ramai menarik pelabur asing masuk ke Negeri Sembilan untuk me, melabur ke, di Negeri Sembilan.

**YB Yang Dipertua Dewan:** Yang Berhormat.

**YB ADUN Mambau:** Dato' Yang Dipertua .....

**YB Yang Dipertua Dewan:** Yang Berhormat .....

**YB ADUN Mambau:** ..... semalam soalan lisan, Mambau ada tanya soalan satu mengenai Manifesto Aspirasi Perpaduan Negeri Sembilan. Jadi ini ialah salah satu manifesto .....

**YB Yang Dipertua Dewan:** Yang Berhormat, satu minit lagi. Kita sebenarnya hadkan peruntukan 10 minit.

**YB ADUN Mambau:** Okey, terima kasih. Dato' Yang Dipertua, ini ialah satu manifesto yang di antara Pakatan Harapan dan Barisan Nasional. Dan selepas kita mengumumkan, ada Manifesto Aspirasi Perpaduan

Negeri Sembilan jadi betul-betul ramai orang tertanya-tanya; bila akan dimulakan. Jadi saya dapat dari, jawapan daripada Menteri Besar semalam bahawa, Menteri Besar menyatakan; akan berunding, berunding dengan UPEN dan mungkin, mungkin akan dilaksanakan pada tahun depan. Jadi, saya harap, saya harap manifesto ini akan disegerakan supaya lebih ramai orang boleh mendapat muafakatlah daripada, daripada manifesto ini.

Jadi, di sini juga saya bercadang pihak, pihak Kerajaan Negeri supaya mewujudkan jaringan kemudahan dan keselamatan untuk rakyat jelata untuk memohon sebarang bantuan, bantuan Kerajaan Negeri dan tidak menghadapi masalah apabila mereka membuat permohonan. Dan kalau boleh abaikan syarat-syarat yang ketat atau syarat-syarat kompleks dalam permohonan mereka. Jadi inilah untuk menyenangkan pemohon-pemohon, rakyat jelata supaya tidak susah payah, tidak sudah payah untuk memohon permohonan bantuan daripada Kerajaan Negeri. Orang putih cakap *soft landing*-lah, *soft landing* supaya lembut sikit, jangan terlalu syarat-syarat yang terlalu ketat, jadi untuk mereka. Jadi .....

**YB Yang Dipertua Dewan:** Yang Berhormat. Masa dah tamat.

**YB ADUN Mambau:** Dato' Yang Dipertua, ada 2 lagi apa ini, aduan, aduan kawasan, DUN kawasan. Jadi, saya di sini ingin na .....

**YB Yang Dipertua Dewan:** Dia tak boleh ikut skrip, dia ikut masa.

**YB ADUN Mambau:** Ada dua, dua aduanlah daripada kawasan DUN Mambau .....

**YB Yang Dipertua Dewan:** Itu simpan kepada aduanlah. Kita ni ucapan usul, usul menyokong usul, ucapan terima kasih.

**YB ADUN Mambau:** Okey, Dato' Yang Dipertua, saya ucapkan terima kasih kepada usul, usul junjung kasih.

**YB Yang Dipertua Dewan:** Menyokong usul.

**YB ADUN Mambau:** Saya menyokong usul.

**YB Yang Dipertua Dewan:** Okey, terima kasih Yang Berhormat. Siapa nak bercakap. Saya kasi Paroi dulu boleh? Paroi.

**YB ADUN Juasseh:** Paroi dulu.

**YB Yang Dipertua Dewan:** Lepas ni Juasseh.

**YB ADUN Paroi:** *'Auzubillahis samiul alim minas syaitanirajim, bismillahirrahmanirrahim. Alhamdulillahirabbil'alamin wassalatu wassalamu ala asrofil anbiya-iwal mursalin saidina muhammadin wa'ala alihi washahbihi ajmain. Rabbi yassir wala tuassir, ya karim. Ya aziz ya jabbar ya mutakabbir alhamdulillah.* Dato' Yang Dipertua dan Ahli-Ahli Dewan Undangan Negeri Sembilan, pertama saya ingin mengucapkan tahniah kepada Dato' Yang Dipertua atas pelantikan sebagai Speaker Dewan Undangan Negeri. Yang keduanya saya juga ingin merakamkan ucapan tahniah kepada ahli-ahli Yang Berhormat semua atas kemenangan dan dipilih sebagai ADUN di Dewan Undangan Negeri masing-masing dalam pilihan raya yang lalu.

Saya juga ingin mengambil kesempatan dalam Dewan yang mulia ini untuk merakamkan ucapan terima kasih atas kepercayaan yang diberikan oleh pengundi-pengundi DUN Paroi yang memberi kepercayaan kepada saya dari Perikatan Nasional sebagai ADUN N25 Paroi. Tahniah juga diucapkan ahli-ahli Yang Berhormat di sebelah kerajaan kerana berjaya membentuk kerajaan yang datang bersamanya amanah bagi melaksanakan tanggungjawab kepada semua 1.2 juta rakyat Negeri Sembilan. Bukan hanya kepada pengundi yang memberi undi Pakatan Harapan dan Barisan Nasional. Begitu juga tahniah diucapkan kepada rakan-rakan saya di sebelah blok pembangkang. Cuma peranan kita sahaja kita berbeza tapi masih bermatlamat atau niat yang sama iaitu bekerja sebagai wakil rakyat DUN masing-masing dan bersuara bagi pihak 1.2 juta rakyat Negeri Sembilan, merentas bangsa, agama, fahaman politik, sosio ekonomi, latar belakang di Negeri Sembilan. Meskipun bilangan kami kecil, namun kami mempunyai tanggungjawab yang besar sebagai agen semak dan imbang kepada pentadbiran negeri yang kita cintai ini.

Dato' Yang Dipertua, suka saya maklumkan bahawa saya dan rakan-rakan dalam barisan pembangkang nekad akan menjadi pembangkang yang bertanggungjawab, berwibawa, matang dan sedia menegur kekurangan di pihak kerajaan yang harapnya diterima dengan hati terbuka dan positif oleh ahli Yang Berhormat di pihak kerajaan. Walaupun tidak ada kuasa secara langsung dalam menentukan hala tuju pentadbiran negeri, tetapi kami mempunyai tanggungjawab langsung kepada rakyat dalam sempadan DUN yang kami menangi. Ia adalah hak rakyat kami perlu dipenuhi. Dan atas keperluan yang sama, kami ADUN pembangkang juga ada hak kepada pentadbiran untuk dilayan sama adil oleh Kerajaan Negeri.

Dato' Yang Dipertua, barisan ahli Yang Berhormat pembangkang adalah satu institusi yang perlu dihormati oleh kawan dan juga lawan selaras dengan sistem demokrasi yang kita amalkan. Sebaik sahaja keluar

keputusan Pilihan Raya Dewan Undangan Negeri pada Ogos lalu, selepas angkat sumpah Menteri Besar, Yang Amat Berhormat Menteri Besar Negeri Sembilan yang saya kenali ya, memberi *response* spontan seolah-olah membayangkan tidak melayan ADUN pembangkang. Bagi saya kata-kata itu tidak membayangkan kematangan, kata-kata seorang pentabir yang memegang amanah. Oleh itu, saya menggesa Yang Amat Berhormat Menteri Besar Negeri Sembilan dan pentadbiran Kerajaan Negeri memberi layanan sama termasuk peruntukan yang sama banyak terus kepada ADUN pembangkang yang dipilih oleh rakyat melalui sistem demokrasi. Jika engkar, ia adalah kezaliman kepada diri sendiri dan pengkhianatan kepada amanah yang dipertanggungjawabkan.

Saya ingin membawa contoh kematangan dalam konteks ini. Sukacita saya sebut dalam Dewan ini, bahawa semua Dewan Undangan Negeri di 4 negeri yang ditadbir oleh Perikatan Nasional yakni Perlis, Kedah, Kelantan dan Terengganu ya, Terengganu, Terengganu masih lagi kosong kan? Memberi peruntukan kepada ADUN pembangkang sebagaimana peruntukan kepada ADUN kerajaan mereka. Ini bermakna setiap undi dan pilihan yang dizahirkan oleh rakyatnya diterima dengan baik walaupun tidak memihak kepada pihak kerajaan. Inilah salah satu ciri keadilan dalam demokrasi dan keadilan Islam.

Kepada Yang Amat Berhormat Menteri Besar Negeri Sembilan, tidak hilang maruah Yang Amat Berhormat jika membuat perkara yang betul selepas tersalah kata. Tetapi Yang Berhormat akan lebih dihormati kerana membuat pembetulan ketika di tangan ada kuasa. Ini selaras dengan titah Yang di-Pertuan Besar Negeri Sembilan beberapa hari yang lalu bahawa mandat yang diberi kepada kita semua adalah amanah yang perlu diterjemahkan dengan penuh tanggungjawab. Kita semua ahli-ahli Yang Berhormat dalam Dewan ini perlu fokus kepada agenda membangunkan negeri, mensejahterakan rakyat. Jangan berbalah, jangan mengamalkan politik dendam dan akhirnya menyimpang daripada kewajipan yang perlu ditunaikan dengan penuh integriti, akauntabiliti, tatakelola yang betul tanpa ada agenda kepentingan mana-mana parti politik ataupun peribadi.

Dato' Yang Dipertua, saya ingin menyatakan tentang ekonomi dan prestasi kewangan. Sebagai seorang anak jati Negeri Sembilan, dan juga mempunyai darah keluarga daripada suku Payakumbuh, saya mempunyai kebanggaan yang sangat tinggi dengan budaya dan Adat Perpatih yang menjadi imej kita dan rakyat Negeri Sembilan. Jika kita membuka mata dan melapangkan dada, kita perlu menerima realiti bahawa tidak ramai rakyat Malaysia dan antarabangsa yang memahami, mengenali keunikan Adat Perpatih dan kebudayaan yang hanya ada di satu negeri sahaja di Malaysia iaitu negeri kita. Malah, tidak keterlaluan

jika saya katakan terdapat sebahagian rakyat Malaysia memandang serong Adat Perpatih kita ini pada sebahagian perkara kerana tidak menerima maklumat yang cukup dan jugak tepat.

Lihat saja kepada sistem raja, adat dan budaya kita di Negeri Sembilan. Sistem syura memilih Yang di-Pertuan Besar Negeri Sembilan, memilih Undang. Ia bukan sahaja amalan kita dalam pentadbiran, berperaturan dan pendekatan kita dalam segenap kehidupan seharian tetapi keunikan ini boleh menjadi tarikan pelancong ya, kepada Bukit Kepayang ya, yang hanya boleh ditawarkan oleh Negeri Sembilan jika diterokai lebih mendalam. Adakah kita sedar ya, terdapat rakyat Malaysia yang mengakui bahawa mereka lebih memahami adat dan budaya Negeri Sembilan hanya selepas berkunjung ke Barat Sumatera khususnya seperti Bukit Tinggi, Padang, Payakumbuh, Padang Panjang, Pariaman, Sawahlunto dan Solok dan sebagai, contohnya. Itu sebagai contoh. Dengan ini saya mencadangkan Kerajaan Negeri membuat kajian mengenal pasti inisiatif di tempat-tempat saya sebutkan tadi sebagai *benchmark* ya, penanda aras dan jugak panduan bagi kita. Saya amat yakin usaha ini belum diterokai sepenuhnya oleh kita untuk memperkasakan lagi sektor pelancongan ya, kebudayaan, seni, warisan dan seterusnya memperkasakan ekonomi di negeri kita yang kita cintai ini bagi industri kecil dan juga sederhana.

Dato' Yang Dipertua, sebagaimana turut disentuh dalam titah di-Pertuan Besar Negeri Sembilan, tidak terkecuali daripada menerima tempias cabaran ekonomi pasca pandemik, ditambah lagi ketidak te, ketidaktentuan geopolitik dunia semasa dan perubahan iklim yang menjejaskan akses makanan. Ahli ekonomi mengistilahkan kombinasi cabaran ini sebagai *the perfect storm*. Realitinya, bagi sebahagian rakyat di bawah hari ini, ada yang masih bertatih mengukuhkan ekonomi diri dan keluarga. Kerajaan Negeri boleh menjadi pemangkin dalam pelbagai peringkat usaha dan pendekatan. Salah satu contohnya, mengurangkan birokrasi ketika permohonan lesen dan permit dan memberi inisiatif tertentu kepada perniagaan tertentu dalam keadaan tertentu. Tindakan penguatkuasa perlu ditimbang dengan budi bicara khususnya kepada peniaga kecil dan juga sederhana untuk rakyat Negeri Sembilan.

Dato' Yang Dipertua, untuk pembangunan dan penyampaian perkhidmatan. Saya adalah ADUN Paroi yang sememangnya tinggal di DUN Paroi. Oleh itu, rakyat di Paroi adalah jiran tetangga saya, kawan-kawan saya, saudara mara saya, dan telah menjadi ahli keluarga saya sendiri. Justeru saya sememangnya sangat memahami segala permasalahan di DUN Paroi. Apatah lagi sejak menjadi wakil rakyat, saya didatangi rakyat untuk berkongsi permasalahan, kesulitan, kekusaran dan harapan mereka. Sudah pasti itu menjadi tanggungjawab

saya untuk ambil peduli dan sudah pasti juga saya bertanggungjawab untuk memaklumkan luahan hati rakyat itu kepada Kerajaan Negeri, Pihak Berkuasa Tempatan, agensi, jabatan atau apa saja jentera kerajaan untuk mengambil tindakan proaktif, reaktif dan progresif demi kebaikan rakyat.

Sebagai contoh ingin saya bawakan untuk maklumat ahli Yang Berhormat dalam Dewan yang mulia ini, ini di Paroi ya, kerja-kerja pembaikan cerun runtuh di jalan berhampiran masjid bandu, Masjid Bandar Baru Senawang, berhadapan Balai Polis Senawang ya. Sudah lama ya, sudah lama dan tidak siap-siap lagi. Dan juga keadaan jalan berombak-ombak, Taman Bandar Senawang ke Klinik Kesihatan Senawang. Keadaan ini menjejaskan kelancaran trafik yang tinggi kerana terletak di penempatan yang padat, membahayakan pengguna. Mohon dapat diberi perhatian.

**YB Yang Dipertua Dewan:** Yang Berhormat. Yang Berhormat, masa cukup ya.

**YB ADUN Paroi:** Sikit lagi, satu lagi. Okey yang keduanya ialah masalah lembu, anjing yang berulang-ulang ya, di Taman Pinggiran Senawang, Taman Senawang Perdana, Taman Bukit Senawang. Dan akhir sekali, untuk pembinaan ya, benda ini, pembinaan kuil yang dibina secara haram di Taman Bukit Senawang Perdana. Dan kuil ini dia sebenarnya untuk Majlis Perbandaran Nilai pada 26 November 2019 ya, notis mengarahkan pemilikan rumah ini dirobohkan. Sudah 4 tahun perkara ini berlalu. Dan saya difahamkan ya, telah dimasukkan dalam Majlis Mesyuarat Kerajaan Negeri dan masih lagi, dan jawapannya saya telah, telah, telah diberi oleh Majlis Mesyuarat Kerajaan Negeri yang bersidang pada 30 Mac 2022 melalui, mengambil keputusan kuil yang berada di atas lot ya, supaya dirobohkan dan rizabkan sebagai tapak gerai di bawah kawalan Majlis Bandaraya Seremban. Jawapannya, Majlis Mesyuarat Kerajaan juga mengambil keputusan operasi perobohan akan diselaraskan oleh Pentadbiran Tanah Seremban, tapi masih, sudah 4 tahun ya. Dan pengusaha kuil pulak bersetuju untuk kuil ini dirobohkan ya, selepas kuil baru dibina. Saya rasa, adakah satu polisi kerajaan benda ini. Dan memandangkan terdapat perjanjian untuk mendapatkan peruntukan bagi perkara tersebut. Ini jawapan yang diberi secara bertulis kepada saya. Oleh yang demikian ya, saya memohon perkara ini diselesaikan secepat yang mungkin, sudah 4 tahun ya, rakyat di sana menginginkan jawapan yang tuntas di pihak kerajaan.

Yang akhirnya ialah berkenaan dengan, saya sentuh sikit untuk kebaikan, isu berkaitan Majlis Agama Islam Negeri Sembilan. Sebelum ini ada surat ya, yang ditujukan oleh Yang di-Pertuan Besar Negeri

Sembilan. Surat terbuka ni ya, dalam Facebook dan saya mohon sekira isu ini adalah benar, kerajaan perlu selesaikan isu ini. Tetapi sekiranya tidak benar, pihak, pihak kerajaan perlu mengambil tindakan sewajarnya demi menjaga institusi agama Islam Negeri Sembilan ya, Yang Berhormat Pegawai Undang-Undang pun ada di sini.

Dan akhir sekali ya, yang akhir sekali .....

**YB Yang Dipertua Dewan:** Dah banyak kali akhir tu Yang Berhormat.

**YB ADUN Paroi:** Okey, *alhamdulillah*. Saya ambil, '*auzubillahis samiul alim minas syaitanirajim, rabbana zalamna anfusana wa in-lam tagfir lana watarhamna la-nakunanna minal khasirin*. Ya tuhan kami, kita doalah sama-sama, kami telah menzalimi diri kami sendiri, jika Engkau tidak mengampuni kami dan memberi rahmat kepada kami, nescaya ya, kami termasuk daripada orang-orang yang rugi. Zalim tu ertinya meletakkan satu benda pada tempatnya. Dan itulah saja daripada saya.

Negeri Sembilan kaya budaya,  
Rakyat sopan bukan kasar,  
Sekian Sahaja ucapan saya,  
Tanda kasih pada yang di-Pertuan Besar.

Dengan ini saya menyokong dan menjunjung kasih titah Duli Yang Maha Mulia Yang di-Pertuan Besar Negeri Sembilan pada 9 Oktober 2023. *Wabillahitaufik assalamualaikum WBT*.

**YB ADUN Klawang:** Dato' Dipertua, Klawang minta mencelah. Terima kasih di atas apa yang diucapkan oleh Paroi.

**YB Yang Dipertua Dewan:** Klawang, boleh saya .....

**YB ADUN Klawang:** Sikit saja, satu minit saja, Yang Dipertua, mintak. YB Paroi nampaknya macam, macamlah Perikatan Nasional bersih sangat di dalam gelanggang politik. Sedangkan sebelum pilihan raya fitnah ditebar atau ditabur, rasuah diguna seperti apa yang telah terbukti. Janganlah, nasihat saya kepada semua, bukan kepada Paroi sahaja, kuman di seberang laut nampak ya, tetapi gajah di depan mato buek boto yo. Mintak maaf Dato' Yang Dipertua.

**YB Yang Dipertua Dewan:** Saya persilakan .....

**YB ADUN Gemas:** Tuan *Speaker*.

**YB Yang Dipertua Dewan:** ..... Juasseh.

**YB ADUN Gemas:** Tuan *Speaker*, apa yang dimaksudkan oleh fitnah oleh Klawang, ADUN Klawang. Sebab ini ucapan .....

**YB Yang Dipertua Dewan:** Saya tak nak buat perbahasan ini kepada polimik politik. Nanti masa yang lain, kita boleh bincang. Tapi ini pasal usul.

**YB ADUN Gemas:** Jangan mudah sangat melemparkan .....

**YB Yang Dipertua Dewan:** Nanti dibalas balik oleh .....

**YB ADUN Gemas:** Tak urusan *Speaker*-lah .....

**YB Yang Dipertua Dewan:** ..... benda ni takkan .....

**YB ADUN Gemas:** ..... untuk menenangkan keadaan Dewan sebab kita memutuskan ucapan titah tadi ya. Mohon bantuan Tuan *Speaker*.

**YB Yang Dipertua Dewan:** Okey.

**YAB ADUN Sikamat:** Yang Dipertua, saya bangkit mohon izin daripada Dato' Yang Dipertua. Tadi ada berkenaan dengan MAINS. Saya tak, tak, tak, tak, tak diterangkan. Jadi, ada pertuduhan ke, ada apa tu, tolong sampaikan kepada Dato' Yang Dipertua-lah supaya kita dapat ambil tindakan. Terima kasih.

**YB Yang Dipertua Dewan:** Juasseh.

**YB ADUN Juasseh:** Terima kasih Dato' Yang Dipertua. Terima memberikan kesempatan kepada saya membahaskan titah ucapan Tuanku pada hari ini. Saya menjunjung kasih ke bawah Duli Yang Maha Mulia Yang di-Pertuan Besar Negeri Sembilan Tuanku kerana berangkat merasmikan Persidangan Kedua Penggal Pertama, Dewan Undangan Negeri Ke 15. Banyak perkara penting mengenai Negeri Sembilan disentuh dalam titah ucapan Tuanku pada hari tersebut.

Dato Yang Dipertua, saya mengambil kesempatan mengucapkan tahniah kepada Yang Amat Berhormat Menteri Besar kerana dilantik semula menerajui Kerajaan Negeri Sembilan dan kepada Yang Berhormat Exco Kanan yang telah dilantik dan Dato Yang Dipertua kerana dilantik sebagai *Speaker* Dewan Undangan Negeri. Tahniah juga kepada semua ahli-ahli Yang Berhormat yang telah berjaya dengan kemenangan pilihan raya baru-baru ini.

Dato Yang Dipertua, dalam titah ucapan Tuanku ada menyentuh tentang pelaburan tertinggi direkodkan di Negeri Sembilan iaitu sebanyak RM8.9 bilion pada tahun 2022. Tahniah kepada Kerajaan Negeri, atas usaha pelabur, atas usaha menarik pelaburan ini. Namun demikian saya berharap segala pelaburan yang berjaya dibawa dapat dilaksanakan. Saya berharap semua agensi dan jabatan kerajaan yang terlibat akan menjadi pemudah cara bagi pelabur-pelabur melaksanakan pelaburannya. Dengan pelaburan yang banyak, ia akan mewujudkan dan membuka peluang pekerjaan yang lebih banyak dan lebih baik khususnya untuk anak-anak negeri.

Saya, Dato' Yang Dipertua, saya tertarik dengan titah ucapan Tuanku berkenaan dengan pembangunan jaringan komunikasi untuk kawasan di luar bandar. Rangkaian internet yang menyeluruh sama ada 4G atau 5G, dengan izin, perlu dirangka dan dilaksanakan dengan segera terutamanya di kawasan luar bandar, ladang-ladang, perkampungan Orang Asli, di kampung-kampung baru seperti di kawasan saya iaitu di DUN Juasseh ataupun DUN-DUN yang lain. Kita tahu sudah maklum ramai rakyat menggunakan media sosial untuk kehidupan seharian dan ia menjadi keperluan kepada mereka berbanding masa-masa dahulu. Oleh yang demikian, saya memohon kepada Yang Amat Berhormat Menteri Besar untuk mempertimbangkan pembinaan *starlink internet*, dengan izin Dato' Yang Dipertua, terutamanya di DUN Juasseh.

Dato' Yang Dipertua, saya mengucapkan terima kasih kepada Kerajaan Perpaduan telah, Kerajaan Perpaduan yang telah melaksanakan pelbagai inisiatif Jualan Harga Ladang Negeri Sembilan Prihatin dan juga termasuk Jualan Rahmah. Saya berharap agar inisiatif yang baik ini dapat diperbanyakkan dan diperluaskan lagi kepada masyarakat di luar bandar bagi memberikan kemudahan kepada rakyat membeli barangan lebih murah dan secara terus. Inisiatif Jualan Rahmah ini menunjukkan bagaimana seriusnya kerajaan tentang isu kos sara hidup yang dihadapi oleh rakyat. Memang diakui dan kita semua sedar tentang isu kenaikan harga barang pada masa kini, namun ingin saya ingatkan isu ini juga berlaku pada masa-masa yang lalu, harga barang senantiasa naik, ini kerana melibatkan isu krisis antarabangsa, hampir seluruh dunia menghadapi yang sama. Namun, saya percaya subsidi yang diberikan oleh kerajaan ini menunjukkan betapa seriusnya kerajaan menangani isu ini dan kerajaan tidak pernah berdiam diri, khususnya Kerajaan Persekutuan, seperti yang didakwa oleh sesetengah pihak yang lain. Tahniah kepada Kerajaan Madani yang diketuai oleh Yang Amat Berhormat Perdana Menteri.

Dato Yang Dipertua, dalam titah ucapan Tuanku juga menyentuh tentang latihan teknikal dan vokasional (TVET). Ucapan terima kasih saya

kepada Yang Amat Berhormat Timbalan Perdana Menteri dan khususnya kepada Yang Berhormat Datuk Seri Noraini; Pengerusi RISDA yang telah pun melancarkan program TVET ini seperti JELITA pada bulan Ogos 2023 dan sekarang ini program tersebut sedang dilaksanakan dan berlangsung di Pacific Regency Port Dickson. Program ini membuka peluang khususnya kepada wanita dan wanita muda untuk mengambil peluang meningkatkan kemahiran bagi diri mereka. Ini sangat diperlukan untuk mereka menjana ekonomi mereka walaupun bekerja sendiri atau dari rumah, ataupun dari rumah. Syabas dan tahniah.

Dato Yang Dipertua, saya ingin menyentuh sedikit berkenaan dengan sukan di Negeri Sembilan, seperti yang dijawab oleh YB Palong sebentar tadi. Saya berharap Yang Amat Berhormat Menteri Besar Dan YB Palong dapat memberikan tumpuan sepenuhnya dalam usaha mempertingkatkan mutu sukan di Negeri Sembilan dan dapat membuat persediaan awal bagi contoh untuk menghadapi SUKMA 2024 yang akan datang. Bukan sahaja kepada sukan-sukan yang telah menyumbang emas ya, YB Palong. Saya harap dapat diseratakan kepada semua sukan dan pengilapan ini harus dibuat segera bagi mencari atlet-atlet baru dan pelapis di dalam negeri. Dan saya berharap Kerajaan Negeri dapat menyediakan peruntukan yang mencukupi bagi semua persatuan sukan ini. Inilah caranya untuk kita menarik minat anak-anak muda khususnya di Negeri Sembilan ini kerana kerajaan, kepada kerajaan kerana melalui sukanlah dapat diterapkan semangat kenegaraan kepada belia-belia di dalam negara kita ini.

Dato Yang Dipertua, saya turut bersolidariti dan menyong, menyokong usul khas tentang isu Palestin yang telah dibawa, dicadangkan dan disokong dibahas Yang Amat Berhormat Menteri Besar dan YB Exco kanan pada sidang Dewan semalam. Inilah semangat yang ingin kita lihat pada para pemimpin negara menunjukkan kesatuan hati dan suara di dalam isu Palestin ini demi memartabatkan hak asasi manusia terutamanya bagi saudara-saudara Islam iaitu yang telah lama ditindas. Saya juga menyokong cadangan bahawa misi-misi bantuan kemanusiaan perlu disegerakan melalui NGO-NGO terlibat demi kesejahteraan saudara sesama Islam kita.

Akhir kata, saya menyeru kepada Kerajaan Negeri supaya memenuhi, memenuhi atau melaksanakan apa-apa yang tercatat dalam manifesto yang kita janji pada pilihan raya baru-baru ini. Kita tidak boleh menganggap manifesto ini bukan kitab suci seperti yang diperkatakan oleh sesetengah pihak. Untuk me, mengelakkan daripada memenuhi janji dalam manifesto ini. Saya yakin dan percaya Kerajaan Perpaduan Negeri Sembilan yang ditubuhkan ini akan dapat memenuhi semua janji

untuk kesejahteraan rakyat. Dan saya berharap Kerajaan Perpaduan ini akan senantiasa membantu semua rakyat walaupun ada di sesetengah ADUN memikirkan kerajaan ini tidak memberikan apa-apa hak istimewa kepada mereka. Sekian Dato' Yang Dipertua, saya mohon menyokong.

**YB Yang Dipertua Dewan:** Terima kasih Juasseh atas ucapan yang baik dan menepati waktu. Saya jemput Jeram Padang. Jeram Padang.

**YB ADUN Jeram Padang:** *Assalamualaikum WBT.* Terima kasih Yang Berhormat Dato' Yang Dipertua kerana memberi peluang kepada saya untuk mengambil bahagian dalam sesi perbahasan menjunjung titah ucapan Duli Yang Maha Mulia Yang di-Pertuan Besar Negeri Sembilan.

*Alhamdulillah,* PRU Negeri Yang Ke-15 telah pun berlaku dan dilaksanakan dalam keadaan suasana yang aman dan harmoni. Tahniah kepada Menteri Besar; Dato' Seri Haji Aminuddin bin Harun yang telah memperoleh mandat untuk terus mengetuai kepimpinan Kerajaan Negeri Sembilan untuk penggal yang kedua. Di kesempatan ini juga saya ingin mengucapkan ribuan terima kasih kepada pengundi Jeram Padang yang telah memberi mandat kepada saya untuk menaja, untuk mewakili suara rakyat Jeram Padang di dalam Dewan ini.

Untuk makluman ahli Dewan semua, DUN Jeram Padang merupakan contoh kepada terbentuknya Kerajaan Perpaduan pada hari ini di mana Masyarakat Jeram Padang terdiri daripada bangsa Melayu, Cina, India, Orang Asli dan lain-lain. Jeram Padang merupakan kawasan luar bandar di mana rata-rata masyarakat di sini melakukan aktiviti pertanian, perladangan, penternakan. Maka di sini saya mencadangkan bahawa diwujudkan semula kereta api, stesen kereta api di Pekan Rompin. Ini yang telah lama dihentikan. Ini akan menambah peluang pekerjaan dan perniagaan di sekitar Pekan Rompin khususnya di kawasan Jeram Padang. Dengan adanya kiosk ataupun gerai di sekitar stesen hentian kereta api, ia akan menambah peluang pekerjaan dan peluang perniagaan kepada penduduk Jeram Padang. Selain itu juga, ia menambah kemudahan pengangkutan untuk rakyat Jeram Padang untuk ke Bahau mahupun ke Gemas, menambah aktiviti pelancongan di kawasan Jeram Padang di mana pengunjung boleh menikmati kemudahan kereta api dengan jarak dekat.

Mengikut apa yang dicadangkan oleh Paroi tadi, betul, ada betulnya. Di Jeram Padang ini juga terdapat Rumah Gadang yang bercirikan Minang Kabau. Jadi, saya cadangkan supaya ia menjadikan pusat pelancongan di mana kediaman itu telah siap dengan nilai 4.5 juta. Pemiliknya sendiri yang membina tanpa pun apa, peruntukan daripada kerajaan. Jadi saya mohon Kerajaan Negeri Sembilan mempromosikan apun, ataupun

menyahut ataupun menyokong agar tempat ini dijadikan pusat pelancongan. Ini akan menjadikan DUN Jeram Padang sebagai pusat pelancongan Adat Perpatih. Ia akan juga menambah peluang pekerjaan dan perniagaan dan akan mewujudkan industri *homestay* di kawasan kampung lebih bergiat aktif dan seterusnya meningkatkan ekonomi penduduk kampung.

Seterusnya untuk makluman Yang Dipertua, Jeram Padang telah melahirkan ramai pemain bola sepak mewakili negeri mahu negara. Namun Jeram Padang tidak mempunyai padang atau *mini stadium*. Jadi, saya merayu kepada pihak kerajaan untuk mengangkat cadangan saya agar pembinaan *mini stadium* ini di Jeram Padang masa akan datang. Ditambah pula di kawasan Jeram Padang, mempunyai 8 sekolah SJKT di mana rata-ratanya sekolah ini tidak mempunyai padang yang sempurna. Maka cadangan saya mempunyai as, mempunyai, mempunyai asas yang kukuh untuk dilaksanakan demi kesejahteraan masyarakat dan anak-anak sekolah. Mengikut apa yang, Duli Yang Maha Mulia titah untuk menjaga kesejahteraan dan kebajikan masyarakat di Jeram Padang.

Yang Dipertua, saya juga mencadangkan bahawa jalan utama Gemas – Rompin perlu dinaik taraf di mana jalan ini perlu dilebarkan untuk keselamatan dan keselesaan pengguna jalan raya. Ini kerana jalan ini mempunyai jalan utama untuk ke Johor. Banyak lori dan jentera berat menggunakan jalan ini. Untuk meningkatkan keselamatan pengguna jalan raya, di sebelah malam, maka pencahayaan lampu di sepanjang jalan perlu dilaksanakan terutamanya, dimula, bermulanya dari simpang Taman Bahau hingga ke Pasir Besar.

Untuk makluman Yang Dipertua, di sini saya juga ingin memaklumkan bahawa jalan utama Palong di simpang per, di simpang Pasir Besar ke Palong 2 perlu dinaik taraf. Jalan ini terlalu bahaya pengguna jalan raya di mana saya sendiri telah mengalami kemalangan di jalan ini. Jadi pelebaran jalan setiap selekoh perlu dilaksanakan. Papan tanda jalan raya perlu diperbanyakkan dan garisan jalan perlu diselenggara dengan baik. Ini kerana statistik telah menunjukkan bahawa boleh dikatakan setiap minggu berlakunya kemalangan di kawasan ini. Saya juga ingin menambah bahawa perlu juga diadakan pencahayaan di sepanjang jalan ini di mana jalan, jalan ini di sebelah malamnya agak terlalu gelap dan bahaya untuk pengguna jalan raya.

Yang Dipertua, saya juga merayu bahawa sistem perpaipan bekalan air di kawasan Jeram Padang perlu dilaksanakan dan tangki-tangki di kawasan perumahan perlu penambahbaikan dan penaik tarafan. Ini kerana saya selaku ADUN Jeram Padang sering menerima aduan dari

masyarakat Jeram Padang mengenai gangguan bela, bekalan air dan paip pecah.

Akhir sekali Yang Dipertua, saya merayu dan ingin mencadangkan bahawa mewujudkan rumah kos rendah di kawasan Jeram Padang. Ini kerana rakyat Jeram Padang sangat memerlukan kerana rata-rata masyarakat sans tidak mempunyai pemilikan rumah sendiri. Perkara ini lebih merumitkan lagi ada pihak pemilik ladang ingin menutup ladang getah mereka, mereka akan dibayar pampasan oleh majikan. Namun saya risau, apa yang mereka perolehi tidak digunakan sebaiknya. Jadi saya mohon pihak Kerajaan Negeri untuk mengangkat cadangan saya ini supaya diadakan kos apa, rumah kos rendah yang menjunjung titah Tuanku untuk harapan rakyat.

Akhir, dengan ini, saya ingin mengakhiri ucapan saya, bahas saya dengan pantun,

Di dahan ara hinggap kenari,  
Hinggap sekawan di pohon jati,  
Terima kasih Ahli Dewan Undangan Negeri,  
Memberi tumpuan sepenuh hati.

Dengan ini saya menjunjung kasih dan menyokong titah Duli Yang Maha Mulia Yang di-Pertuan Besar Negeri Sembilan. Terima kasih Yang Dipertua.

**YB Yang Dipertua Dewan:** Terima kasih. Saya menjemput Sri Tanjung.

**YB ADUN Sri Tanjung:** Terima kasih Yang Berhormat Dato' Yang Dipertua. Di kesempatan ini, saya ingin menjunjung kasih ke atas Duli Yang Maha Mulia Yang di-Pertuan Besar, Negeri Sembilan di atas titah ucapan baginda merasmikan Persidangan Kedua Penggal Pertama Dewan Undangan Negeri, Negeri Sembilan Yang Ke-15.

Dato' Yang Dipertua, titah ucapan, titah ucapan Duli Yang Maha Mulia Yang di-Pertuan Besar Negeri Sembilan telah menyambut baik permuafakatan yang tercapai di antara pemimpin parti untuk membentuk sebuah kerajaan yang stabil dan utuh. Seterusnya, kerajaan ini dapat menumpukan sepenuh daya usaha untuk memperkuatkan tekad bagi membangunkan negeri yang menjana pertumbuhan ekonomi dan secara langsung menjamin kesejahteraan rakyat di bawah naungan Duli Yang Maha Mulia Yang di-Pertuan Besar Negeri Sembilan.

Sebelum mengorak kata lebih jauh, izinkan saya mengambil peluang merakamkan ucapan tahniah dan syabas kepada pimpinan Yang Amat

Berhormat Dato' Seri Aminuddin Harun Menteri Besar Negeri Sembilan atas membentuk barisan Kerajaan Perpaduan Negeri Sembilan yang baharu. Saya ingin mengambil kesempatan ini mengucapkan terima kasih, terima kasih atas kepercayaan pengundi di DUN Sri Tanjung kerana memilih saya. Dan kerana anda semua saya berada di sini pada hari ini. Sesungguhnya, kepercayaan dan sokongan yang diberikan oleh pengundi Sri Tanjung ini amat dihargai dan disanjung tinggi, serta akan digalas dengan sehabis baik dan sepenuh hati.

Dato' Yang Dipertua, saya bersetuju dan menyokong cadangan YB Chennah untuk membina pelabuhan kecil atau *smart port* di Port Dickson. Saya juga memohon Unit Perancang Ekonomi Negeri Sembilan untuk membuat kajian menyeluruh mengenainya. Sekiranya projek itu berjaya direalisasikan ia akan memberi nilai tambah kepada Kerajaan Negeri, sekaligus dapat menarik minat syarikat pelaburan atau industri untuk membina fasiliti lain termasuk kilang di kawasan Port Dickson dan bakal memberi pulangan ekonomi terbaik selain mewujudkan lebih peluang pekerjaan untuk penduduk tempatan.

Saya ingin mencadangkan beberapa cadangan untuk pembangunan Port Dickson. Cadangan nombor 1 iaitu jambatan baru – (4 lorong 2 hala). Cadangan jambatan baru merintang muara Sungai Lukut Besar adalah bertujuan menghubungkan pusat Bandar Port Dickson dan Pekan Lukut dengan petempatan sekitar kawasan Chuah dan Jimah Power Plant melalui jalan Kuala Lukut. Dengan ini meningkatkan aksesibiliti dan kemudahan sampai antara pusat bandar dengan kawasan sekitar KLIA. Kedua: jaringan rangkaian jalanraya yang baik. Memperbaiki tahap perkhidmatan jalan raya dan kelancaran trafik pada waktu kemuncak. Mengurangkan konflik lalu lintas di jalan raya.

Cadangan kedua merupakan permohonan untuk membina jejantas pejalan kaki berhampiran Sekolah Rendah Kebangsaan Port Dickson dan Sekolah Menengah Kebangsaan Raja Jumaat. Sebelum ini, banyak kemalangan berlaku di kawasan ini terutamanya yang melibatkan para pelajar kerana kenderaan yang melalui jalan ini kebanyakan memandu dengan laju. Walaupun garis kuning dan papan tanda kawasan sekolah serta lampu isyarat telah disediakan tetapi kebanyakan pemandu memandu terlalu laju tanpa memikirkan pengguna jalan raya yang lain. Jejantas itu juga akan memudahkan ibu bapa menghantar dan mengambil anak-anak serta dapat mengurangkan masalah kesesakan lalu lintas terutamanya di waktu puncak dan mengelakkan kemalangan jalan raya.

Cadangan ketiga: isu rokok elektronik atau vape semakin membimbangkan dalam kalangan masyarakat pada masa kini

khususnya melibatkan pelajar sekolah. Statistik Kementerian Kesihatan Malaysia yang melaporkan jumlah perokok elektronik dalam kalangan pelajar mencecah hingga 43,000 pelajar sekolah menengah dan 341 murid bagi sekolah rendah. Statistik ini memberi bayangan betapa seriusnya isu penggunaan rokok elektronik dalam kawasan, di kalangan generasi remaja yang menjadi sebahagian daripada 1.52 juta penduduk Malaysia yang menggunakan rokok elektronik ini.

Trend penglibatan belia dengan dadah dijangka meningkat tahun ini seperti jangkakan Majlis Penyaahgunaan Bahan Malaysia (MASAC). Salah satunya faktornya adalah penjualan peranti vape tidak berdaftar yang memudahkan belia mengambil dadah jenis perisa *mushroom*. Selain itu, faktor tekanan hidup serta bekalan dadah yang semakin mudah diperoleh juga mendorong kepada peningkatannya. Saya di sini memohon kepada Kerajaan Negeri untuk mengetatkan lagi proses permohonan lesen premis perniagaan.

Saya ingin mengambil kesempatan ini mengucapkan syabas dan tahniah kepada IPD Port Dickson atas penahanan seorang suspek minggu lalu, hasil maklumat dan risikan terhadap kegiatan pemilik kedai vape itu selepas dikesan aktif menjual dadah dalam bentuk cecair vape atau *magic mushroom* kepada remaja dan belia.

Cadangan keempat: saya mencadangkan Kerajaan Negeri Sembilan untuk bantuan khas makanan dalam pelbagai program untuk pelajar di negeri ini menjelang peperiksaan untuk membantu ramai pelajar terutama dari golongan *B40* dan luar bandar Tingkatan 4 dan Tingkatan 5. Bantuan khas makanan yang disediakan sangat membantu pelajar golongan *B40* dan luar bandar. Ini mendorong pelajar untuk terus berada di sekolah bagi mengikuti kelas tuisyen pada sebelah petang. Sebelum ini, ramai, tidak ramai pelajar yang dapat hadir kelas tambahan sebelah petang kerana kekangan dari segi kewangan. Kadang kala pelajar sudah makan pukul 10:00 pagi, jika tambah belanja untuk makan tengah hari, ini membebankan mereka. Jadi sukar untuk mereka terus berada di sekolah bagi mengikut kelas tambahan pada petang. Tetapi apabila ada bantuan khas makanan yang disediakan pada tengah hari, pelajar tidak perlu pulang atau keluar untuk makan tengah hari, mereka terus berada di sekolah untuk kelas tambahan.

Akhir sekali, saya di sini berhasrat untuk menambah bilangan prasekolah di sekolah rendah jenis, sekolah rendah kerajaan Negeri Sembilan ini bagi penuhi keperluan anak-anak golongan *B40*. Penambahan prasekolah ini bertujuan untuk menyediakan pendidikan awal kepada murid sebelum memasuki Tahun 1. Dan kita berharap adanya peruntukan meneruskan belanjawan kerana kita memerlukan

dana untuk memperluaskan ke seluruh sekolah rendah di Negeri Sembilan. Untuk makluman Yang Berhormat semua, di Negeri Sembilan, di Port Dickson sahaja kami mempunyai 17 SJKT dan hanya 3 SJKT sahaja menawarkan pra sekolah. Kerajaan Negeri Sembilan perlu terlibat secara langsung untuk menyelesaikan isu infrastruktur sekolah seperti menyediakan pantri, tandas untuk pelajar pra-sekolah dalam usaha memastikan sekolah rendah terutama di kawasan luar bandar dapat terus beroperasi. Kita harap pihak kerajaan mengambil langkah yang terbaik untuk mengatasi masalah ini. Sekian terima kasih. Dengan ini saya sokong usul.

**YB Yang Dipertua Dewan:** Terima kasih. Saya jemput Seri Menanti.

**YB ADUN Seri Menanti:** *Bismillahirrahmanirrahim. Assalamualaikum WBT.* Terima kasih kepada Yang Berhormat Dato' Yang dipada, Dipertua Dewan, Yang Amat Berhormat Sikamat, Exco Kanan, barisan Exco dan juga sahabat-sahabat Yang Berhormat serta ketua-ketua jabatan yang hadir pada pagi ini. Pertamanya saya ucapkan terima kasih kerana diberi peluang untuk merakamkan ucapan atas titah menjunjung kasih titah Seri Paduka Baginda, Duli Yang Maha Mulia Yang di-Pertuan Besar Negeri Sembilan; Tuanku Muhriz ibni Alharhum Tuanku Munawir. Dan juga saya ucapkan terima kasih kepada seluruh pengundi Seri Menanti kerana memberikan mandat dan peluang kepada saya untuk berbakti sebagai wakil rakyat di kawasan Seri Menanti.

*Alhamdulillah* di Seri Menanti ini merupakan satu bandar yang dipanggil Bandar Diraja yang mana di situ terletaknya istana dan juga beberapa kawasan yang menarik. Dan saya mengharapkan kepada Kerajaan Negeri khususnya Exco Pelancongan memberikan penumpuan yang lebih kepada kawasan Seri Menanti terutamanya untuk kita membangkitkan berkenaan dengan hab pelancongan Perpatih yang ada di Negeri Sembilan ini. Kerana kita sedia maklum kalau kita tidak meningkatkan lagi pengetahuan berkenaan dengan Adat Perpatih di Negeri Sembilan, saya risau ia akan ditelan zaman.

Berkenaan dengan beberapa perkara di Seri Menanti ini terutama daripada segi infrastruktur sepertimana yang telah dibangkitkan tadi berkenaan dengan terutama jalan utama dan juga air di kawasan Seri Menanti. Terima kasih saya ucapkan kepada Kerajaan Negeri kerana bermula tahun depan akan bermulanya penukaran paip air di kawasan Seri Menanti ini. Dan juga berkenaan dengan jalan terutama jalan daripada Kuala Pilah sehinggalah kawasan Ulu Bendul yang mana kalau hari minggu ataupun hari cuti, ia akan, dia merupakan satu jalan utama. Sama ada daripada Seremban nak balik ke Pantai Timur ataupun daripada kawasan Pantai Timur nak balik ke Seremban ataupun Kuala

Lumpur. Jadi ia melibatkan kenderaan yang banyak dan akan mengakibatkan jalan, kesesakan jalan yang melampaui masa, masa sehingga berlakunya kekecohan di dalam media sosial sehingga 4 ke 6 jam daripada Kuala Pilah nak sampai ke Seremban. Jadi, saya mengharapkan agar Kerajaan Negeri dapat menilai semula berkenaan dengan pelebaran jalan di kawasan Seri Menanti ini ataupun ada kaedah yang terbaik untuk kita memudahkan pengguna jalan raya di kawasan Kuala Pilah ke Seremban ini.

Berkenaan dengan rangkaian liputan mudah alih. Kita dah sedia maklum bahawa kita menuju ke negara yang sentiasa mendapat maklumat yang begitu mudah. Jadi kalau di kawasan Seri Menanti ini masih lagi ada kawasan-kawasan yang sukar nak mendapat liputan rangkaian mudah alih dan juga internet. Dan apabila, kalau kita baca kembali titah Duli Yang Maha Mulia berkenaan dengan, ada satu Pelan Ekonomi Digital Negeri Sembilan. Ramai di kalangan anak-anak muda kita yang menggunakan media sosial sebagai ruang mereka berniaga. Jadi saya mengharapkan agar dipertingkatkan lagi berkenaan dengan jalur lebar ataupun rangkaian mudah alih di kawasan Seri Menanti.

Dan juga berkenaan dengan eko sistem pelancongan. Sepertimana yang kita sedia maklum, bahawa sekarang ini ramai di kalangan masyarakat kita yang berminat dengan eko pelancongan ini, terutama berkenaan dengan *camp site*. Kalau boleh saya mengharapkan di bawah pelancongan, kita menyediakan satu dasar yang baik untuk pelan, eko pelancongan ini terutama berkenaan dengan *camp site – camp site* yang di, yang dibuat begitu banyak sekarang ini supaya keselamatan lebih terjamin untuk orang yang menyewa ataupun tuan tanah ber, *camp site* ini. Ini penting kerana kita tak mahu lagi perkara-perkara yang terjadi di dalam negara kita yang mana ada kejadian tanah runtuh, ada kejadian ibu air yang boleh mengakibatkan kehilangan nyawa.

Dan juga saya ucapkan terima kasih kepada Kerajaan Negeri kerana semalam telah membuat satu pembentangan usul berkenaan dengan Palestin yang mana Palestin ini begitu dekat dengan hati kita kerana ia bukan berkaitan dengan agama tetapi ia berkaitan dengan keamanan sejagat, kemana, kemanusiaan sesama kita. Kalau kita ada sifat ehsan di dalam diri kita, kemanusiaan ini sangat penting. *Hablum minallah, hablum minannas*. Adanya hubungan kita dengan Allah SWT dan juga hubungan kita sesama manusia, maka hubungan kita sesama manusia inilah yang mendekatkan diri kita bersama dengan rakyat Palestin yang berada jauh dengan diri kita.

Berkenaan dengan isu perpaduan. Saya mengharapkan agar kita sama-sama, sama ada di pihak kerajaan dan juga pembangkang, kita fikir

kembali agenda perpaduan ini. Jangan kita mainkan lagi isu perkauman, isu agama kerana perpaduan dalam negara kita, kita kena tengok kembali bahawa dalam negara kita ini berbilang kaum dan juga berbilang agama. Kalau kita masih lagi memainkan isu perkauman, isu agama dan juga isu-isu lain, sampai bila kita nak bersatu padu, sampai bila masyarakat kita ini masih lagi dimomokkan dengan perkara-perkara yang tidak mendatangkan faedah terutama kemakmuran dalam negeri dan juga negara kita.

Saya berpendapat, bahawa kita kena perkasakan kembali institusi-institusi keagamaan terutama kalau Islam kita perkasakan kembali institusi masjid dan juga surau. Kalau agama lain, mungkin perkasakan kembali institusi rumah agama ini supaya kita menekankan nilai-nilai kemanusiaan dalam masyarakat kita terutama, untuk makluman Yang Amat Berhormat Sikamat, ramai pengerusi-pengerusi masjid memaklumkan kalau boleh Kerajaan Negeri pertimbangkan mereka ini diberikan imbuhan sama ada elaun ataupun perkara-perkara yang boleh mendatangkan, memudahkan kemaslahatan mereka kerana ada di, ada, ada di antara mereka ini kalau berurusan dengan Pejabat Agama, mereka ni ada yang jauh. Mereka kata; tak akan nak ambil duit masjid. Jadi sebaiknya kita fikirkan yang terbaik untuk kita memudahkan kemaslahatan mereka. Termasuk juga dengan pegawai-pegawai masjid yang lain.

Dan juga bagaimana kita fikirkan di bawah institusi agama Islam ini, bagaimana kita nak mencari pelapis-pelapis imam. Kerana kebanyakan imam-imam di masjid-masjid kita ini ramai yang dah terlebih umur. Bukan kita nak kata mereka ini dah tua, tetapi kita kena cari pelapis. Kerana kita menyediakan elaun 1 dan juga Iman 2, tetapi kalau tidak ada pelapis, rugilah kariah di kawasan tersebut. Jadi ada sebaiknya, saya memuji Kerajaan Negeri kerana telah membuat satu inisiatif ke, kepada pelajar-pelajar tahfiz berkenaan dengan pendidikan *fast track* kita. Kita nak lahirkan anak-anak tahfiz kita yang mana berumur daripada umur 17 tahun sehingga 21 tahun, kita nak berikan mereka ini pendidikan perdana, mereka diberikan, dimasukkan di dalam sekolah-sekolah yang boleh mengambil peperiksaan SPM. Dan tidak salah sekiranya kita beri peluang kepada mereka untuk kita tempatkan mereka di masjid-masjid kariah yang ada dalam negeri kita.

Dan juga saya nak bangkitkan sedikit berkenaan dengan kemaslahatan yang mana berlaku kekecohan sebelum pilihan raya baru-baru ini berkenaan dengan penggali kubur yang kita bagi, saya tak, tak diberikan makluman yang je, maklumat yang jelas sama ada penggali kubur ini diberikan elaun secara *one off* ataupun secara bulanan. Kerana di kariah-kariah kita, penggali kubur ini bukannya seorang. Ada yang satu kariah

sampai 4 – 5 orang. Jadi yang kita mintak maklumat hanya seorang. Jadi ia menimbulkan satu kesulitan ataupun menimbulkan satu perkara yang tidak menyenangkan di peringkat kariah, akhirnya menyebabkan pergaduhan dan juga pecah belah. Kalau nak bagi, kena ambil maklumat data yang tepat, kita bagi. Kalau 4 penggali kubur, kita bagi 4 penggali kubur. Jangan kita bagi seorang.

Dan juga akhir, saya nak masuk sedikit berkenaan dengan kemakmuran rakyat. Saya ucap terima kasih kepada Kerajaan Negeri dan juga Kerajaan Persekutuan kerana telah menyediakan satu inisiatif kita membantu rakyat terutama Jualan Ladang Prihatin dan juga Jualan Rahmat yang telah diperkenalkan oleh Kerajaan Negeri dan juga Kerajaan Persekutuan. Kita sedia maklum, kita kena bantu rakyat. Rakyat dalam keadaan yang susah. Jadi nak tak nak, kita kena buat inisiatif ini. Kalau boleh jangan adakan sebulan sekali ataupun 2 bulan sekali di kawasan-kawasan tertentu. Kita kerap lakukan perkara ini untuk kita memudahkan membantu rakyat terutama dalam keadaan isu sekarang ini, dengan kekurangan beras, kekurangan gula dan juga minyak, kalau boleh kita adakan kerap di kawasan DUN-DUN yang ada di dalam negeri kita. *Insyallah* kita dapat memudahkan membantu rakyat dalam jualan-jualan inisiatif yang disediakan oleh Kerajaan Negeri dan juga Kerajaan Persekutuan.

Dan juga saya mengharapkan agar dipercepatkan pembinaan berkenaan dengan kilang beras yang telah diumumkan oleh Exco Kanan kita untuk kita bina kilang beras untuk negeri kita. Mungkin kita boleh perkenalkan bahawa inilah hasil beras yang tumbuh di kawasan di negeri kita dan kita perkenalkan beras yang berasal daripada Negeri Sembilan sepertimana yang telah dicadangkan oleh Yang Berhormat daripada Gemas, bahawa biarlah pihak yang berwa, yang, yang terlibat berkenaan kita nak membina benih padi yang, yang kuat, yang, yang bagus untuk kita edarkan ke seluruh negeri dan juga negara kita.

Dan saya mohon kepada Kerajaan Negeri, kalau boleh kita timbang kembali sepertimana yang telah diucapkan oleh Yang Berhormat Johol berkenaan dengan kita perkasakan kembali GLC-GLC di dalam negeri kita. Kerana kalau boleh kita nak bantu rakyat ini, bagaimana kita nak buat satu penempatan rakyat yang mana sebelum ini ada projek perumahan kos, kos rendah. Yang mana, kita tahu nilai rumah sekarang ini dalam negeri dan juga negara kita kadang-kadang melampaui harganya dan juga kemampuan masyarakat kita untuk membeli rumah. Kalau Kerajaan Negeri menyey, menyediakan satu inisiatif projek perumahan kos, kos rendah sepertimana yang ada di kawasan saya sebelum ini, contohnya rumah di Taman Pemark, Taman Seri Terachi dan juga Taman Seri Ulu Bendul. Saya yakin kita dapat memudahkan

rakyat untuk, untuk mendapat kediaman yang terbaik buat diri mereka. Di kawasan saya, contohnya kawasan kampung, mungkin tak sama dengan kawasan bandar yang ada rumah, rumah, rumah apa dipanggil, apartmen. Mungkin kalau di kawasan kita, kawasan saya ini mungkin sesuai kita buat rumah kos rendah. Kita boleh bantu rakyat kita memiliki rumah kediaman di bawah harga 100,000.00 ringgit. Saya mohon pertimbangan daripada Kerajaan Negeri kerana di dalam keadaan yang sukar ini, kita boleh membantu rakyat mendapat satu kediaman yang terbaik buat diri mereka dan juga keluarga mereka.

**YB Yang Dipertua Dewan:** Mohon Yang Berhormat.

**YB ADUN Seri Menanti:** Baik, satu lagi Yang di, Yang, Dato' Yang Dipertua. Berkenaan dengan pendidikan dan juga modal insan. Saya mengharapkan kepada Kerajaan Negeri dan juga Exco Pendidikan dan juga Modal Insan, kita dapat menyediakan satu, membina satu lagi, sepertimana yang kita bina di ITQAN di Gemencheh. Kita bina satu lagi pusat tahfiz kerana kalau boleh kita mahu melahirkan lebih ramai anak-anak kita yang alirannya menjaga Al Quran dan juga sesuai dengan keadaan zaman, mereka juga, menjaga, dapat pendidikan di bidang sains dan juga alir, aliran perdana. Kalau kita dapat melahirkan, memperbanyakkan sekolah sebegini, *insyaAllah* Negeri Sembilan akan sentiasa mendapat rahmat dan juga keberkatan daripada Allah SWT.

Saya memetik sedikit ayat Al Quran [melafazkan bacaan ayat 155 dari Surah Al Baqarah]. Jadi saya mengharapkan kepada sahabat-sahabat daripada pembangkang, banyak-banyaklah bersabar di dalam perjuangan ini, haa ya. Kerana kalau kita banyak bersabar di dalam perjuangan ini dan juga bersama dengan kami dalam Kerajaan Perpaduan, dan *insyaAllah* kita dapat sama-sama merealisasikan membantu rakyat dan juga kita menjaga keharmonian dan juga perpaduan dalam negeri kita. Terima kasih, saya menyokong usul daripada Yang Berhormat Johol berkaitan dengan ucapan titah Duli Yang Maha Mulia Yang di-Pertuan Besar Negeri Sembilan. Terima kasih *assalamualaikum WBT*.

**YB Yang Dipertua Dewan:** Ahli-ahli Yang Berhormat, kita akan sambung perbahasan ini pada pukul 2:30. Sekarang Dewan ditangguhkan.

**[Mesyuarat Dewan ditangguhkan pada jam 12.57 tengah hari]**

---

**[Mesyuarat Dewan disambung semula pada jam 2.35 petang]**

[Setiausaha Dewan mengumumkan ketibaan YB Yang Dipertua Dewan]

**YB Yang Dipertua Dewan:** *Assalamualaikum.* Dijemput, kita sambung perbincangan, dijemput YB Rahang.

**YB ADUN Rahang:** Terima kasih Yang Berhormat Dato' Yang Dipertua, saya merakamkan ucapan menjunjung kasih ke atas Titah DiRaja, Duli Yang Maha Mulia Yang di-Pertuan Besar Negeri Sembilan. Saya jugak mengucapkan tahniah kepada Yang Amat Berhormat Dato' Seri atas pelantikan sebagai Menteri Besar buat kali kedua.

Dato' Yang Pertua, saya jugak ingin mengucapkan terima kasih kepada pengundi DUN Rahang yang telah memberi mandat kepada saya untuk mewakili mereka. Saya akan cuba sedaya upaya untuk berkhidmat dan mengutarakan suara rakyat DUN Rahang di Dewan yang mulia ini.

Dato' Yang Dipertua, saya ingin mencadangkan agar Pihak Berkuasa tempatan, Tempatan dan semua agensi kerajaan dapat meneruskan usaha bertindak pantas terhadap aduan rakyat. Ini adalah harapan rakyat DUN Rahang dan Negeri Sembilan.

Dato' Yang Dipertua, kini beban kehidupan rakyat semakin meningkat. Saya amat berharap Kerajaan Negeri dapat meneruskan dasar atau polisi yang mengurangkan beban rakyat seperti Jualan Harga Ladang, meneruskan bantuan kewangan pelajar yang masuk ke universiti, Tabung Usahawan Negeri Sembilan dan sebagainya.

Dato' Yang Dipertua, saya juga ingin mencadangkan kepada pihak Kerajaan Negeri supaya meneruskan usaha untuk menarik lebih banyak pelabur di dalam dan luar negara untuk melabur di Negeri Sembilan kerana ia akan menjana ekonomi dan mewujudkan lebih banyak peluang kerja, pekerjaan kepada rakyat Negeri Sembilan.

Dato' Yang Pertua, saya ingin mengucap ribuan, ribuan terima kasih kepada Kerajaan Negeri dan Majlis Bandaraya Seremban kerana telah meluluskan peruntukan menaik taraf longkang di depan kedai-kedai dalam kawasan Rahang. Saya amat berharap projek ini dapat dilaksanakan dalam masa yang terdekat demi kesejahteraan rakyat di situ. Akhir sekali, saya menyokong usul ini. Terima kasih.

**YB Yang Dipertua Dewan:** Saya menjemput Bagan Pinang.

**YB ADUN Bagan Pinang:** *Assalamualaikum* WBT. Terima kasih kepada Yang Berbahagia Dato' *Speaker*. Tahniah di atas pelantikan Yang Amat Berhormat Dato' Seri Aminuddin bin Harun, di atas pelantikan sebagai

Menteri Besar Negeri Sembilan. Dan juga tahniah di atas pelantikan Yang Berhormat Dato' M K Ibrahim bin Abd Rahman sebagai Yang Dipertua Dewan Undangan Negeri Sembilan. Terima kasih juga kepada SPR dan juga seluruh agensi kerajaan telah menjayakan dan membantu kejayaan PRN Yang ke-15 yang lepas.

Yang Berbahagia Dato' *Speaker*, izinkan saya mulakan perbahasan Titah Diraja ini dengan serangkap pantun.

Harum mewangi bunga kenanga,  
Disusun bersama belahan pinang,  
Perpaduan nasional agenda negara,  
Bagan Pinang tampil bicara.

Dato' Yang Dipertua, firman Allah SWT; '*auzubillahiminashaitan nirrajim* [melafazkan bacaan ayat 162 dari Surah Al An'aam]. Yang bermaksud: "Katakanlah sesungguhnya sembahyangku dan ibadatku, hidupku dan matiku, hanyalah untuk Allah SWT memelihara dan mentadbir sekalian alam."

Dato' Yang Dipertua, menjunjung kasih Titah Diraja yang menzahirkan kecaknaan kepada negeri dan juga kebajikan rakyat Negeri Sembilan secara keseluruhannya dan menggambarkan kepimpinan cukup berhemah, berhikmah dan selaras dengan Maqasid Syariah terutamanya keperluan menunaikan amanah sebagai kerajaan dan wakil rakyat yang telah diberi mandat oleh rakyat pada Pilihan Raya Umum yang lepas.

Dato Yang Dipertua, saya ingin menyentuh 5 isu penting yang begitu rapat dengan kehidupan warga di Bagan Pinang: yang pertama, pelancongan; yang kedua: nelayan; ketiga: Bandar Tentera Darat; keempat: pusat kemahiran minyak dan gas, dengan izin, *oil and gas*; yang kelima: pendidikan.

Dato' Yang Dipertua, kita semua maklum bahawa Port Dickson merupakan salah satu destinasi pelancongan yang terbe, tersohor bukan sahaja di Negeri Sembilan malah di seluruh Malaysia. Industri pelancongan telah menjadi faktor penting dalam pertumbuhan ekonomi dan pembangunan kawasan, serta telah memberi peluang yang banyak kepada penduduk tempatan. Pantai Bagan Pinang dan Pantai Telok Kemang dengan pantai yang cantik, putih yang menawan dan landskap indah, menawarkan pelbagai tarikan kepada para pelancong dari dalam dan luar negeri. Tumpuan kepada aktiviti air seperti berenang, berkayak, menyelam, sehingga kita dapat menyaksikan daya tarik pelbagai jenis yang ditawarkan oleh destinasi ini.

Dato' Yang Dipertua, kedatangan para pelancong bertambah setiap tahun, ini dapat dilihat dengan kesesakan lalu lintas pada setiap hujung minggu atau cuti-cuti umum. Peningkatan jumlah pelancong telah meningkatkan permintaan terhadap perkhidmatan berkaitan seperti pengangkutan, penginapan, makan, rekreasi, tandas, tempat persalinan dan sebagainya. Penyediaan kemudahan fasiliti seperti tempat parkir yang mencukupi, tandas awam dan tapak-tapak perkhemahan tersusun serta landskap yang menarik dan jalan-jalan yang ditata dengan baik dan sempurna.

Dato' Yang Dipertua, persoalan yang timbul dalam perancangan dan pelaksanaan pembangunan pelancongan adalah kesan-kesan pembangunan yang secara sedar atau sebaliknya tanpa mengambil kira kesan ke atas eko sistem habitat hidupan laut dan keindahan pantai peranginan di Bagan Pinang dan Telok Kemang. Bangunan-bangunan terbengkalai yang ditinggalkan tanpa disiapkan juga menjejaskan pandangan dan mencacatkan panorama. Akhirnya tempat-tempat ini menjadi sarang penagihan dadah, aktiviti tidak bermoral dan juga tempat pembiakan nyamuk.

Dato' Yang Dipertua, adalah penting untuk menyedari bahawa perkembangan industri pelancongan perlu berlaku secara mampan dan bertanggungjawab. Penyediaan lebih banyak tong sampah dan kekerapan untuk pengumpulan, menjaga persekitaran marin daripada pencemaran minyak dan mengurangkan kesan negatif terhadap alam sekitar oleh projek-projek pembinaan hotel dan penginapan. Selain itu juga, industri pelancongan juga membawa manfaat kepada masyarakat tempatan dalam pelbagai cara. Ia mencipta peluang mendorong pembangunan peniaga kecil dan sederhana.

Dalam usaha meningkatkan industri pelancongan di Bagan Pinang, adalah penting untuk bergiat secara kolektif bersama kerajaan tempatan, pengusaha pelancongan dan komuniti tempatan. Kesedaran masyarakat berkaitan alam sekitar, mesra terhadap pelancong adalah kunci kepada kejayaan industri ini. Saya berharap bahawa kita boleh bersama-sama mencapai matlamat untuk menjadikan Bagan Pinang sebagai destinasi pelancongan utama yang tidak hanya menarik pelancong dari seluruh tempatan tetapi juga meletakkan lesta, kelestarian alam sekitar dan kesejahteraan masyarakat tempatan sebagai keutamaan.

Dato' Yang Dipertua, pembangunan sektor perikat, perikatan, peringatan, sektor peringan, perikanan perlu terus diberikan perhatian oleh kerajaan terutamanya kepentingan nelayan kecil atau nelayan pelancongan sebagai sumber pendapatan di samping menyediakan

latihan dan kemahiran serta peluang pekerjaan terutama dalam bidang perikanan marin dan juga penternakan akuakultur di kalangan kebanyakan daripada mereka yang sekarang berdepan dengan pelbagai masalah cabaran ekonomi, sosial, dan alam sekitar.

Dato' Yang Dipertua, dalam memenuhi keperluan dan permintaan untuk membangunkan industri pelancongan, banyak kemudahan-kemudahan baru dan hotel-hotel mewah akan dibina sepanjang pantai Port Dickson. Ini akan menyebabkan sebahagian nelayan tidak dapat turun ke laut kerana penutupan laluan dan kawasan penangkapan ikan ditutup. Ini akan menjejaskan aktiviti harian dan pendapatan mereka yang semakin terikat, terhimpit dengan tekanan dan kos hidup yang semakin tinggi. Ini perlu diberikan perhatian yang serius oleh Jabatan Perikanan dan Kerajaan Negeri.

Dato' Yang Dipertua, merujuk kepada cadangan membina sebuah pelabuhan mini di Port Dickson, saya berharap tidak dilupakan untuk buat satu kajian yang komprehensif dan teliti kesan sampingan kepada sosio ekonomi penduduk, nelayan dan alam sekitar. Selain itu, tumpahan minyak yang mencemar perairan Port Dickson bukanlah perkara asing, malah ianya berlaku hampir setiap tahun. Tumpahan minyak ini berpunca daripada pelepasan minyak secara haram oleh kapal-kapal yang berlabuh di sekitar Port Dickson dan Kuala Linggi. Ini bukan sahaja menjejaskan hasil tangkapan nelayan, eko sistem hidupan laut dan industri pelancongan di pantai Port Dickson. Untuk itu, saya memohon pihak berkuasa untuk meningkatkan pemantauan dan penguatkuasaan terhadap aktiviti berkaitan kapal dagang yang berlabuh di perairan Port Dickson dan pelabuhan berhampiran.

Dato' Yang Dipertua, Bagan Pinang juga terkenal sebagai "Bandar Tentera Darat" yang telah diisytiharkan pada tahun 2009 sebagai ikonik kepada Port Dickson yang menjadi tarikan pelancongan dan di antaranya adalah Muzium Tentera Darat. Keberadaan Pusat Latihan Tentera Darat sejak tahun 1933 memainkan peranan penting dalam menyediakan anggota tentera yang menjaga keamanan dan keselamatan negara. Saya ingin merakamkan ucapan terima kasih di atas pengorbanan dan jasa bakti yang telah dicurahkan oleh semua seluruh anggota ATM dan keluarga mereka dalam menjaga keamanan dan mempertahankan kedaulatan negara kita.

Pembangunan Pusat Latihan Asas Tentera Darat atau PUSASDA adalah projek yang besar dan penting untuk memastikan pasukan tentera darat sentiasa berada dan berkemampuan untuk menghadapi apa jua ancaman yang mendatang. Dalam konteks ini, saya ingin mencadangkan supaya dibina monumen-monumen simbolik aset tentera darat dan

memasukkan acara pembarisan tamat latihan perajurit muda dan lain-lain acara ketenteraan dalam kalendar tahunan pelancongan bagi Negeri Sembilan.

Dato' Yang Dipertua, Port Dickson terkenal dengan industri minyak dan gas sejak terbinanya 2 kilang penapis minyak; Petron Refinery Port Dickson dan Hengyuan Refining Company sejak tahun 1960, menjadi pelopor industri minyak dan gas di Malaysia. Ramai di kalangan warga Port Dickson yang terlatih dan berkemahiran dalam bidang ini. Oleh itu saya mencadangkan supaya satu pusat kemahiran berlandaskan minyak dan gas diwujudkan di Port Dickson. Dengan adanya .....

**YB Yang Dipertua Dewan:** Yang Berhormat.

**YB ADUN Bagan Pinang:** ..... pusat kemahiran .....

**YB Yang Dipertua Dewan:** Yang Berhormat masa dah ....

**YB ADUN Bagan Pinang:** minyak .....

**YB Yang Dipertua Dewan:** Masa.

**YB ADUN Bagan Pinang:** 3 minit, terima kasih Dato' Yang Dipertua. Yang ke, terakhir. Demi meningkatkan intelektual anak-anak di Bagan Pinang, saya merasakan perlu adanya sekolah berasrama penuh di Bagan Lalang, di Bagan Pinang atau di Port Dickson amnya. Kerana dalam pemerhatian saya di Daerah Port Dickson tiada satu pun sekolah yang berprestasi tinggi seperti Sekolah Menengah Sains ataupun Sekolah Berasrama Penuh ataupun MRSM sekalipun. Saya mencadangkan diwujudkan sebuah Sekolah Berprestasi Tinggi di Bagan Pinang atau Port Dickson.

Dan sebagai akhirnya, saya memohon menyokong usul. Sekian, *wabillah assalamualaikum* WBT.

**YB Yang Dipertua Dewan:** Terima kasih. Dijemput ADUN, YB Kota. Tolong hadkan 10 minit kita nak habiskan apa ni, usul ni pada hari ini dan .....

**YB ADUN Kota:** Belum mula dah kena *warning*.

**YB Yang Dipertua Dewan:** ..... penggulungan sekali ya.

**YB ADUN Kota:** *Bismillahirrahmanirrahim. Assalamualaikum WBT,* salam sejahtera. Yang Berhormat Dato' Yang Dipertua Dewan, Yang Amat

Berhormat Sikamat, barisan Exco Kerajaan Negeri, ahli-ahli Dewan, ahli-ahli Yang Berhormat di barisan kerajaan dan pembangkang yang berada di dalam dewan yang mulia ini. Yang Berhormat Dato' Yang Dipertua, saya bangun mengemukakan usul yang berbunyi bahawa Dewan ini mengambil ketetapan menjunjung kasih Ke Bawah Duli Yang Maha Mulia Yang di-Pertuan Besar Negeri Sembilan atas titah ucapan Baginda bagi merasmikan Pembukaan Penggal Kedua, Dewan Undangan Negeri, Negeri Sembilan kali yang Ke-15.

Ucapan tahniah kepada kesemua Yang Berhormat kerana telah dipilih untuk mewakili rakyat di kawasan masing-masing melalui satu proses demokrasi yang telah dilaksanakan dengan telus pada Pilihan Raya Negeri yang lalu. Dengan menjunjung titah Ke Bawah Duli Yang Maha Mulia Yang di-Pertuan Besar Negeri Sembilan, sama-samalah kita menunaikan amanah ini dengan sebaiknya.

Yang Berhormat Dato' Yang Dipertua, penggal ini merupakan penggal pertama saya diberi kepercayaan oleh warga Kota untuk berkhidmat kepada mereka. Dan untuk kali pertama ini saya ingin menyentuh beberapa perkara. Yang pertama berkaitan dengan pembangunan infra di kawasan Kota. Di kawasan saya ini kurang kemudahan-kemudahan awam. Antaranya tiada kemudahan untuk beriadah disediakan seperti taman-taman awam sebagaimana yang ada di kawasan-kawasan lain. Program kemasya, kemasyarakatan juga terhad untuk dilaksanakan kerana kawasan Kota ini tiada dewan yang besar mampu menampung kapasiti yang ramai sehinggakan jika hendak mengadakan majlis-majlis yang memerlukan penggunaan dewan dalam kapasiti yang ramai seperti majlis kenduri kahwin, terpaksa ke da, ke daerah yang berdekatan iaitu Daerah Tampin.

Yang Berhormat Dato' Yang Dipertua, suka saya maklumkan kepada Dewan yang mulia ini, di Kota terdapat beberapa destinasi yang berpotensi dalam sektor pelancongan yang boleh dimajukan ya, dan menjadi tarikan kepada pengunjung-pengunjung dari luar Negeri Sembilan. Antara kawasan yang menjadi tempat berpo, antara kawasan yang menjadi tempat berpotensi sebagai destinasi pelancongan ini ialah Gunung Datuk, Sungai Timun dan juga Lubok Talan. Kawasan-kawasan ini telah tersedia dengan baik malah telah pun menjadi destinasi kunjungan orang ramai. Namun begitu, destinasi-destinasi ini kurang dikenali secara meluas kerana kurangnya promosi yang dijalankan.

Untuk makluman Yang Berhormat Dato' Yang Dipertua, hujung Ogos yang lalu Kerajaan Negeri Sembilan melalui Pejabat Daerah Dan Tanah Rembau telah menganjurkan pertandingan Cabaran Sopit Biru iaitu pertandingan memancing udang galah di salah satu destinasi

pelancongan yang terdapat di Kota iaitu di Sungai Timun. Program ini dihadiri sendiri oleh yang, dan dirasmikan sendiri oleh Yang Amat Berhormat Menteri Besar Negeri Sembilan. Program yang sangat baik pengisiannya dan telah menerima penyertaan serta pengunjung seramai 3,000 hingga ke 4,000 orang. Saya amat berharap program ini dapat dijadikan sebagai program tahunan kerana ianya sebagai salah satu cara kita untuk mempromosikan di samping dapat memberi limpahan ekonomi kepada penduduk setempat.

Terima kasih di atas inisiatif Kerajaan Negeri melalui Pejabat Daerah Dan Tanah Rembau dan juga Lembaga Pelancongan Negeri Sembilan. Namun begitu, Yang Dipertua, diharapkan Kerajaan Negeri dapat meningkatkan lagi fasiliti di sekitar Sungai Timun begitu juga dengan 2 destinasi yang, yang lain iaitu di Gunung Datuk dan juga Lubok Talan.

Dato' Yang Dipertua, ingin juga saya maklumkan juga dalam Dewan yang mulia ini, anak-anak Kota juga ramai yang terlibat dengan pertandingan-pertandingan di peringkat antarabangsa. Antaranya mereka ini tidak diwar-warkan penglibatannya sedangkan mereka sangat berpotensi dan boleh mengharumkan nama negeri dan juga negara. Dalam keadaan serba kekurangan, tempat latihan yang tidak lengkap dan juga kemudahan yang tidak mencukupi, namun penglibatan mereka dalam pertandingan-pertandingan kebang, di peringkat antarabangsa amat membanggakan. Semuanya dengan perbelanjaan sendiri.

Mereka ini adalah anak-anak yang menyertai Kelab Muay Thai yang bertapak di Pekan Kota. Kelab Muay Thai Bullet ini hanya mampu menyediakan atau memberikan latihan kepada anak-anak ini di gelanggang futsal dengan kemudahan yang sangat minimum tetapi Dato' Yang Dipertua, mereka berjaya memperolehi 8 emas, 4 perak dan 5 gangsa di Kejohanan Remaja Dunia dan *Grand Slam* pada tahun 2022 yang lalu. Banyak lagi pertandingan-pertandingan di peringkat kebangsaan dan juga antarabangsa yang telah di, disertai oleh anak-anak ini dengan pencapaian yang sangat membanggakan. Mereka ini perlu diberikan perhatian yang sewajarnya agar atlet-atlet yang berpotensi ini tidak diambil oleh negeri lain dan kemudiannya akan merugikan Negeri Sembilan.

Saya mohon Dato' Yang Dipertua, agar Kerajaan Negeri melalui agensi-agensi yang berkaitan dapat membina sebuah pusat latihan yang lengkap dan setaraf dengan pencapaian yang telah mereka perolehi. Jika pusat latihan ini dapat diberi perhatian untuk direalisasikan, Kelab ini juga akan dapat menganjurkan pertandingan-pertandingan peringkat kebangsaan atau dunia di mana akan dapat menarik penglibatan

peserta-peserta dari dalam dan juga luar negara. Ini secara tidak langsung akan membantu menjana ekonomi Kota khususnya.

Walau bagaimana pun Dato' Yang Dipertua, pembinaan fasiliti-fasiliti yang saya sebutkan tadi juga perlulah dibina bersama dengan fasiliti-fasiliti lain yang menyokong pembinaannya. Sebagai contoh, penyediaan tempat-tempat penginapan, premis-premis perniagaan dan juga keceriaan Pekan Kota itu sendiri perlu ditingkatkan lagi. Kota perlu diberi nafas baru oleh Kerajaan Negeri agar kawasan-kawasan yang berpotensi di Kota ini dapat dibangunkan dan secara tidak langsung dapat membantu meningkatkan ekonomi penduduk.

Dato' Yang Dipertua, semua yang sebutkan tadi telah saya kenal pasti lokasi yang sesuai untuk pembinaannya. Semua apa yang saya sebutkan ini, ini adalah harapan penduduk Kota. Semoga ada berita baik dari Kerajaan Negeri untuk penduduk Kota nanti. *insyaAllah*.

Yang Berhormat Dato' Yang Dipertua, seperti, sepertimana yang dititahkan oleh Ke Bawah Duli Yang Maha Mulia Yang di-Pertuan Besar, Baginda mahu melihat negeri ini menjadi sebuah negeri yang berpendapatan tinggi. Oleh yang demikian, saya yakin dan percaya jika kita semua yang berada di dalam Dewan ini, yang telah diberikan mandat oleh rakyat di kawasan masing-masing, berusaha dengan gigih untuk meningkatkan taraf hidup dan juga pendapatan rakyat, hasrat Tuanku supaya Negeri Sembilan menjadi negeri yang berpendapatan tinggi akan dapat direalisasikan.

Yang Berhormat Dato' Yang Dipertua, akhir sekali, saya mengambil kesempatan ini untuk mengucapkan jutaan terima kasih kepada warga Kota kerana telah memberi mandat kepada saya untuk mewakili mereka di dalam Dewan yang mulia ini. Saya akan sedaya upaya saya berusaha untuk memperjuangkan hak dan keperluan warga Kota secara keseluruhannya. Dengan itu, Yang Berhormat Dato' Yang Dipertua, saya mohon menyokong. Sekian, terima kasih.

**YB Yang Dipertua Dewan:** Terima kasih. Dijemput YB Serting.

**YB ADUN Serting:** *Assalamualaikum* dan juga selamat sejahtera. *Alhamdulillah wassalatuwassala muala rasulullah allahummas soli'ala Muhammad wa'ala alihi wasohbihi wabarik wasalim*. Terima kasih saya ucapkan kepada Dato' Yang Dipertua Dewan Undangan Negeri di atas kesempatan yang diberikan kepada saya untuk turut bersama membahaskan usul titah ucapan Duli Yang Maha Mulia Yang di-Pertuan Besar Negeri Sembilan; Tuanku Muhriz ibni Almarhum Tuanku Munawir. Saya nak jawab pantunlah Dato'.

Muhammad Fairuz nama diberi,  
ADUN Sering penggal ini,  
Membawa suara tak kira parti,  
Itulah asas pegangan diri.

Dato' Yang Dipertua, saya juga ingin mengucapkan terima kasih kepada pengundi-pengundi di DUN Serting kerana memberikan saya mandat sebagai wakil rakyat di DUN Serting pada PRN Kali Ke-15 baru-baru ini. Sesungguhnya saya bukanlah yang terbaik di kalangan yang baik. Namun *insyaAllah* saya akan cuba sedaya upaya yang ada untuk menunaikan tanggungjawab ini dengan baik kepada rakyat khususnya di DUN Serting tanpa memilih latar belakang politik, bangsa dan juga agama. Seterusnya saya ingin merakamkan syabas dan tahniah kepada ahli-ahli Yang Berhormat yang telah dilantik di dalam PRN baru-baru ini. Syabas dan tahniah juga saya ucapkan kepada Yang Amat Berhormat Sikamat selaku Menteri Besar Negeri Sembilan yang telah dilantik untuk penggal seterusnya. Semoga mandat yang diberikan ini dapat dilaksanakan dengan penuh tanggungjawab dan keikhlasan serta dedikasi. Sesungguhnya amanah kepimpinan ini bukan satu *tasyrifan* ataupun kemuliaan, bahkan ianya adalah satu *taklifan* iaitu tanggungjawab yang mesti dilaksanakan. Sabda Nabi Muhammad SAW, dengan izin, *kullukum ra'in wa kullukum mas'ulun an ra'iyyatihi*. Setiap kalian adalah pemimpin dan tiap-tiap pemimpin akan diminta untuk dipertanggungjawabkan. Sesungguhnya, amanah adalah satu yang berat, yang akan diperhitungkan oleh Allah SWT nanti di akhirat. Segala kerja buat kita ada perhitungan pahala dan dosa, termasuklah hal kepimpinan ini. Oleh kerana beratnya tanggungjawab ini, maka saya berazam untuk buat yang terbaik sekadar kemampuan yang ada bagi rakyat di, bagi rakyat di DUN Serting khususnya dan di Negeri Sembilan amnya. Semoga Allah SWT memberi taufik dan hidayahNya kepada kita ahli-ahli Yang Berhormat untuk melakukan kerja kita semua, *insyaAllah*.

Yang Berhormat Dato' Yang Dipertua, saya ingin menarik perhatian sidang Dewan yang mulia ini akan titah Duli Yang Maha Mulia Tuanku mengenai agenda mengutamakan hal rakyat kepada seluruh wakil rakyat di dalam Dewan yang mulia ini. Umum mengetahui bahawa ada di kalangan kita, wakil rakyat yang berada dalam Dewan ini, senior sepertimana saya, iaitu orang baru. Begitu jugak ada yang telah berada 2, 3 bahkan melebihi 5 penggal. Tahniah saya ucapkan kerana tuan-tuan Yang Berhormat adalah mereka yang dipilih dan disukai oleh rakyat kerana dah dapat memenuhi tanggungjawab.

Suasana yang berlaku pada hari ini, dengan kemerosotan ekonomi, rakyat yang semakin tersepit akibat daripada krisis sumber makanan

asas yang kurang dan melambung naik harga, ditambah pula dengan sumber pendapatan rakyat yang tidak menentu. Saban hari saya secara peribadi didatangi oleh rakyat ke pusat khidmat inginkan makanan, inginkan duit dan juga inginkan keperluan harian. Dan ada jugak yang mengadu tentang masalah rumah tanggo, tak dapek den nak jawab doh. Namun sekadar yang termampu, dapat disalurkan kepada yang mengharap. Selebihnya apa yang boleh diberikan dengan memberikan borang mohon sumbangan. Contohnya daripada JKM, MAINS, FELDA ataupun agensi-agensi tertentu yang mana boleh kita katakan sebagai sokongan. Harapan saya, sokongan daripada wakil rakyat pembangkang kepada rakyat yang mohon bantuan dapatlah diterima oleh semua agensi kerajaan tanpa ada diskriminasi sedikit pun termasuklah di peringkat Yang Amat Berhormat Sikamat selaku Menteri Besar Negeri Sembilan.

Oleh kerana agenda khidmat kepada rakyat ini adalah satu agenda besar kepada seluruh ahli-ahli Yang Berhormat di kawasan masing-masing, sekali lagi Serting ingin menyuarakan bersama sahabat-sahabat ADUN pembangkang yang lain agar peruntukan ADUN dapat disalurkan secara saksama, sama ada kepada ahli Yang Berhormat kerajaan mahupun pembangkang. Jika dilihat, negeri-negeri yang diperintah oleh Kerajaan Perikatan Nasional, wakil rakyat pembangkang tetap diutamakan oleh kerajaan iaitu mendapat peruntukan untuk berkhidmat kepada rakyat. Negeri Sembilan tak ramai pembangkang Dato' Yang Dipertua, baru 5 orang. Apalah sangat dengan kami berlima ini untuk diberikan peruntukan.

Yang Berhormat Dato' Yang Dipertua dan ahli-ahli Berhormat sidang Dewan, menjunjung titah Duli Yang Maha Mulia Tuanku berkaitan khidmat dan kesejahteraan rakyat. Serting ingin memberi beberapa maklum balas berkenaan permasalahan yang kelap ber, yang kerap berlaku di Serting. Berkenaan isu permasalahan air yang kerap terputus bekalan dan ada tempat-tempat tertentu tekanan air yang sangat rondah. Kebanyakan penghuni di DUN Serting adalah kampung tradisi serta kawasan felda. Ada rumah yang tiada tangki air. Dan ada yang mempunyai tangki tapi kurang baik dan kecil. Antara kampung tradisi yang terlibat contohnya; Serting Hilir dan beberapa tempat di Felda Raja Alias. Baru-baru ini, terjadi musibah kepada pekerja FGV Felda yang menghuni rumah felda lama, rumahnya hangus terbakar walaupun peringkat awal dikatakan apinya kocik, ataupun kecil yang boleh kita padamkan, tetapi disebabkan tekanan air yang rondah, mereka tidak memadamkan kebakaran tersebut. Sering kali juga terjadi paip pecah di tepi-tepi jalan bahkan sudah menjadi lumrah di Serting. Saya mohon kepada SAINS agar dapat usahakan menggantikan paip-paip yang lama kepada baharu, semoga manfaat dapat dirasai oleh semua rakyat di sana.

Tuan Yang Dipertua, saya juga ingin membawa suara dari penduduk kampung dan juga felda dalam DUN Serting mengenai isu tong sampah serta sistem kutipan yang, yang lebih teratur. Saya berterima kasih kepada *response* yang diberikan iaitu daripada Yang Amat Berhormat kepada soalan-soalan yang diajukan, antaranya Labu sebelum ini. Perkara yang sama saya rasakan berlaku jugak di peringkat Serting iaitu memohon tong sampah. Begitu jugak saya mengucapkan terima kasih kepada yang, Yang Amat Berhormat yang telah *response* akan soalan tentang lampu yang tiada di jalan-jalan utama khususnya Serting. Dan saya mengucapkan terima kasih.

Tuan Yang Dipertua, Serting memohon supaya dipertimbangkan supaya Serting boleh dijadikan hab pendidikan dengan ditambah lagi daripada sudah ada sekarang ini kepada lebih lagi. Untuk makluman Dewan yang mulia, di kawasan DUN Serting sekarang ini adanya sebuah MRSM, sebuah sekolah menengah agama iaitu Sekolah Menengah Agama Dato' Mustafa, 4 buah tahfiz swasta, 8 buah sekolah rendah, 4 buah sekolah menengah, 2 buah sekolah jenis kebangsaan dan 1 buah kolej komuniti. Oleh yang demikian, besarlah harapan saya agar Serting menjadi hab pendidikan dengan diwujudkan pusat pengajian tinggi seperti wujudnya UiTM di Kuala Pilah dan juga di Rembau. Sebagai contoh, bagi tujuan hab pendidikan yang dicadangkan, di samping dapat mengembangkan sosio ekonomi Bandar Seri Jempol dan masyarakat tempatan. Di samping itu juga, saya mencadangkan agar diwujudkan sekolah aliran tahfiz ataupun TVET tahfiz di Serting sebagai rangsangan kepada anak-anak tempatan menghafaz Al Quran di samping mereka juga berkemahiran sepertimana yang telah ada di MRSM, Jasin Melaka.

Saya menyokong akan usul yang telah disebut oleh Seri Menanti tadi untuk memperbanyakkan sekolah-sekolah tahfiz kerajaan, kerana sekolah tahfiz kebanyakan yang ada di Negeri Sembilan ini yang dibuat ataupun ditubuhkan oleh persendirian ataupun swasta. Mudah-mudahan, *insyaAllah* kita berharap agar Negeri Sembilan ini akan menjadi lebih baik daripada masa-masa yang datang. Dan apa yang Serting ingin cadangkan adalah hab pendidikan itu berada di Serting.

Tuan Yang Dipertua, sebagai penutup, saya berpesan kepada diri saya dan semua ahli Berhormat akan satu kata-kata, dengan izin, *annasualadin mulukihim*; manusia mengikut akan cara hidup pemimpin mereka. Semestinya kita selaku pemimpin hendaklah menjadi *role model*, dengan izin, kepada rakyat yang menjadi pengikut kita agar kebaikan melekat di hati mereka dan menjadi ikutan. Oleh kerana saya mulakan dengan pantun, nak tutup jugak dengan pantun. Dato' Yang Dipertua tak boli lagi, tak

Buah cempedak sedap rasanya,  
Makan dengan buah dokong,  
Berakhir sudah ucapan saya,  
Titah Diraja saya pohon menyokong.

Dengan ini saya Serting menerima dan menyokong penuh usul titah ucapan Duli Yang Maha Mulia Yang di-Pertuan Besar Negeri Sembilan yang dibawa oleh YB Johol. *Qulu qauli haza astaghfirullah*, mohon ampun dan maaf, *assalamualaikum WBT*.

**YB Yang Dipertua Dewan:** *Walaikumsalam WBT*. Terima kasih YB. Lepas ni kena beli buku pantunlah. Hari ni banyak pantun. Boleh, Chembong dah sedia? Boleh? Sila, YB Chembong.

**YB ADUN Chembong:** *Bismillahirrahmanirrahim*. Segala puji kepada Allah; Tuhan sekalian alam, selawat dan salam kita ke atas junjungan besar Nabi Muhammad SAW, serta seluruh ahli keluarga dan sahabat handai Baginda. Terima kasih Dato' Yang Dipertua, panggil Chombong untuk turut sama membahaskan usul menjunjung kasih Titah DiRaja semasa Baginda merasmikan persidangan kita pada Isnin lepas.

Pertama-tamanya Dato' Yang Dipertua, saya nak rakamkan ucapan setinggi-tinggi tahniah, syabas kepada Dato' Yang Dipertua, di atas lantikan *Speaker* Undangan Negeri penggal ke-15 ni Dato' Yang Dipertua. Dato' Yang Dipertua, pada pengamatan saya memang seorang yang hebat. Saya Dato' *Speaker*, bertanding, kempen 2 minggu, siang malam, menang besar dengan majoriti yang baik, Dato' *Speaker*. Tapi tak dapat jadi apa. Dato' *Speaker* tak bertanding pun dapat jadi *Speaker*. Hebat Dato' *Speaker* .....

**YB Yang Dipertua Dewan:** Itu namanya dia rezeki.

**YB ADUN Chembong:** Dato' *Speaker* tahniah.

**YB Yang Dipertua Dewan:** Itu namanya dia rezeki.

**YB ADUN Chembong:** Ya betul.

**YB Yang Dipertua Dewan:** Masih 10 minit jugak.

**YB ADUN Chembong:** Dato' *Speaker*, satu lagi perkara yang Dato' *Speaker* ambil maklum, saya adalah merupakan satu-satunya ahli Yang Berhormat dicalonkan sebagai *Speaker*, tempoh hari Dato' *Speaker*. Terima kasih kepada ADUN Paroi di atas cadangan, terima kasih kepada ADUN Labu yang menyokong. Kalau bukanlah Dato' *Speaker* calon yang

bersaing dengan saya, mungkin lain pertimbangannya Dato' *Speaker*.  
Jadi .....

**YB Yang Dipertua Dewan:** Dah tinggal 9 minit.

**YB ADUN Chembong:** Jadi jangan samakan saya 10 minit dengan orang lain Dato' *Speaker*. Satu perkara je Dato' *Speaker*, untuk kepentingan Dewan, untuk kesejahteraan Dewan, Dato' *Speaker*, sukacita saya nak mencadangkan peranan Dato' *Speaker* ini amat penting. Betul? Dato' *Speaker*. Jadi keberadaan, kesediaan Dato' *Speaker* dalam Dewan ini amat penting. Saya risau-risaukan Dato' *Speaker* sekiranya Dato' *Speaker* ada hal yang lain. Saya mohon maaf, ada kalanya saya keluar Dato' *Speaker*, untuk ke bilik air, menghirup air dan sebagainya Dato' *Speaker*. Dato' *Speaker* tak boleh, Dato' *Speaker*. Jadi saya mencadangkan agar Timbalan *Speaker* dilantik sesegera mungkin Dato' *Speaker*. Betul? Kita semua tidak mahu kerana masalah ke, ada apa-apa hal yang, terhadap Dato' *Speaker* besok, terpaksa Dewan ditangguhkan Dato' *Speaker*. Jadi Dato' *Speaker*, saya mencadangkan Timbalan *Speaker* dilantik sesegera mungkin.

Dato' *Speaker*, saya berterima kasih, mengucapkan tahniah juga kepada semua di antara kita dapat menubuhkan Kerajaan Perpaduan di Negeri Sembilan ini Dato' *Speaker*. Kalau dulu di zaman era Barisan Nasional, Kerajaan Negeri kita hebat, masa di bawah era Kerajaan PH pun baik. Rakyat, masyarakat mendambakan Kerajaan BN yang hebat dulu dicampur dengan PH yang baik ni, seharusnya jauh lebih hebat, Dato' *Speaker*. Rakyat memerhatikan kita sekarang Dato' *Speaker*. Jadi, saya nampak keserasian, kesepaduan yang baik. Menteri Besar daripada PH, Exco Kanan daripada BN.

**YB ADUN Seremban Jaya:** BN.

**YB ADUN Chembong:** BN.

**YB ADUN Seremban Jaya:** BN.

**YB ADUN Chembong:** Dan saya, Dato' *Speaker*, saya mencadangkan kalaulah *Speaker*-nya dari PH untuk merealisasikan kesepaduan, kepadanan ini Dato' *Speaker*, *Speaker*-nya daripada PH, Timbalan-nya daripada BN, Dato' *Speaker*. Itu cadangan sayalah Dato' *Speaker*, ya.

**YB ADUN Jeram Padang:** Sokong, sokong.

**YB ADUN Chembong:** Ya, terima kasih Dato' *Speaker*. Ya. Dato' *Speaker*, itu cadangan Dato' *Speaker*, sebab rakyat memerhatikan kesepaduan,

keserasian Kerajaan Perpaduan ini, Dato' *Speaker*. Dato' *Speaker*, kita telah melalui satu proses demokrasi yang sangat baik bulan Ogos lepas Dato' *Speaker*. Saya nak ambil kesempatan untuk mengucapkan setinggi-tinggi penghargaan, tahniah, syabas kepada semua pihak, agensi yang telah menjalankan proses ini dengan baik terutamanya pihak SPR dan mana-mana pihak, jabatan-jabatan kerajaan, penjawat-penjawat awam yang sama-sama memastikan perjalanan proses demokrasi ini berjalan baik Dato' *Speaker*.

Di kawasan saya, proses pilihan rayanya, Dewan Undangan Negeri Chembong di, di apa, diurusetikan oleh Pejabat Pendidikan Daerah Rembau. Saya ucapkan tahniah, berjalan dengan sangat baik Dato' *Speaker*. Saya ucapkan terima kasih banyak kepada semua pihak, pasukan penguatkuasaan, pihak Polis, RELA, Angkatan Perkhidmatan Awam dan sebagainya Dato' *Speaker*. Dato' *Speaker*, sehubungan dengan itu jugak, saya nak cadangkan kepada pihak SPR agar dapat mungkin mengadakan perbincangan, *postmortem* dan sebagainya, ada aspek-aspek, sudut-sudut yang mungkin boleh ditambahbaikkan untuk proses pelaksanaan pilihan raya ni Dato' *Speaker*. Sebagai contoh, di Dewan Undangan Negeri Chembong, mungkin perlu dilihat semula, ada kawasan-kawasan daerah mengundi yang perlu ditambah tempat mengundinya Dato' *Speaker*. Contohnya di Pusat Daerah Mengundi Chembong yang mempunyai pengundi lebih daripada 4,000. Yang kini hanya ada satu sekolah, satu tempat mengundi. Untuk kelancaran yang lebih, mungkin boleh ditambah lagi satu sekolah, Dato' *Speaker*. Itu satu.

Nombor 2 nya Dato' *Speaker*, dari satu sudut lain jugak, mungkin boleh dilihat semula, disemak semula lokaliti-lokaliti yang tidak lagi relevan dengan pilihan raya – pilihan raya sebelum ini Dato' *Speaker*. Contohnya, pengundi-pengundi di Kampung Seberang Batu Hampar, di kampung tersebut ada tempat mengundi tetapi mereka terpaksa pergi ke Pekan Rembau melangkaui tempat mengundi yang ada di kampung mereka Dato' *Speaker*. Dan saya yakin ini terjadi di kawasan-kawasan yang lain jugak Dato' *Speaker*. Jadi, saya mohon pihak SPR, kalau boleh datang, turun berbincang dengan pihak-pihak parti, berbincang dengan wakil-wakil rakyat untuk kita melihat bagaimana kita boleh tambah baikkan perkara-perkara ini Dato' *Speaker*.

Dato' *Speaker*, isu-isu hangat di pasaran, di kalangan masyarakat netizen sekarang Dato' *Speaker*, antaranya adalah isu kekurangan beras jugak dan diikuti oleh makanan-makanan ruji yang lain, makanan-makanan asas, keperluan asas yang lain Dato' *Speaker*. Jadi saya ingin bertanya dan mohon untuk Kerajaan Negeri, apakah langkah-langkah, tindakan jangka masa pendek, jangka masa panjang, sederhana panjang untuk mengatasi masalah ni Dato' *Speaker*. Pada masa yang sama, saya nak

ucapkan terima kasih banyak kepada jabatan-jabatan yang tertentu, yang terbabit. Contohnya Jabatan Pertanian, FAMA di bawahnya Dato' *Speaker*, minggu lepas mengadakan jualan prihatin Negeri Sembilan, selain daripada membawa, membekalkan beras yang banyak, tetapi jugak dengan bahan-bahan yang lain. Terima kasih Dato' *Speaker*. Cumanya ucapan terima kasih saya ni haruslah disambut dengan perbanyakkan, kerapkan lagi program-program yang sangat dinanti-nanti, diharapkan oleh masyarakat ni Dato' *Speaker*.

Keduanya, masalah yang saya rasa bukan sahaja di kawasan Dewan Undangan Negeri Chembong, adalah masalah yang mungkin kita anggap yang biasa, tetapi ianya makin lama makin mencengkam, menghantui masyarakat Dato' *Speaker*, iaitu masalah haiwan perosak tanaman. Kogho, beghuk, babi dan sebagainya Dato' *Speaker*. Saya belum lihat lagilah, ataupun dalam erti kata lain, saya mohon agar Kerajaan Negeri boleh melihat, mempertimbangkan, mungkin untuk membentuk satu jawatankuasa khas, pasukan khas, pasukan yang kuat berkesan untuk menangani perkara ini Dato' *Speaker*. Bukan sekadar dia merosakkan hasil-hasil tanaman orang kampung, membuatkan orang kampung tak boleh nak mengharap hasil tanaman mereka lagi Dato' *Speaker*, tetapi pada masa sama ianya telah merupakan satu ancaman kepada keselamatan penduduk, Dato' *Speaker*. Beruk-beruk, monyet-monyet tu, *Speaker*, dah sampai masuk ke dalam rumah. Dan ada satu kejadian di kawasan saya Dato' *Speaker*, ada orang kampung yang cedera parah diserang dan dcederakan oleh haiwan-haiwan seumpamanya Dato' *Speaker*. Jadi saya mencadangkan pihak Kerajaan Negeri mungkin boleh tubuhkan pasukan, mungkin boleh diketuai oleh PERHILITAN dan dianggotai oleh pasukan-pasukan yang lain, Polis, RELA dan sebagainya Dato' *Speaker*. Saya mohon penca, mencadang perkara yang sangat penting ini Dato' *Speaker*.

Seterusnya Dato' *Speaker*, sekadar nak berkongsi bahawasanya pelaburan bagi tujuan membangunkan infrastruktur dan jugak kemudahan asas adalah merupakan satu elemen yang sangat penting bagi pertumbuhan ekonomi jangka masa panjang selain daripada mempertingkatkan kualiti hidup rakyat Dato' *Speaker*. Sehubungan dengan tu, saya nak ucapkan terima kasih banyak kepada Kementerian Kemajuan Desa Dan Wilayah, ataupun dulunya kemajuan, Kementerian Pembangunan Luar Bandar, di atas pelaksanaan projek jalan baru di antara Ulu Sepri, Rembau ke Seri Menanti, Dato' *Speaker*. Saya yakin projek jalan ini, yang dilaksanakan oleh JKR, akan dapat dilaksanakan dengan baik, tepat masanya Dato' *Speaker*. Namun dalam konteks yang sama, saya mohon kiranya Dato' *Speaker*, kalau pihak Kerajaan Negeri, JKR, UPEN dan sebagainya dapat *explore* ataupun apa tu, menerokai keperluan untuk kita melihat kewajaran membina satu jalan baru Dato' *Speaker*.

*Speaker*, di antara Kampung Kundur Hilir ke Linggi. Iaitu kalau Jalan Negeri-nya tak salah saya N114, kalau tak salah sayalah ya, melalui Bukit Kunit, Dato' *Speaker*. Dan ini sudah pastinya akan merencanakan lagi sosio ekonomi kawasan di Rembau dan jugak kawasan sebelah, Port Dickson. Saya yakin, saya percaya ADUN Linggi pun setuju, Dato' *Speaker*.

Dato' *Speaker*, tolong jangan *on*-kan *speaker* tu, Dato' *Speaker*.

**YB Yang Dipertua Dewan:** Dah lebih dah.

**YB ADUN Chembong:** Dato' *Speaker*, ini untuk kepentingan rakyat, satu, betul. Dato' *Speaker*.

**YB Yang Dipertua Dewan:** Satu saja.

**YB ADUN Chembong:** Dato' *Speaker*, ADUN Rantau mintak saya gunakan masa dia, Dato' *Speaker*.

**YB Yang Dipertua Dewan:** Dia mintak, dia mesti mintak daripada Yang Dipertua.

**YB ADUN Chembong:** Ya. Dato' *Speaker*, ya, Dato' *Speaker*, saya nak membangkitkan dalam Dewan yang mulia ini, masalah-masalah lama yang masih lagi belum diberikan perhatian yang sebaiknya, Dato' *Speaker*. Kerajaan dah bertukar dah ni. Dulu Kerajaan BN, tukar PH, sekarang Perpaduan, Dato' *Speaker*. Menteri Besar ya belum tukar, *Speaker* pun dah bertukar, Dato' *Speaker* ya. Dato' SS pun dah bertukar Dato' *Speaker*.

Saya nak menyebut hal-hal pentadbiran, hal-hal di, di Majlis Daerah Rembau, Dato' *Speaker*. Exco, Exco Kerajaan Perumahan Kerajaan Tempatan pun dah bertukar sekarang ni, betul kan? Kepada Nilai, Dato' *Speaker*. Dato' *Speaker*, perkara senang tapi penting, Dato' *Speaker*. Saya mohon, saya cadangkan dah 2, 3 kali Dato' *Speaker*, pindahkan semula tapak pasar tani di bersebelahan Balai Polis Rembau ke tapak asalnya dulu, di Pekan Rembau, Dato' *Speaker*. FAMA setuju, pengusaha sangat mendambakan, wakil rakyat pun setuju, lagi apa ni, Dato' *Speaker*. Tu satu Dato' *Speaker*.

Keduanya, haa ni perkara penting. Dulu, Exco Perumahan Dan Kerajaan Tempatan dah janji dengan saya untuk lihat, sekarang saya mintak Exco baru pulak. Dato' *Speaker*, polisi menyewakan gerai-gerai Majlis Daerah Rembau dalam Daerah Rembau berasaskan tender. Siapa tender tinggi, dapat. Saya rasa ini bukannya satu dasar yang mesra rakyat, Dato'

*Speaker.* Kita membina kemudahan-kemudahan ini bukan berasaskan untuk tujuan untung dan rugi. Buat satu had bayaran yang minimal, yang ter, te, tetap, Dato' *Speaker.* Saya mohon dikaji semulalah. Yang herannya pulak, Majlis Daerah lain, okey. Majlis Daerah Rembau yang gunakan sistem ni Dato' *Speaker.* Saya mohon sangat Dato' *Speaker,* kalau dululah saya sebagai pembangkang, tak didengar suara saya, sekarang ni, saya adalah sebahagian daripada kerajaan. Jangan pandang-pandang. Dato' *Speaker,* saya mohon ini Dato' *Speaker,* ya. Bukan untuk saya Dato' *Speaker,* untuk, Dato' *Speaker* jangan tekan dulu.

**YB Yang Dipertua Dewan:** Dah, dah.

**YB ADUN Chembong:** Ada 1, 2 je lagi Dato' *Speaker,* jangan risau .....

**YB Yang Dipertua Dewan:** Satu saja, satu saja.

**YB ADUN Chembong:** Eh, Dato' *Speaker,* semuanya hal rakyat Dato' *Speaker* .....

**YB Yang Dipertua Dewan:** Semua hal rakyat di sini.

**YB ADUN Chembong:** Dato' *Speaker,* saya ingin menyebut tentang hal kemudahan prasarana pendidikan Dato' *Speaker.* Pun saya dah sebut dulu, tentang pra sekolah. Tabika Perpaduan di Taman Pedas Perdana, daripada penggal lepas saya sebut, tak buat-buat lagi Dato' *Speaker,* dengar-dengarnya peruntukan dah ada. *Speaker* tolong, saya pihak Kerajaan Negeri. Keduanya tentang Tabika KEMAS Mampong, Dato' *Speaker,* saya dimaklumkan ditutup oleh kerana tabika tersebut yang sebelum ini menggunakan balai raya, keadaannya tidak begitu baik, perlu dibaik pulih. Sekarang ni anak-anak di Tabika Mampong tersebut terpaksa ditumpangkan di kampung bersebelahan yang agak jauh. Atuk, uwan, ayah, ibu yang menghantar anak cucu mereka terpaksa menghantar ke kampung sebelah yang jauh Dato' *Speaker.* Saya mohon agar Tabika Kampung Mampong ini dibaik pulih semula, Dato' *Speaker,* mudah aja, ya. Saya yakinlah dengan sentuhan sedikit daripada Yang Amat Berhormat Sikamat, selesai ni, Dato' *Speaker* ya.

Dato' *Speaker,* tentang kemudahan pendidikan ni jugak Dato' *Speaker,* iaitu kebakaran satu blok asrama Sekolah Menengah Agama Haji Hassan Sail, Dato' *Speaker.* Terbakar dah setahun lebih dah. Yang Amat Berhormat Perdana Menteri dah turun, Yang Amat Berhormat Menteri Besar pun turun, terima kasih. Sekadar saya mohon untuk dipercepatkan proses baik pulih ni, Dato' *Speaker.* Itu saja, Dato' *Speaker,* boleh, ini tentang semua dah.

Dan akhirnya sekali Dato' *Speaker*, satu *last*, Dato' *Speaker*, janganlah camtu, Dato' *Speaker* ya. Dato' *Speaker*, ini tentang kita berada di hujung tahun yang sudah mestinya kerajaan sedang sibuk untuk menyediakan bajet, Dato' *Speaker*, bajet. Saya nak cadangkan, Dato' *Speaker*, bukan, bukan untuk tambahan elaun *Speaker* dan wakil rakyat, itu lain kali Dato' *Speaker*, ini lain. Dato' *Speaker*, saya ingin mencadangkan, sebab salah satu aspek penting tentang kehebatan, kemajuan pencapaian yang baik negeri kita adalah berasaskan, disebabkan penjawat-penjawat yang kita melakukan tugas tanggungjawab mereka dengan penuh komited dan berjaya, Dato' *Speaker*. Jadi, saya nak cadangkan kalau tahun sebelum ini, bonus mereka sebulan setengah, apalah kiranya tahun ini kita bagi lebih Dato' *Speaker*, sikit. 2 bulan Dato' *Speaker*, ya, Dato' *Speaker*, boleh? Sebab saya tengok dalam titah ucapan DiRaja ni itu hari, tempoh hari Dato' *Speaker*, tahun lepas kita anggarkan kita punya belanjawan defisit, tapi akhirnya sudah tukar jadi *surplus*, Dato' *Speaker*. Saya cadangkan 2 bulan, Dato' *Speaker*.

Dan keduanya tentang bonus ni, Yang Amat Berhormat Menteri Besar. Saya cadangkan, ada jugak penjawat-penjawat awam daripada *federal*, dari *federal* yang bertugas sama-sama membantu menaikkan, memajukan negeri kita tetapi, Dato' *Speaker*, kita tambahlah dia sebab *federal* dapat sikit Dato' *Speaker*. Rakan sebelah dia, semeja, sebelah meja sebelah dia, *state*, dapat lebih. Dia duduk satu bumbung, satu jabatan dapat kurang disebabkan dia *federal* punya, *government* punya pegawai, Dato' *Speaker*. Saya cadangkan untuk mereka-mereka ini, kita tambahlah agar mereka dapat jumlah yang sama Dato' *Speaker*. Mohon mencadang.

Dan 2, satu lagi, Dato' *Speaker*, tentang bajet jugak, saya mohon untuk Kerajaan Negeri memberikan perhatian untuk peruntukan di dalam belanjawan besok nanti, kepada persatuan-persatuan belia ni, khususnya Majlis-Majlis Belia, Dato' *Speaker*. Majlis Belia Negeri bagilah sikit, Majlis Belia di peringkat-peringkat daerah-daerah, Dato' *Speaker*, saya yakin Exco Belia daripada Palong pun akan menyokong.

Dan tentang bajet ini, akhirnya Dato' *Speaker*, saya nak sebut ada masalah kerap berlaku tentang hal-hal bencana Dato' *Speaker*. Orang kampung, rakyat yang memerlukan, di rumahnya ditiup angin ribut, Dato' *Speaker*. Proses permohonan untuk baik pulihnya ada, tetapi agak lambat, panjang, Dato' *Speaker*. Saya mohon mencadang, apalah kiranya untuk diwujudkan Tabung Amanah Bencana Peringkat Daerah, Dato' *Speaker*. Kerajaan Negeri peruntukkan sebilangan, sebahagian, tak banyak, mungkin 300 – 400 ribu mungkin, ke peringkat daerah, jadi untuk kerja-kerja baik pulih yang kecil, kita hadkan, contohnya di bawah 5,000.00 Dato' *Speaker*, kita berikan, turunkan kuasanya kepada

peringkat daerah. Jadi Pegawai Daerah, DO tak perlulah mengambil langkah yang panjang, untuk buat permohonan ke peringkat Negeri, Dato' *Speaker*. Jadi orang kampung ni pun setuju, orang kampung pun riang Dato' *Speaker*, dan kita dapat mempercepatkan proses baik pulih ni Dato' *Speaker*.

Jadi, itu saja yang saya nak sampaikan untuk kali ini Dato' *Speaker*. saya sekali lagi nak mengucapkan sebab ramai orang Chembong tengok *live* ni Dato' *Speaker*. Saya nak ucapkan terima kasih banyak kepada semua pengundi-pengundi Dewan Undangan Negeri Chembong. Sama ada yang mengundi ataupun tak mengundi Dato' *Speaker*. Yang belum dapat mengundi pun terima kasih di atas doa dan sokongan. Yang saya nak nyatakan Dato' *Speaker*, *insyaAllah* saya akan terus memperjuang membela nasib-nasib sedara-sedara tuan-tuan di Dewan Undangan Negeri Chembong, Dato' *Speaker*. Terima kasih banyak, *wabillahitaufik walhidayah, assalamualaikum WBT*.

**YB Yang Dipertua Dewan:** Terima kasih. Saya jemput Chuah, YB Chuah. 10 minit ya. Bukan macam tadi ya.

**YB ADUN Chuah:** Okey, boleh, boleh. Salam sejahtera, salam perpaduan. Terima kasih Dato' Yang Dipertua kerana memberi peluang kepada saya berbahas dalam usul menjunjung kasih titah Duli Yang Maha Mulia Yang di-Pertuan Besar Negeri Sembilan. Terlebih dahulu saya mengu, mengambil kesempatan mengucapkan tahniah kepada Dato' Yang Dipertua yang telah dilantik sebagai Yang Dipertua Dewan Undangan Negeri Sembilan dan juga tahniah kepada Yang Amat Berhormat Sikamat yang telah dilantik sebagai Menteri Besar untuk men, terus mengetuai kepimpinan Kerajaan Negeri Sembilan. Tahniah juga ucapkan kepada ahli-ahli Exco dan juga ahli-ahli Yang Berhormat yang telah menang dalam PRN pada Ogos yang le, lalu.

Dato' Yang Dipertua, saya ingin ucapkan terima kasih kepada Kerajaan Negeri kerana dalam 5 tahun yang lalu, banyak pembangunan telah dibuat di kawasan Chuah. Banyak kemudahan telah dinaik taraf. Namun, masih ada lagi yang perlu diberi perhatian. Sebagai contoh, parit monsun di Jalan Bukit Pelandok. Parit tanah tersebut telah sekian lama terhakis sehingga tebingnya telah runtuh dan permukaan, permukaan Jalan Bukit Pelandok tersebut telah mula retak. Dan penduduk sekarang sedang risau jalan tersebut akan runtuh dan akan bawa kesan kepada kedai di sebelah jalan tersebut. Untuk makluman semua, Jalan Bukit Pelandok ini merupakan laluan utama ke sekolah SJK(C) Yik Chiao, Bukit Pelandok. Oleh itu, saya memohon agar jabatan yang berkenaan dapat mengambil tindakan segera demi menjamin keselamatan pengguna

jalan tersebut terutamanya pelajar-pelajar dan ibu bapa – ibu bapa serta guru-guru sekolah tersebut.

Dato' Yang Dipertua, saya dimaklumkan bahawa Kerajaan Negeri telah meluluskan peruntukan untuk membina sebuah dewan serbaguna di Kampung Sawah, di DUN Chuah. Sekali lagi terima kasih daripada Chuah. Penduduk DUN Chuah memang menanti-nantikan projek ini sebab di DUN Chuah memang kekurangan kemudahan sukan. Untuk makluman semua, tapak untuk pembinaan dewan tersebut seluas 6.5 ekar, manakala cadangan dewan serbaguna hanya menggunakan tanah seluas 1 ekar sahaja. Maka saya ingin mencadangkan supaya tapak tersebut dibangunkan sebagai kompleks sukan Chuah yang merangkumi dewan serbaguna, padang bola, gelanggang takraw, gelanggang bola keranjang, peralatan kecergasan, kelengkapan permainan kanak-kanak dan sebagainya. Saya yakin dengan adanya kemudahan ini, sudah tentu aktiviti riadah dan kemasyarakatan dapat terus digalakkan di kalangan warga Chuah.

Dato' Yang Dipertua, semalam, isu perkuburan bukan Islam dibawa oleh Lukut. Tapi untuk makluman semua, isu kekurangan tanah perkuburan bukan Islam bukan sahaja isu di Chuah, di, di, Lukut. Tapi di Chuah adalah satu perkara yang agak serius. Baru-baru ini saya berjumpa dengan pihak pengurusan tanah perkuburan Cina dan pihak pengurusan tanah perkuburan India di Bukit Pelandok, dan saya difahamkan setelah diukur semula tapak perkuburan mereka, didapati kegunaan tanah kedua-dua tapak ke, apa ni, perkuburan tersebut telah memasuki tanah jiran mereka, iaitu tanah hak milik persendirian. Maknanya kubur atas tanah persendirian sudah. So oleh itu, saya ingin nak apa ni, memohonlah supaya Kerajaan Negeri dapat mengenal pasti tapak baru di kawasan Chuah ataupun boleh mengaji, meng, mengkaji kesesuaian untuk membuat pengambilan yang terlibat tersebut menjadi rizab perkuburan bukan Islam untuk kegunaan warga bukit ting, Bukit Pelandok dan kawasan sekitar.

Dato' Yang Dipertua, semalam bila mendengar pemohon, permohonan Yang Berhormat serem, Seremban Jaya, tentang keperluan cawangan bank di kawasan beliau. Baru saya dapati bukan sahaja kawasan saya yang tidak ada kemudahan perbankan. Saya setuju jawapan Yang Amat Berhormat Sikamat di mana pihak swas, syarikat bank komersial akan menimbang keuntungan sebelum mewujudkan cawangan mereka di sesuatu tempat. Tetapi kita perlu ingat juga, kita mempunyai beberapa syarikat perbankan milik kerajaan yang melaksanakan program-program kerajaan dan mendapat peruntukan kerajaan seperti Agro Bank dan Bank Simpanan Nasional yang menguruskan bantuan kewangan Jabatan Kebajikan dan persaraan. Seharusnya mereka

mempunyai tanggungjawab sosial dalam memberi perkhidmatan kepada rakyat terutamanya di kawasan pinggir bandar. Oleh itu, saya menyeru supaya Kerajaan Negeri dapat mengenal pasti DUN-DUN yang masih tiada kemudahan perbankan dan memohon kepada syarikat bank milik kerajaan bagi mewujudkan cawangan mereka di tempat-tempat yang ada keperluan.

So dengan ini, saya menyokong usul menjunjung kasih titah Duli Yang Maha Mulia yang, Yang di-Pertuan Besar yang dibawa oleh ADUN Johol. Sekian, terima kasih.

**YB Yang Dipertua Dewan:** Terima kasih. Dijemput YB Lenggeng.

**YB ADUN Lenggeng:** Terima kasih. [melafazkan bacaan penuh Selawat Tafrijiyah]. Terima kasih Yang Dipertua kerana memberi kesempatan kepada saya untuk menjunjung titah ucapan Duli Yang Maha Mulia Yang di-Pertuan Besar. Terlebih dahulu saya mengucapkan tahniah kepada Yang Dipertua kerana telah terpilih menjadi *Speaker* pada Dewan yang mulia ini. Ingin juga saya ucapkan tahniah kepada Yang Amat Berhormat Dato' Seri Haji Aminuddin Harun kerana telah, sekali lagi telah dipilih menjadi Menteri Besar untuk Negeri Sembilan. Terima kasih juga, dan juga saya ucap tahniah kepada Exco, Exco Kanan, telah bantu bertungkus lumus memastikan penubuhan gabungan Kerajaan Madani adalah pilihan yang terbaik untuk semua rakyat Negeri Sembilan.

Dan di kesempatan saya mengucapkan tahniah juga kepada semua ADUN-ADUN, daripada Pakatan Harapan, daripada Barisan Nasional, daripada Perikatan Nasional kerana telah memenangi pilihan raya yang baru-baru diadakan. Dan tidak lupa saya ucapkan kepada pengundi saya di DUN Lenggeng kerana telah memilih saya menjadi wakil mereka untuk hadir di Dewan yang mulia ini.

*Alhamdulillah*, Yang Dipertua, kita tengah, negara kita sedang mengalami situasi keadaan yang tidak pernah berlaku sebelum ini ya. Dari kecil sehingga dewasa, saya tidak pernah melihat satu situasi di mana rakyat beratur begitu panjang untuk membeli beras ya, yang *viral* baru-baru ini dan masih hangat diperkatakan, hanya semata-mata untuk dapat diskaun beras. Diskaun dalam 5.00 ringgit, 5.00 ringgit ke 10.00 ringgit. Hanya kerana 10.00 ringgit, mereka sanggup beratur hampir 2 jam – 3 jam dan di-*viral*-kan. Mereka melihat kejayaan kepada *organizer* yang membuat. Saya melihat kesedihan melihat rakyat beratur begitu panjang, lama Yang Dipertua, 2 jam. Bayangkan kalau ibu kita yang beratur, bayangkan kalau anak kita beratur, pakcik kita, ayah-ayah kita, keluarga kita yang beratur semata-mata untuk dapatkan beras.

Yang Dipertua, di zaman PKP, di zaman *COVID-19* ya, beras begitu, begitu banyak di pasaran. Beras begitu banyak lambakan. Sampai masa tu kita buat, NGO, kita menghantar beras-beras kepada rumah ke rumah. Satu rumah ada 10 beras. Begitu banyaknya lambakan beras ketika musim *COVID-19*. Kita tidak pernah mendengar masalah beras. Tetapi setelah habis musim *COVID-19*, kita berhadapan dengan kekurangan beras. Jadi, atas kesedihan ini saya melihat bahawa kita, negara kita, negeri kita sama-sama mengalami masalah beras yang begitu run, yang begitu runcing.

Jadi Yang Dipertua, saya melihat ini adalah kerana keadaan ekonomi dunia yang melanda negara kita dan negeri kita. Tetapi kita tidak boleh melihat ini sekadar alasan, jawapan sebagai ADUN-ADUN, sebagai apa, penjawat-penjawat awam. Kita kata ini adalah kerana ekonomi global, kerana ekonomi dunia. Kita kena melihat bagaimana cara kita di, di, Negeri Sembilan ini untuk menyelesaikan masalah ini supaya kita tidak dimalukan oleh negeri-negeri lain. Supaya kita tidak, tidak, tidak menghampakan rakyat-rakyat yang telah mengundi kita.

Jadi Yang Dipertua, kita kena, kita, saya mencadangkan untuk membuat sesuatu supaya kesusahan rakyat hari ini dibantu. Seperti yang Chembong cakap tadi, belanjawan yang akan datang, belanjawan sudah hampir, sudah hampir tiba, jadi saya mencadangkan Kerajaan Negeri, Kerajaan Negeri mencadangkan bajet untuk subsidi khas beras. Maksudnya Yang Dipertua, sekiranya beras di pasaran tu berharga 30.00 ringgit, Kerajaan Negeri mengambil insentif untuk membeli subsidi 10.00 ringgit, contohnya. Kerana dulu pernah berlaku di Negeri Selangor, ketika harga ayam melambung, saya ingat lagi, Selangor telah memberi subsidi khas ketika harga ayam di seluruh Malaysia 9.00 ringgit lebih, Selangor dia *maintain* harga dia 8.00 ringgit lebih dia tidak, men, me, Kerajaan Negeri membayar subsidi menggunakan duit tabung Kerajaan Negeri.

Jadi salah satu Yang Dipertua, yang kita kena melihat isu ini begitu serius untuk kita bantu. Kita kena melihat bahawa yang beratur tu mak kita, kita kena melihat yang beratur saudar kita, dan ayah dan beli barang. Setelah kita melihat isu itu seperti saudara kita, barulah kita bersungguh-sungguh untuk membantu rakyat yang menghadapi situasi yang mencengkam ini, Yang Dipertua.

Yang seterusnya yang Dipertua, untuk mengatasi masalah ini saya me, saya melihat faktor pelancongan. Faktor pelancongan akan membawa pulangan ekonomi kepada warga setempat. Kita melihat semua DUN, semua DUN, Johol, Seri Menanti, Rahang, kawan-kawan saya, semua menceritakan sektor pelancongan, untuk membangunkan sektor

pelancongan. Jadi saya, saya melihat ini Yang Dipertua, sektor pelancongan ini kena menjadi ekonomi ketiga untuk Kerajaan Negeri Sembilan. Kita tahu semalam Rantau bagitahu ekonomi Negeri Sembilan ini bergantung kepada perkilangan awam, awam dan kita, saya mengharapkan bahawa sektor pelancongan menjadi ekonomi ketiga kita Yang Dipertua. Jadi ini perlulah memandangkan serius, Exco Pelancongan kenalah pandang ini begitu serius, maksudnya kita kena *engage* dengan pihak-pihak swasta. Kita, kita ada, kita ada kelebihan di tempat-tempat kita. Port Dickson kita ada, Lenggeng, jangan sebut Port Dickson je, Lenggeng pun ada, kan, Chembong pun ada. Masing-masing ada kelebihan masing-masing Yang Dipertua. Tetapi sekiranya kelebihan-kelebihan ini tidak di, di, diangkat di peringkat *international*. Kita nak *international*, kita tak nak *local*, *local* dah ada. Di Lenggeng setiap minggu, Sabtu Ahad, kalau datang Yang Dipertua, Yang Dipertua pun daripada DUN Lenggeng. Kalau datang, kita akan tengok basikal penuh di jalan-jalan raya DUN Lenggeng. Motosikal. Jadi di, apabila pelancongan tempatan masuk Sabtu Ahad, maka sektor-sektor ekonomi tempatan akan meningkat. Mereka akan dapat meniaga, jadi dapat sara anak mereka, keluarga mereka, membayar cukai-cukai untuk kerajaan Yang Dipertua.

Jadi sekarang kita ingin, ingin pelancongan sektor *international* bagaimana kita, kita ber, ber, *engage* dengan swasta supaya bersama-sama dengan kita punya pelancongan. Saya banyak berjumpa dengan *travel agency* yang di peringkat antarabangsa Yang Dipertua. Mereka datang dan mereka, mereka iklankan supaya datang ke Malaysia, bawak daripada Taiwan, daripada Korea ya. Bila bersembang, mereka datang ke, datang ke Malaysia, *airport* dia KLIA, sedangkan Negeri Sembilan yang paling hampir, tetapi mereka tidak singgah ke Negeri Sembilan. Mereka bawak ke Sabah, mereka bawak ke Sarawak, mereka bawak ke Langkawi. Kenapa? Persoalan dia mereka, *travel agency* suka bawak mereka ke tempat-tempat selain daripada Negeri Sembilan. Sedangkan Negeri Sembilan sangat hampir, KLIA sangat hampir dengan Negeri Sembilan. Tak sampai 20 minit. Kalau ke Lenggeng tu 30 minit saja Yang Dipertua. Tetapi kerana tidak ada *engagement* dengan, dengan swasta, maka kita hanya melihat sahaja pelancong tu lalu di KLIA, singgah, dan pergi ke negeri-negeri, negeri-negeri jiran kita.

Dan Yang Dipertua, saya ingin, saya ingin kita melihat semua, ahli-ahli Dewan semua melihat, setiap hujung minggu ataupun setiap kali cuti sekolah ya, kita melihat jalan raya – jalan raya penuh, mereka bawak pergi bercuti. Dan kalau kita tanya ke mana mereka pergi, mereka tidak akan sebut ke Negeri Sembilan. Mereka akan pergi Pulau Pinang ya, baru-baru ni sahabat saya pergi ke Pulau Pinang 12 jam, sesak di *highway*, berkoyan, berduyun-duyun pergi ke Pulau Pinang. Kerana

Pulau Pinang dia ada banyak faktor-faktor pelancongan yang menarik minat. Bukan sahaja menarik minat, malah mereka berjaya mem-*viral*-kan tempat-tempat mereka sehingga begitu, sehingga anak-anak kita okey, keluarga, adik-adik kita semua kata, bila, mana nak cuti, kita ke Pulau Pinang. Ada taman *dinosaur* kalau kita pergi ke sana, kemudian kita ada Bukit Bendera. Walaupun Bukit Bendera tu telah lama Yang Dipertua, tapi itulah faktor yang membuatkan ramai orang berkunjung ke Negeri Sembilan, ke Pulau Pinang dan ekonomi setempat sangat, sangat memberi apa, bantuan kepada penduduk sekitar.

Jadi Yang Dipertua, saya mencadangkan Yang Dipertua, sekiranya selepas ini dalam masa 5 tahun ini, kita jadikan Negeri Sembilan ni tempat destinasi pelancongan yang utama dalam Malaysia okey, kita tak nak dengar lagi mereka ke Pulau Pinang, mereka ke Melaka, mereka ke Johor kerana ada Legoland, tapi lepas ni kita nak dengar mereka ke Negeri Sembilan kerana ada kereta, kereta apa, apa kereta, kabel? Kita pun nak buat kereta kabel, Yang Dipertua. So kita kena buat ni Yang Dipertua. So perlahan-lahan kita buat. Tapi yang pentingnya Yang Dipertua, apa yang kita ada sekarang kita mantapkan dan kita buat *engagement* dengan swasta. Kemudian yang paling penting, kita kena *viral*-kan. Sekarang semua *viral*. Kalau kita tak *viral* Yang Dipertua, apa saja produk kita tak akan laku ya.

Yang Dipertua, yang seterusnya berkenaan dengan pertanian, Yang Dipertua saya nak sentuh pertanian sebab saya telah melihat di kawasan-kawasan di DUN Lenggeng, ada tanah-tanah besar yang bukan terbiar, tetapi tidak digunakan sepenuhnya. Apabila saya bertanya dengan mereka yang duduk situ, mereka kata itu adalah tanah, tanah padang ragut. Tetapi apabila saya pergi berjumpa dengan pihak yang berkenaan, mereka mengatakan padang ragut ini dalam status permohonan, belum lagi lulus untuk di, di, digunapakai. Tetapi bagaimanapun mereka hanya pakai, mereka pakai jugak, walaupun masih tidak lulus, sebab, sebab tidak lulus, saya pun tidak tahu Yang Dipertua. Tetapi masalahnya Yang Dipertua, sekarang ini isu dia adalah isu ramai orang-orang kampung yang tidak ada kerja. Sekiranya di tanah tu ada 200 ekar, padang ragut 200 ekar terbiar begitu sahaja, yang kita nak sekarang adalah berkenaan dengan pertanian. Tanam cili 2 bulan, 3 bulan boleh dapat duit. Tanam sayur-sayuran, sawi, kobis. Sekiranya kita, Kerajaan Negeri memberi kebenaran untuk digazet balik padang ragut ni untuk bukak kepada mereka-mereka yang berkeupayaan, berkeinginan atau yang tak bekerja untuk menyumbangkan, untuk menggunakan tanah tu untuk memantapkan sektor ekonomi di kampung mereka. Ini dapat, sangat-sangat dapat membantu Yang Dipertua, kan. Apa, maksudnya sekiranya sebulan mungkin mereka dapat menjana *income* 2,000.00 – 3,000.00 – 4,000.00 bergantung

kepada berapa tanah mereka dapat dan bagaimana subsidi kerajaan yang kita boleh bagi kepada penduduk-penduduk.

**YB Yang Dipertua Dewan:** Ringkaskan YB.

**YB ADUN Lenggeng:** Ya?

**YB Yang Dipertua Dewan:** Ringkaskan, dah habis masa.

**YB ADUN Lenggeng:** Baiklah Yang Dipertua. Jadi penggulangan saya Yang Dipertua, saya melihat kesusahan rakyat pada hari ini dan kerajaan, Kerajaan Negeri haruslah melihat kesusahan ini dengan cara mem, membantu memberikan subsidi, memperbanyakkan lagi Jualan-Jualan Rahmah dan membawa agensi-agensi lain bersama-sama dengan Kerajaan Negeri untuk membuat Jualan-Jualan Rahmah ni, seperti contohnya seperti Pusat Zakat ya, kemudian mungkin daripada sektor-sektor GLC-GLC yang berada di Negeri Sembilan. Saya pun faham mereka ada bagi barang-barang bantuan. Saya nak dia orang rancakkan barang keperluan, kerana ekonomi kita berada di dalam keadaan yang sangat sudah. Yang Dipertua saya tutup perbincangan ni, maka saya menyokong usul daripada Johol. Sekian, terima kasih.

**YB Yang Dipertua Dewan:** Terima kasih. Dijemput YB Gemencheh.

**YB ADUN Gemencheh:** *Bismillahirrahmanirrahim. Assalamualaikum WBT.* Terima kasih diucapkan kepada Yang Dipertua di atas peluang yang diberikan kepada saya untuk ucapan menjunjung kasih Duli Yang Maha Mulia Yang di-Pertuan Besar Negeri Sembilan. Ini merupakan ucapan sulung saya sebagai ADUN Gemencheh, Dato' Yang Dipertua. Dalam perbincangan yang pertama ini, saya ingin merakamkan jutaan terima kasih kepada pengundi di N25 Gemencheh kerana telah memberi kepercayaan kepada saya dan ini adalah tanggungjawab yang amat besar. Justeru itu, saya akan terus komited dan terus berkhidmat demi warga Gemencheh.

Terlebih dahulu saya mengucapkan tahniah kepada Dato' Seri Haji Aminuddin bin Harun yang telah dilantik sebagai Menteri Besar Negeri Sembilan, dan tahniah juga kepada barisan Exco Kerajaan Negeri yang telah dilantik. Dato' Yang Dipertua, saya juga mengucapkan terima kasih kepada agensi-agensi kerajaan yang menjalankan tanggungjawab dengan amat baik bagi pentadbiran Kerajaan Negeri Sembilan. Di samping Kerajaan Negeri telah melaksanakan Jualan Ladang Negeri Sembilan Prihatin untuk menangani masalah kenaikan harga barang dan keperluan asas yang sekarang ini kami di peringkat DUN Gemencheh, telah memperluaskan di seltiap kampung-kampung di DUN Gemencheh.

Dato' Yang Dipertua, yang pertamanya, baru-baru ini sedang berlangsung promosi filem Gemenchey Boy di seluruh negara. Filem ini yang menceritakan tentang sukan kriket di Gemenchey. Saya mengharapkan Kerajaan Negeri memberi sokongan dan dokongan dan sama-sama mempromosikan filem ini yang berlatarbelakangkan kehidupan felda di Felda Bukit Rokan Utara di Gemenchey. Saya mengharapkan juga agar Kerajaan Negeri menyediakan peruntukan untuk sukan kriket di Negeri Sembilan. Dan kita juga, kita juga di Negeri Sembilan adalah antara juara kebangsaan kriket.

Dato' Yang Dipertua, yang keduanya saya ingin mencadangkan Kerajaan Negeri mengkaji semula elaun Ketua-Ketua Adat yang saya dimaklumkan elaun Datuk Lembaga cuma ada RM200.00 dan tiada elaun kepada datuk, Datuk-Datuk Buapak dan Ibu Soko. Diharapkan kerajaan mempertimbangkan balikkah elaun bagi Datuk-Datuk Adat ni.

Yang ketiganya, Dato' Yang Dipertua, saya ingin mohon Kerajaan Negeri Sembilan melalui agensi-agensi memperluaskan atau menaik taraf eko pelancongan di kawasan Gemenchey. Ini kerana di Gemenchey, kami ada produk mamanan, iaitu makanan yang tersenarai antara makanan yang tersedap di dunia. Dan kami juga ada Estet Ikan MyKP Sungai Jerneh. Estet ikan ini kami jadikan pusat rekreasi yang telah mendapat perhatian daripada stesen televisyen negara Jepun yang telah datang membuat rakaman program mengoca. Dan kami juga menjaga, menjalankan program Pesta Mengoca pada setiap kali ikan ini dituai hasil. Terima kasih kepada Jabatan Perikanan yang sentiasa membantu kami di Gemenchey.

Di Gemenchey juga terdapat bukit-bukit tempat para *hikers* menjalankan aktiviti-aktiviti con, contohnya di Bukit Tok Saih di kampung saya sendiri di Kampung Tenai; Bukit Ramunia di Kampung Air Rawa. Dan mohon juga Jabatan Perhutanan mewartakan tempat Bukit Ramunia ni sebagai tempat, tempat rekreasi pendakian. Dan juga Bukit Motohorn di Felda Sungai Kelamah. Diharapkan pihak Kerajaan Negeri dapat membantu memperluaskan eko pelancongan yang berpotensi di Gemenchey.

Yang keempatnya Dato' Yang Dipertua, saya ingin me, isu, isu gerai penjaja di Gemenchey yang mendapat notis pemutihan atau dirobuhkan pada hujung tahun ini. Untuk maklumat Yang Dipertua, permohonan lesen Majlis ini perlu ada permohonan LPS yang bayarannya sebanyak 1,500.00 ringgit setahun. Dan deposit 1,500.00 bayaran untuk, satu kali bayaran. Dan tak ada, orang cakap tak ada kompromilah. 1,500.00, 3,000.00 tu dah tentu untuk bayaran permohonan lesen untuk LPS dan

sebagainya. Dan belum lagi apa, permohonan pelan dan sebagainya. Ini adalah antara yang membebankan peniaga-peniaga di Gemencheh. Dan harap Kerajaan Negeri mempertimbangkanlah bayaran ni, macam mana kita mendekatkan pihak kerajaan untuk memudahkan serta mencari jalan penyelesaian agar permohonan lesen peniaga kecil ni tidak membebankan merekalah. Kita harapkan, kita kaji baliklah bayaran-bayaran ni yang dikenakan kepada penjaja.

Dan akhir sekali Dato' Dipertua, sekian ucapan dari, saya menjunjung penuh titah Duli Yang Maha Mulia Yang di-Pertuan Besar Negeri Sembilan. Saya mohon menyokong.

**YB Yang Dipertua Dewan:** Terima kasih. Ahli-ahli Yang Berhormat sekalian, kita bahas semua ahli-ahli Yang Berhormat telah mengambil bahagian dalam perbahasan usul menjunjung kasih kepada ucapan Tuanku. Jadi sekarang saya buka pada ahli-ahli Mesyuarat Kerajaan untuk berbahas. Saya buka, saya tak perlu sebut nama, siapa boleh dulu. Ampangan, boleh Ampangan? Belum lagi. Linggi?

**YB ADUN Bahau:** Terima kasih Dato' Yang Dipertua. Terima kasih kepada semua ahli yang, ahli Yang Berhormat yang telah pun mengambil bahagian dalam perbahasan. Dan telah menyentuh isu mengenai portfolio perindustrian dan juga hal ehwal bukan Islam.

Dato' Yang Dipertua, terlebih dahulu saya ingin menjawab isu yang telah pun dibangkitkan oleh Yang Berhormat Lobak dan juga Yang Berhormat Lukut. Ni mengenai isu perkuburan, isu perkuburan yang tidak mencukupi. Jadi untuk makluman Yang Berhormat Lobak dan juga Yang Berhormat Lukut, Kerajaan Negeri Sembilan melalui Jabatan Perancangan Bandar Dan Desa Negeri Sembilan (PLANMalaysia Negeri Sembilan) telah menyediakan Laporan Inventori Rumah Ibadat Bukan Islam Negeri Sembilan selaras dengan keputusan Mesyuarat Jawatankuasa Bertindak Sumber Manusia, Perladangan Dan Hal Ehwal Bukan Islam yang ber, bersidang pada 11 Mei 2023. Laporan inventori ini akan mengandungi maklumat berkaitan lokasi, luas, badan pengurusan dan lain-lain, lain-lain lagi bagi setiap jenis rumah ibadat bukan Islam seperti kuil, tokong, gereja dan sebagainya. Penyediaan laporan inventori ini juga melibatkan kerjasama daripada semua Pejabat Daerah Dan Tanah serta Pihak Berkuasa Tempatan dalam membekalkan maklumat berkaitan dengan rumah ibadat bukan Islam yang terdapat di daerah masing-masing.

Melalui penyediaan inventori ini, dapat membantu pihak berkuasa yang berkaitan untuk mengawal, memantau kemudahan ibadat bukan Islam dan juga kubur yang tidak berdaftar. Dan sudah tentunya bagi pihak

Kerajaan Negeri, kita akan sentiasa dari masa ke semasa mendengar pandangan dan juga cadangan daripada ahli Yang Berhormat serta NGO-NGO yang berkaitan dengan pengurusan perkuburan bukan Islam agar kita dapat sama-sama untuk menyelesaikan isu kekurangan perkuburan bukan Islam di Negeri Sembilan.

Seterusnya mengenai isu, yang isu ini juga dibangkitkan oleh Yang Berhormat Lukut, di mana rakyat bukan Islam di Negeri Sembilan terdiri daripada pelbagai latar belakang agama dan juga budaya. Maka kaedah pengebumian juga adalah agak unik mengikut amalan agama masing-masing. Sebab sebelum ini Yang Berhormat Lukut ada mengutarakan bahawa kos untuk pengebumian bagi bukan Islam agak tinggi. Jadi dalam perkara ini, Kerajaan Negeri Sembilan sentiasa terbuka untuk mendengar cadangan atau pandangan mengenai kaedah pengebumian bukan Islam daripada NGO ataupun persatuan keagamaan.

Dan seterusnya mengenai perkara yang telah pun dibangkitkan oleh Yang Berhormat Paroi tadi, mengenai isu kuil di Taman Bukit Senawang Perdana. Yang Berhormat Paroi ada dalam Dewan, oh tak ada dalam Dewan. Jadi saya juga ingin mengambil kesempatan ini untuk memaklumkan kepada Dewan yang mulia ini bahawa sebenarnya sepanjang 5 tahun ini, sejak 2018, banyak usaha ataupun perundingan telah pun dijalankan oleh ahli Yang Berhormat daripada Nilai, ahli Yang Berhormat yang daripada Lobak dan juga mantan Yang Berhormat Paroi, mereka telah pun banyak kali berjumpa dengan jawatankuasa kuil tersebut. Dan sebenarnya kami telah pun berjaya membantu kuil tersebut untuk menga, mengenal pasti sebidang tanah di mana sepatutnya kuil tersebut perlu pindah ke tanah tersebut. Tetapi padalannya, pada awalnya Kerajaan Negeri dimaklumkan bahawa ni apa, perbelanjaan untuk memindahkan kuil tersebut, dia cuma melibatkan lebih kurang dalam 40,000.00 sahaja. Dan pada masa itu, pihak pemaju juga telah pun bersetuju untuk menampung perbelanjaan tersebut. Tetapi selepas tanah telah pun dikenal pasti, dan kami pulak dimaklumkan oleh pihak kuil, perbelanjaan keseluruhan untuk memindahkan kuil tersebut ia meningkat kepada lebih kurang 400,000.00 ringgit ini. Jadi ini, dia secara langsung telah pun sedikit sebanyak men, melambatkan proses kami untuk memindahkan kuil tersebut.

Saya rasa kami yang berada di dalam Dewan ini, kami memang adanya harapan untuk nak memastikan bahawa isu ini dapat diselesaikan dalam keadaan yang harmoni. Dan di sini saya juga mengambil kesempatan untuk, saya secara rasmi, saya menjemput Yang Berhormat Paroi, sebab ini isu bersama kita. Jadi saya rasa, untuk pertemuan ataupun untuk perundingan yang pada, yang akan datang, saya, saya akan

menjemput Yang Berhormat Paroi untuk kita sama-sama turun sekali untuk kita selesaikan perkara ini. Saya rasa tanah kita telah pun kenal pasti dan seterusnya saya rasa dari segi kewangan dia, kita perlu lihat macam mana kita boleh membantu mereka. Dan yang paling penting, kita nak situ sentiasa kekal harmoni.

Dan untuk makluman Yang Berhormat Paroi, kalau tak silap, pengerusi ataupun jawatankuasa taman tersebut telah pun berjumpa saya, 2 minggu yang lepas, dan saya juga memaklumkan kepada mereka; ini sesuatu yang memang di dalam tindakan Kerajaan Negeri. Jadi saya rasa, saya berharap Yang Berhormat Paroi, boleh balik memberi penjelasan kepada penduduk di situ. Dan saya sudi turun bersama dengan Yang Berhormat Paroi untuk berjumpa dengan penduduk di situ. Dan sama juga untuk jawatankuasa kuil, kita juga akan berjumpa dengan mereka dan lihat macam mana kita boleh mengharmonikan keadaan tersebut. Itu apalah, jawapan saya kepada Yang Berhormat Paroi dan juga untuk maklumat semua ahli Yang Berhormat. Jadi saya rasa itu sahaja. Terima kasih Dato' Yang Dipertua.

**YB Yang Dipertua Dewan:** Terima kasih. Saya jemput YB Kepayang. Bukit Kepayang.

**YB ADUN Bukit Kepayang:** Terima kasih Dato' Yang Dipertua. Dato' Yang Dipertua dan Dewan yang mulia ini, bersempena dengan titah ucapan Duli Yang Maha Mulia Yang di-Pertuan Besar Negeri Sembilan Darul Khusus yang menekankan kepentingan perpaduan dan kebersamaan demi keharmonian rakyat, sukacita saya menggulungkan perbahasan kali ini. Terlebih dahulu saya ingin menzahirkan ucapan tahniah kepada Yang Amat Berhormat Menteri Besar; Dato' Seri Aminuddin bin Harun, dilantik sebagai Yang Berhormat Menteri Besar Negeri Sembilan untuk penggal yang kedua. Dan kepada Dato' M K Ibrahim yang baru dilantik sebagai Yang Berhormat Yang Dipertua Dewan yang mulia ini.

Harapan rakyat. Baru-baru ini kita dapat melihat perubahan besar dalam landskap politik dan corak pentadbiran kerajaan. Kami berjaya membentuk sebuah Kerajaan Perpaduan yang stabil dan utuh susulan daripada permuafakatan yang tercapai di kalangan pimpinan parti. Apa-apa keputusan yang dibuat oleh Kerajaan Perpaduan ini harus melalui proses perbincangan untuk mencapai permua, permuafakatan ini, baik untuk peruntukan pembangkang ataupun untuk lantikan Timbalan *Speaker*. Baik, saya percaya, permukatan, permuafakatan ini akan dicapai kelak setelah proses perbincangan ini selesai dijalankan. Suka saya untuk kongsi serangkap pantun yang saya pinjam daripada Datuk Seri Ahmad Maslan.

Kalau anda ingin pergi memancing,  
Jangan lupa bawa umpan,  
Sekarang kita sudah kanceng,  
Demi generasi masa depan.

KPI saya sebagai Exco Pelancongan, Kebudayaan Dan Kesenian. Penghargaan kepada pengundi DUN Bukit Keayang yang memilih saya sekali lagi untuk penggal kedua sebagai ADUN Bukit Keayang. Saya ingin juga menzahirkan ucapan terima kasih saya kepada Yang Amat Berhormat Menteri Besar yang memberi kepercayaan kepada saya dengan melantik saya sebagai Exco Pelancongan, Kebudayaan Dan Kesenian pada tanggal 24 haribulan Ogos 2023. Hari ini adalah genap 1 bulan 17 hari saya dinobatkan sebagai Exco Pelancongan, Kebudayaan Dan Kesenian. Namun begitu, saya rasa saya ada satu, dengan izin, *big shoes to fill*, ataupun kerana beliau sebagai Exco Pelancongan, Kebudayaan Dan Kesenian semasa, beliau sebagai Exco Pelancongan, beliau telah *raise the bar*, dengan izin, dengan semangat dan inisiatif dan begitu apa nama, ke, kewibawaan beliau. Itu sebabnya saya masih perlu tunjuk ajar daripada Yang Amat Berhormat Menteri Besar supaya saya dapat melaksanakan amanah yang diberikan kepada saya.

KPI saya yang pertama, sebagai Exco Pelancongan adalah untuk menswastakan LPNS. LPNS walaupun namanya "Lembaga", LPNS ni cuma satu unit yang duduk di bawah SUK. Saya rasa untuk kita dapat menjalankan promosi pelancongan Negeri Sembilan, kita harus ada satu pendekatan swasta iaitu kita kena, dengan izin, GLC-kan LPNS. Dan saya akan cadang, kertas kerja saya rasa sudah naik ke bahagian UPEN, untuk di, dikaji dan di, diteliti supaya LPNS dijadikan sebagai satu anak syarikat di bawah MBI. Dan saya rasa ini akan banyak membantu untuk gerak kerja promosi pelancongan Negeri Sembilan sebab kita dapat capai satu tahap yang Lenggeng inginkan.

KPI yang kedua adalah supaya kita adakan pakej pelancongan. Semasa saya, saya sudah men, dapat mengenal pasti apa masalah sektor pelancongan di Negeri Sembilan. Mengapa pelancong-pelancong, dia cuma singgah di Negeri Sembilan, mungkin untuk makan ataupun *shopping*, selepas tu dia mungkin pergi ke Perak, ke Penang ataupun Pahang, ataupun Melaka. Tapi dia suka, dengan izin, *skip* Negeri Sembilan. Masalah kita adalah kita tak ada pakej pelancongan. Walaupun kita ada 200 lebih produk pelancongan, kita sudah ada banyak produk pelancongan yang sungguh mantap, tapi tak ada pakej. Ini bermakna, kalau Mat Saleh dia sampai ke KLIA, dia nampak, oh Gunung Angsi. Gunung Angsi, tapi dia tak ada pakej pelancongan. Dia terpaksa Google pergi Gunung Angsi, cari penginapan sendiri, cari logistik sendiri. So itu sebabnya setiap daerah di, di, dilontarkan cabaran

untuk mengeluarkan pakej pelancongan sekurang-kurangnya 2 malam 3 hari. Kalau kita boleh, kita laksanakan mungkin 3 malam 4 hari. Tapi setelah kita dapat pakej pelancongan ini, kita akan padankan dengan agensi-agensi pelancongan supaya agensi pelancongan ini tidak ada alasan kata; oh tak ada produk yang menarik di Negeri Sembilan.

Daripada 200 lebih agensi pelancongan yang berdaftar di bawah MATTA dan NCTA di bawah Negeri Sembilan, 95% adalah mereka buat pakej umrah dan *hajj*. Yang 5% ini, dia buat pakej *outbound* iaitu dia membawa Negeri Sembilan keluar melancong di luar Negeri Sembilan. Ada 0% yang buat *inbound*. Itulah cabaran yang saya, supaya kita dapat, kalau tidak mendorong, mendesak atau memaksa agensi pelancongan untuk jual pakej *inbound*, untuk buat pakej *inbound*. Ini adalah inisiatif atau usaha yang sedang dilaksanakan oleh LPNS.

Cabaran ketiga, KPI ketiga, saya sebagai Exco Pelancongan, adalah untuk menarik pelancong asing. Bagaimana kita boleh tarik mereka masuk ke Negeri Sembilan. Saya boleh bagi contoh di Sarawak ada *Festival Rain Forest*. Kita boleh adakan festival yang memaparkan keunikan Negeri Sembilan. Kerana unik, Negeri Sembilan sendiri adalah unik kerana inilah satu-satunya negeri yang mengamalkan Adat Perpatih. Daripada 13 negeri di seluruh Malaysia, kita mengamalkan Adat Perpatih dan kita ada sistem *matrilineal*, kita boleh menggunakan keunikan ini untuk memasarkan Negeri Sembilan. Dan juga identiti, Negeri Sembilan identiti termasuk kerongsang ini, bunga lado. Kita boleh pasarkan baju separuh tingkat, atau setengah tingkat. Kita akan cuba dapat mem, *production* untuk cenderahati-cenderahati dan dapat dijual kepada pelancong-pelancong asing.

Suka saya bagi contoh tentang *engagement* dengan swasta. Baru-baru ini saya dapat lebih kurang 120 pelancong dari, bangsa Cina daripada Vietnam, Singapura, Indonesia, *Mainland China*, Taiwan, mereka datang untuk satu pesta kebudayaan Guan Gong, pesta kebudayaan Cina di Seremban dan saya sudah, pihak LPNS telah *engage* dengan kilang di Pantai; Far East Foam supaya mereka menerima pelancong ini, dan kerana produk mereka diimport, sebelum ini mereka mengimport produk mereka ke luar negara. Dan sekarang kami bawa pelancong ini pergi ke kilang pan, di Pantai. Dan juga kita bawa mereka pergi ke *shopping* untuk Siew Pow.

Saya bagi contoh di Kuala Pilah, dia sangat *famous*, popular dengan emas yang paling murah di seluruh Malaysia. So apabila kita bawa pelancong ke Kuala Pilah, wajib untuk bawa mereka ke kedai emas. Itulah *engagement* yang kita sedang buat. Dan juga gula enau. Gula enau Kuala Pilah juga sangat unik, negeri lain. Dan dari segi penceritaan itu amat

penting. Kalau kita beritahu gula enau, tak menarik. Tapi kalau kita guna penceritaan yang melibatkan apa tu, sedikit cerita dongeng, yang kita ha, ada *licence* untuk memberitahu, kita kata; kalau kita ketuk gula enau, kalau dia rasa sedih, gula tu tak manis. Benda ini kita akan buat melalui *training of trainers* di mana pelan, *tourist guide* akan diberi *training* untuk membawa penceritaan yang menarik ini untuk menarik pelancong.

**YB ADUN Lenggeng:** Mohon mencelah?

**YB ADUN Bukit Kepayang:** Ya?

**YB ADUN Lenggeng:** Mencelah?

**YB ADUN Bukit Kepayang:** Mencelah okey.

**YB ADUN Lenggeng:** Berkenaan dengan *engagement* dengan swasta. Saya ingin bertanyakan dengan Exco Pelancongan, di DUN Lenggeng contohnya kita ada hutan lipur. Ada pihak swasta yang berminat untuk membangunkan chalet di kawasan tu. Tapi tu milik kerajaan, Pengarah hutan dan sebagainya. Adakah dibenarkan di sini? Contohnya di, di Selangor, di Kemensah kita lihat dia punya hutan lipur ada chalet dan sebagainya. So mungkin kita boleh di sini, *engagement* dengan swasta. Terima kasih.

**YB ADUN Bukit Kepayang:** Memang kita menggalakkan pengusaha untuk mendirikan chalet. Tapi mereka terpaksa melalui proses KM dengan MBS, kena buat permohonan. Dan sekarang, kita cuba ya, sorry ....

**YAB ADUN Sikamat:** Untuk jawapan soalan tersebut. Kita tak benarkan untuk kawasan tanah, tanah Hutan Simpan kita tak benarkan. Terima kasih.

**YB ADUN Lenggeng:** Saya minta mencelah sikit, boleh? MB mintak maaf saya tanya, kalau sekiranya dia hanya letak macam kabin, maksudnya tidak, tidak, bukan bangunan kekal. Adakah dibenarkan? Sebab ramai yang berminat untuk buat macam tu. Terima kasih.

**YAB ADUN Sikamat:** Itu yang kita katakan, kita tak benarkan apa-apa pembangunan di kawasan di tanah simpanan, tanah Hutan Simpan. Terima kasih.

**YB ADUN Bukit Kepayang:** Saya rasa Yang Amat Berhormat sudah jawab soalan tu. Penghargaan saya juga diberikan kepada ADUN yang berbahas dalam sesi menjunjung kasih titah Duli Yang Maha Mulia Yang

di-Pertuan Besar Negeri Sembilan Darul Khusus. Dan juga penghargaan kepada semua warga LPNS yang bekerja keras untuk mempromosikan pelancongan.

Izinkan saya untuk jawab beberapa isu yang dibawa oleh Yang Berhormat Sungai Lui, yang bertanyakan Jempol sebagai salah satu pusat sukan permotoran. Jawapannya adalah Daerah Jempol telah mempunyai 3 tarikan. Sungai Lui tak ada, *so* saya *skip*. Nak, nak, okey, yang perlu ditingkatkan aktiviti yang menarik .....

**YB ADUN Jeram Padang:** Tak apa, tak apa. Saya wakil Jempol, boleh? Boleh, boleh, teruskan.

**YB ADUN Bukit Kepayang:** Daerah Jempol mempunyai 3 tarikan utama sukan permotoran iaitu Kompleks Sukan Permotoran Jempol; Jempol Drag Racing yang diusahakan oleh Syarikat PRD Empire, yang kedua: Dataran Seri Jempol; Litar Kejohanan Cub Prix, diselenggara oleh Majlis Perbandaran Jempol (MPJL), yang ketiga: Litar Motorcross Air Hitam. Dan di antara aktiviti yang telah dijalankan selepas PKP seperti berikut:

- 16 – 17 Julai 2022: Kejohanan Cub Prix Petronas Pusingan Kelima Musim 2022 di Dataran Bandar Seri Jempol.
- Pada 11 dan 12 Februari 2023: MYFIT@motocross. Perlumbaan Motocross KBS Peringkat Zon Selatan, Litar Motocross Air Hitam.
- Pada 11 dan 12 Mac 2023: Kejohanan Cub Prix Petronas Pusingan Kedua Musim 2023, Dataran Bandar Seri Jempol.

Pihak MPJL akan menganjurkan Kejohanan Motocross Jempol 2023 pada 4 dan 5 haribulan November 2023. Dan telah mengemukakan permohonan kepada pihak penganjur Cub Prix bagi persediaan perlumbaan tahun 2024.

Pihak MPJL akan sentiasa membuka ruang kepada mana-mana pihak yang berminat untuk penganjuran sukan permotoran dalam Daerah Jempol sekaligus menaikkan imej daerah sebagai hab permotoran.

**YB ADUN Jeram Padang:** Boleh saya mencelah?

**YB ADUN Bukit Kepayang:** Ya.

**YB ADUN Jeram Padang:** Saya nak tanyalah, pasal yang *drag*, litar *drag* tu, saya nampak dulu telah dilantik satu agensi tetapi tidak berfungsi pun. Adakah perlu di, ditender semula ataupun dilantik agensi baru.

Saya cadangkan elok dibagi peluang kepada orang lainlah sebab yang lama tu tidak berminat dan merosakkan imej Menteri Besar kita. Dah beri peluang, tapi tak, tak bangunkan. Mohon apa ni, pencelah, penjelasan.

**YB ADUN Bukit Kepayang:** Sekarang saya tak ada jawapan. Saya akan jawab secara bertulis, okey. Untuk menjawab Yang Berhormat Chembong, yang membangkitkan tentang Pengkalan Nelayan Sungai Timun diwu, mewujudkan pakej memancing udang galah sepih biru untuk menarik pelancong setempat, domestik dan antarabangsa. Jawapannya adalah; Pengkalan Nelayan Sungai Timun merupakan salah satu pengkalan nelayan berdaftar di bawah Jabatan Perikanan Negeri Sembilan. Terdapat 8 orang nelayan berlesen di Pengkalan Nelayan Sungai Timun, yang menjalankan aktiviti menangkap ikan di sungai dengan menggunakan peralatan menangkap ikan antaranya jaring hanyut, bubu dan rawai. Namun, mereka tidak terlibat dengan eko pelancongan yang membawa pem, penumpang memancing. Terdapat 3 pengusaha persendirian yang membawa pemancing-pemancing udang galah di Sungai Rembau. Kekerapan pemancing bergantung kepada musim udang galah dan berdasarkan faktor pasang urut, surut dan kualiti air Sungai. Dianggarkan setiap pengusaha bot membawa 15 orang pemancing sebulan dengan pendapatan 1,000.00 ringgit sebulan.

Okey, untuk menjawab Yang Berhormat Seri Menanti dan Paroi. Untuk, yang mencadangkan untuk mewujudkan hab pelancongan Adat Perpatih di Negeri Sembilan. Jawapannya; Adat Perpatih meliputi pra syarat kepimpinan dan persempadanan, *matrilineal*, bahasa dan budaya, ekonomi, kesopanan dan harta dan cerita rakyat. Di Minangkabau, adat mereka juga mempunyai terasnya. Perbezaan dengan Negeri Sembilan adalah dari segi kearifan *local* atau *local genius* masing-masing. Di Minangkabau, iaitu Sumatera berat, Barat yang mempunyai Nagari-Nagari, sekitar 700 Nagari seperti Nagari Payakumbuh, Nagari Sarisemalok, Nagari Simanglagang dan lain-lain pelancongan adat Minangkabau dapat diketengahkan mengikut keunikan nagari-nagari ini.

Sehubungan dengan itu, pelancongan Adat Perpatih Negeri Sembilan dapat dilaksanakan dan usaha-usaha ini telah berjalan dengan mengetengahkan konsep Jelajah Keilmuan Adat Perpatih seperti pernah dilaksanakan di Luak Gunung Pasir pada tahun 2022, di Luak Ineh tahun 2023, dan untuk 2024, Luak Inas, bukan Ineh, dan 2024 adalah Luak Terachi. Pakej Jelajah Adat ini telah mendapat perkenan Duli Yang Maha Mulia atas dasar Luak ini di bawah Payung Duli Tuanku. *Insyallah* Jelajah Keilmuan ini akan diteruskan ke Luak-Luak lain. Dalam pakej ini dapat ditonjolkan keunikan Adat Perpatih untuk pelancongan ilmu di

mana keunikan Syura pemimpin-pemimpin Adat, keindahan Luak-Luak seperti gunung, sungai dan lain-lain. Begitu juga keunikan senibina, kulineri adat, pencerahan-pencerahan Adat dengan Ketua-ketua Adat. Jadi keunikan Adat Minangkabau dengan kelebihanannya dan Adat Perpatih dan dengan kelebihanannya adalah di Luak-Luak yang kesemuanya adalah di Luak yang 20 Luak termasuk Luak Naungan.

**YB Yang Dipertua Dewan:** YB, YB.

**YB ADUN Bukit Kepayang:** Ada, ada 2 lagi.

**YB Yang Dipertua Dewan:** Kita bukan jawab soalan-soalan satu. Kita menggulungkan aja. Kalau boleh ringkaskan.

**YB ADUN Bukit Kepayang:** Okey .....

**YB Yang Dipertua Dewan:** Ini menggulung ucapan dasar, ucapan ....

**YB ADUN Bukit Kepayang:** Untuk menjawab .....

**YB ADUN Chembong:** Terima kasih Dato' *Speaker*. Terima kasih.

**YB Yang Dipertua Dewan:** Kenapa?

**YB ADUN Bukit Kepayang:** Boleh tak saya pendekkan .....

**YB ADUN Chembong:** Memberikan panduan, terima kasih.

**YB ADUN Bukit Kepayang:** Terima kasih atas pedoman.

**YB ADUN Gemas:** Boleh mencelah lagi tak? Dato' *Speaker* boleh mencelah lagi Dato' *Speaker*?

**YB ADUN Bukit Kepayang:** Okey. Saya ikut petua Dato' Yang Dipertua.

**YB ADUN Gemas:** Boleh saya mencelah? YB Exco, saya nampak dari keterangan dari YB Exco tadi, kita dah ada pelancongan dalam, dalaman. Dan yang dibangkitkan daripada 100% yang agensi, 95% melibatkan haji dan umrah, 5% adalah membawa pelancong tempatan ke luar. Kenapa kita, Kerajaan Negeri tidak memfokus kepada pelancongan perubatan sebab kita lihat ramai pelancong daripada Indonesia, daripada negara luar nak datang ke Malaysia pakej perubatan. Kita dekat dengan KLIA. Itu yang pertama.

Yang kedua, pakej pelancongan sukan. Apabila pakej, contoh, di Australia, di Melbourne setiap bulan akan diadakan maraton. Apabila setiap bulan, dia dah jadikan satu takwim iaitu orang luar akan datang ke Melbourne untuk menyertai *half or full marathon*, dengan izin, 42 dengan 21 iaitu, jadi setiap bulan akan aktiviti sukan maraton.

Yang ketiga, saya nak sebutkan apabila saya melihat satu tindakan yang cukup baik daripada Yang Berhormat, Yang Amat Berhormat Sikamat apabila turut bersama-sama turun ke padang dalam aktiviti mengoca, mengoca atau pertandingan di sawah yang dibuat setiap tahun. Untuk orang Singapura, aktiviti-aktiviti ini cukup menarik hati mereka. Mereka tak pernah rasa ber, berada dalam situasi begini. Dan mereka juga sudi duduk 3 hari 2 malam untuk, dan satu ketika dahulu mereka sudi untuk mengadakan, untuk agama Islam, mereka membuat korban. Maksud dia, sekarang ni, saya setuju dengan YB *Speaker* itu hari, orang Negeri Sembilan buat korban di Kemboja, buat korban di negara luar, tapi sebenarnya kita ambil dari sudut pelancongan. Saya tak sebut dari sudut agama, sudut pelancongan. Kenapa kita tak tarik orang-orang dari negara maju ini, datang untuk mengadakan program-program ini, 3 hari 2. Mereka akan menetap, mereka akan menetap menyambut Aidiladha bersama. Jadi saya lihat ini adalah peluang yang, yang ada di Negeri Sembilan sebab kita berhampiran dengan lapangan terbang. Terima kasih.

**YB ADUN Bukit Kepayang:** Terima kasih atas pencelahan daripada Yang Berhormat Gemas. Memang ini menjadi KPI kami yang ketiga iaitu menarik pelancong asing melalui pelancongan yang berbagai sektor, perubatan. Kita ada banyak *international school* juga, dengan izin, kita ada festival kebudayaan, kita boleh adakan dan dapat memaparkan keunikan Negeri Sembilan. Dan juga sukan, baru-baru ini kita ada satu *international skuasy event* di mana *top 5 player in the world*, dengan izin, akan datang ke Negeri Sembilan untuk satu *tournament* skuasy pada bulan 11. Dan kita akan menggunakan kesempatan ini untuk membawa pemain-pemain antarabangsa ini untuk melawat lokasi pelancongan kami seperti Lorong Seni yang paling seni yang paling panjang di Malaysia iaitu 500 meter. Kita akan buat sesi *meet and greet fans* dengan pemain *international* ini, dari *Egypt, top player* skuasy sekarang di dunia adalah dari Egypt. So kita bawa mereka dan saya rasa, mereka ada ramai peminat-peminat yang akan ikut dengan Youtube mereka, dengan, itu yang kita dapat *viral*-kan tempat-tempat pelancongan di Seremban.

Okey, dengan ini saya sekali lagi memberi penghargaan kepada semua warga LPNS yang bekerja keras untuk mempromosikan pelancongan di Negeri Sembilan dan juga warga JKKN juga untuk mempromosikan kebudayaan dan kesenian, sama juga dengan warga Kraftangan, dan

juga warga UPEN yang banyak membantu. Sebutan khas untuk Puan Razmona yang banyak membantu LPNS untuk buat dasar-dasar kami. Dan, dan juga kepada semua penjawat awam yang secara langsung atau tidak langsung membantu saya melaksanakan tugas saya sebagai Exco Pelancongan, Kebudayaan Dan Keseniaan. Saya mengakhiri dengan pantunlah kerana Kerajaan Perpaduan kan.

Sedap sungguh buah bidara,  
Sedap lagi buah pulasan,  
Jangan lupa Rukun Negara,  
Kesopanan Dan Kesusilaan.

Sekian, terima kasih.

**YB Yang Dipertua Dewan:** Sama-sama. Jadi saya pun ada pantunlah. Sebab Chembong tadi kan, jadi

YB Chembong datang berkunjung,  
YB Nicole Exco Pelancongan,  
Amanah rakyat kita junjung,  
Beban rakyat kita mahu ringankan.

Okey, saya jemput Palong.

**YB ADUN Johol:** Dato', Dato' *Speaker*, saya nak bertanya sikit. Yang sekarang ni kita dalam sesi menggulung ya, penggulangan. Jadi adakah sesi, Dato' *Speaker* membenarkan mencelah ataupun apa ni, pertanyaan-pertanyaan daripada kami.

**YB Yang Dipertua Dewan:** Tapi, dia nanti jadi soalan macam sesi soalan lisan balikkah. Tapi ni, sesi membahas usul untuk apa, ucapan menjunjung kasih kepada Tuanku. Tapi boleh, tapi kita tak nak balik kepada terlalu banyak pencelahan kan, penerangan. Jadi kita nak selesaikan perbahasan ini, penggulangan Exco petang ni ya. Besok *insyaAllah* apa ni, Menteri Besar boleh gulung keseluruhannya. Saya, Palong bersedia? Belum. Pilah?

**YB ADUN Pilah:** *Assalamualaikum*, salam Sejahtera. Yang, Dato' Yang Dipertua dan ahli-ahli Yang Berhormat. Tahniah saya ucapkan kepada Yang Amat Berhormat Menteri Besar; Dato' Seri Haji Aminuddin bin Harun yang telah memperolehi mandat untuk terus mengetuai kepimpinan kerajaan, kerajaan. Tahniah juga kepada Dato' Yang Dipertua atas pelantikan sebagai Yang Dipertua Dewan Undangan Negeri, Negeri Sembilan dan seluruh ahli Dewan atas kemenangan pada PRN yang lepas.

Terlebih dahulu saya ingin mengucapkan jutaan terima kasih kepada warga DUN Pilah kerana memberi mandat kepada saya sebagai wakil rakyat pada Pilihan Raya Negeri Ke-15 yang lalu. Tidak lupa juga kepada seluruh petugas SPR, pegawai-pegawai kerajaan, anggota keselamatan yang bekerja keras sepanjang tempoh pilihan raya yang lepas. Tahniah juga diucapkan kepada Yang Dipertua, kerana dilantik sebagai *Speaker*.

Dato' yang Dipertua, dalam Dewan yang mulia ini, saya ingin menyeru seluruh warga Negeri Sembilan agar mengekalkan keharmonian institusi kekeluargaan untuk menjamin kesejahteraan masyarakat khususnya di Negeri Sembilan. Wanita merupakan golongan yang memberi, yang memainkan peranan penting dalam pembinaan sebuah negara bermula daripada rumah sehingga pentadbiran. Oleh itu, golongan wanita perlu seiring dengan arus pemodenan masa kini. Bukan setakat itu sahaja, saya juga berharap agar warga Negeri Sembilan sentiasa peka terhadap ahli keluarga agar tidak melibatkan diri dalam masalah sosial yang akan mengganggu gugat kesejahteraan rakyat. Rakyat di Negeri Sembilan seharusnya melibatkan diri dalam program yang dianjurkan oleh jabatan dan agensi.

Dato' yang, Dato' Yang Dipertua, izinkan saya untuk menjawab isu yang dibangkitkan oleh YB ADUN Lobak iaitu mengenai manifesto kerajaan bantuan kewangan sebanyak 200.00 ringgit kepada warga emas 70 tahun ke atas. Untuk maklum balas ini, Jabatan Kebajikan Masyarakat selaku agensi pemberi bantuan kini sedang menguruskan Bantuan Warga Emas di bawah peruntukan Persekutuan iaitu sehingga bulan Ogos 2023 sebanyak 8,078 kes dengan melibatkan perbelanjaan sebanyak Ringgit Malaysia 35,030,000.00. Kadar bagi penerima bantuan adalah Ringgit Malaysia 500.00 sebulan dan kelayakan asas adalah berumur 60 tahun ke atas, warganegara Malaysia dan berba, berpendapatan bawah Ringgit Malaysia 1,169.00 sebulan.

Merujuk kepada Manifesto Kerajaan Perpaduan, bantuan 200.00 ringgit bagi warga emas berumur 70 tahun ke atas oleh pihak Kerajaan Negeri Sembilan perlu ditentukan ataupun menentukan tatacara pemberian dan agihan bantuan supaya bantuan akan dapat diagihkan dengan cekap, betul dan memberi manafaat kepada kumpulan sasar. Dalam hal ini, urusan ini, pandangan daripada agensi-agensi yang berkaitan seperti UPEN, Pejabat Menteri Besar, Pejabat Kewangan Negeri, Pejabat Pendaftaran Negara dan Jabatan Kebajikan Masyarakat juga akan diambil kira untuk melaksanakan Manifesto Kerajaan Perpaduan ini. Jadi, semua tindakan yang di atas akan dijangka mengambil masa. Walau bagaimanapun, Kerajaan Negeri akan mengambil tindakan segera yang mungkin bagi memastikan manifesto ini dapat dilaksanakan dengan jayanya. Sekian, terima kasih Yang Dipertua.

**YB Yang Dipertua Dewan:** Terima kasih.

**YB ADUN Lobak:** Penjelasan. Yang 200.00 tu, tawaran 200.00 tu, dia akan agih tahun bila? Agak ambil kira tahun '23? Termasuk? Jikalau dia agihkan *on next year*.

**YB ADUN Pilah:** YB, RM200.00 itu adalah merupakan manifesto yang baru untuk Kerajaan Perpaduan. Jadi, mekanisma yang perlu kita laksanakan perlu melihat pada perbincangan di peringkat UPEN, Pejabat Menteri Besar, Pejabat Kewangan Negeri dan agensi-agensi yang terlibatlah. Jadi, keputusan semua kita melihat pada agensi-agensi itu sebelum dilaksanakan. Terima kasih.

**YB ADUN Lobak:** Erti itu yang umur 70 tahun ke atas kami pun tak tahu bilangan berapa. Agak-agak jikalau kos jumlah berapa.

**YB ADUN Pilah:** Belum, belum lagi.

**YB ADUN Lobak:** Belum dapat tau.

**YB ADUN Pilah:** Okey, nanti mungkin saya akan menyemak dan memberi jawapan bertulis, YB Lobak .....

**YB ADUN Lobak:** Okey, terima kasih.

**YB ADUN Pilah:** Terima kasih.

**YB Yang Dipertua Dewan:** Okey, sila, Senaling.

**YB ADUN Senaling:** Yang Berhormat Dato' Yang Dipertua, sebelum saya menjawab beberapa persoalan yang disentuh oleh rakan-rakan Yang Berhormat, saya juga seperti ahli Yang Berhormat yang lain, ingin mengambil kesempatan ini untuk merakamkan ucapan terima kasih dan penghargaan kepada pengundi-pengundi saya di DUN Senaling dan jugak di atas sokongan. Dan jugak, nak juga merakamkan ucapan terima kasih kepada warga DUN Juasseh-lah sebab saya lama di Juasseh, jadi, berpindah kawasan, jadi saya nak ucap terima kasih juga kepada warga DUN Juasseh.

Yang Berhormat Dato' Yang Dipertua, ada beberapa persoalan yang ditimbulkan dalam perbahasan oleh rakan-rakan Yang Berhormat. Yang pertamanya Yang Berhormat Temiang ada menyentuh tentang penubuhan Majlis Perundingan TVET. Kita semua tahu bahawa ini satu perkara yang penting dan Kerajaan Negeri tidak ketinggalan untuk menubuhkan satu majlis perundingan kerana tumpuan kita sekarang ni

kepada pendidikan ataupun pembelajaran vokal, ni, teknikal ya, dan juga vokasional. Jadi untuk TVET di Negeri Sembilan ni memanglah sepertimana yang disebut oleh YB Temiang tu, memang telah pun dicadangkan. Dan sekarang ni pihak UPEN sedang dalam peringkat memuktamadkan deraf terakhir kita. Kerana nak menubuhkan jawatankuasa ataupun majlis perundingan ni kita perlu tentukan dia punya *terms of reference* dia Yang Berhormat ya, dengan izin, dan jugak cadangan keanggotaan dia, ahli majlis ni. Jadi kita di Kerajaan Negeri sedang memuktamadkan ya, penubuhan jawatankuasa TVET peringkat Negeri Sembilan ni.

Yang keduanya, YB Bagan Pinang menyentuh beberapa perkara. Yang pertamanya cadangan daripada Bagan Pinang tentang penubuhan ya, penubuhan Sekolah Berasrama Penuh ke, Sekolah Berprestasi Tinggi ni YB?

**YB ADUN Bagan Pinang:** Untuk di, untuk ditubuhkan di Port Dickson.

**YB ADUN Senaling:** Sekolah Berprestasi Tinggi?

**YB ADUN Bagan Pinang:** Betul tu.

**YB ADUN Senaling:** SBP ke SBT, saya pun salah catit. Berprestasi tinggi. Jadi untuk, berprestasi tinggi, memanglah ini satu cadangan yang baik. Tapi apa pun kita perlukan orang kata, persetujuan daripada kementerian melibat, apa juga yang melibatkan sekolah ni, kita perlu ada persetujuan daripada kementerian. Dan kalau kita lihat pada garis panduan kementerian ni, cadangan boleh kita buat tetapi Kementerian Pendidikan, mereka ada jawatankuasa pemilihan dia sendiri, SBT ya, dan dipengerusikan oleh Ketua Pengarah Pelajaran Malaysia (KPPM) dan dianggotai oleh Timbalan Ketua Pengarah (Sektor Operasi Pendidikan) dan banyak lagilah, pihak-pihak yang terlibat. Tapi apa pun cadangan ni cadangan yang baik. Dan kita akan teliti cadangan ni dan kalau ada kesempatan dan keperluan, kita kena panjangkanlah permohonan ini melalui Jabatan Pendidikan Negeri Sembilan atas permohonan YB Bagan Pinang untuk menubuhkan sebuah Sekolah Berprestasi Tinggi di Daerah Port Dickson.

Di masa yang sama kalau, jugak YB sebut MARA tadi, MRSM. MRSM ni bawah MARA-lah, di bawah Majlis Amanah Rakyat. Pun boleh kita panjangkan kerana MARA pun duduk di bawah portfolio pendidikan jugak.

Dan seterusnya YB Bagan Pinang jugak menyebut tentang di Port Dickson ni dah ada yang terkenal dengan industri *oil and gas* ya, dan

mintak, cadangkan kemahiran ya, pusat kemahiran berkaitan *oil and gas* ni di Port Dickson. Ini permohonan Bagan Pinang dalam ucapan tadi. Dan untuk itu, saya nak maklumkan bahawa buat ketika ini memang terdapat beberapa pusat latihan yang bertaualiah di bawah Jabatan Pembangunan Kemahiran (JPK), Kementerian Sumber Manusia di Negeri Sembilan yang sedia ada menjalankan program berkaitan dengan *oil and gas* ini. Yang pertamanya ialah, Kolej Vokasional Port Dickson. Dia ada kursus KV dan jugak pemban, Pembantu Jurutera *Welding Fabrication* berkaitan dengan *oil and gas*. Yang keduanya Institut Latihan Perindustrian Pedas (ILP Pedas) yang juga ada menawarkan kursus *oil and gas*, Operasi Fabrikasi Struktur Logam (Minyak, Gas & Petrokimia). Jadi dah ada YB ya. Di Negeri Sembilan memang sedia, tainggal lagi nak, di PD pun, yang mereka untuk nak dapatkan kemahiran dalam bidang ini boleh masuklah ke kedua-dua kolej sepertimana yang saya sebutkan sebentar tadi.

Seterusnya Yang Berhormat Gemencheh ya. Gemencheh ada sebut tentang sukan kriket ni. Saya tahu yang terlibat ni adalah sekolah, Sekolah Bukit Rokan rasanya, Rokan Utara. Memang kita ucap tahniahlah kepada sekolah luar bandar yang jauh ni, di Gemencheh ni, menjadi johan ya, mendapat melahirkan pemain-pemain kriket yang, yang baik. Sebenarnya Negeri Sembilan ni, selain daripada sukan kriket ni Yang Berhormat Dato' Yang Dipertua, kita pun ada sukan lain jugak yang kita hebat ni. Seperti contohnya *softball* ya, *softball* pun kita johan kebangsaan jugak. MSSM kita baru saya raikan baru-baru ni, dia pun johan bawah 18 tahun, wanita, lelaki. Johan keseluruhan baru-baru ini.

Jadi untuk ini, yang Berhormat mintak kalau ada perhatian. Memang kita beri perhatian, kita memang memberi perhatian kerana kita bukan sahaja menumpu dalam soal pendidikan, pencapaian akademik ni, tetapi jugak kita melihat kepada bakat ya, khususnya dalam bidang sukan ni. Jadi kita akan bincang apakah insentif yang boleh kita salurkan sedikit sebanyak kepada sekolah-sekolah yang memang *excellent* dengan izin, atau memang terbilanglah dalam sukan-sukan tertentu ni. Ini pun kita kena bincanglah. Apa pun terima kasih YB kerana *highlight*-kan sukan kriket di Sekolah Bukit Rokan Utara ni.

Kemudian satu lagi perkara yang disebut, Seri Menanti pun ada sentuh jugak sikit soal pendidikan ni, iaitu tentang *fast track* kita di sekolah tahfiz. Dan ini memang kita akan teruskan *insyaAllah* Kerajaan Negeri akan teruskan. Kita nampak kesan dia. Dan kita nampak pencapaian mereka pun baik setakat ni. Ada pelajar-pelajar yang telah berjaya kita hantar ke pusat pengajian tinggi, ke luar negara pun ada rasanya, ada beberapa yang kita hantar ke luar negara walaupun mereka lulusan tahfiz, mereka duduk SPM, balik balik ke, ke orang kata, ke pendidikan

perdana ni, tapi mereka mampu untuk orang kata, mereka mampu untuk bersaing ya, dengan pelajar-pelajar yang memang dalam aliran perdana. Dan memang telah mencapai kejayaan. Oleh itu, apa yang sebut oleh Yang Berhormat Seri Menanti tu tentang *fast track* ni, *insyaAllah* ya, kerajaan pertimbangkan untuk, kita bawaklah bulan, belanjawan besok, *insyaAllah* akan ada peruntukan untuk kita teruskan *fast track* kepada sekolah-sekolah lepasan tahfiz ni.

Akhir sekali yang saya nak sentuh ialah soal Chembong tadi sebut sekolah tu. Jadi saya jawablah, mungkin Yang Amat Berhormat sebagai pengerusi infrastruktur nak jawab jugak, tapi saya jawab sini. Asrama Sekolah Menengah Agama Haji Hassan Sail tu, saya dimaklumkan bahawa dari segi pelantikan kontraktor tu dah selesailah untuk baik pulih ni. Tinggal lagi hanya menunggu JKR mengeluarkan surat SST dia, dalam masa yang terdekat. Saya rasa pelantikan dah selesai, jadi SST akan dikeluarkan dalam masa terdekat. Terdekat tu mungkin minggu depan ke, tak tahu lah kan. Jadi *insyaAllah* asrama sekolah ni akan kita baik pulih dengan kadar yang segeralah. Terima kasih Dato' Yang Dipertua.

**YB Yang Dipertua Dewan:** Terima kasih. Dijemput Repah.

**YB ADUN Repah:** Terima kasih Dato' Yang Dipertua. Terima kasih dan syabas kepada semua ahli-ahli Berhormat yang telah mengambil bahagian dalam perbahasan semalam dan hari ini. Dan ada beberapa perkara yang telah dibangkitkan oleh ahli-ahli Yang Berhormat.

Untuk Mambau, Mambau membangkitkan persoalan Kerajaan Negeri melaksanakan insentif untuk meringankan beban rakyat, ekonomi makin merosot, harga barang naik dan gaji tidak naik. Dan ada cadangan daripada ADUN Mambau bahawa TUNS yang kini diberi geran sebanyak 3,000.00 dinaikkan kepada 5,000.00 ringgit dan TUNS Plus daripada 15,000.00 dinaikkan kepada 20,000.00 ringgit.

Dato' Yang Dipertua, untuk makluman, cadangan tersebut akan dibincangkan dan dipertimbangkan di dalam Sesi Konsultasi Belanjawan Negeri Sembilan 2024 yang akan diadakan pada 15 dan 14 Oktober. Dan kita juga akan ada beberapa cadangan penambahbaikan dan tambah nilai kepada inisiatif-inisiatif yang lain yang akan dibentangkan dalam masa Sesi Konsultasi Belanjawan Negeri Sembilan kelak.

Dato' Yang Dipertua, ADUN Gemas membangkitkan isu bekalan beras, minyak masak dan lain-lain keperluan dan juga berkaitan dengan isu barangan yang melonjak tinggi. Untuk makluman ahli-ahli Yang

Berhormat, Pejabat Kementerian Perdagangan Dalam Negeri Dan Kos Sara Hidup Negeri Sembilan sentiasa memandang serius berhubung isu keberadaan bekalan dan kenaikan harga barangan ataupun harga makanan dan keperluan asas di pasaran. Antara tindakan dan langkah yang telah diambil dan sedang dilaksanakan oleh Kementerian Perdagangan Dalam Negeri, Negeri Sembilan bagi mengatasi perkara ini adalah seperti berikut:

- Pertama: menjalankan pemeriksaan harian dan pemantauan berkala di premis-premis perniagaan di kawasan bandar dan luar bandar bagi memastikan bekalan barangan keperluan asas adalah mencukupi di semua peringkat rantai perniagaan dan peniaga sentiasa mematuhi akta-akta dan peraturan-peraturan yang dikuatkuasakan oleh Kementerian Perdagangan Dalam Negeri dalam menjalankan operasi perniagaan mereka. Pemeriksaan ini meliputi *hypermarket, supermarket, minimarket*, kedai runcit, pasar-pasar awam dan lain-lain premis perniagaan. Sepanjang tahun 2023, sebanyak 28,833 premis perniagaan meliputi pelbagai peringkat perniagaan telah diperiksa bagi tempoh 1 Januari 2023 sehingga 10 Oktober 2023.
- Kedua: bagi memastikan kelangsungan bekalan dalam negeri, KPND juga telah melaksanakan operasi-operasi penguatkuasaan seperti berikut:
  - Pertama: Ops Jamin. Ops Jamin merupakan kolaborasi bersama Kementerian Pertanian Dan Keterjaminan Makanan untuk memastikan keberadaan bekalan beras. KPND Negeri Sembilan memastikan tiada penyelewengan berkaitan label jenis beras import ataupun tempatan. Sehingga 10 Oktober 2023, sebanyak 251 pemeriksaan telah dilaksanakan. Dari pemeriksaan tersebut terdapat sebanyak 3 kes dihasilkan. Dan antara tindakan yang boleh diambil adalah rampasan barangan kawalan tersebut; kedua: tindakan kompaun dikenakan; ataupun ketiga: pendakwaan di mahkamah.
  - Yang kedua: Ops Manis. KPN juga memastikan isu dan pengedaran gula pasir putih bertapis secara lebih komprehensif serta mengambil tindakan ke atas pemborong-pemborong atau peruncit gula. Sehingga Oktober, 10, sehingga 10 Oktober 2023, sebanyak 1,202 pemeriksaan telah dilaksanakan. Dari pemeriksaan tersebut, terdapat 2 kes dihasilkan dan antara tindakan yang boleh diambil adalah; pertama: rampasan barangan kawalan tersebut; kedua: tindakan kompaun boleh dibuat; atau pendakwaan mahkamah.

- Dan ketiga: selain daripada itu, KPDN Negeri Sembilan juga turut mengadakan sesi libat urus bersama pihak pengeluar, pemborong dan pemain industri bagi memastikan pengeluaran dan bekalan berada di, pada tahap yang tinggi, stok barangan ataupun bekalan dalam pasaran sentiasa berada dalam keadaan stabil.
- Keempat: KPDN juga melaksanakan Skim Harga Maksimum Musim Perayaan. Penentuan harga maksimum minyak masak kelapa sawit tulen dalam botol dan juga penentuan harga maksimum ayam dan telur ayam bagi mengawal harga barangan kawalan yang terpilih.
- Kelima: selain daripada itu, dalam menimbang usaha meringankan kos sara hidup, kerajaan juga telah memperkenalkan konsep Payung Rahmah sebagai induk kepada usaha membantu golongan susah dan rentan. Salah satu inisiatif iaitu Program Jualan Rahmah adalah program jualan barangan keperluan harian yang terdiri daripada barangan makanan mentah ataupun siap dan barangan bukan makanan yang dikategorikan sebagai barangan keperluan harian. Program ini dilaksanakan dengan penglibatan peruncit, *hypermarket*, pasar besar, pasar raya, pasar raya mini dan juga kedai runcit yang mana digalakkan untuk memberi pengurangan harga barangan semasa program jualan berlangsung antara 10 hingga 30% berbanding dengan harga pasaran semasa berdasarkan tempat untuk dinikmati oleh rakyat yang bertujuan untuk melaksanakan mengurangkan kos sara hidup. Antara senarai barangan keperluan harian asas yang boleh diberikan diskaun harga adalah seperti berikut:
  - Pertama: ikan, ayam dan hasil laut, telur ayam, gula putih bertapis, minyak masak botol, tepung gandum, beras, sayur-sayuran ataupun buah-buahan, barangan penjagaan diri, barangan pembersihan rumah, lampin pakai buang, barangan keperluan sekolah, ubat-ubatan dan lain-lain barangan keperluan harian, makanan dan bukan makanan yang bersesuaian.

Sehingga 10 Oktober 2023, sebanyak 187 Jualan Rahmah telah dilaksanakan di seluruh 36 DUN dalam Negeri Sembilan dengan 111 model pelaksanaan dalam premis, 4 Jualan Rahmah terbuka dan 72 pelaksanaan Jualan Rahmah secara bergerak (*mobile*). Sehingga kini, hampir Ringgit Malaysia 800,000.00 ringgit telah diperuntukkan untuk subsidi Jualan Rahmah. Anggaran jumlah penduduk yang mendapat manfaat daripada program ini adalah seramai 370,522 orang dengan anggaran jualan sebanyak 4.9 milion, juta. Itu saja.

**YB Yang Dipertua Dewan:** Terima kasih. Saya jemput Ampangan.

**YB ADUN Ampangan:** *Assalamualaikum*, salam sejahtera, salam perpaduan dan salam Malaysia Madani. Terima kasih ahli-ahli Yang Berhormat yang mengambil bahagian dalam sesi perbahasan titah ucapan Duli Yang Maha Mulia Yang di-Pertuan Besar Negeri Sembilan. Terlebih dahulu tahniah saya ucapkan kepada Yang Amat Berhormat Menteri Besar; Dato' Seri Haji Aminuddin Harun yang telah memperolehi mandat untuk terus mengetuai kepimpinan kerajaan. Tahniah juga kepada Dato' Yang Dipertua atas pelantikan sebagai Yang Dipertua Dewan Undangan Negeri, Negeri Sembilan dan seluruh ahli Dewan atas kemenangan pada PRN yang lalu. Terima kasih juga kepada Yang Amat Berhormat Menteri Besar atas kepercayaan yang diberi bagi menggalas tanggungjawab sebagai Exco Kesihatan, Penerangan, Perpaduan Integrasi Nasional Dan NGO. Seterusnya saya ingin mengucapkan jutaan terima kasih kepada warga di DUN Ampangan kerana memilih saya sebagai wakil rakyat bagi Pilihan Raya Negeri Ke-15 yang lalu. Tidak dilupakan juga kepada seluruh petugas SPR, pegawai-pegawai kerajaan, anggota keselamatan yang bekerja keras sepanjang tempoh pilihan raya tempoh hari.

Dato' Yang Dipertua, dalam Dewan yang mulia ini, saya ingin menyeru seluruh warga Negeri Sembilan agar mengekalkan semangat perpaduan di antara kaum. Menjadi tanggungjawab bersama para pemimpin dan rakyat dalam, dalam bukan sahaja memelihara dan mengukuhkan lagi keharmonian serta perpaduan yang dikecapi selama ini. Malah menyemarakkan lagi semangat perpaduan yang ada pada ketika ini. Bukan setakat itu sahaja, saya juga berharap agar warga Negeri Sembilan sentiasa kekal sihat dengan cara melibatkan diri dalam program sukan, program-program yang dianjurkan oleh jabatan dan agensi berkenaan.

Dato' Yang Dipertua, seperti semua sedia maklum, negara kita telah melalui satu fasa di mana penularan wabak COVID-19 pada tahun 2020. Kini kita masih di fasa pasca COVID atau fasa pemulihan ekonomi negara dan negeri khususnya. Di sebalik, di sebalik peristiwa ini, rakyat telah menyerlahkan semangat kekitaan, iaitu kebersamaan dan penyatuan dalam kalangan rakyat tanpa mengira latar belakang kaum, agama dan pangkat bagi membantu kejiwaan mereka yang kurang berkemampuan pada ketika itu.

Dato' Yang Dipertua, penggal ini pastinya akan mempunyai kisah dan peristiwa yang tersendiri. Cabaran yang datang mungkin berbeza dari apa yang pernah kita alami. Ayuh kita berusaha sama mendepaninya dengan kesungguhan, keberanian dan penuh semangat perpaduan antara kita. Marilah kita sama-sama berusaha memastikan Negeri

Sembilan terus maju jaya. Saya juga ingin meng, meningkatkan diri saya dan seluruh Malaysia amnya, seluruh warga Negeri Sembilan khasnya, agar sentiasa memastikan kebenaran sesuatu berita agar tidak sesekali kita menyebarkan berita palsu.

Seterusnya saya ingin menjawab persoalan yang diajukan berkenaan kesihatan oleh Yang Berhormat ADUN Kuala Klawang. Penyelesaian secara holistik bagi peningkatan kes mental. Antara penyelesaian secara holistik bagi meningkat, pening, peningkatan kes mental adalah dengan menjalankan promosi minda sihat melalui aktiviti berterusan melalui kempen-kempen kesihatan umum atau khusus seperti:

- Kempen Let's TALK Minda Sihat bagi meningkatkan kesedaran masyarakat tentang gejala-gejala masalah kesihatan mental untuk mengke, menggalakkan mereka atau membawa ahli keluarga mereka tampil untuk mendapatkan rawatan. Penempatan 11 orang Pegawai Psikologi (Kaunseling) secara tetap dan kontrak telah ditempatkan di fasiliti setiap daerah di Negeri Sembilan untuk memberi perkhidmatan pengurusan dan intervensi bagi masalah kesihatan mental.
- Saringan Minda Sihat pula mampu mengesan individu yang mempunyai masalah kesihatan mental. Sekiranya skor penilaian mereka dalam kategori sederhana, teruk atau sangat teruk, mereka akan dirujuk kepada sama ada kepada Pegawai Psikologi (Kaunseling), Pegawai Perubatan atau Pakar Perubatan Keluarga untuk intervensi di mana-mana fasiliti KKM. Saringan Minda Sihat juga telah diperkenalkan di sekolah rendah dan menengah. Pelajar yang mempunyai isu berkaitan kesihatan mental akan dirujuk ke klinik untuk intervensi selanjutnya.
- Program *Outreach* juga dijalankan di sekolah-sekolah. Program ini dilaksanakan bersama para pelajar dengan menjalankan aktiviti secara berkelompok bersama dengan Guru Bimbingan Dan Kaunseling Sekolah memfokuskan kepada yang banyak dihadapi oleh pelajar.
- Memberi rawatan susulan secara berkala kepada pesakit di klnik kesihatan sama ada pengambilan ubat makan atau suntikan bulanan.
- Talian HEAL 15555 yang diperkenalkan dan dikelola oleh Pegawai Psikologi dari Pusat Kecemerlangan Kesihatan Mental Kebangsaan (NCEMH) yang beroperasi pada setiap hari dari pukul 8:00 pagi hingga 12:00 malam. Perkhidmatan yang menawarkan bantuan psikososial melalui atas talian dalam isu kesihatan mental.

Itu sahaja Dato' Yang Dipertua. Terima kasih.

**YB Yang Dipertua Dewan:** Terima kasih. Jadi saya jemput, ada tak, Palong.

**YB ADUN Palong:** *Bismillahirrahmanirrahim, assalamualaikum WBT.* Terima kasih Dato' Yang Dipertua, di atas ruang dan peluang untuk saya membuat penggulungan bagi sesi perbahasan usul menjunjung kasih Titah Ucapan DiRaja dalam sesi persidangan kali ini. Terima kasih saya ucapkan kepada semua ahli-ahli Yang Berhormat yang telah pun mengambil bahagian dalam menyentuh isu-isu berkenaan dengan belia dan sukan. Kepada Yang Berhormat Johol, Yang Berhormat Sungai Lui, Yang Berhormat Juasseh, Yang Berhormat Jeram Padang, Yang Berhormat Kota, Yang Berhormat Gemencheh dan juga Yang Berhormat Chuah yang telah mengemukakan persoalan-persoalan.

Saya ingin mulakan, Dato' Dipertua, dengan jawapan kepada yang Berhormat ADUN Johol yakni berkenaan dengan perhatian khusus bagi pembangunan infrastruktur sukan di kawasan luar bandar. Untuk makluman Yang Berhormat ADUN Johol, pihak Kerajaan Persekutuan di bawah Kementerian Belia Dan Sukan sedang membina sebuah kompleks sukan mini di kawasan luar bandar iaitu di kawasan Gemas dengan kos keseluruhan projek sebanyak 8.0 juta ringgit. Projek tersebut dijadualkan siap pada 17 Oktober 2023. Walau bagaimanapun, terdapat beberapa perkara yang tidak dapat dielakkan, maka jadual siap bagi projek ini dijangka berubah pada bulan April 2024. Selepas lawatan saya yang telah saya lakukan bersama Pejabat Pembangunan Negeri, Negeri Sembilan tempoh hari, pihak perundingan dan kontraktor utama projek ini, pada September yang lepas, memalumkan bahawa mereka akan cuba siapkan seawal bulan April pada tahun hadapan.

Untuk makluman, selain daripada itu pihak Kementerian Belia Dan Sukan juga dalam proses membina sebuah kompleks sukan berkapasiti penuh di Daerah Rembau yang meliputi pembinaan padang bola sepak sintetik termasuk lampu *high-mast*, balapan larian, astaka berkapasiti 800 orang, gelanggang futsal, sepak takraw serta dewan serbaguna berkapasiti 1,500 orang yang dijadualkan siap juga pada April 2024.

Setakat ini, Majlis Daerah Kuala Pilah telah mempunyai Kompleks Rakan Muda yang terletak di kawasan Melang, di, yang sesuai digunakan oleh masyarakat di Kuala Pilah. Namun demikian, yang Berhormat Johol, bolehlah kemukakan permohonan kepada kementerian dengan tapak yang sesuai untuk kita angkat, untuk kita perjuangkan untuk kompleks yang sesuai di kawasan Yang Berhormat.

**YB ADUN Johol:** Terima kasih YB Palong. Johol mintak, bagi kat Gemas. Tu salah tadi tu Yang Dipertua kan.

**YB ADUN Palong:** Apa dia?

**YB ADUN Johol:** Dimaklumkan tadi, Gemas tu kan.

**YB ADUN Palong:** Nak bagitahu bahawa ada.

**YB ADUN Johol:** Okey, okey.

**YB ADUN Palong:** Di Gemas ada, di Rembau ada .....

**YB ADUN Gemas:** Terima kasih.

**YB ADUN Palong:** Cuma di Johol belum sampai lagi.

**YB ADUN Gemas:** Terima kasih.

**YB ADUN Palong:** Seterusnya juga daripada Yang Berhormat ADUN Johol yakni berkenaan pembangunan belia dan sukan di luar bandar, perlukan pusat belia. Diwujudkan satu pusat belia yang mempunyai pelbagai kemudahan. Untuk makluman Yang Berhormat ADUN Johol, bermula pada bulan Februari 2023, Jabatan Belia Dan Sukan Negeri Sembilan bersama dengan Majlis Belia Daerah Rembau telah menyediakan satu pusat aktiviti belia yang dinamakan sebagai *Rembau Youth Hub*. Maknanya ada ya. Pusat aktiviti belia ini telah beroperasi sepenuhnya di bawah kendalian Majlis belia Daerah Rembau, dipantau oleh Pejabat Belia Dan Sukan Daerah Rembau. Fungsi *Rembau Youth Hub* adalah sebagai *one stop centre* kepada belia di Daerah Rembau khususnya, untuk menjalankan aktiviti dan mendapatkan pelbagai info yang ditawarkan kepada belia di Daerah Rembau. Antara kemudahannya ialah Wifi percuma yang boleh diakses oleh para belia yang berkunjung di pusat ini, kemudian ada permainan *Play Station 4* dan juga ada meja bagi permainan *pool* dan sebagainya. Jadi ini adalah usaha yang dibuat di *Rembau Youth Hub*. Jadi konsep yang sama boleh kita buat di kawasan Johol, kita jadikan dia *Johol Youth Hub*, haa ya.

Seterusnya adalah jawapan dari, kepada persoalan YB ADUN Sungai Lui. Ini berkenaan dengan pembangunan belia lebih bersifat holistik bagi membentuk pimpinan pelapis masa hadapan ya, khususnya di kawasan felda dan, dan juga sukan permotoran. Untuk maklumat Yang Berhormat ADUN Sungai Lui, Kementerian Belia Dan Sukan melalui Institut Pembangunan Dan Kecemerlangan Kepimpinan ataupun i-LEAD adalah sebuah agensi yang bertanggungjawab dalam membentuk dan

melaksanakan program belia yang dibagikan mengikut kluster seperti kluster kepimpinan, kerjaya, modal insan dan kenegaraan. Antara objektif program-program ini adalah untuk membentuk pembangunan secara holistik dan melahirkan kepimpinan pelapis dari golongan belia dan menerapkan semangat cintakan negara.

Selain daripada itu, Jabatan Belia Dan Sukan Negeri sentiasa menyokong dan membantu persatuan-persatuan belia secara keseluruhannya dalam melaksanakan program-program yang boleh meningkatkan semangat patriotism di kalangan belia termasuk belia-belia di kawasan felda. Untuk pengetahuan ADUN Sungai Lui, yang tak ada dalam Dewan, dia keluar ya, yakni saya juga telah berbincang dengan Pengarah i-LEAD ni supaya kursus-kursus yang diadakan di peringkat Negeri Sembilan akan ada elemen ataupun modul tambahan yang akan menyuntik semangat cintakan Negeri Sembilan, yang akan kita modifikasikan sedikit untuk program-program pada tahun hadapan.

Kementerian Belia Dan Sukan juga melalui Jabatan Belia Dan Sukan Negeri Sembilan telah merancang untuk melaksanakan program dalam sukan permotoran bagi menggalak dan menarik golongan belia untuk menyertai sukan permotoran di Negeri Sembilan. Antara program yang akan dilaksanakan adalah seperti *KBS Motosport Carnival* pada 2 hingga 3 Disember di Litar Jempol Motorplex Jempol. Kemudian Klinik Cub Prix 2022, ini berumur 18 tahun ke atas, Klinik Cub Prix 2023 ya, 18 tahun ke atas, pada 18 hingga 19 November di Perkarangan Belia Dan Sukan Negeri Sembilan, Paroi. Yang ketiganya Klinik Motocross 18 tahun ke atas yang dijadualkan pada 9 Disember 2023 di Litar Motocross Gemencheh dan Klinik Go Kart untuk peserta berumur 7 hingga 25 tahun, bertarikh 10 Disember 2023 di Litar Go Kart X Park D'Tempat, di, di D'Tempat Country Club, Sendayan. Inilah di antara program-program permotoran.

Seterusnya adalah persoalan dibangkitkan oleh YB Jeram Padang. YB Jeram Padang mengenai pembinaan kompleks sukan mini yang mempunyai jeram, yang mempunyai padang di Jeram Padang. Jeram Padang tapi tak ada padang ya.

**YB ADUN Jeram Padang:** Tolong, YB.

**YB ADUN Palong:** Untuk makluman Dato' Yang Dipertua, KBS melalui Jabatan Belia Dan Sukan Negeri buat masa ini tiada perancangan dalam membina kompleks sukan mini yang mempunyai padang di dalam kawasan Dewan Undangan Negeri DUN Jeram Padang setakat ini. Namun demikian, permohonan Yang Berhormat YB boleh buat permohonan untuk dikemukakan kepada pihak Kementerian Belia Dan

Sukan sekiranya ada kawasan atau tanah yang sesuai untuk kita bangunkan sebuah kompleks sukan mini di Jeram Padang.

**YB ADUN Jeram Padang:** Okey YB, baik YB.

**YB ADUN Palong:** Okey.

**YB ADUN Jeram Padang:** *Insyallah.*

**YB ADUN Palong:** Seterusnya daripada YB ADUN Juasseh yakni berkenaan dengan penumpuan prestasi mutu sukan negeri, persediaan awal Temasya Sukan Malaysia dan lain-lain. Untuk makluman Yang Berhormat ADUN Juasseh, sukan merupakan salah satu kaedah untuk memupuk perpaduan dan semangat kenegaraan khususnya di kalangan anak muda di negara ini. Dalam usaha memastikan rakyat negeri ini aktif dalam bidang sukan, pelbagai aktiviti telah dilaksanakan oleh agensi di bawah Kementerian Belia Dan Sukan serta Kerajaan Negeri Sembilan.

Dari aspek pembangunan dan kecemerlangan sukan, seharusnya penumpuan sukan perlu diberikan bagi memastikan sukan-sukan utama khususnya melibatkan penyertaan atlet ke temasya-temasya besar seperti Sukan Olimpik, Sukan Asia, Sukan Komanwel, Sukan SEA dan Sukan Malaysia. Sukan-sukan pilihan yang tidak tersenarai dalam temasya sukan utama dan sukan teras negara, fokus sukan negeri masih boleh melaksanakan program pembangunan sukan masing-masing dengan bantuan daripada Kerajaan Negeri melalui Majlis Sukan Negeri, Negeri Sembilan. Kerajaan Negeri melalui Majlis Sukan Negeri, Negeri Sembilan telah merangka program persediaan Sukan Malaysia 2024 dan semua 37 Persatuan Sukan Negeri yang terlibat dengan penyertaan atlet telah dipanggil untuk menghadiri taklimat pada 6 September yang lalu. Dipengerusikan oleh Pengarah sendiri, Pengarah Majlis Sukan Negeri Sembilan. Semua wakil Persatuan Sukan Negeri yang telah hadir telah memberikan maklum balas berkaitan penyertaan serta prestasi semasa atlet sukan masing-masing. Antara butiran yang telah dibentangkan semasa perjumpaan bersama persatuan adalah:

- Yang pertama: dasar penyertaan pasukan ke Temasya Sukan Malaysia adalah dengan mengambil kira pencapaian pingat pasukan berkenaan di 3 temasya sebelum ini. Bagi penyertaan di Temasya Sukan Malaysia 2024, Majlis Sukan Negeri telah memaklumkan hanya mengambil kira pencapaian di 2 temasya iaitu Temasya Sukan Malaysia 2018 dan 2022. Pencapaian di temasya 2016 tidak diambil kira, tidak diambil kira kerana faktor jarak masa yang terlalu jauh dan tidak relevan.

- Yang keduanya adalah semua atlet ataupun pasukan perlu melepasi had kelayakan yang telah ditetapkan. Bagi sukan yang boleh diukur adalah tidak menjadi masalah untuk melepasi kelayakan, tetapi bagi sukan-sukan berpasukan, penetapan telah dibuat di mana perlu berada di kelompok 4 terbaik di bawah 21 tahun, dan syarat tambahan ialah 70% atlet masih boleh beraksi di tahun 2024. Penetapan penyertaan ini selaras dengan ucapan disampaikan oleh Yang Amat Berhormat Menteri Besar pada Majlis Penyampaian Insentif Kemenangan Atlet Dan Pegawai Di Temasya Sukan Malaysia 2022, pada 16 Mac 2023 yang lalu.
- Antara faktor lain diambil kira bagi penyertaan ke Temasya Sukan Malaysia adalah struktur tadbir urus Persatuan Sukan Negeri yang baik dan teratur, mempunyai kemudahan pusat latihan dan program pembangunan yang berterusan. Persatuan juga perlu mempunyai perancangan program pembangunan yang komprehensif dan struktur tadbir yang stabil bagi meyakinkan Kerajaan Negeri untuk menyalurkan dana.

Dato' Yang Dipertua, pencarian bakat-bakat baru dalam bidang sukan bukan hanya tanggungjawab utama Majlis Sukan Negeri semata-mata. Ianya merupakan usahasama di antara pemegang taruh yang lain iaitu Persatuan Sukan Negeri, Jabatan Pendidikan Negeri dan sekolah-sekolah sukan negeri. Kolaborasi ini akan mewujudkan satu usahasama yang baik dalam mencungkil bakat-bakat baru di dalam pelbagai jenis sukan. Untuk makluman, pusat-pusat latihan yang telah ditubuhkan kebanyakannya beroperasi di sekolah-sekolah yang telah dikenal pasti di mana kepakaran kejurulatihan terdapat di situ. Kepakaran jurulatih di kalangan guru merupakan salah satu perkara penting dalam mengenal pasti bakat-bakat yang ada di peringkat umur seawal 6 tahun. Majlis Sukan Negeri Sembilan juga turut mendapatkan khidmat Institut Sukan Negara Malaysia dan kepakaran dari Fakulti Sains Sukan UiTM Seremban 3 dalam mengaplikasikan sains sukan untuk ujian prestasi dan pengukuran tahap kecergasan atlet supaya atlet sentiasa berada di tahap yang memuaskan sebelum menyertai Temasya Sukan Malaysia.

Kesimpulannya, Dato' Dipertua, penyertaan pasukan atau atlet menyertai Temasya Sukan Malaysia bukanlah semata-mata untuk penyertaan pendedahan, tetapi sebaliknya adalah menyertai kejohanan yang melibatkan persaingan tertinggi di peringkat kebangsaan yang dianjurkan di negara kita. Temasya Sukan Malaysia yang dianjurkan berselang seli dengan Temasya Sukan SEA adalah merupakan satu platform untuk negara untuk memilih atlet. Temasya Sukan Malaysia tahun hadapan akan dikelolakan oleh Kerajaan Negeri Sarawak yang akan berlangsung pada 17 hingga 24 Ogos 2024.

Temasya Sukan Malaysia bukanlah merupakan kejohanan pendedahan yang boleh disertai oleh semua atlet dari Persatuan Sukan Negeri. Temasya ini merupakan pengumpulan atlet-atlet terbaik di peringkat negeri, seluruh negara untuk bertanding untuk menempatkan diri dalam program-program latihan di peringkat kebangsaan dan seterusnya mewakili negara ke temasya utama. Sebagai makluman tambahan, semua keputusan penyertaan pasukan ke Temasya Sukan Malaysia akan dibawa dan diputuskan dalam Majlis Mesyuarat Kerajaan Negeri sebelum pendaftaran dikemukakan kepada Sekretariat Jawatankuasa Induk Sukan Malaysia.

Seterusnya Dato' Yang Dipertua, ialah berkenaan soalan dikemukakan oleh YB ADUN Kota. Yang menyuarakan tentang tiada perhatian daripada Kerajaan Negeri kepada atlet Muay Thai dari segi sokongan kewangan dan kemudahan. Untuk makluman Yang Berhormat ADUN Kota, ada tak ADUN Kota? Ada, okey. Majlis Sukan Negeri Sembilan mempunyai dasar bagi pemberian bantuan atau sumbangan yang hanya disalurkan kepada Persatuan Sukan Negeri, Persatuan Sukan Negeri sahaja. Persatuan Sukan Negeri yang dimaksudkan adalah Persatuan Sukan Negeri yang berdaftar dengan Pesuruhjaya Sukan Malaysia di bawah kategori sukan berprestasi tinggi ataupun *high performance sport*, ya, *high performance sport* sahaja. Bagi menjawab soalan ini, atlet muay thai yang dimaksudkan tersebut adalah datangnya daripada Kelab Muay Thai Bullet ya. Untuk sumbangan dan bantuan Kelab Muay Thai Bullet ini, mereka perlu bergabung di bawah Persatuan Muay Thai Negeri Sembilan bagi sebarang program atau aktiviti yang dilaksanakan yang melibatkan penganjuran atau penyertaan atlet ke peringkat negeri mahupun peringkat luar negara. Semua permohonan bantuan perlu dikemukakan melalui Persatuan Muay Thai Negeri Sembilan mengikut peraturan yang telah ditetapkan.

Dalam isu pusat latihan muay thai pula, setakat ini Majlis Sukan Negeri mempunyai satu gelanggang muay yang diletakkan, diletakkan secara kekal yang dijadikan pusat latihan muay negeri di arena kompleks; Kompleks Sukan Tan Sri Dr Hj Mohd Said, Seremban 2 ya. Ada di Seremban 2. Gelanggang ini terbuka penggunaannya kepada semua atlet dari persatuan negeri atau kelab muay yang berhasrat untuk menggunakannya dengan menyediakan jadual latihan mengikut kekosongan tarikh dan masa yang ada.

Bagi cadangan pembinaan pusat latihan di Pekan Kota, pusat latihan muay di Pekan Kota, YB ADUN bolehlah mengemukakan permohonan rasmi untuk pertimbangan yang selanjutnya. Jadi sekurang-kurangnya bekas, kerana ADUN Kota ni adalah bekas pegawai JBS, jadi kalau boleh

kita buat di situ, adalah satu pengiktirafan kepada seorang bekas pegawai Jabatan Belia Dan Sukan.

**YB ADUN Gemas:** Exco boleh mencelah?

**YB ADUN Palong:** Ya.

**YB ADUN Gemas:** Mohon izin, tadi disebut, tadi saya tak nak ganggu daripada awal, Kompleks Mini Sukan Gemas yang sepatutnya siap pada Oktober 2023, saya difahamkan ini kali ketiga diberikan kelebihan kepada kontraktor untuk menangguhkan. Jika daripada ucapan YB Exco tadi, dikatakan, dijanjikan pada April 2024 akan siap. Adakah ini adalah permohonan terakhir atau ada lagi permohonan untuk menangguhkan siapnya projek tersebut?

Yang kedua, maaf, pendek. Tahniah kepda pasukan sepak takraw Negeri Sembilan yang menjadi juara Piala Kejuaraan STL di Johor, Johor tempoh hari. Ini satu, sebab saya lihat Dato' Seri, Yang Amat Berhormat Sikamat turut hadir semasa pusingan awal di Dewan MBS, cukup ramai Dato' Seri. Masa tu saya bawa pasukan negeri sebelah, tapi saya tengok semangat Dato' Seri walaupun malam tu, kita berhadapan pasukan Malaysia iaitu Kuala Lumpur, Kuala Lumpur, tapi semangat juang, kita perlu ada satu strategi untuk memastikan pasukan sepak takraw Negeri Sembilan Antlers ini membawa satu, sebab *brand* sepak takraw apabila kita lihat di Astro, *follower*, pengikut, maaf Tuan *Speaker*, pengikut dia cukup ramai, jadi kita, *brand* kita dah ada dah, kita dah bawak, dah tunjuk dah kejuaraan. Yang main pun, contoh Dik Ma ni, Dik Ma dengan keluarga dia ni memang orang Negeri Sembilan. Sayang kalau esok, tahun 2024, tiba-tiba kita gagal mempertahankan atau berada dalam 6 pasukan terbaik. Jadi kita mohon melalui Exco Belia Dan Sukan, fikir-fikirkan, *insyaAllah* Gemas sedia membantu.

**YB ADUN Palong:** Terima kasih Gemas. Berkenaan dengan, berkenaan dengan kompleks Sukan Gemas ini, setakat ini komitmen mereka adalah menyiapkan pada April 2024. Jadi kita tunggu dah lihatlah sampai April 2024 tahun depan ya.

**YB ADUN Gemas:** Adakah ini yang terakhir atau ....

**YB ADUN Palong:** Tak tahu lagi, itu bergantung kepada prestasi yang akan dibuat oleh kontraktor tersebut ya. Saya sempat pergi, melawat, dan saya tanya sendiri, sebenarnya bukan ada struktur yang hebat mana pun, tinggal hari tu sebabkan oleh COVID dan sebagainya, dia jadi lambat, dengan masalah pekerja. Dan tempoh hari mereka beri komitmen untuk menyiapkannya pada bulan April pada tahun hadapan.

Jadi marilah kita berdoa agar kompleks sukan di Gemas tu akan dapat direalisasikan sebab .....

**YB ADUN Gemas:** Aaminn.

**YB ADUN Palong:** Aaminn, okey. Seterusnya ialah soalan daripada YB ADUN Gemencheh berkenaan dengan peruntukan untuk sukan kriket. Haa? Takraw tu okey dah tu, terima kasih atas sumbangan untuk membantu, Gemas. Saya akan, saya akan tuntutan pertolongan tu. Seterusnya berkenaan dengan kriket oleh ADUN Gemencheh. Baik, untuk makluman YB ADUN Gemencheh, sukan kriket merupakan salah satu sukan yang telah disenaraikan untuk dipertandingan di Temasya Sukan Malaysia 2024, tahun depan. Pada tahun 2022, Kerajaan Negeri Sembilan telah menyalurkan sebanyak 63,000.00 ringgit dan 17,000.00 ringgit pada tahun 2023 kepada Persatuan Kriket Negeri Sembilan bagi menyertai kejohanan di peringkat kebangsaan, pembelian peralatan dan subsidi makan bagi latihan. Bagi bantuan akan datang, pihak Persatuan Kriket Negeri Sembilan boleh mengemukakan permohonan rasmi ya, kepada Majlis Sukan Negeri untuk dipertimbangkan penyaluran geran ataupun bantuan ya. Dan apa pun tahniah kepada Moncheh Boys.

Seterusnya Dato' Dipertua, adalah soalan terakhir daripada ADUN Chuah yakni cadangan pembinaan Kompleks Sukan Chuah. Di Chuah juga sama, dia tak ada padang ya, dia langsung tak ada padang. Haa sama Jeram padang-lah, dia tak ada padang. Ada DUN tu pulak banyak padang, tak ada orang nak main. Yang ni padang yang tak ada. Jadi untuk yang ini, Dato' Seri, Dato' Yang Dipertua, tanah yang dimaksudkan merupakan tanah kerajaan seluas 6.5 ekar di kawasan lapang Kampung Sawah, Chuah dan telah dirizabkan seluas 1.0 ekar untuk tujuan pembinaan Dewan Serbaguna Kampung Sawah. Manakala baki 5.5 ekar merupakan tanah kosong kerajaan. Berdasarkan cadangan yang diusulkan, pentadbiran Kerajaan Negeri akan melihat dari segi kesesuaian lokasi untuk pembangunan akan datang supaya Kompleks Sukan Chuah. Itu saja Dato' Dipertua, jawapan-jawapan kepada persoalan yang telah dikemukakan. Terima kasih, *assalamualaikum WBT*.

**YB Yang Dipertua Dewan:** *Waalaiikumsalam*. Terima kasih. Silakan YB Linggi.

**YB ADUN Linggi:** *Bismillahhirrahmanirrahim. Assalamualaikum WBT*, salam sejahtera, salam perpaduan. Akhirnya dapat juga saya berucaplah dalam Dewan yang mulia ni, selepas 3 hari. Pertamanya saya ingin merakamkan jutaan tahniah kepada Yang Berhormat Dato' *Speaker* kerana telah dipilih dan juga dilantik sebagai Yang Dipertua Dewan Undangan Negeri pada penggal kali ini. Dan saya juga ingin merakamkan

setinggi-tinggi tahniah kepada Yang Amat Berhormat Dato' Seri Aminuddin Harun kerana telah dipilih dan juga dilantik sebagai Menteri Besar Negeri Sembilan untuk penggal yang kedua. Di kesempatan ini juga saya ingin merakamkan ju, tahniah kepada Yang Berhormat ADUN Pertang ya, kerana telah dipilih dan juga dilantik sebagai Exco Kanan. Dan yang keempat, saya mengambil kesempatan ingin merakamkan jutaan terima kasih kepada pengundi-pengundi saya di dalam DUN Linggi terutamanya kepada 7,832 pengundi yang telah mengundi ya, Barisan Nasional bersama dengan Pakatan Harapan dalam pilihan raya yang lalu. Dan saya harap pengundi-pengundi tak, mengundi saya tu tak perlu bimbang kerana menjadi amanah dan tanggungjawab kita semua untuk kita jaga semua yang ada dalam DUN kita.

Saya tidaklah berhasrat untuk mengambil, menggulung, mengambil masa yang lama. Cuma dalam perbincangan yang telah ditimbulkan oleh Yang Berhormat daripada DUN Seri Menanti. Untuk makluman Yang Berhormat, kesemua pelaksanaan di bawah inisiatif JENDELA melibatkan peruntukan melalui 2 sumber iaitu satu daripada kerajaan melalui Program Pemberian Perkhidmatan Sejagat ataupun USP dan pelaburan komersial oleh Syarikat Pemberi Perkhidmatan. Untuk makluman Yang Berhormat, terdapat 2 projek menara baru di Kampung Mampas dan juga Kampung Orang Asli Langkap di dalam DUN Seri Menanti di mana ianya dibina melalui dana Pemberian Perkhidmatan Sejagat ataupun USP yang dikawal selia oleh, oleh Suruhanjaya Komunikasi Dan Multimedia Malaysia iaitu MCMC. Manakala satu menara telah selesai dinaik taraf iaitu di Kampung Meruas.

Pihak TM juga telah menyediakan perkhidmatan jalur lebar di kawasan DUN Seri Menanti yang telah tersedia perkhidmatan fiber jalur lebar Unifi sejak dari tahun 2021 lagi. Untuk makluman pihak semua, TM telah memasang sejumlah 1,376 *port* di DUN Seri Menanti. Dan bilangan *port* yang telah dilanggan adalah sebanyak 588 ataupun 43%. Masih terdapat lagi *access port* untuk dilanggan dan TM telah mengumumkan harga pakej internet yang terbaru yang jauh lebih murah untuk kemudahan rakyat.

Pemantauan secara berkala dari semasa ke semasa juga dilaksanakan oleh pihak MCMC untuk memastikan kualiti liputan kualiti dalam keadaan baik. Dalam masa yang sama pihak MCMC juga turun padang bagi menyantuni penghuni berkaitan aduan dan masalah yang dihadapi oleh penduduk setempat.

Seterusnya isu yang dibangkitkan oleh ADUN Juasseh. Untuk makluman Yang Berhormat, sebanyak 23 menara telah selesai dinaik taraf di kawasan DUN Juasseh dan sebanyak 1,617 premis telah tersedia dengan

sambungan gentian optik bagi memberikan liputan yang lebih baik. Pihak MCMC juga telah menyantuni aduan yang telah diterima di kawasan Masjid Kariah Pelangai dan Balai Raya Kampung Pelangai, di mana masalah telah diselesaikan hasil dari penilaian audit dibuat bersama penduduk, hasil dari penilaian tersebut mendapati purata kelajuan, kelajuan di kawasan tersebut telah bertambah baik iaitu kepada 62 *megabyte*. Pemantauan secara berkala dari semasa ke semasa juga dilaksanakan oleh pihak MCMC bagi memastikan kualiti liputan dalam keadaan baik. Dalam masa yang sama, pihak MCMC juga turun padang bagi menyantuni aduan dan masalah yang dihadapi oleh penduduk setempat. Sekian, terima kasih.

**YB Yang Dipertua Dewan:** Terima kasih.

## 5. PENANGGUHAN MESYUARAT

**YB Yang Dipertua Dewan:** Terima kasih. Jadi ahli-ahli Yang Berhormat sekalian, sebentar lagi saya akan menangguh mesyuarat Dewan. Mesyuarat Dewan akan disambung semula pada hari Khamis; 12 Oktober 2023 bersamaan 26 Rabiulawal 1445 Hijrah mulai jam 10.00 pagi. Jadi hari Khamis secara tradisinya, Yang Berhormat dan hadirin boleh memakai baju, baju batiklah, kecuali saya terpaksa jubah jugaklah ya. Mesyuarat Dewan ditangguhkan.

**Persidangan ditangguhkan pada jam 5.25 petang**

## PENYATA DEWAN

### PERSIDANGAN KEDUA (PERASMIAN) PENGGAL PERTAMA DEWAN UNDANGAN NEGERI, NEGERI SEMBILAN YANG KE-15 PADA 12 OKTOBER 2023 (KHAMIS)

#### HADIR:

BIL.	NAMA	KAWASAN
1.	YANG DIPERTUA DEWAN UNDANGAN NEGERI, NEGERI SEMBILAN: YB Dato' M K Ibrahim bin Abd Rahman	
2.	MENTERI BESAR NEGERI SEMBILAN: YAB Dato' Seri Haji Aminuddin b. Haji Harun	Sikamat
3.	YB Datuk Seri Haji Jalaluddin bin Haji Alias	Pertang
4.	YB Tuan Teo Kok Seong	Bahau
5.	YB Puan Noorzunita Begum binti Mohd Ibrahim	Pilah
6.	YB Dato' Haji Ismail bin Lasim	Senaling
7.	YB Tuan Arul Kumar a/l Jambunathan	Nilai
8.	YB Tuan Haji Mustapha bin Nagoor	Palong
9.	YB Puan Nicole Tan Lee Koon	Bukit Kepayang
10.	YB Tuan Veerapan a/l Superamaniam	Repah
11.	YB Datuk Mohd Faizal bin Ramli	Linggi
12.	YB Tengku Hajah Zamrah binti Tengku Sulaiman	Ampangan
13.	YB Dato' Ir. Haji Bakri bin Sawir	Klawang
14.	YB Dato' Haji Zaifulbahri bin Haji Idris	Chembong
15.	YB Tuan Gunasekaren a/l Palasamy	Seremban Jaya
16.	YB Tuan Choo Ken Hwa	Lukut
17.	YB Tuan Chew Seh Yong	Lobak
18.	YB Tuan Mohd Razi bin Mohd Ali	Sungai Lui
19.	YB Puan Sri Bibi Sharliza binti Mohd Khalid	Juasseh
20.	YB Tuan Ng Chin Tsai	Temiang

<b>BIL.</b>	<b>NAMA</b>	<b>KAWASAN</b>
21.	YB Tuan Haji Saiful Yazan bin Sulaiman	Johol
22.	YB Tuan Yap Yew Weng	Mambau
23.	YB Dato' Mohd Zaidy bin Abdul Kadir	Jeram Padang
24.	YB Dr. Rajasekaran a/l Gunnasekaran	Sri Tanjung
25.	YB Tuan Muhammad Sufian bin Maradzi	Seri Menanti
26.	YB Tuan Siau Meow Kong	Rahang
27.	YB Tuan Suhaimi bin Aini	Kota
28.	YB Tuan Yew Boon Lye	Chuah
29.	YB Datuk Haji Mohd Asna bin Amin	Lenggeng
30.	YB Tuan Suhaimizan bin Bizar	Gemencheh
31.	YB Tuan Haji Ridzuan bin Ahmad	Gemas
32.	YB Tuan Mohd Fairuz bin Mohd Isa	Serting
33.	YB Tuan Mohamad Hanifah bin Abu Baker	Labu
34.	YB Tuan Haji Kamarol Ridzuan bin Mohd Zain	Paroi
35.	YB Tuan Abdul Fatah bin Zakaria	Bagan Pinang

**TIDAK HADIR DENGAN IZIN**

1.	YB Tuan Loke Siew Fook	Chennah
2.	YB Dato' Seri Utama Haji Mohamad bin Haji Hasan	Rantau

**HADIR MENGIKUT FASAL 37(3) UNDANG-UNDANG  
TUBUH KERAJAAN NEGERI SEMBILAN**

1. SETIAUSAHA KERAJAAN NEGERI, NEGERI SEMBILAN  
(YB Dato' Mohd Zafir bin Ibrahim)
2. PENASIHAT UNDANG-UNDANG NEGERI, NEGERI SEMBILAN  
(YB Dato' Muzalmah binti Mustapha Kamal)
3. PEGAWAI KEWANGAN NEGERI, NEGERI SEMBILAN  
(YB Dato' Mohd. Khidir bin Majid)

**TURUT HADIR**

1. SETIAUSAHA DEWAN UNDANGAN NEGERI, NEGERI SEMBILAN  
(Mohd Amin bin Ludin)
2. KETUA PENOLONG SETIAUSAHA  
(Mohd Zamri bin Md Saad)

[Setiausaha Dewan mengumumkan ketibaan YB Yang Dipertua Dewan.]

[Mesyuarat dimulakan pada jam 10.02 pagi.]

**1. MEMBACA DOA**

**Setiausaha Dewan:** Susunan Mesyuarat. Perkara pertama, Membaca Doa. Dipersilakan Yang Berhormat ADUN Lenggeng.

[YB ADUN Lenggeng telah membacakan doa di bawah Peraturan IX, Peraturan-Peraturan dan Perintah-Perintah Tetap Dewan Negeri]

**2. PERUTUSAN YANG DIPERTUA DEWAN**

**Setiausaha Dewan:** Perkara kedua, Perutusan Yang Berhormat Dato' Yang Dipertua Dewan.

**YB Yang Dipertua Dewan:** *Assalamualaikum* WBT, *Bismillahirrahmanirrahim alhamdulillahirabbil'alamin wassolatu wassalamu'ala asrofil ambiya iwalmursalin wa'ala alihi wasohbihi ajma'in. Rodhitsu billahi robba, wabil islami diina, wabimuhammadin nabiyya warosuula. Alhamdulillah*, segala puji bagi Allah Tuhan Pencipta Alam, selawat dan salam ke atas junjungan Nabi Muhammad SAW, ahli keluarga dan para sahabat Baginda.

Yang Amat Berhormat Dato' Seri Haji Aminuddin bin Haji Harun; Menteri Besar Negeri Sembilan, Yang Berhormat Ahli-Ahli Majlis Mesyuarat Kerajaan Negeri, ahli-ahli Yang Berhormat, ketua-ketua jabatan, Dato'-Dato', Datin-Datin, tuan-tuan, puan-puan hadirin yang dihormati sekalian. *Alhamdulillah*, syukur ke hadrat Allah, dengan limpah dan izinNya, dapat kita bersama-sama bersidang pada hari ini, hari Khamis; 12 Oktober 2023 bersamaan 26 Rabi'ulawal 1445 Hijrah. Persidangan kita telah pun masuk ke hari keempat.

Pada hari ini, *insyaAllah*, kita akan menyempurnakan susunan mesyuarat sebagaimana yang telah ditetapkan. Walau bagaimanapun, sekiranya masa mengizinkan, kita akan cuba selesaikan susunan mesyuarat hari esok iaitu Hari Jumaat pada hari ini.

Untuk makluman hadirin sekalian dan khususnya kepada ahli-ahli Yang Berhormat, sebagaimana makluman saya semalam, urusetia Dewan Undangan Negeri pada masa ini juga sedang bertungkus lumus untuk proses penyediaan notis-notis dan persiapan untuk Persidangan Bajet

Tahun 2024 yang telah diperkenankan oleh Ke Bawah Duli Yang Maha Mulia Tuanku bermula pada 1 Disember 2023 nanti, *insyaAllah*. Sehubungan dengan itu, saya telah membenarkan notis panggilan persidangan tersebut diedarkan segera dan pihak urusetia Dewan diminta memastikan notis berkenaan dapat diedarkan pada hari ini juga.

Hadirin sekalian, sebagaimana biasa, saya ingin menyeru kepada semua hadirin agar sentiasa mematuhi Peraturan-Peraturan Dan Perintah-Perintah Tetap Dewan serta tata kelakuan dan etika bagi ahli Yang Berhormat sepanjang persidangan. Dipohon kerjasama semua hadirin untuk memastikan persidangan kita pada kali ini berjalan dengan lancar dan sempurna. Sekian, terima kasih. Selamat Bersidang

### 3. **PERTANYAAN-PERTANYAAN**

#### **Pertanyaan-Pertanyaan Yang Berkehendakkan Jawapan Lisan (Hari Keempat)**

**Setiausaha Dewan:** Perkara ketiga, Pertanyaan-Pertanyaan. Pertanyaan-pertanyaan yang berkehendakkan jawapan lisan (Hari Keempat).

**YB Yang Dipertua Dewan:** Saya, dijemput Labu, ADUN Labu.

**YB ADUN Labu:** No. 1 ya. Saya bangun untuk bertanyakan soalan nombor 1. Terima kasih.

**YB ADUN Pertang:** *Bismillahirrahmanirrahim*, Yang Berhormat Dato' Yang Dipertua, soalan, pertamanya saya nak ucapkan terima kasih kepada Yang Brhormat ADUN Labu yang bertanyakan soalan berkaitan dengan kenaikan harga beras import ya. Dato' Yang Dipertua, untuk makluman ahli-ahli Yang Berhormat, harga beras import ini sememang mampu, menjadi satu fenomena luar biasa kali ini. Kenaikan harga beras import mendatangkan selain daripada mendatangkan satu lagi beban kepada rakyat untuk mendapatkan bekalan beras import dengan harga yang hampir 2 kali ganda berbanding dengan harga sebelum ini, ia juga memberi kesan kepada kekurangan ataupun penambahan permohonan dan permintaan kepada beras putih tempatan.

Kerana itu untuk makluman ahli-ahli Yang Berhormat terutamanya Yang Berhormat ADUN Labu, bekalan beras tempatan kita mempunyai kekurangan hasil daripada kenaikan harga beras import dan jugak hasil daripada pengeksportan oleh negara-negara jiran seperti India, *Cambodia*, Vietnam dan jugak Thailand yang semakin kurang peratusannya kepada negara kita. Walau bagaimanapun, untuk

makluman ahli Yang Berhormat, pihak Kerajaan Negeri khususnya Negeri Sembilan telah mengambil beberapa langkah intervensi bagi mengatasi masalah kekurangan beras putih tempatan kerana permintaan yang semakin hari semakin banyak, semakin tinggi, maka beras putih tempatan kita kurang. Jabatan Pertanian melalui FAMA telah melakukan beberapa langkah intervensi bermula daripada 20 september yang lalu, Dato' Yang Dipertua, yakni telah membantu menyediakan 20 metrik tan ataupun 2,000 pek beras 10 kilo dengan harga 26.00 ringgit di Negeri Sembilan. Ini harga memang tak naik, kalau ada dia orang kata bagitau ada pihak-pihak kata harga beras tempatan ni nak naik harga, tak ada. Itu pembohong Yang Berhormat. Saya sebut di Dewan ini, harga tetap 26.00 ringgit.

Dan kali ini edaran dibuat melalui FAMA di beberapa lokaliti. Daripada fasa pertama 20 haribulan kita edarkan 20 metrik tan, 22 haribulan kita edarkan lagi 25 metrik tan dan pada 26 haribulan kita edarkan 60 metrik tan. Bekalan yang diterima oleh FAMA ini, untuk makluman ahli Dewan, telah pun kita edarkan ke 5 *outlet* pemasaran FAMA Negeri Sembilan iaitu Pusat Operasi FAMA Senawang, Pusat Operasi FAMA Kuala Pilah, Pusat Operasi FAMA Jelebu dan juga PTKM Palong dan Agro Bazaar Sendayan.

Selain daripada itu, untuk makluman ahli Dewan, 16 *outlet* usahawan Agro Bazaar FAMA di 7 daerah di Negeri Sembilan akan menerima bekalan beras putih tempatan daripada FAMA untuk dipasarkan kepada penduduk sekitar Negeri Sembilan. Saya mengharapkan dengan adanya inisiatif Kerajaan Negeri melalui FAMA dan juga Jabatan Pertanian ini, akan memberikan sedikit sebanyak bantuan bagi menyelesaikan masalah kekurangan beras putih tempatan. Pesawah dan, inisiatif yang telah dijalankan ini adalah merupakan antara beberapa perkara untuk membantu bagi mengisi kekurangan ini.

Perkara kedua, untuk makluman ahli Dewan, inisiatif kerajaan melalui Jabatan Pertanian di bawah Pakej Peningkatan Hasil Padi, ini adalah satu program lagi untuk mengatasi masalah kekurangan bekalan beras kita pada tempoh-tempoh yang akan datang. Kerajaan Negeri telah pun mengambil beberapa tindakan jangka panjang dari segi pembangunan tanah sawah yang merangkumi pembaikan infrastruktur ladang, sistem pengairan, peralatan tanah, program peningkatan hasil padi dan program tranformasi teknologi seperti penggunaan dron bagi, bagi tujuan pembajaan dan racun di sawah. Untuk makluman Yang Berhormat Labu dan juga makluman Dewan yang mulia ini, program-program peningkatan pada penghasilan padi ini, untuk makluman Dato' *Speaker*, telah pun kita rancang dan juga pihak jabatan telah menyediakan kertas dasar bagi kita laksanakan bagi tempoh 5 tahun

yang akan datang, bagi memastikan bekalan beras putih tempatan kita ini tidak akan mengalami *shortage*, dengan izin, pada tempoh 5 tahun yang akan datang. Terima kasih.

**YB ADUN Labu:** Soalan tambahan, Tuan *Speaker*. Yang di, Yang Dipertuan, rakyat sekarang terutama yang berpendapatan rendah benar dalam keadaan dalam tertekan dalam menguruskan perbelanjaan harian mereka dalam keadaan kebanyakan barangan keperluan asas meningkat naik. Di Malaysia ni, kita ada pokok sawit tapi kita minyak paket susah nak dapat. Kita ada tebu, sekarang kalau kita tengok di pasar raya, gula-gula semua dicatu. Kita ada padi, tetapi kita ada masalah beras. Jadi, soalan saya kepada Dato', kepada, soalan saya Dato' *Speaker*, dengan hanya kemampuan pengeluaran dalam negara dalam lingkungan 67%, apakah langkah yang diambil bagi memastikan hak membeli beras putih tempatan diutamakan dahulu kepada rakyat tempatan. Dan adakah Kerajaan Negeri mempunyai perancangan strategik jangka pendek, sederhana dan panjang seperti membuka kawasan tanaman padi yang baru bagi mencapai 80% pengeluaran dalam negara seterusnya memastikan visi kadar sara diri (SSR) Kerajaan Perpaduan pada tahun 2030 tercapai? Terima kasih.

**YB ADUN Pertang:** Dato' Yang Dipertua, seperti yang saya jelaskan tadi, sememangnya kita akui bahawa bekalan beras putih tempatan ini agak kurang sekarang. Bukan saja di dalam negara kita, malah di beberapa negara, kita mengalami kekurangan beras, ataupun bekalan beras terutamanya di seluruh nega, di seluruh negara. Faktornya ialah saya dah sebut, kerana India dia sekat eksport kita hampir 40% ke dalam negara kita kerana mereka memastikan bekalan makanan di India itu dapat di, dikawal dahulu.

Yang keduanya ialah kerana beras import ini harganya naik. Negara tak boleh kawal. Kita tak boleh letakkan harga siling bagi beras import tempatan. Kalau dulu 32.00 ringgit, sekarang 38.00, sekarang 40.00 ringgit dan peningkatan ini meningkat begitu mendadak hingga menjejaskan kemampuan ataupun menjejaskan keperluan masyarakat golongan-golongan tertentu untuk meneruskan bagi mendapatkan bekalan beras import. Sebagai contoh, saya nak bagitahu, ada sekelompok golongan masyarakat, dulu beli beras import dengan harga 25.00 ringgit, tetapi apabila beras, dengan harga 32.00 ringgit, tetapi apabila beras import ini naik sampai 38.00 ringgit, naik sampai 40.00 ringgit, dia dah tak beli beras import Dato' Dipertua, dia pergi beli beras putih tempatan. Sedangkan pembelian atau permintaan beras putih tempatan ni cukup untuk menampung bagi keperluan masyarakat yang daripada dulu membeli dan jugak mengisi keperluan beras putih tempatan kepada keluarga mereka. Jadi permintaan tu dah jadi banyak.

Bila permintaan tu jadi banyak Dato' Yang Dipertua, maka bekalan kita jadi *shortage*, jadi, dengan izin, jadi kurang untuk keperluan masyarakat ni.

Hasil daripada itu, Dato' Dipertua, langkah intervensi jangka pendek telah pendek telah kita ambil. Jangka panjang di Negeri Sembilan, kita telah pun, saya telah pun sebut tadi, kita telah mengemukakan beberapa langkah-langkah jangka pendek, sederhana dan panjang bagi kita tidak lagi boleh menghadapi masalah kekurangan ini pada masa akan datang. Di Negeri Sembilan ni, Dato' Yang Dipertua, untuk makluman Yang Berhormat Labu, labu ni tak ada kawasan tanam padi. Kawasan lain ada banyak kawasan tanam padi. Kita nak tambah 20 hektar lagi di Londah, Kampung Londah, Gemas. Kampung Londah. Kita nak tambah lagi kawasan penanaman padi. Dan kawasan-kawasan tanah terbiar juga kita nak tambah.

Kemudian kita ambil lagi langkah untuk meningkatkan kualiti benih kita. Dan kita akan wujudkan kawasan pembenihan padi ini di Negeri Sembilan, supaya dapat menampung keperluan bekalan beras tempatan bagi rakyat Negeri Sembilan. Pihak kerajaan belum lagi mengambil keputusan untuk mengenakan syarat tertentu bagi pembelian beras putih tempatan. Maknanya belum lagilah kepada untuk orang tempatan, bagi orang asing ni, dia tak boleh beli ni, belum lagi. Kerana bekalan kita masih cukup. Cuma harapan saya dan kerajaan, supaya rakyat Negeri Sembilan tidak panik dan tidak membuat pembelian panik kepada bekalan ini. *Insyallah* Kerajaan Negeri sentiasa memantau soal bekalan ini, dan saya yakin bekalan ini dapat kita tampung dari semasa ke semasa asalkan keadaan dan suasana pengedaran dan pembelian ini dapat kita kawal. Terima kasih.

**YB ADUN Gemas:** Datuk Exco, boleh saya tambahkan?

**YB ADUN Pertang:** Yang Berhormat kalau tanya, kena bangun mintak pada *Speaker*, bukan mintak pada saya.

**YB ADUN Gemas:** Sebab dah sentuh, sebab, terima kasih Dato' Exco. Sebab sebut Londah tadi. Kita ada satu masalah lagi di Tampin iaitu Bangka Hulu, Kampung Bangka Hulu apabila penduduk kampung memberikan kebenaran kepada kontraktor luar iaitu kita maksudkan syarikat luar untuk mengusahakan. Tapi apabila mereka tidak, ada tak kuasa daripada Kerajaan Negeri untuk, sebab dia tak buat pun sawah ni. Sayang. Di Bangka Hulu tu ada keluasan yang sepatutnya diusahakan, tapi apabila kontraktor telah membuat perjanjian dengan pemilik tanah, tapi mereka tak usahakan. Jadi pemilik tanah tak buat, dua-dua rugi, tiga-tiga rugi. Kerajaan Negeri rugi, operator tak buat, tak buat memang

dia rugilah, pemilik tanah tak dapat apa sebab perjanjian tu. Mohon Datuk Exco.

**YB ADUN Pertang:** Yang Berhormat Dato' *Speaker*, saya nak ucap terima kasih pada pandangan Yang Berhormat Gemas. Ini satu tanggungjawab Yang Berhormat. Akan datang Yang Berhormat kena *educate*, dengan izin, bagitahu kepada pemilik, pesawah padi, ni usahakan tanah ni sendiri. Kerana kerajaan bagi subsidi banyak Yang Berhormat kepada penanaman padi ni. Kita bagi bantuan bekalan apa yang kita nak bekal, apa, input pengairan air, kolaborasi antara jabatan dengan jabatan, kita beri penumpuan kepada pesawah padi ni Yang Berhormat.

Jadi Yang Berhormat, masalah kita sekarang ni ialah ada orang tengah *offer* harga lebih tinggi. Sekarang ni kerajaan harga kita ialah 1,200.00 ringgit/tan untuk padi proses, ada juga kilang, pengilang *offer* 1,700.00 kerana bekalan beras putih tempatan kita tinggi kualitinya Yang Berhormat. Jadi dia boleh *packing*, dia boleh *repack* kepada barang, kepada barang, kepada beras import, ini masalah kita. Tetapi akhirnya, kawasan, keadaan ini di dalam pemantauan dan pemerhatian kita, *insyaAllah*. Dan saya mengharapkan supaya *enforcement*, dengan izin, daripada Badan Kawal Selia Beras Negara dapat kita perhebatkan dan *insyaAllah* bekalan beras di Negeri Sembilan akan semakin hari semakin bertambah.

Kerana untuk makluman Yang Berhormat Gemas, sekarang ini kawasan penanaman padi di Negeri Sembilan ni, *in total* 1,200 hektar. Keperluan untuk kita mengeluarkan bagi keperluan *mini factory*, ataupun dengan izin ya, kilang sederhana skala kecil dalam sekitar 1,500. Kita ada *shortage about 300 hectares* lagi. Dan ini dalam pemerhatian kita untuk kita buat dari masa ke semasa. Kertas dasar dan konsep ini akan saya bantangkan dalam Mesyuarat MMK, dan *insyaAllah* Yang Amat Berhormat ADUN Sikamat akan memberikan kelulusan total kepada perancangan ini. Terima kasih Dato' *Speaker*.

**YB Yang Dipertua Dewan:** Terima kasih. Saya jemput YB Sungai Lui.

**YB ADUN Sungai Lui:** Yang Amat Berhormat Dato' Yang Dipertua, saya kemukakan soalan nombor 1, tentang lot perumahan generasi kedua felda dan jugak kalau boleh, bersekali dengan rumah-rumah yang terbengkalai di kawasan felda sekali.

**YB ADUN Pertang:** Saya lagi, mintak maaf Dato' *Speaker*. Semalam, inilah kesan apabila tak ada, Dato' *Speaker*, saya nak ucapkan terima kasih kepada Yang Berhormat ADUN Sungai Lui. Ini memang *forte* saya, Dato' Yang Dipertua, pasal lot generasi, rumah generasi kedua felda,

selain daripada *forte* ataupun dengan izin, ADUN bagi kawasan felda ni, saya percaya 40 kawasan felda di Negeri Sembilan menunggu jawapan kita ini.

Yang pertama Dato' Seri, Dato' Yang Dipertua, pentadbiran Kerajaan Negeri Sembilan sentiasa mengambil berat dan prihatin akan isu permasalahan yang dihadapi oleh generasi felda di Negeri Sembilan. Pihak FELDA bersama agensi teknikal yang lain telah mengadakan beberapa siri libat urus secara bersama bagi mengeluarkan satu garis panduan dan terma rujukan di dalam pelaksanaan Lot Generasi Kedua FELDA di Negeri Sembilan. Selain itu, FELDA telah mengadakan sesi taklimat kepada pengurusan dan generasi di Rancangan bagi menerangkan proses dan kaedah pelaksanaan LGF ini bagi mengelakkan kekeliruan, ke, ke kekeliruan, *confuse*, dengan izin Dato' Yang Dipertua, bagi mengelakkan, di peringkat bawahan Dato' Yang Dipertua, mintak maaf. Dato' Dipertua, senyum sikit, saya tengok muka masam.

Pada tahun 2022, yang ni saya nak ucap tahniah kepada Yang Amat Berhormat ADUN Sikamat, kerana telah melaksanakan dan memperkenalkan pemberian lot tanah kediaman bagi Generasi Baharu Felda yang telah dimulakan Di daerah Jempol dengan lokasi khusus iaitu di Felda Palong 12. Kita tepuk sikit pada ADUN Sikamat. Pemberian lot tanah ini adalah bagi lot kediaman dengan jumlah 4,000 kaki persegi. Dato' Dipertua, pemberian lot generasi ni adalah untuk mengisi keperluan yang diperlukan oleh generasi kedua, ketiga dan keempat felda. Masalah kita Dato' Yang Dipertua, sekarang ini kita kena siapkan dulu, nak kenal pasti di manakah lokaliti kawasan yang sesuai untuk diberikan dan juga dipecah-pecahkan 4,000 kaki persegi ni, di seluruh kawasan felda di 49 kawasan felda di Negeri Sembilan. Dan yang penting bagi kita ialah sebagai contoh, di Felda Palong 12 yang dibuat oleh Kerajaan Negeri tu, dia tak boleh kawasan ini kita bagi 10 tapak, kemudian di sudut Palong tu pulak bagi 12 tapak, termasuk di kawasan felda yang lain. Dia, maknanya dia tak boleh *scattered*, dengan izin, kalau *scattered* dia tak jadi program ni. Kita akan ambil dan buat penumpuan kepada, kenal pasti bagi kawasan-kawasan tertentu.

Contoh di Felda Sungai lui, untuk maklumat Yang Berhormat Sungai Lui, kita akan tengok, kita ada kawasan sekitar 10 ekar untuk projek lot generasi kedua felda. Dan apabila sudah dikenal pasti, untuk makluman ahli-ahli Yang Berhormat, barulah kita pergi ke fasa kedua untuk membuat proses bagi mendapatkan agihan kepada generasi kedua. Generasi kedua felda ni pulak kita nak tengok Yang Berhormat, kita tak boleh bagi semua. Generasi kedua felda daripada kalangan guru, tidak ada masalah. Daripada kalangan ahli peniaga, tidak ada masalah. Di kalangan yang mempunyai kerjaya tertentu, tidak ada masalah. Masalah

kita sekarang ini untuk mengisi keperluan dan permintaan kepada generasi kedua, ketiga, keempat felda yang mempunyai kerjaya, yang memerlukan, maknanya yang pemandu lori umpamanya, pekerja ladang umpamanya, yang duduk di rumah ibu bapa umpamanya. Yang ini kita nak bagi tumpuan. Dan *insyaAllah* apabila semua ni selesai, maka pemberian ataupun penyediaan lot-lot generasi kedua felda ini, lot generasi kedua felda ini dapat kita laksanakan di Negeri Sembilan melalui fasa-fasa tertentu yang akan kita laksanakan, *insyaAllah*. Terima kasih.

**YB ADUN Sungai Lui:** Soalan tambahan ya. Kalau boleh disentuh jugak ya, agak-agak berapa, berapa, mengambil masa berapa lama proses ini dan jugak tentang perumahan-perumahan terbengkalai di kawasan PGBF yang berada di kawasan-kawasan felda khususnya di kawasan Jempol dan sekitarnya. Itu saja.

**YB ADUN Pertang:** Yang Berhormat Lui sabar sikit. Kerajaan Negeri sedang buat perkara ini. Kita sedang melaksanakan proses kerana kita tak boleh buat *ad hoc action* ataupun tindakan secara *ad hoc*. Kita *cross, cross the board* Dato' Yang Dipertua, dengan izin, kita melakukan beberapa tindakan supaya perkara ini dapat berjalan secara baik dan tersusun kerana kita tidak mahu nanti masalah-masalah yang berkaitan dengan pemilikan dan jugak masalah kepada pemilihan peserta LGF ini menghadapi masalah kerana kita terpaksa menguruskan permohonan dan jugak permintaan di kalangan generasi kedua felda ini yang terlalu ramai.

Tetapi untuk makluman Dewan, Kerajaan Persekutuan melalui FELDA, Kerajaan Negeri melalui intervensi dan jugak pendekatan pelbagai untuk memenuhi keperluan generasi kedua felda dilakukan dari masa ke semasa. Saya nak bagitahu kepada ahli Dewan, tidak ada kerajaan selain daripada Kerajaan Perpaduan yang memberikan penumpuan khusus kepada keperluan generasi kedua felda dari masa ke semasa. Ini harus dihargai oleh peneroka dan jugak generasi kedua felda.

Dan saya nak maklumkan juga kepada Yang Berhormat Lui, sekarang ini kita ada beberapa masalah berkaitan dengan, apa ni, penyelamatan ataupun apa, untuk menyiapkan rumah generasi kedua felda yang terbengkalai. Di Felda Pasoh 2 sekarang Yang Berhormat di, sedang dilaksanakan dan hampir siap. Dan ada lagi Felda Pasoh 3. Pihak Kerajaan Negeri sedang mendapatkan peruntukan tambahan daripada FELDA untuk kita melengkapkan bagi rumah generasi kedua felda yang sedang terbengkalai sekarang. Semalam, untuk makluman ahli Yang Berhormat, saya sudah mengemukakan hal ini ke dalam Jawatankuasa

MEXCLUB semalam untuk tindakan segera FELDA bagi perkara-perkara ini dapat kita *execute*, dengan izin, secepat mungkin.

Di Felda Pasoh 2 tu, untuk makluman Yang Berhormat, saya sudah maklum kepada RGM, saya sudah maklumkan kepada Pengurus supaya pengisian rumah generasi kedua felda ini mesti dilakukan serta merta sehingga, selewat-lewatnya penghujung bulan kerana kita tidak mahu apabila rumah ini siap nanti, *vandalism* berlaku sekali lagi dalam projek perumahan ini. Terima kasih Dato' *Speaker*.

**YB Yang Dipertua Dewan:** Meneruskan soalan, saya menjemput YB Mambau.

**YB ADUN Mambau:** Terima kasih Dato' Yang Dipertua, Mambau kemukakan soalan pertama.

**YB ADUN Nilai:** Dato' Yang Dipertua, Projek Residensi Seremban Sentral merupakan salah satu projek perumahan di bawah perbandaran, Perbadanan PR1MA Malaysia yang terletak di Negeri Sembilan. Projek ini terdiri, terdiri daripada 1,504 unit apartmen dan 881 unit ataupun 59% telah terjual. Kontraktornya adalah Brunsfel. Projek ini telah siap dibina dan telah menerima Sijil Perakuan Siap Dan Pematuhan (CCC) pada 31 Mei 2023. Penyerahan kunci telah dilaksanakan bermula pada 26 Jun 2023 dan setakat 7 September 2023, sebanyak 626 unit telah berjaya diserahkan kepada para pembeli.

Berhubung dengan isu kesukaran bagi kelulusan pemasangan meter air dan elektrik, PR1MA telah mengambil langkah proaktif bagi menangani isu tersebut dengan mengadakan perjumpaan pihak syarikat utiliti yang terlibat. Berikut adalah status terkini berka, berkenaan isu-isu tersebut:

- Berkaitan dengan bekalan elektrik. Bekalan elektrik utama telah disambung ke tapak mulai pada Jun 2023. Bagi permohonan meter untuk unit, pemasangan meter telah mula dibuat oleh pihak TNB pada 28 Julai 2023. Setakat 20 September, sebanyak 154 unit telah dibekalkan dengan meter dan 114 unit sedang dalam proses pendaftaran permohonan. Proses ini dianggarkan akan mengambil masa 14 hari sebaik permohonan diluluskan.
- Berkaitan dengan bekalan air. Bekalan air telah disambung ke tapak mulai Jun 2023. Permohonan bekalan air individu kepada SAINS pada 17 Julai 2023 telah ditolak kerana pihak SAINS mensyaratkan agar permohonan dilakukan secara pukal iaitu melibatkan 1,504 unit sekaligus. PR1MA telah membuat rayuan berkaitan dengan permohonan bekalan air secara individu dan rayuan telah diluluskan

pada 21 Ogos 2023. Pihak kontraktor telah menghantar semula borang-borang permohonan kepada SAINS bagi pemasangan meter individu.

Pihak PR1MA telah mengalih, mengambil inisiatif segera dengan mendahulukan deposit bekalan air secara individu bagi pihak pembeli kepada SAINS untuk semua permohonan unit-unit yang telah terjual iaitu 656. Proses pematang, pemasangan meter air ini dianggarkan akan mengambil masa 14 hari jugak.

Pihak PR1MA bersama Brunfield juga telah mengadakan sesi libat urus yang dipanggil *PR1MA Community Coordination (PCC)* bersama wakil-wakil pembeli residensi ini pada 7 September 2023 bagi menerangkan tentang proses Serahan Notis Milikan Kosong, tuntutan dan pembayaran Ganti Rugi Tertentu Dan Ditetapkan (LAD), pengurusan strata, pengurusan fasiliti, penyerahan kunci, pembaikan kecacatan dan perkara berbangkit yang lain.

Pihak PR1MA sentiasa memastikan kediaman yang berkualiti dapat disediakan kepada semua pembeli-pembeli Residensi Seremban Sentral dan akan mematuhi ter, terma dan syarat seperti yang termaktub di dalam perjanjian jual beli bersama pihak pembeli.

Maka, mengikut apa yang dinyatakan, kedua-dua isu yang dibangkitkan oleh Yang Berhormat Mambau, telah pun diselesaikan. Terima kasih.

**YB ADUN Mambau:** Dato' Yang Dipertua, soalan tambahan. Dato' Yang Dipertua, ada aduan-aduan seperti ni yang agak sama di kawasan DUN Mambau jugak, pada tempoh hari. Jadi saya ada terima aduan berkenaan dengan, dengan tiada bekalan air dan, dan, dan tiada bekalan elektrik di Pangsapuri Perkhidmatan Universiti Mall di Seremban 3. Jadi ini amat menyusahkan pelajar-pelajar UiTM yang tinggal di situ. Dan saya nak ambil peluang ini untuk mengucapkan terima kasih kepada Exco Nilai kerana Exco Nilai sanggup dengan serta merta bersama saya turun padang berjumpa dengan pihak wakil pihak, wakil pihak pemaju dan pengadu-pengadu, pemilik unit di situ, dan jabatan COB MBS. Jadi, di sini, saya nak mohon tanya pada Exco Nilai, ada apa-apa status perkembangan terkini terhadap isu ini untuk menyelesaikan aduan masalah ini? Terima kasih.

**YB ADUN Nilai:** Dato' Yang Dipertua, di Universiti Mall di Seremban 3 ini sekarang berhadapan dengan pemotongan bekalan elektrik di *common area* ataupun di kawasan bersama menyebabkan lif untuk 16 tingkat itu tidak dapat digunakan. Dan hampir 30 hingga 40 unit yang

digunakan sebagai hostel untuk pelajar-pelajar UiTM Seremban 3 itu menggunakan tangga ke unit-unit mereka.

Dan baru-baru ini, hari Selasa lepas, bekalan air jugak tidak dapat sampai ke setiap unit kerana *meter pump* pun tidak dapat digunakan kerana tiada bekalan elektrik. So keadaan ini menyebabkan ada banyak isu, dan jugak saya bersama dengan Mambau juga telah berjumpa dengan sekumpulan pemilik rumah, pemilik unit tersebut di mana isunya adalah hampir 70% pemilikan di situ adalah masih di bawah pemaju. Pemilik pulak sanggup untuk membayar *maintenance fee* setiap bulan. COB MBS jugak bersedia untuk memberikan pengakuan Sijil Pengakuan kepada JMB. Tetapi masalah yang dihadapi adalah, kalau pemilikan 70% unit itu masih di bawah pemaju, kalau pemaju tidak bayar *maintenance fee* untuk 70% tu, 30% kesemua bayar *maintenance fee* oleh pemilik-pemilik itu pun tidak dapat diselesaikan masalah ni. Ini adalah masalah berpunca daripada pemaju tersebut. Dan kita, saya dalam satu dua hari ini jugak akan berjumpa dengan pemaju tersebut, kerana pemaju tersebut jugak tidak bertanggungjawab, jawab dalam isu ini kerana 70% pemilikan, pemilikan itu masih di bawah pemaju tersebut. Dan kita harap satu perbincangan dapat dijalankan dengan sebaik mungkin supaya isu ini dapat diselesaikan. Dan satu keadaan tempat yang sangat baik, sangat strategik, kita tidak mahu ia akan menjadi terbengkalai selepas ini. Terima kasih.

**YB Yang Dipertua Dewan:** Dijemput Gemas.

**YB ADUN Gemas:** Terima kasih Dato' Yang Dipertua, Gemas bertanyakan soalan nombor 1.

**YB ADUN Nilai:** Dato' Yang Dipertua, ini berkaitan dengan perkhidmatan komuter Gemas, perkhidmatan komuter Gemas. Perkhidmatan KTM Komuter tidak lagi beroperasi sehingga ke Gemas sejak tahun 2016 susulan jumlah penumpang yang naik dan turun di Stesen Gemas merekodkan bilangan yang rendah iaitu 10 orang penumpang sahaja untuk setiap sehari. Atas penilaian faktor ini membawa kepada rasional, rasionalisasi operasi Perkhidmatan KTM Komuter yang berhenti sehingga ke Stesen Pulau Sebang sahaja. Tambahan lagi, dengan hasil kutipan tiket dari jumlah bilangan penumpang yang, yang rendah iaitu 10 penumpang setiap hari di Stesen Gemas tidak dapat menampung kos operasi tren KTM Komuter untuk ke Stesen Gemas sekitar Ringgit Malaysia 300,000.00 setahun.

Walau bagaimanapun, KTMB bersedia untuk menyemak semula perancangan operasi Perkhidmatan KTM Komuter ke Stesen Gemas dengan kerjasama Kerajaan Negeri untuk meningkatkan jumlah

penumpang di stesen ini serta pertimbangan untuk menanggung kos operasi yang berkaitan secara bersama.

Untuk, sebagai alternatif jugak, KTMB juga menyediakan sebanyak 4 perkhidmatan ETS yang berhenti di Stesen Gemas. Perincian masa tren ETS di Stesen Gemas adalah seperti berikut: berlepas daripada Stesen Gemas pada 8:05 pagi dan 3:20 petang, 2 lagi yang tiba di Stesen Gemas adalah pada 2:52 petang dan juga 12:10 pagi, awal pagi. Terima kasih.

**YB ADUN Gemas:** Soalan tambahan Tuan *Speaker*. Saya akui, jumlah penumpang memang 10 orang. Tapi jadual perjalanan untuk perjalanan pertama komuter di Gemas ini bermula pukul 4:30 pagi, itu yang pertama. Gemas juga merupakan hab untuk penduduk dari kawasan sekitar; Palong, persekitaran terdekat untuk ke Kuala Lumpur, selain orang Gemas tu sendiri dan Segamat, Segamat jugak, Segamat Baru. Ini adalah alternatif sebab perjalanan, soalan pertama saya tempoh hari melibatkan jalan raya. Ini adalah alternatif perjalanan untuk orang ramai menggunakan perkhidmatan komuter. Cuma kami mohon jika KTM boleh meng, menjadualkan semula perjalanan untuk komuter di, bermula daripada Gemas. Untuk makluman YB Exco perjalanan bermula pukul 4:30 pagi. Itu trip yang satu saja. Kami tak mintak trip yang banyak, satu saja.

Untuk ETS, bukan kami tak naik, tak nak naik ETS, tambang ETS ni, dua kali ganda daripada tambang komuter. Jika daripada Gemas nak ke Kuala Lumpur, 30.00, hampir 30.00 lebih ringgit. Jadi, mohon untuk, YB Exco untuk 10 orang tu dinilai pada pukul 4:30 pagi. Terima kasih.

**YB ADUN Nilai:** Okey, terima kasih atas cadangan tersebut. Kita akan cuba berbincang dengan KTM berkaitan dengan penyelarasan masa tersebut. Pada masa yang sama, sepertimana yang semalam, 2 hari lepas dinyatakan oleh Yang Berhormat Chennah, beberapa projek menaik taraf laluan landasan kereta api daripada, ke Johor Bahru, daripada Gemas sedang dilaksanakan. Dan sudah tentu selepas dinaik taraf, kemungkinan besar kita dapat menyediakan perkhidmatan itu mengikut masa yang sesuai. Terima kasih.

**YB Yang Dipertua Dewan:** Dijemput Sri Tanjung.

**YB ADUN Sri Tanjung:** Terima kasih Dato' Yang Dipertua, soalan saya nombor 1.

**YB ADUN Palong:** Terima kasih Dato' Yang Dipertua, terima kasih Sri Tanjung, yakni berkenaan dengan Kerajaan Negeri memperuntukkan geran bantuan, ada atau tidak. Untuk makluman ADUN Sri Tanjung,

Kerajaan Negeri telah pun memperkenalkan beberapa produk ya, di bawah PKNNS (Perbadanan Kemajuan Negeri, Negeri Sembilan) yang bertujuan agar lebih ramai penjaja, peniaga kecil berjaya dikembangkan melalui bantuan pembiayaan. Di antara produk-produk ini, yang pertama, kita sebut Tabung Pembangunan Usahawan Negeri Sembilan (TUNS) ya. TUNS adalah bentuk berjumlah 3,000.00 ringgit bagi peniaga-peniaga kecil yang jualan tahunan mereka kurang daripada 100,000.00 ringgit, ya. Itu produk pertama, TUNS.

Produk kedua adalah TUNS Plus ataupun Tabung Pembangunan Usahawan Negeri Sembilan Plus. Ia ini adalah dalam bentuk pinjaman mudah tanpa faedah ya, yang berjumlah 5,000.00, 10,000.00 ataupun 15,000.00 untuk tempoh maksimum 5 tahun. Ini adalah bagi peniaga-peniaga yang jualan tahunan mereka kurang daripada 300,000.00.

Dan produk ketiga adalah Tabung Pembangunan Usahawan Negeri Sembilan Extra ataupun TUNS Extra. Yang ini dalam bentuk geran padanan ataupun *matching grant* pada nisbah 50:50, maksima 30,000.00 ya.

Jadi inilah 3 bentuk tabung yang disediakan oleh Kerajaan Negeri kepada peniaga-peniaga, kebanyakannya adalah orang-orang muda ya. Hampir 60% penerima ini adalah orang-orang muda. Kemudian tumpuannya adalah kepada Usahawan Belia, Usahawan Wanita, Usahawan Tani, Usahawan Luar Bandar termasuk juga Usahawan Orang Kurang Upaya.

Sementara itu, itu dari pihak Kerajaan Negeri. Manakala dari, oleh Jabatan Belia Dan Sukan melalui KBS pula ada 2 program iaitu Jelajah Genta Belia yang akan dilaksanakan di 3 daerah untuk tahun ini iaitu Daerah Seremban, Jempol dan Tampin yang disediakan dana sebanyak 36,000.00 ringgit. Manakala bakinya 10,000.00 ringgit lagi adalah untuk program *MyPreneur* iaitu kursus di peringkat negeri bagi membantu anak-anak muda untuk mulakan perniagaan dan seterusnya.

Bagi menjawab soalan yang kedua, yakni yang berkenaan rancangan kerajaan untuk menyediakan pemimpin pelapis, untuk makluman Yang Berhormat Sri tanjung, Jabatan Belia dan Sukan melalui Jabatan Belia dan Sukan Negeri Sembilan ada beberapa program yang disediakan bagi menyediakan pemimpin-pemimpin pelapis masa hadapan.

Yang pertama, adalah Anugerah Perdana Belia Negara. Anugerah ini ialah sebuah program berbentuk penilaian untuk memberikan pengiktirafan dan penghargaan kepada individu dan pertubuhan belia yang telah memberi sumbangan kepada pembangunan belia negara. Yang keduanya memberi penghargaan dan pengiktirafan di atas

pencapaian masyarakat belia pelbagai bidang di peringkat negeri. Seterusnya menggalakkan penglibatan para belia dalam kerja-kerja sukarela yang menyumbang kepada pembangunan masyarakat. Dan menjana sokongan masyarakat umum terhadap usaha-usaha pembangunan belia hingga ke peringkat akar umbi. Itu yang pertama, program pertama iaitu Anugerah Perdana Belia Negara.

Proram yang kedua adalah Parlimen Belia Malaysia. PBM ataupun Parlimen Belia Malaysia ini berperanan sebagai platform untuk belia menyuarakan idea dan pandangan. Pewujudan PBM ini hampir menyamai Parlimen Belia di 33 buah negara ya, seperti kebanyakan negara-negara maju dan membangun seperti Australia, United Kingdom, New Zealand, Timor Leste, Filipina, Bangladesh dan beberapa Negara Eropah. Dan objektifnya adalah pertamanya: meningkatkan pengetahuan dan kemahiran kepimpinan negara jangka masa panjang kepada belia-belia ini; dan sebagai pendedahan kepada belia dalam mendalami bagaimana proses undang-undang digubal serta memahami sistem pentadbiran sebuah negara.

Program seterusnya adalah Program Pertukaran Belia Antarabangsa. Semua ini Yang Berhormat, adalah untuk melatih, menyediakan belia untuk masa hadapan negara. Program Pertukaran Belia Antarabangsa pulak bertujuan untuk mengukuhkan persahabatan dan perhubungan antara belia secara berterusan selain menjadi platform untuk belia bertukar maklumat terutamanya di dalam bidang pembangunan belia.

Program keempat adalah Felo Perdana atau Felo Korporat. Yakni sebuah program inteship, *internship* merupakan salah satu inisiatif Kementerian Belia Dan Sukan untuk melahirkan golongan belia yang dinamik, berdaya saing dan mempunyai pengetahuan yang relevan berkaitan sistem pentadbiran korporat bertaraf antarabangsa serta dapat membangunkan negara pada masa yang akan datang. Sebagai perintis kepada program ini, Kementerian Belia Dan Sukan akan bekerjasama dengan GLC ya (*Government linked Companies*) untuk menempatkan pelajar Malaysia yang menuntut di dalam dan luar negara bersama mentor yang juga merupakan Ketua Pegawai Eksekutif ataupun CEO syarikat-syarikat Korporat Malaysia di negara ini. Pemilihan mentor yang terdiri daripada Ketua Pegawai Eksekutif di syarikat-syarikat korporat Malaysia adalah bagi memberikan pendekatan contoh kepimpinan korporat yang boleh dicontohi oleh belia-belia kita.

Dan objektif Program Felo Perdana ialah pertamanya: menyediakan dan mendedahkan belia-belia Malaysia yang berpotensi terhadap kompetensi kepimpinan berasaskan perniagaan ya, seperti kepintaran perniagaan, pemikiran strategik perniagaan dan pembinaan rangkaian

perniagaan. Dan yang keduanya ialah melahirkan kepimpinan pelapis kepada Ketua Pegawai Eksekutif ataupun CEO syarikat-syarikat korporat negara ini yang mampu berdaya saing di peringkat global dan untuk menyambung kesinambungan korporat pada masa-masa yang akan datang.

Seterusnya adalah program Felo Korporat Siswazah. Program felo korporat, felo, Program Felo Korporat Siswazah ini pula terbuka kepada semua pelajar yang sedang mengikuti pengajian di Institut Pengajian Tinggi, tertakluk kepada syarat-syarat yang dinyatakan ya. Kemudian kita ada Felo Korporat Graduan. Felo Korporat Graduan pulak terbuka kepada semua graduan baru daripada Institut Pengajian Tinggi, tertakluk kepada syarat-syarat juga ya.

Dan akhir sekali kita ada satu lagi program yang kita beri nama Majlis Perundingan Belia Negara. Fungsi Majlis Perundingan Belia Negara adalah untuk bertindak sebagai badan perunding dalam hal yang berhubungan dengan pembangunan belia di peringkat negeri. Bertindak sebagai badan perunding dan penasihat kepada pertubuhan belia di peringkat negeri dan juga daerah ya. Objektifnya adalah pertamanya: mempertingkatkan pelaksanaan program pembangunan kepimpinan dan pengurusan organisasi belia. Yang keduanya: membincangkan isu dan masalah-masalah yang dihadapi oleh belia. Yang ketiganya: dalam proses pembangunan belia pada semua peringkat. Meneroka dimensi baru dalam agenda pembangunan belia selaras dengan senario perubahan semasa. Dan akhir sekali ialah menzahirkan pelan tindakan bagi menangani sebarang isu pembangunan belia kesan daripada kemelesetan ekonomi semasa. Terima kasih.

**YB ADUN Sri Tanjung:** Soalan tambahan Dato' Yang Dipertua. Sebilangan besar penggunaan vape adalah belia. Vape berpotensi digunakan dalam penyalahgunaan pelbagai jenis dadah yang berbahaya. Apakah tindakan kerajaan untuk mengatasi isu ini?

**YB ADUN Palong:** Terima kasih Sri Tanjung. Soalan berkenaan dengan penyalahgunaan vape, apakah tindakan kerajaan. Yang pertamanya, saya yakin dan percaya adalah kita perlu perhebatkan kesedaran, kesedaran kepada pengguna-pengguna vape, pengguna, kesedaran tentang penyalahgunaan penggunaan vape. Mungkin juga kesedaran kepada penyalahgunaan ataupun perokok, pun kita kena masukkan jugak. Bila rokok ramai mula pandang saya nampaknya ya. Rokok, vape dan penyalahgunaan vape, ia perlu diberikan kesedaran, diperhebatkan kesedaran. Bukan saja pihak kerajaan secara total, tetapi oleh institusi pendidikan perlu bantu, di sekolah-sekolah, di universiti kerajaan kita

kena bantu, persatuan-persatuan belia kena bantu, semua pihak kena bantu memberikan kesedaran tentang penyalahgunaan vape ini.

Yang keduanya pada hemat saya ialah kita perlu penguatkuasa, menguatkuasakan undang-undang dengan kita menyelia tempat-tempat yang menjual vape ni supaya tidak ada elemen-elemen yang boleh di apa nama, penyalahgunaan bahan-bahan yang salah dari segi undang-undang ya, yang, yang dijual di premis-premis ini. Maka kita perlu pergiatkan lagi.

Dan yang ketiga, yang saya fikir masih kontroversi, ialah adakah kerajaan bersedia untuk wujudkan undang-undang ataupun *legalize* untuk penggunaan vape ataupun industri vape. Ini perkara ketigalah saya fikir yang perlu kita ambil tindakan sewajarnya. Terima kasih Sri Tanjung.

**YB Yang Dipertua Dewan:** Dijemput YB Paroi.

**YB ADUN Paroi:** *Assalamualaikum WBT.* Soalan nombor 1.

**YB ADUN Repah:** Terima kasih Dato' Yang Dipertua, terima kasih kepada ADUN Paroi yang bertanyakan berkenaan Pusat Kualiti Alam Sendayan. Dato' Yang Dipertua, pada 3 Ogos 2018, Kerajaan Negeri telah mengemukakan surat cadangan penempatan semula ataupun penutupan Kualiti Alam Sdn. Bhd. di Sendayan kepada Ketua Setiausaha Kementerian Tenaga, Teknologi, Sains, Alam Sekitar dan juga Perubahan Iklim melalui surat yang ditandatangani oleh YB Setiausaha Kerajaan Negeri Sembilan. Kerajaan Negeri juga telah membangkitkan isu berkenaan status penempatan semula Kualiti Alam Sdn. Bhd. di negeri dalam Mesyuarat MEXCOE Bil.2/2020 pada 23 Oktober 2020.

Jabatan Alam Sekitar Negeri Sembilan memaklumkan hak eksklusif Kualiti Alam Sdn. Bhd. telah tamat pada tahun 2015 dan cadangan untuk diperbaharui hak eksklusif tersebut tidak dipersetujui oleh Kerajaan Persekutuan. Hak eksklusif kepada Kualiti Alam Sdn. Bhd. sebelum ini adalah untuk tujuan pelupusan akhir bahan buangan terjadual daripada industri dengan fasiliti insinerator, solidifikasi, *chemical/physical treatment* dan juga *secured landfill*. Ini dipanggil konsep sebagai konsep *cradle to grave*. Selepas tahun 2015, Kerajaan Persekutuan telah membenarkan Premis Yang Ditetapkan Buangan Terjadual lain dilesenkan untuk tujuan menggalakkan industri mengguna, mengitar semula dan *recover* bahan-bahan buangan terjadual tersebut iaitu dengan konsep *cradle to cradle* ataupun *circular economy*. Buat masa ini, Kualiti Alam Sdn. Bhd. beroperasi seperti pusat, Premis Yang Ditetapkan Buangan Terjadual seperti yang lain tanpa hak eksklusif daripada

Kerajaan Persekutuan. Dan lesen operasi pula akan diperbaharui pada setiap tahun dan dikeluarkan oleh JAS sekiranya tidak berlaku sebarang pelanggaran syarat.

**YB ADUN Paroi:** Soalan tambahan Dato' Yang Dipertua. Kalau kita, sedikit soalan yang saya nak cadangkan di sini. Kalau kita lihat Kualiti Alam ya, dia menguruskan lebih kurang 70 jenis toksik ya, yang pertamanya ialah rawatan fizikal dan jugak kimia; yang kedua: tapak penstoran untuk sisa berjadual dan yang ketiga: tapak pelupusan selamat *landfill*.

Dalam suasana sekarang ini ya, Kualiti Alam tu dia berlaku kebakaran ya, pada bulan Oktober 2019. Dan ini saya rasa dia akan me, pelepasan gas-gas merbahaya kepada penduduk. Dan suasana yang berlaku di Kualiti Alam tu kita tengok penduduknya berdekatan ya, berdekatan dengan kawasan Kualiti Alam. Dalam Sinar, pada bulan, 2 Oktober 2018; *buffer zone* ni hanya berdekatan 500 meter daripada penduduk. Saya rasa, Kualiti Alam ni telah diuruskan 25 tahun ya. Dan tempat pelupusan ni adalah tempat yang cukup bahaya asapnya dan jugak dia apabila buat *landfill* tempat 70 benda toksik yang, yang kita uruskan.

Oleh yang demikian, saya rasa Jabatan Alam Sekitar pada tiap-tiap tahun dia akan keluarkan lesen ya. Satu kajian ya, kita tak naklah pulak ya, 70 toksik itu, satu Malaysia dihimpunkan ke Negeri Sembilan. Dan kita tengok suasana tempat tersebut, dengan masjidnya yang cantik ya, dengan pembangunannya yang begitu, di Sendayan. Dan ini saya rasa, saya mintaklah dibuat satu kajian .....

**YB ADUN Repah:** Soalannya apa?

**YB ADUN Paroi:** Soalannya, perlu atau tidak ya, kita tukarkan Kualiti Alam ke tempat lain? Itu soalan saya yang, yang jelas setelah berlaku 2 kebakaran besar; 2015 dan 2019. Dan ini adalah bom jangka. Kalau berlaku saja kebakaran, Bomba nak masuk pun takut. *Wallahualam*.

**YB ADUN Repah:** Terima kasih kepada soalan tambahan tersebut. Sebenarnya Kualiti Alam ni, sebelum ni memang ada berlaku insiden kebakaran tetapi ia tidak menjejaskan keselamatan penduduk di sekitar. Dan Kualiti Alam ni mempunyai sistem keselamatan yang baik. Mereka ada bomba sendiri, jika berlaku kebakaran, mereka ada sistem bomba mereka untuk mengambil tindakan pantas sebelum kita ada Bomba daripada kerajaan.

Walau bagaimanapun, Jabatan Alam Sekitar sentiasa memantau keadaan di persekitaran Kualiti Alam ni dan memastikan udara yang bersih dan

juga jika ada apa-apa pencemaran di sekitar, akan dimaklumkan dan tindakan segera akan diambil. Tetapi buat masa ni, memang tidak ada apa-apa isu yang menjejaskan kesihatan penduduk di sekitar. Sebab memang Jabatan Alam Sekitar membuat pemantauan yang kerap dan rapi. Dan kita juga lihat buat masa ini Kualiti Alam ni ditukar kepada proses *recovery*, bukannya terus buangan terjadual ni dilupuskan di *landfill*. Dan setiap negeri juga mempunyai premis yang ditetapkan untuk buangan terjadual masing-masing. Jadi, proses untuk *recovery* ini dibuat di Kualiti Alam ni. Jadi bukannya semua bahan buangan terjadual ni dilupuskan di *landfill*. Jadi itu adalah perkara yang kita buat. Dan kita akan pastikan pemantauan akan dibuat kerap dan berkala di Kualiti Alam ni. Terima kasih.

**YB Yang Dipertua Dewan:** Dijemput Seri Menanti.

**YB ADUN Seri Menanti:** Terima kasih Dato' Yang Dipertua, soalan saya nombor 1.

**YB ADUN Linggi:** Terima kasih Dato' Yang Dipertua, dan terima kasih kepada ADUN Seri Menanti. ADUN Seri Menanti dia bertanyakan tentang soal menara telco di Kampung Mampas dan juga Kampung Orang Asli Langkap. Dan dalam soal, soalan beliau telah pecah kepada 2 iaitu apakah tindakan daripada Suruhanjaya Komunikasi Dan Multimedia Malaysia dan juga bilakah jangka pemasangan talian telco di pemancar menara ini akan siap.

Untuk makluman Yang Berhormat ADUN Seri Menanti, menara telekomunikasi di Kampung Mampas dan Kampung Orang Asli Langkap merupakan inisiatif pihak Kerajaan Negeri melalui Suruhanjaya Komunikasi Dan Multimedia (MCMC) di bawah Pelan Jalinan Digital Negara ataupun JENDELA, dalam usaha untuk meningkatkan tahap kesalinghubungan digital dan perkhidmatan kualiti jalur lebar di kawasan luar bandar yang turut meliputi di kawasan DUN Seri Menanti.

Pihak MCMC sentiasa memantau dan meneliti pelaksanaan JENDELA yang dijalankan oleh penyedia perkhidmatan di Negeri Sembilan termasuk di kawasan DUN Seri Menanti agar dapat diselesaikan mengikut perancangan, peruntukan dan juga kelulusan yang ditetapkan.

Dia sememangnya kalau ikut mata kasar, memang menara tu telah pun siap tetapi setakat ini, status pelaksanaan menara telekomunikasi di kedua-dua kawasan tersebut adalah di dalam fasa penyediaan perkhidmatan telekomunikasi yang merangkumi kepada skop kerja penilaian dan juga keselamatan tapak, penyediaan *backhaul fiber*, pemasangan komponen elektronik komunikasi dan pelaksanaan

pengukuran kualiti perkhidmatan agar mencapai standard rangkaian komunikasi yang telah ditetapkan.

Untuk jawapan yang kedua, perancangan bagi memastikan kedua-dua menara telekomunikasi tersebut beroperasi selaras dengan kualiti pengalaman yang ditetapkan adalah disasarkan selesai sepenuhnya menjelang suku kedua 2024. Walau bagaimanapun, pelaksanaan ini dijangka dapat disegerakan secara berperingkat melalui peruntukan dan kelulusan yang diberikan.

Perkhidmatan rangkaian utama talian tele, telekomunikasi yang bakal dinikmati oleh penduduk di kedua-dua kawasan tersebut adalah daripada rangkaian Celcom Digi dan akan disusuli dengan talian telekomunikasi dari Maxis serta U Mobile melalui teknologi perkongsian rangkaian. Terima kasih.

**YB ADUN Seri Menanti:** Soalan tambahan Dato' Yang Dipertua. Berkenaan dengan rangkaian liputan mudah alih yang sering terputus bermula daripada jalan Bukit Putus sehinggalah sampai ke Ulu Bendul. Dan kemudian di kawasan, kawasan Kampung Bukit Perah dan juga Kampung Juah di kawasan Seri Menanti. Jadi, apakah tindakan daripada pihak MCMC berkenaan dengan rangkaian yang sering terputus ini? Terima kasih Dato' Yang Dipertua.

**YB ADUN Linggi:** Terima kasih atas soalan tambahan daripada ADUN Seri Menanti. Bekalan ataupun rangkaian yang selalu kadang-kadang terputus ini, dia mungkin disebabkan ada faktor bekalan elektrik yang berpanjangan ataupun dia berkaitan dengan kerja-kerja pembaikan pulih ataupun ada kabel yang terputus ya, pada ketika itu, dan perlu ambil masa untuk dibaik pulih. Dan sebarang aduan berkenaan dengan apa nama ni, rangkaian internet boleh diadu terus kepada pihak MCMC. Terima kasih.

**YB Yang Dipertua Dewan:** Dijemput Yang Berhormat Serting.

**YB ADUN Serting:** *Assalamualaikum* dan selamat sejahtera. Yang Berhormat Tuan *Speaker*, soalan nombor 1.

**YB ADUN Nilai:** Dato' Dipertua, ini berkaitan dengan perkhidmatan kutipan sampah di kawasan bukan seliaan PBT. Sama jugak adalah, 2 hari lepas saya, jawapan yang di, apa, soalan yang dibangkitkan oleh Yang Berhormat Labu di mana semua kawasan Pihak Berkuasa Tempatan, kutipan sampah ini, perkhidmatannya disediakan oleh PBT melalui SWCorp ataupun SWM. Berkaitan dengan kawasan luar PBT, boleh membuat lantikan kontraktor kutipan sisa pepejal yang berlesen

dengan Jabatan Pengurusan Sisa Pepejal Negara dan juga mengikut kadar bayaran dan juga frekuensi kutipan, bilangan tong, jenis tong dan saiz tong.

Pihak SWCorp bersedia untuk memberikan khidmat nasihat dan juga pandangan dalam aspek penyediaan kemudahan penstoran, kutipan penghan, kutipan pengangkutan dan pelupusan sisa, sisa pepejal. Berkaitan dengan kawasan luar bandar, kawasan di luar kawasan PBT, kita sedang mengkaji bagaimana dapat kita membantu supaya penduduk di sekitar kawasan luar bandar ini tidak akan membuat, apa ni, pembakaran secara terbuka ataupun membuang sampah di sungai.

Pihak SWCorp sentiasa bekerjasama dengan agensi seperti Pejabat Daerah Dan Tanah, Kementerian Pembangunan Luar Bandar (KPLB) dan juga Unit Perancang Ekonomi Negeri bagi memudahkan proses perancangan penyediaan kemudahan berkenaan. Terima kasih.

**YB Yang Dipertua Dewan:** Dijemput Rahang.

**YB ADUN Rahang:** Terima, terima kasih Dato' Yang Dipertua, saya mengemukakan soalan nombor 1.

**YB ADUN Bahau:** Terima kasih Dato' Yang Dipertua, terima kasih soalan daripada Yang Berhormat Rahang. Untuk maklumat Yang Berhormat Rahang, sebanyak 3 kawasan industri baharu yang bakal dibuka di Negeri Sembilan dan kini dalam peringkat pembangunan. Pertama adalah kawasan industri *XME Business Park* di Nilai Impian yang merupakan sebuah fasiliti *Managed Industrial Park* yang pertama di Negeri Sembilan seluas hampir, hampir 70 ekar yang dijangka setiap, yang dijangka siap pada penghujung tahun, tahun 2023. Pemaju projek ini adalah Sime Darby Property Berhad. Selain daripada *XME Business Park* Nilai Impian, juga sedang, Sime Darby Property Berhad juga sedang membangunkan kawasan Perindustrian Hamilton, Parcel A, MVV 2.0 di Nilai dengan keluasan keseluruhan 867 ekar.

Seterusnya adalah kawasan perindustrian *Techpark @ Enstek Fasa 3* dengan kawasan seluas lebih kurang 650 ekar akan dibangunkan di Bandar Enstek oleh TH Properties. Pembangunan kawasan industri di Enstek ini secara umumnya memfokuskan kepada industri berkaitan halal. Di samping itu, terdapat juga potensi pembangunan kawasan industri baharu di Negeri Sembilan dalam peringkat perancangan seperti berikut: yang pertama: *Seri Pajam Development (SPD) Techvalley* di Senawang dengan keluasan 520 ekar; yang kedua: *NS Semiconductor Valley* di Sg. Gadut dengan keluasan 837.8 ekar; dan Eka

Smart Industrial Park di Labu, Sendayan dengan keluasan 200 ekar.  
Terima kasih.

**YB Yang Dipertua Dewan:** Dijemput Yang Berhormat Labu.

**YB ADUN Labu:** *Assalamualaikum* Yang Dipertua, saya bangun untuk bertanya soalan nombor 1.

**YB ADUN Nilai:** Dato' Yang Dipertua, berkaitan dengan peniaga warga asing di mana semua PBT sama sekali tidak membenarkan dan juga memberi lesen atas nama mereka iaitu warga asing untuk berniaga di mana-mana tempat; di kaki lima, di pasar pagi ataupun di pasar malam ataupun di mana-mana premis. Pentadbiran Majlis khususnya di Majlis Bandaraya Seremban membuat pemantauan operasi secara berkala terhadap premis-premis perniagaan di bawah seliaan Majlis Bandaraya Seremban.

Pada 31 haribulan 8, 2023, sitaan juga telah dijalankan ke atas perniagaan MS Ayu Khan Enterprise di Jalan Sheikh Ahmad yang telah melanggar syarat lesen dan 1 kompaun yang telah dikeluarkan kepada pemilik perniagaan. Manakala pada 17 haribulan 9, 2023 sitaan ke atas premis 104 dan 105, Jalan Dato' Bandar Tunggal perniagaan Siti Mobile & Trading dan 1 kompaun telah dikeluarkan kepada pemilik perniagaan. Kedua-dua premis ini dilesenkan atas nama isteri yang berwar, berstatus warganegara untuk menjalankan, untuk menjalankan perniagaan tersebut. Selain itu, sebanyak 22 kompaun tanpa lesen juga telah dikeluarkan terhadap premis di kawasan Nilai yang juga disyaki diuruskan oleh warga asing namun menggunakan nama isteri berstatus warganegara untuk menjalankan perniagaan tersebut.

Di mana semua PBT tidak mengeluarkan lesen kepada mana-mana warga asing. Tetapi isunya adalah mereka menggunakan isteri ataupun pasangan mereka untuk mendapatkan lesen ataupun ada jugak segolongan warganegara kita yang tidak bertanggungjawab, menyewakan lesen tersebut kepada warganegara asing untuk berniaga. Dan ini menyebabkan hari ini kita dapat lihat di beberapa kawasan, warga asing ini memonopoli perniagaan di beberapa kawasan tertentu. Dan oleh itu, kita sedang mengambil tindakan yang tegas dan sepertimana yang dinyatakan oleh Yang Amat Berhormat Sikamat, pada minggu lepas, di mana satu *task force* yang diketuai oleh Dato' SS (Setiausaha Kerajaan) akan mengambil tindakan yang sewajarnya khususnya dalam meletakkan syarat-syarat yang lebih ketat dalam pengeluaran setiap lesen kepada mana-mana premis perniagaan. Dan ini diikuti dengan penguatkuasaan yang lebih ketat. Kita berharap perniagaan yang dijalankan oleh warganegara asing, atas nama

warganegara Malaysia ini dapat di, dikurangkan ataupun dapat diambil tindakan yang sewajarnya. Terima kasih.

**YB ADUN Labu:** Yang Dipertua, soalan tambahan. Keadaan dalam PBT di kawasan Majlis Bandaraya Seremban terutamanya telah dijelaskan monopoli warga asing dalam perniagaan telah meningkat dengan ketara dan mereka ini terdiri daripada yang masuk ke Malaysia sebagai pekerja buruh. Saya memahami ada peniaga warga asing ni berselindung, berkahwin dengan warga tempatan dan menggunakan lesen-lesen atas nama isteri mereka. Tapi ada di kawasan terutama dalam kawasan penjaja, pasar malam, mereka tidak menggunakan lesen, lesen isteri tetapi menggunakan lesen daripada peniaga tempatan. Tapi perkara ni berlarutan daripada penggal yang sudah. Jadi ini dah masuk penggal kedua. Jadi, kalau satu isu sebegini makan masa 5 tahun nak diselesaikan, dah tentu jelas ada kerjasama jugak, saya tak segan cakap, sebab saya dulu Ahli Majlis, Majlis Perbandaran Nilai, ada kerjasama daripada penguatkuasa sebab ada penguatkuasa ni sepatutnya dia kena ada sistem bergilir 3 tahun sekali di Majlis Perbandaran Nilai yang sudah hampir 11 tahun, di, dikuasai oleh satu kumpulan. Jadi saya pun ada memberitahu perkara ini kepada YB Nilai.

Jadi, perkara nak sentuh berkenaan pekerja asing ini adalah berkenaan kontrak, pekerja-pekerja kontrak warga asing. Ia menjejaskan kontrak, peniaga-peniaga mempunyai lesen *G1, G2* ya, yang berdaftar dengan CIDB. *G1, G2* tu tak semestinya dapat kontrak kerajaan, mereka jugak mengharapkan kontrak-kontrak kecil seperti membuat rumah, *renovation* rumah di kawasan-kawasan perumahan. Tapi, hari ini, kalau kita lihat, peniaga warga asing dalam bidang kontrak kerja kasar, buruh ni, daripada warga Indonesia dan jugak Bangladesh ya, mereka mengambil keuntungan atas kelemahan penguatkuasaan yang berlaku lebih daripada 20 tahun. Saya rasa mungkin lebih. Mereka tidak mempunyai permit, kadang-kadang mereka tidak mempunyai permit yang sah, tetapi mereka boleh mengambil kontrak. Kesan tu adalah kepada penguat, peniaga ataupun kontrak-kontrak Bumiputera. Jadi, dan jugak pendapatan jugak kepada negara. Jadi soalan saya, adakah Kerajaan Negeri peka juga ke atas perkara yang melibatkan pekerja asing yang dalam bidang *construction* ini memandangkan masalah ini dibangkitkan dan jugak Ahli Majlis Perbandaran, PBT, sejak dulu, tetapi sehingga kini, masih berlarutan. Jadi, saya nak tahu jangka masa bila perkara-perkara sebegini dapat diselesaikan sepenuhnya. Tak perlulah sampai ada ustaz daripada Pulau Pinang datang ke, datang ke Nilai. Itu jelas menunjukkan kekecewaan rakyat di Negeri Sembilan, peniaga-peniaga di Negeri Sembilan. Terima kasih.

**YB ADUN Nilai:** Sepertimana tadi yang saya nyatakan di mana terdapat ramai warganegara kita sendiri yang tidak bertanggungjawab dan juga memberikan lesen kepada warganegara asing. Di mana isu ini bukan setakat hanya diselesaikan oleh PBT sahaja, tetapi sudah tentu dengan kerjasama daripada pejabat, Jabatan Imigresen Malaysia. Di mana warga asing yang berada di Malaysia terdiri daripada 2 kategori iaitu Pendatang Asing Dengan Izin dan juga Pendatang Asing Tanpa Izin. Di mana Pendatang Asing Dengan Izin ini berada di Malaysia dengan dokumen dan pas yang sah sama ada sebagai pelancong ataupun diberikan Pas Lawatan Sosial (PLS) ataupun pekerja asing diberikan Pas Lawatan Kerja Sementara ataupun pasangan asing yang diberi Pas Isteri/Suami Kepada Warganegara Malaysia dan warganegara asing yang diberi pas-pas lain di bawah Imigresen.

Di mana pada 2 minggu lepas, saya juga telah berjumpa dengan Pengarah Jabatan Imigresen Malaysia, di mana semasa membuat penguatkuasaan oleh Jabatan Imigresen Malaysia, jika mereka adalah pendatang asing tanpa izin, mereka, pendatang asing tanpa izin dan juga pendatang, warganegara, pendatang asing, pendatang asing yang telah pun tamat tempoh. Untuk 2 ini, Jabatan Imigresen Malaysia dapat mengambil tindakan yang segera iaitu dengan menahan mereka. Tetapi untuk yang menyalahgunakan permit mereka. Semasa membuat apa ni, semasa membuat operasi, ki, mereka juga menghadapi beberapa masalah. Apabila mereka buat operasi dan warga asing itu *declare* mereka sebagai *customer* untuk kedai tersebut, adalah datang jumpa kawan di kedai tersebut. *So* semasa ada isu-isu seperti ini, ini yang memberikan kesan ataupun memberikan halangan dalam mengambil tindakan yang sewajarnya. Sebab itu, satu jawatankuasa yang dinyatakan oleh Yang Amat Berhormat Sikamat, dan juga kita sedang mengkaji supaya setiap lesen yang dikeluarkan itu dengan adanya syarat-syarat yang lebih ketat, sudah tentu isu ini dapat kita selesaikan.

Dan satu lagi adalah berkaitan dengan penguatkuasaan. Penguatkuasaan kita akan lihat cadangan yang dibangkitkan oleh Yang Berhormat Labu supaya penggiliran itu juga dapat dilakukan supaya tidak ada mana-mana penguatkuasa dengan senang mengawal sesuatu kawasan. Dan kita harap dengan penggiliran, dengan tindakan dalam penguatkuasaan ini, isu ini juga dapat diselesaikan, ataupun dapat mengurangkan peniaga-peniaga warga asing ini terus berniaga di negara kita. Terima kasih.

**YB Yang Dipertua Dewan:** Dijemput Yang Berhormat Kota.

**YB ADUN Kota:** Terima kasih Dato' Yang Dipertua, soalan nombor 1 berkaitan dengan perumahan belia.

**YB ADUN Nilai:** Dato' Yang Dipertua, merujuk kepada Akta Pertubuhan Belia Dan Pembangunan Belia (Pindaan) 2019, golongan belia ditafsirkan sebagai seorang yang berumur tidak kurang daripada 18 tahun dan tidak lebih daripada 30 tahun. Di mana Kerajaan Negeri telah menyediakan Dasar Perumahan Negeri Sembilan (DPNS) bagi membantu rakyat Negeri Sembilan untuk memiliki rumah yang mampu dimiliki. Melalui DPNS, pemaju swasta adalah diwajibkan untuk menyediakan keperluan sebanyak 20% Rumah Mampu Milik *Type A* yang berharga tidak melebihi 80,000.00 ringgit, 15% Rumah Mampu Milik *Type B* yang berharga tidak melebihi 250,000.00 ringgit dan 15% lagi Rumah Mampu Milik *Type C* yang berharga tidak melebihi 400,000.00 ringgit.

Di mana setiap projek yang dibangunkan oleh pihak swasta, 50% daripada jumlah rumah yang dibina itu adalah mesti terdiri daripada Rumah Mampu Milik yang berharga 400,000.00 ke bawah, mengikut pecahan yang tadi saya nyatakan. Di mana ini akan memberikan peluang kepada setiap golongan yang berpendapatan rendah, berpendapatan sederhana dan juga berpendapatan tinggi dapat memiliki rumah.

Selain daripada itu, dalam beberapa tahun ini juga, Kerajaan Negeri telah juga menyediakan, melaksana, melaksanakan beberapa projek selain daripada PPR, rumah PPR di, di beberapa kawasan di mana Kerajaan Negeri juga telah melaksanakan projek Perumahan Rimbun Harapan iaitu 351 buah rumah yang berharga 90,000.00 dan juga 250,000.00. Satu lagi adalah di bawah PR1MA iaitu Seremban Residensi. Dan baru-baru ini, pada bulan, beberapa bulan lepas, Kerajaan Negeri juga telah memberi, menyerahkan sebidang tanah seluas 45 hektar kepada KPKT di Kampung Pantai untuk menyediakan 700 unit rumah. Ia diserahkan kepada KPKT dan dibangunkan oleh mereka. Dan semua ini akan memberikan keperluan kepada golongan belia yang mempunyai pendapatan rendah ataupun sederhana untuk memiliki rumah sendiri. Terima kasih.

**YB Yang Dipertua Dewan:** Terima kasih. Dijemput Yang Berhormat Chuah.

**YB ADUN Chuah:** Terima kasih Dato' Yang Dipertua, soalan saya nombor 2.

**YAB ADUN Sikamat:** Dato' Yang Dipertua, terima kasih. Terima kasih soalan Chuah. Dato' Yang Dipertua, Parcel C pembangunan MVV 2.0 di Tanah Merah, Bukit Pelandok dirangka bagi pembangunan Lembah Aeroangkasa Negeri Sembilan ataupun *NS Aerospace Valley* (NSAV) yang menumpukan kepada pembangunan sektor perindustrian aeroangkasa.

Bagi pertimbangan kebolehlaksanaan perancangan pembangunan tersebut, satu Kajian Kemungkinan mengenai cadangan, mengenai cadangan pembangunan NSAV telah disediakan dengan kerjasama Unit Perancang Ekonomi (EPU) Jabatan Perdana Menteri (kini Kementerian Ekonomi) menunjukkan perancangan pembangunan NSAV adalah berdaya maju dan pelaksanaannya adalah perlu bagi mengukuhkan ekonomi negara. Terima kasih Dato' Yang Dipertua.

**YB ADUN Chuah:** Soalan tambahan. So perancangan awal kita memang adalah tapak tersebut memang dikhususkan oleh *aerospace* di Negeri Sembilan. Tapi pada Februari yang lalu, ataupun September yang lalu, tak ada tambahan lagi daripada Negeri Selangor. Dia juga telah melancarkan pembangunan serantau bersepa, bersepadu selatan Selangor yang juga apa ni, ada sebanyak 2,000 ekar tanah untuk juga di, apa ni, diperuntukkan untuk *Selangor Aerospace Park* juga di Sepang. Maknanya sangat berdekatan dengan kita. So adakah apa langkah kita ke, ataupun disegerakan perancangan kita di kawasan ni sebab memandangkan di sebelah sana, dia ada kelebihan dari segi apa ni, lokasi dan *infrastructure* serta mungkin daripada tapak tu pun lebih bersedia daripada kita. So saya nak tahu adakah kita teruskan dengan rancangan yang asal ataupun mungkin ada perubahan perancangan kita di sini. Sebab dia akan melibatkan masa depan di Chuah dan juga di Port Dickson juga. Terima kasih.

**YAB ADUN Sikamat:** Terima kasih soalan tambahan. Kita sedia maklum, tadi saya telah maklumkan bahawa Kajian Kemungkinan telah dilakukan oleh EPU, kini di Kementerian Ekonomi, dia menunjukkan perkara yang positif dan kerana itu NS Corp yang lepas, telah mengadakan beberapa siri kerjasama ataupun perjanjian bersama pelabur yang berminat ketika itu ya. Jadi, kita menunggu dan *insyaAllah* kita akan lihat perkembangannya. Walaupun ada di sebelah kita, tapi ini mungkin akan menjadikan satu sempadan yang baik, Selangor 2,000 ekar, kita ada lebih kurang, yang kita cadangkan adalah seluas lebih kurang seluas yang sama. Jadi menunjukkan bahawa Malaysia mempunyai satu hab ya, yang baik di dua-dua negeri ini ya. Kita tak kata Selangor buat, kita akan kalah. Mungkin ini akan menjadi satu faktor tambahan yang menarik di antara dua yang bersempadanan. Dan kita boleh buat kerjasama dengan Selangor, *insyaAllah*, terima kasih.

**YB Yang Dipertua Dewan:** Dijemput Yang Berhormat Lenggeng.

**YB ADUN Lenggeng:** Terima kasih Yang Dipertua, soalan saya berkenaan *Fast Track* SPM Lepas Tahfiz. Terima kasih.

**YB ADUN Senaling:** Terima kasih. *Assalamualaikum* dan salam sejahtera. Yang Berhormat Dato' Yang Dipertua. Berkaitan dengan *Fast Track* (SPM) Lepas Tahfiz ni. Dalam usaha kerajaan melaksanakan arus perdana bagi pelajar tahfiz dalam sistem pendidikan negara, inisiatif Program *Fast Track* (SPM) Lepas Tahfiz mula diperkenalkan dalam Belanjawan 2021 yang lalu di mana Kerajaan Negeri pada waktu itu telah memperuntukkan sebanyak 500,000.00 ya, buat permulaan ya, bagi membiayai anak-anak tahfiz memperolehi Sijil Peperiksaan SPM dalam tempoh yang singkat ataupun *Fast Track*. Manakala dalam Belanjawan 2022 dan 2023, telah diluluskan peruntukan pelaksanaan program ini ditingkatkan kepada RM1.0 juta ringgit bagi memberi peluang kepada lebih ramai anak-anak hafiz dan hafizah mengikuti program ini.

Berdasarkan keputusan SPM tahun 2023 baru-baru ini, semua 51 orang pelajar *Fast Track intake* kedua iaitu pada tahun 2022 di Maahad Tahfiz As-Sa'idiyyah telah berjaya memperolehi sijil yang melayakkan pelajar-pelajar tersebut melanjutkan pelajaran ke peringkat lebih tinggi di mana 8 orang pelajar telah lulus dengan cemerlang memperolehi keputusan 8A dan juga 7A. Sehubungan dengan itu, ia menjadikan rekod seramai 99 orang pelajar sepanjang tempoh 2 tahun pelaksanaan program *Fast Track* ini pada tahun 2021 sehingga 2022 telah berjaya memperolehi sijil SPM. Pada tahun ini pula, seramai 72 orang pelajar sedang mengikuti program ini iaitu 50 orang di As'Sa'idiyyah dan 22 orang di Sri Seremban. Di Sri Seremban tu, alirannya adalah aliran, aliran Sains ya, Dato' Yang Dipertua.

Sehubungan dengan itu, ini saya dah dalam penggulungan semalam, saya dah sebut, saya rasa Seri Menanti ada tanya hal ini. Program ini wajar diteruskan pada tahun 2024 yang akan datang, kerana melihat kepada prestasi program ini yang amat baik dan memberi manfaat kepada pelajar lepasan tahfiz terutamanya. Sekiranya program ini ingin diteruskan, soalan daripada Lenggeng, jumlah peruntukan yang sama iaitu, *insyaAllah* 1.0 juta juga akan dibawa pada tahun akan datang, di mana sasaran pengambilan pelajar ialah lebih kurang 80 orang. Dato' Yang Dipertua.

**YB ADUN Lenggeng:** Soalan tambahan. Adakah kerajaan berhasrat untuk menambah baikkan program *smart tahfiz* ni contohnya seperti yang YB bagitahu tadi, telah ada yang berjaya masuk ke universiti. So adakah kita ingin berhasrat membawa pelajar-pelajar *smart tahfiz* ke luar negara contohnya seperti ke *Morocco*, Mesir, Universiti Al Azhar supaya dia menjadi satu *trademark* kepada Kerajaan Negeri untuk dasar pelajar tahfiz? Terima kasih.

**YB ADUN Senaling:** Terima kasih Lenggeng. Sepertimana yang saya sebutkan tadi, pencapaian setakat ni amat memberangsangkan. Tinggal lagi hanya dari segi aliran perdana sains ni, baru pertama kali kita perkenalkan tahun ni Sekolah Sri Seremban. Saya fikir kita nak tengok dululah keputusan dia. Keputusan SPM dia. Tapi yang aliran agama kita dah terbukti, saya dah sebut tadi berapa ramai dapat 7A, 8A. Dan ini kita sebenarnya tak ada halanganlah, saya rasa Kerajaan Negeri tak ada halangan kalau keputusan ni melayakkan mereka mendapat tempat di mana-mana institusi, menyambung di luar negara, *I think they are most welcome*-lah. Amat kita alu-alukan. Dan satu pencapaian yang baik kepada program *Fast Track* ini. Terima kasih Dato' Yang Dipertua.

**YB Yang Dipertua Dewan:** Ahli-ahli Yang Berhormat sekalian, masa bagi Pertanyaan Lisan hari ini, Hari Keempat telah pun tamat. Semua pertanyaan yang tidak sempat dijawab akan diberikan jawapan secara bertulis.

4. **USUL:**

**Usul Menjunjung Kasih Titah Ucapan Diraja**

**Setiausaha Dewan:** Perkara keempat, Usul Menjunjung Kasih Titah Ucapan Diraja.

**YB Yang Dipertua Dewan:** Penggulangan ya. Saya jemput, Yang Berhormat Nilai.

**YB ADUN Nilai:** Dato' Yang Dipertua, berkaitan isu yang dibangkitkan oleh ADUN Lobak di mana berkaitan dengan peruntukan Kerajaan Negeri untuk rumah PPRT Lobak. Majlis telah mohon untuk mendapat, Majlis telah mohon untuk mendapatkan peruntukan daripada Kerajaan Negeri tetapi ia masih belum dapat maklum balas untuk memperbaiki kerosakan di PPRT Lobak tersebut. Kerja-kerja membaiki kerosakan buat masa ini adalah dengan menggunakan bajet daripada KPKT.

Yang kedua adalah berkaitan dengan status agihan peruntukan kewangan kepada JMB ataupun MC. 113 skim strata kos rendah yang layak dalam kawasan Majlis Bandaraya Seremban iaitu untuk tahun 2023 – 77 skim sudah disalurkan baki 2 skim dalam proses bayaran dan 34 skim dalam proses permohonan iaitu untuk tahun ni. Pada tahun lepas, tahun 2022 – 103 skim bantuan, peruntukan tersebut telah pun disalurkan, baki 2 skim dalam proses bayaran dan 8 lagi dalam proses permohonan. Ini berkaitan dengan PPRT Lobak dan juga status agihan.

Daripada ADUN Temiang, kos pembinaan jalan Temiang iaitu peruntukan sebanyak 4.0 juta. Dan status terkini laporan penilaian tender telah dihantar ke Urusetia Lembaga Perolehan Negeri pada 6 Oktober 2023 iaitu pada minggu lepas bagi pemilihan kontraktor yang berjaya.

Seterusnya adalah berkaitan jugak ADUN Temiang jugak, iaitu memohon pengarah kejuruteraan melaporkan status pemasangan lampu di DUN Temiang. Pihak Majlis telah membuat 8, telah membuat 18 unit iaitu tahun 2013 hingga tahun 2020, penambahan baru jalan, lampu jalan di kawasan perniagaan di kawasan DUN Temiang. Manakala 5 unit sehingga penambahan jalan khususnya di, di Jalan Seng Meng Lee, Temiang. Bilangan pemasangan lampu jalan di kawasan DUN Temiang secara keseluruhan adalah seperti berikut: 2013 - 19 unit, 2017 - 43 unit, 2018 - 27 unit, 2019 - 28 unit, 2020 - 33 unit, 2022 - 62 unit menaik taraf LED kepada lampu sedia ada, dan 2023 sehingga sekarang adalah 1 unit.

Seterusnya berkaitan dengan ADUN Temiang, kos pembinaan jalan Kampung Bukit Merbah iaitu peruntukan ialah sebanyak 3.0 juta dan mohon MBS kenal pasti kontraktor yang menyelenggara jalan tersebut. Bagi kos pembinaan jalan Kampung Bukit Merbah, projek tersebut adalah di bawah seliaan pihak Jabatan Kerja Raya. Dan kita, dan isu ini akan dirujuk kepada, kita akan mendapatkan maklumat daripada JKR dan saya akan maklumkan kepada Yang Berhormat Temiang.

Berkaitan dengan ADUN Temiang jugak, iaitu Jabatan Pengairan Dan Saliran menyediakan dan membuat kolam takungan air di Temiang. Cadangan kolam takungan ini tidak, tidak dikemukakan kepada MBS. Mengikut RTMVV, tidak ada kolam takungan yang baru yang dikenal pasti dan belum lagi dikenal pasti.

Berkaitan dengan ADUN Paroi, permohonan lesen baru untuk lesen minuman yang keras dibekukan pada 2 haribulan 5, 2014. Lesen minuman di kawasan Seremban dan Nilai dikeluarkan oleh Lembaga Eksais Daerah Seremban. Manakala penguatkuasaan dilaksanakan oleh Jabatan Kastam Diraja Malaysia. Walau bagaimanapun, terdapat minuman beralkohol yang tidak ditakrifkan di bawah minuman keras. Majlis Bandaraya Seremban tiada kepakaran untuk menentukan kelas minum beralkohol di bawah minuman keras dan itu adalah di bawah tanggungjawab jabatan, Lembaga Eksais Daerah Seremban. Tetapi, kita akan melihat jika ada aduan kita akan rujuk balik kepada Lembaga, Lembaga Eksais Daerah Seremban di mana permohonan *renewal* ataupun pembaharuan itu dilaksanakan.

Berkaitan dengan soalan yang dibangkitkan oleh ADUN Labu, isu penguatkuasaan ke atas permit pekerja asing dan juga isu penguatkuasaan PBT terhadap pekerja asing. Untuk makluman, bagi tahun 2023, sejumlah 66 kompaun telah dikeluarkan ke, di atas kesalahan penjaja pasar malam, peniaga tanpa lesen iaitu UUK 6 Undang-Undang Kecil Penjaja dan pemegang lesen hendaklah sentiasa hadir. Daripada jumlah tersebut, sebanyak 5 kompaun telah dikenakan di kawasan Pasar Malam Desa Cempaka dan 2 tindakan sitaan telah diambil di kawasan tersebut, yang melibatkan warga asing menjual bahan basah seperti ikan, sotong dan juga udang.

Ini berkaitan dengan ADUN Paroi, lesen dan permit untuk penjaja dipermudahkan. Penjaja dikecualikan lesen dan permit oleh Majlis Bandaraya Seremban seperti ketetapan yang dibuat oleh Kerajaan Negeri. Berkaitan dengan pihak jabatan mengemukakan status terkis, terkini pembaik, pembaikan di hadapan Balai Polis Senawang dan dia di bawah, tindakan sedang diambil oleh pihak JKR. Jabatan, yang ketiga, pihak jabatan mengambil tindakan terhadap jalan di Taman Bandar Senawang kerana jalan tersebut tidak rata. Pihak Majlis Bandaraya Seremban akan membuat siasatan tapak dan jika ada berlaku permasalahan jalan berombak, pentadbiran Majlis akan memohon peruntukan untuk melaksanakan perka, pembaikan tersebut.

Yang keempat, mohon pihak jabatan jelaskan isu masalah lembu, anjing dan, di Taman Bukit Senawang Perdana. Pihak Majlis Bandaraya Seremban merancang untuk melesenkan setiap lembu dan juga kandang lembu yang diternak di dalam kawasan Majlis Bandaraya Seremban selepas pewartaan Undang-Undang Kecil yang baharu. Kaedah-kaedah yang diambil oleh Majlis Bandaraya Seremban untuk menangani aduan anjing liar ialah melantik syarikat Furrykids Safehaven, sebagai kontraktor untuk menyelematkan haiwan di seluruh kawasan MBS. Prosedur yang telah diguna pakai adalah tangkapan anjing di kawasan aduan, pemandulan anjing yang berjaya ditangkap dan juga simpanan anjing di tempat kontraktor.

Yang seterusnya, apakah status kuil di Taman Bukit Senawang Perdana. Saya ingat semalam Yang Berhormat Bahau telah pun menjawab. Seterusnya berkaitan dengan ADUN Lobak iaitu kenderaan terbiar. Haa ini pun semalam saya telah pun menjawab. ADUN Lobak, pembangunan di Lobak, mohon peruntukan menyediakan kawasan, buat masa ni pentadbiran Majlis tiada peruntukan khusus untuk mencerikan jalan ini, kecuali hiasan untuk masa, untuk musim perayaan ada, ada disediakan. Pentadbiran Majlis akan memohon peruntukan daripada KPKT berhubung perkara ini. Berkaitan dengan ADUN Lobak, mohon untuk pembinaan dewan dibagi untuk setiap DUN. Majlis Bandaraya

Seremban akan melihat keperluan pembinaan dewan baharu di bawah pentadbiran MBS. Dewan yang terbaharu dibina di kawasan MBS adalah Dewan Coral Heights, dewan terbuka Desa Kiara dan juga Dewan Serbaguna Pasar Ampangan. Pada tahun 2024, MBS telah mengangkat permohonan kepada Kerajaan Negeri bagi pembinaan 3 buah pusat komuniti dan, di 3 kawasan DUN berlainan di kawasan pentadbiran MBS melalui Belanjawan MBS 2024.

Berkaitan dengan ADUN, ADUN Labu. Isu warga asing berniaga di pasar malam. Ini tadi, saya telah pun jawab. Yang berhor, Yang Berhormat ADUN Lukut iaitu masalah burung gagak. Pihak Majlis telah cuba menangani isu ini dalam beberapa kaedah yang bersesuaian. Antara tindakan yang telah diambil pada tahun lepas dan tahun ini ialah dengan menjalankan 5 aktiviti pemangkasan pada pokok-pokok yang menjadi tempat hinggap burung gagak. Pihak Majlis juga sedang mendapatkan kebenaran pihak PDRM untuk mengadakan program menembak burung gagak bersama pelesen awam senjata api bagi mengurangkan populasi gagak di kawasan Port Dickson. Selain itu, pihak Majlis bersama-sama dengan SWCorp dan juga SWM telah menjalankan aktiviti kawalan berkaitan pengurusan sisa pepejal yang merupakan antara punca hurungan gagak di kawasan awam dengan melaksanakan operasi sampah haram sebanyak 15 kali sepanjang tahun 2023. Penduduk setempat juga dimintak untuk memastikan sisa makanan dilupuskan di dalam sampah bertutup untuk mengelakkan isu ini terus berulang.

Yang berkaitan ADUN Seri Menanti. Penyediaan rumah kos rendah berharga 100,000.00 di dalam kawasan DUN Seri Menanti. Kerajaan Negeri sentiasa menitikberatkan keperluan bagi menyediakan perumahan mampu milik dengan penepatan harga bersesuaian melalui penyediaan dan pelaksanaan Dasar Perumahan Negeri, Negeri Sembilan bagi membantu rakyat Negeri Sembilan untuk memiliki rumah. Secara umumnya matlamat DPNS adalah bagi menyediakan perumahan yang mencukupi, selesa, berkualiti dan mampu di, mampu dimiliki bagi meningkatkan kemampanan hidup rakyat. Perumahan kos rendah, perumahan kos sederhana rendah dan perumahan kos sederhana di bawah Dasar Perumahan Negeri dikenali sebagai perumahan mampu milik. Pembangunan perumahan mampu milik dalam satu kawasan pembangunan perumahan ditetapkan sebanyak 50%. Transformasi dilaksanakan dalam komponen pembangunan perumahan kos rendah sepertimana yang saya tadi nyatakan dalam satu soalan lisan iaitu 20% adalah *Type A* – 80,000.00, 15% adalah 250,000.00 *Type B* dan 15% lagi adalah di bawah 400,000.00 di bawah *Type C* dan 50% daripada komponen perumahan ditentukan oleh pemaju iaitu *Type D*.

Berkaitan dengan ADUN Lobak, iaitu pemberian geran JMB/MC dicadangkan peruntukan ditambah daripada 2,000.00 kepada 12,000.00 Kerajaan Negeri sentiasa prihatin terhadap keperluan rakyat bagi setiap usaha penambahbaikan yang dilaksanakan. Kerajaan Negeri turut fokus kepada kemandirian dan juga kemampanan daya hidup rakyat Negeri Sembilan. Inisiatif pemberian geran kepada badan perku, Badan Pengurusan Bersama iaitu JMB ataupun Perbadanan Pengurusan (MC) ini diwujudkan melalui objektif pengukuhan ahli jawatankuasa pengurusan JMB/MC yang dibentuk di kalangan penghuni melalui mandat secara kolektif untuk menjalankan fungsi-fungsi pengurusan dan pentadbiran dalam kawasan pemajuan berstrata.

Pemberian geran ini adalah untuk menggalakkan program-program berkaitan dengan kebersihan, keselamatan, kemasyarakatan serta kesedaran penghuni kawasan pemajuan berstrata supaya kualiti dan juga kesejahteraan hidup para penghuni dapat dipertingkatkan. Inisiatif geran JMB/MC ini di, mula dilaksanakan pada tahun 2022 sehingga tahun ini. Sehubungan dengan itu, selaras dengan dasar semasa kerajaan, Bahagian Perumahan sedang meneliti impak dan juga *outcome* daripada melaksanakan inisiatif dalam tempoh 2 tahun pemberian geran kepada JMB dan juga MC. Di samping itu pelaksanaan inisiatif ini akan disusun selaras dengan keperluan perumahan di Negeri Sembilan berdasarkan keutamaan permintaan dan juga penawaran perumahan mampu milik rakyat di Negeri Sembilan. Jika ada impak positif, mungkin cadangan daripada Yang Berhormat Lobak ini dapat kita, dipertimbangkan.

Berkaitan dengan ADUN Gemas, kerjasama dengan McDonald's, semalam saya telah pun jawab dalam soalan lisan. Berkaitan dengan ADUN Lukut, iaitu mohon semua jabatan yang terlibat untuk mempamerkan segala tindakan yang telah diambil berdasarkan aduan rakyat di SISPA, di *social media*. Pihak Majlis Perbandaran Port Dickson (MPPD) ada mempamerkan tindakan berdasarkan aduan rakyat di SISPA melalui media sosial rasmi MPPD iaitu Facebook dan Instagram seperti operasi besar-besaran berkaitan lembu dan anjing berkeliaran, isu, berkeliaran, isu khemah di pantai, kemudahan awam serta lain-lain isu untuk maklumkan kepada rakyat. MPPD juga ada menyediakan aktiviti dan program seperti yang diusulkan masyarakat dalam SISPA seperti mengadakan penganjuran program mesra rakyat di Rumah Rakyat Pengkalan Durian, Linggi yang telah diadakan pada 10 Jun 2023 dan telah dimuat naik dalam media sosial. Pihak MPPD akan sentiasa memuat naik tindakan penyelesaian aduan rakyat melalui media sosial rasmi Facebook dan Instagram sebagai platform untuk hebahan umum dari semasa ke semasa setiap tindakan yang diambil oleh Pihak Berkuasa Tempatan. Sama jugak untuk Majlis Bandaraya Seremban pun.

Berkaitan dengan ADUN Chennah, isu memperindahkan Bandaraya Seremban, pengindahan semula segitiga kawasan strategik dan juga mohon pengarah penilaian dan pengurusan strata mengemukakan maklumat terperinci berkaitan naik taraf Terminal 1. Untuk yang pertama: pihak Majlis telah memperuntukkan 450,000.00 untuk kerja-kerja pemasangan lampu hiasan bagi 4 perayaan utama bagi tahun 2023. Yang kedua: untuk makluman, buat masa ini Majlis Bandaraya Seremban sedang giat melaksanakan kerja-kerja naik taraf landskap ataupun mengindahkan lagi Bandaraya Seremban di lokasi-lokasi yang strategik iaitu antaranya:

- kerja-kerja menaik taraf landskap, infrastruktur dan lampu di Dataran Seremban yang sedang dilaksanakan;
- kerja-kerja menaik taraf landskap di hadapan KTM Seremban dan Seremban Prima, sama jugak yang sedang dilaksanakan;
- kerja-kerja membaik pulih laluan pejalan kaki dan kolam pancur di tepi padang MBS, Jalan Datuk Bandar tuga, Tunggal, juga sedang dilaksanakan;
- kerja-kerja menaik taraf kemudahan riadah, *water casket* serta kerja-kerja berkaitan di Laman Basikal dan Laman Awam, Jalan Keliling;
- yang seterusnya kerja-kerja menaik taraf kemudahan riadah, pam air serta kerja-kerja berkaitan di sekitar Taman Tasik Seremban;
- yang seterusnya menaik taraf Padang Lobak, Dataran Lobak;
- yang seterusnya kerja-kerja pembangunan taman permainan mega kanak-kanak di Taman Tasik Seremban;
- menaik taraf laluan pejalan kaki Lee Sam, Jalan Lee Sam;
- dan juga menaik taraf landskap pengindahan di persimpangan lampu isyarat Persiaran Pusat Bandar di persimpangan Tol Nilai, Bandar Baru Nilai.

Semua kerja-kerja ini adalah kerja-kerja yang sedang dilaksanakan sebagai salah satu usaha untuk mengindahkan kawasan Majlis Bandaraya Seremban.

Yang ketiga: pihak MBS telah mengemukakan surat permohonan peruntukan di bawah Inisiatif Belanjawan Kerajaan Negeri Sembilan

kepada Bahagian Perumahan SUKNS melalui surat bertarikh 31 Julai, tapi sehingga kini belum ada menerima sebarang maklumat. Sementara itu, kerja-kerja penyelenggaraan dan baik pulih kerosakan di PPR Paroi dan juga PPR Lobak sedang dilaksanakan adalah di bawah peruntukan Jabatan Perumahan Negara, KPKT dengan peruntukan sebanyak 2.5 juta bagi pelaksanaan 11 projek.

Seterusnya adalah berkaitan dengan ADUN Lukut, aktiviti pelancongan malam di Port Dickson dilihat tidak menggalakkan pelancong luar. Aktiviti seperti *urban street dining* perlu diwujudkan di PD bagi menarik kehadiran ramai. Maklum balasnya: aktiviti pelancongan malam sentiasa menanti para pengunjung di mana ianya memeriahkan lagi industri pelancongan Port Dickson yang melibatkan *tourism players* secara langsung yang di antaranya adalah seperti berikut:

- segmen pelancongan pantai, eko dan juga riadah kombinasi di mana yang pertama: perkhidmatan basikal pintar iaitu di PD Waterfront. *laypark* santai di pantai dengan pencahayaan lampu limpah di Pantai Saujana dan Pantai Bagan Pinang; jeti memancing di Jeti Telok Pelandok dan Jeti Pasar Panjang; mural berlampu di Bandar Port Dickson; *jungle tracking* di Dataran Astronomi PD Forest; *Extreme Park* di Pasir Panjang; pasar malam setiap Sabtu malam di Batu 4; *camping site* di Pantai Nelayan, Pantai Purnama.
- Dan juga berkaitan dengan segmen pelancongan makanan, *gastronomy tourism*. Yang pertama: Medan Ikan Bakar MPPD; Medan Ikan Bakar Kampung Telok, Benteng Malam Port Malam, Benteng Malam Bagan Pinang, King's Char Kuey Tiow dan juga *Pasma Night*.

Berkaitan dengan ADUN Labu, warga asing, warga asing berniaga di pasar malam. Tindakan memang diambil secara berterusan. Sebanyak 50 operasi yang melibatkan penjaja pasar, kedai runcit di Negeri Sembilan mulai tahun, Januari hingga September 2023. Dan jumlah tangkapan Pendatang Asing Tanpa Izin adalah seramai 46 orang. Jumlah operasi yang telah pun dijalankan sejak 2021 adalah 131 orang, operasi, 131 operasi, jumlah orang yang diperiksa adalah 573 orang, jumlah tangkapan PATI adalah 127 orang daripada jumlah 573 orang ini. Hasil daripada operasi yang dijalankan, Jabatan Imigresen Malaysia Negeri Sembilan mendapati bahawa kebanyakan warga asing yang terlibat dalam aktiviti perniagaan merupakan pemegang Pas Pasangan Kepada Warganegara Malaysia dan memiliki Pas Kebenaran Bekerja Yang Sah atau pekerja asing memiliki Pas Lawatan Kerja Sementara bagi sektor-sektor yang dibenarkan.

JIM Negeri Sembilan akan meneruskan aktiviti penguatkuasaan bagi membanteras isu warga asing yang berniaga tanpa mempunyai lesen yang sah. Selain itu, JIM Negeri Sembilan akan turut melibatkan Pihak Berkuasa Tempatan dalam pelaksanaan operasi dan penyaluran maklumat keberadaan PATI bagi menangani masalah PATI khususnya yang berniaga tanpa lesen yang sah. Kerjasama serta kepri, keprihatinan rakyat negara ini adalah elemen yang penting dan berkesan untuk menangani isu ini dalam jangka masa yang panjang dengan tidak menyokong mana-mana perniagaan-perniagaan warga asing yang dilaksanakan secara tidak sah di samping menyalurkan maklumat-maklumat berkaitan dengan peniaga warga asing yang tidak sah ini kepada JIM Negeri Sembilan dan juga usaha, kerjasama daripada setiap agensi, kita harap dapat diselesaikan itu perniagaan warga asing ini.

Berkaitan dengan ADUN Serting, iaitu mohon sediakan tong sampah. Saya tadi jawab dalam soalan bertulis, soalan lisan. Berkaitan dengan ADUN Sri Tanjung, isu rokok vape elektronik, pihak PBT dimintak mengetatkan lagi. Pihak MPPD hanya meluluskan 5 permohonan lesen premis menjual barangan elektronik vape sehingga 2023 di Daerah Port Dickson. Dan permohonan-permohonan lain yang diterima telah ditolak oleh Mesyuarat Jawatankuasa Pelesenan MPPD. Setiap permohonan perlu mendapat ulasan jabatan teknikal dalaman MPPD, dan juga ulasan daripada pihak Pejabat kesihatan Daerah beserta IPD Polis Daerah, IPD Polis sebelum diluluskan. MPPD mengambil serius tentang perkara ini dan telah mula mengambil langkah mengetatkan lagi syarat permohonan lesen premis perniagaan barangan elektronik vape agar isu rokok vape elektronik ini tidak menular di kalangan remaja di bawah umur dan juga pelajar sekolah. Selain itu, pihak agensi seperti KKM juga sentiasa menjalankan penguatkuasaan merokok di bawah Peraturan-Peraturan Kawalan Hasil Tembakau 2004 bagi membendung masalah ini.

Yang berkaitan dengan Yang Berhormat Jeram Padang, penyediaan rumah kos rendah di dalam kawasan DUN Jeram Padang. Bahagian Perumahan dan dimaklum, Bahagian Perumahan telah dimaklumkan oleh pihak KPKT berkaitan perkara ini, setelah pihak KPKT menerima permohonan terus daripada ADUN Jeram Padang. Lanjutan dari itu, Bahagian Perumahan telah mengemukakan maklum balas kepada pihak KPKT sebagaimana yang dipohon melalui e-mel bertarikh 28 Julai tahun 2023 dengan membekalkan maklumat pelan GIS9 kawasan yang dimohon dan jumlah permohonan rumah rakyat di kawasan Jempol. Tindakan selanjutnya kini adalah di kawal, di bawah kawalan KPKT dan Unit Perumahan akan membantu dalam menyelaras, menyelaraskan permohonan tersebut.

Yang akhir sekali, berkaitan dengan perkhidmatan tong sampah. Haa ini pun saya telah pun jawab, ini adalah daripada, berkaitan dengan Majlis Perbandaran Jempol, iaitu di mana melalui pihak konsesi SWM Environment Sdn. Bhd. telah menyediakan tong sampah individu bagi setiap premis perniagaan dan rumah di dalam kawasan operasi Majlis Perbandaran Jempol iaitu kawasan taman perumahan dan juga kawasan perniagaan sahaja. Manakala di kawasan kampung dan felda, ianya di luar bidang kuasa Majlis Perbandaran Jempol. Terima kasih.

**YB ADUN Labu:** Yang Dipertua mintak penjelasan sedikit. ADUN Labu ada bertanya berkenaan isu sampah pepejal di kawasan Majlis Perbandaran Seremban. Jadi, apabila kita naik taraf daripada Majlis Perbandaran, Majlis Perbandaran ke Majlis Bandaraya, banyak perkara kita terus naik taraf termasuk cukai dan undang-undang, tetapi kita tidak peka berkenaan masalah sampah, masalah sampah ni, sebab dia tak semestinya jadi menjadi bandar raya isu sampah ni, sepatutnya diambil kira dalam menyelesaikan. Jadi, saya nak tahu, isu sampah, sampah pepejal ni, jangka masa berapa lama lagi boleh selesai? Sebab rakyat di luar sana tak nak, tak nak tunggu lagi dah isu, sebab lori sampah tak boleh masuk, mereka tak mintak lori sampah tu dalam kampung. Kita pun tahu jalan kampung 6 kaki ni, lori sampah tak boleh masuk. Tapi mereka perlukan kawasan kampal, sampah yang boleh dipusatkan. Jadi saya tak tahu bila masalah boleh diselesaikan, tak boleh tunggu lagi satu penggal.

Dan kedua, berkenaan isu penguatkuasa warga asing tadi, tadi Nilai bagitahu berkenaan laporan daripada penguatkuasa agensi Pusat tetapi saya nak tahu laporan penguatkuasa, penguatkuasa Majlis Perbandaran tempatan, berapa penguatkuasaan yang mereka buat sebab mereka biasanya ada penguasaan, penguatkuasaan secara mingguan. Jadi dalam tempoh setahun, berapa penguatkuasa yang telah dilakukan? Terima kasih.

**YB ADUN Nilai:** Dato' Yang Dipertua, berkaitan dengan isu sampah. Saya ingat saya, dah ada apa, jawapan daripada 2, 3 kali untuk beberapa soalan yang di, dibangkitkan. Di mana walaupun kawasan itu adalah terletak di bawah Majlis Bandaraya Seremban, tetapi dia di luar kawasan seliaan PBT, kawasan seliaan PBT. Di mana setiap kawasan yang diambil ataupun dibayar Cukai Taksiran, diberikan perkhidmatan untuk kutipan sampah. Semua tempat yang di luar, yang tidak dikenakan Cukai Taksiran itu adalah di luar tanggungjawab PBT. Sebab itu, beberapa kali saya telah pun menyatakan bahawa kita akan melihat beberapa cara, jalan, untuk kita melihat, untuk kita sediakan tempat pelupusan sampah berpusat. Sudah tentu tidak dapat disediakan untuk setiap individu ataupun secara individu. Tetapi secara berpusat itu, kita akan lihat

bagaimana dapat diambil tindakan, sudah tentu melalui KPLB ataupun melalui beberapa agensi kerajaan.

Berkaitan dengan penguatkuasaan PBT, makluman tersebut saya akan dapatkan daripada Pihak Berkuasa Tempatan dan saya akan jawab secara bertulis. Terima kasih.

**YB Yang Dipertua Dewan:** Terima kasih. Bagi meneruskan penggugungan daripada pihak kerajaan, saya menjemput Yang Berhormat Pertang.

**YB ADUN Pertang:** Terima kasih Dato' Yang Dipertua, saya akan mulakan penggugungan pada hari ini dengan menjawab beberapa perkara yang telah ditimbulkan ahli-ahli Yang Berhormat di dalam perbahasan hari pertama dan kedua, semalam. Dan saya maklumkan kepada ahli Yang Berhormat, saya akan menggugung perkara-perkara yang berasaskan kepada perkara-perkara yang tidak disebut di dalam jawapan saya, dan ahli Yang Berhormat boleh mencelahlah kalau ada perkara-perkara yang boleh memerlukan penjelasan lanjut.

Pertama, Yang Berhormat ADUN Chennah ya, yang menimbulkan soal pembukaan pasar tani di kawasan parkir Dewan Orang Ramai Titi. FAMA Negeri Sembilan akan membuat permohonan kepada Majlis Daerah Jelevu bagi membolehkan penggunaan tapak parkir Dewan Orang Ramai Titi ini untuk kita jadikan sebagai pasar tani seperti yang dicadangkan oleh Yang Berhormat ADUN Chennah. Dan saya nak ucapkan terima kepada Yang Berhormat ADUN Chennah di atas keprihatinan ini. Sememangnya bagi kawasan Parlimen Jelevu dan kawasan Majlis Daerah Jelevu ini, kita sedang kenal pasti beberapa kawasan tapak untuk dijadikan sebagai tapak pasar tani kekal dan jugak tapak pasar tani sementara bagi kita kita laksanakan secepat mungkin. *Insyallah* dalam jangka masa terdekat kita akan laksanakan.

Yang kedua, Dato' Yang Dipertua, ialah daripada ADUN Seremban Jaya yang telah menimbulkan perkara yang berkaitan dengan pembiakan ikan secara komersial yang perlu diperbanyakkan bagi memastikan bekalan ikan untuk tujuan penggunaan domestik mencukupi. Bagi makluman yang, ahli Yang Berhormat, untuk mempertingkatkan pengeluaran ikan negara, Jabatan perikatan, perikanan, Perikanan Malaysia telah merangka plan pembangunan baka dan benih dengan memperkasakan beberapa program dan aktiviti penyelidikan serta pengembangan bersama dengan pelbagai pihak. Penubuhan Institut Penyelidikan Perikanan Air Tawar di Glami Lemi adalah satu tindakan untuk membantu Jabatan Perikanan di dalam penyelidikan berkaitan ikan air tawar di Negeri Sembilan. Antara aktiviti yang telah dijalankan,

banyak perkara, Dato' Yang Dipertua, pengenalan kepada penggunaan teknologi, taklimat dan jugak sesi-sesi libat urus dan jugak yang penting ialah untuk kita *update* semua senarai pengusaha-pengusaha akuakultur dan jugak menjalankan aktiviti pemantauan serta pemilihan teknologi dari masa ke semasa. Yang penting yang saya nak nyatakan di Dewan pada pagi ini ialah untuk dijadikan sebagai satu rekod kita ialah Jabatan perikatan, peri, Perikanan Negeri Sembilan telah mendaftarkan seramai 33 pengusaha *hatchery* swasta dengan pengeluaran sebanyak 18,674,691 ekor dengan nilai 6,833,629.00 ringgit pada tahun 2023.

Seterusnya ADUN Seremban Jaya juga menimbulkan tentang tanah-tanah terbiar yang berkaitan milik Negeri Sembilan dan juga milik swasta yang boleh diusahakan bagi tujuan pertanian dan penternakan, tetapi permohonan dibuat ke Pejabat ADUN dari masa ke semasa telah ditolak oleh pihak kerajaan. Saya ingin nyatakan kepada Yang Berhormat bahawa tanah-tanah kerajaan di bawah kawalan Pengarah Pertanian, dia ada 2 kaedah tanah kerajaan ni. Satu: di bawah Kerajaan Negeri, satu adalah di bawah kawalan agensi kerajaan. Tanah yang di bawah kerajaan, kawalan pertanian, Jabatan Pertanian Negeri ataupun Taman Kekal Pengeluaran Makanan, Ladang Rakyat dan pusat pertanian, ketika ini sedang dibangunkan dan tidak termasuk dalam tanah kerajaan terbiar. Mana-mana tanah yang kita dapati terbiar itu akan dibuat pengisian dari masa ke semasa untuk kegunaan ataupun untuk dilaksanakan oleh pihak-pihak yang telah berjaya di dalam permohonan mereka.

ADUN Labu juga telah membangkitkan soal yang berkaitan dengan kampung tradisi, maaf, dia tersalah *paper* ni. Saya juga nak pergi kepada isu yang telah dibangkitkan oleh Yang Berhormat ADUN Lui yakni isu projek rumah-rumah terbengkalai di kawasan felda. Saya dah sebut di dalam jawapan saya tadi, cumanya sebagai penambahan, ingin saya nyatakan di Dewan yang mulia ini, FELDA telah memberikan komitmen sepenuhnya untuk menyiapkan tapak-tapak projek perumahan generasi baru yang berada pada tahap 70% penyiapan mereka di kawasan tapak pembinaan yang melibatkan dania, dana penyiapan kertas putih di Negeri Sembilan.

Tetapi ada 3 lagi projek PGBF yang terbengkalai iaitu Felda Pasoh 3, Felda Palong. Felda Pasoh 3 sebanyak 150 unit Yang Berhormat, kemudian Felda Palong 12 – 200 unit, Felda Palong 16 – 210 unit serta satu Projek Sentuhan Kasih di Felda Palong 16 sebanyak 100 unit. Bagi 3 projek PGBF yang terbengkalai, FELDA sedang dalam proses lantikan konsultan bagi mendapatkan semula kelulusan pembangunan ataupun *development order* yang dijangka ditender semula pada suku tahun pertama 2024. Namun ianya tertakluk kepada peruntukan yang dimohon oleh kerajaan, kepada Kerajaan Persekutuan. Bagi Projek

Sentuhan Kasih di Felda Palong 16, FELDA sedang dalam proses tender penyiapan semula dan dijangka kerja pembinaan akan bermula seawal suku pertama tahun 2024.

Untuk makluman Dewan, bagi projek perumahan generasi baru ataupun generasi felda ini, saya juga sedang menyediakan beberapa kerja, kertas konsep untuk kita selesaikan mengikut peratusan daripada tahun ke tahun kerana beberapa pendekatan telah pun dibincangkan dengan pihak FELDA dan jugak Kerajaan Persekutuan bagi dapat suntikan dana untuk kita perbaiki rumah-rumah yang terbengkalai yang menjadi isu dari masa ke semasa.

Yang Berhormat ADUN Lui juga telah menimbulkan tentang pemberian lot-lot penempatan generasi kedua dan jugak generasi felda yang telah saya jawab sebentar tadi. Dan sebagai contoh yang terbaik di Felda Palong 12, yang telah dijalankan program ini. Dan dari masa ke semasa program ini dilaksanakan seperti yang telah saya jelaskan di dalam menjawab soalan lisan tadi. Cumanya untuk makluman Yang Berhormat, program ini sedang dilaksanakan oleh pihak FELDA Wilayah Raja Alias dan pihak Yang Berhormat yang terlibat dengan kawasan felda ini akan dipanggil bagi mendapatkan penjelasan secara *detail* dalam, tentang program lot generasi kedua felda ini. ADUN Gemas .....

**YB ADUN Labu:** Yang Berhormat, mintak penjelasan sikit. Berkenaan Felda, saya nak bertanya sikit. Generasi kedua di kawasan felda, saya sokong untuk ada kawasan perumahan, perumahan untuk generasi kedua. Tapi satu perkara yang perlu dititikberatkan adalah pendapatan generasi kedua di kawasan felda ni. Saya ambil kira di kawasan, di kawasan Felda Palong 1 mungkin sampai Palong 16, jadi dulu kawasan-kawasan Felda Palong ni dulu adalah kawasan kebun getah. Palong ni dulu. Tapi sekarang dah dijadikan kawasan kelapa sawit. Jadi, kepakaran anak-anak kawasan Palong ni, terutama Fasa 1, 2 mungkin sampai 6 ni dulu, dia, mereka tidak berapa pakar dalam kelapa sawit ni. Dan sekarang ni yang berlaku kebanyakan pekerja-pekerja kontrak Indonesia dan jugak hanya ada peluang pekerjaan kepada kontrak-kontrak lori kan.

Jadi, saya agak risau ya, kalau pembangunan perumahan kepada generasi kedua dititikberatkan tanpa menitikberatkan kembali pendapatan. Jadi akhirnya apa yang berlaku sekarang, contoh di Felda Palong 2, ayah saya, saya anak peneroka Felda Palong 2 jugak, sekolah menengah ni sekarang ni pelajar dia lebih lingkungan dalam 200 orang sahaja. Di, di, Darjah 1 sekolah kebangsaan ada satu kelas 27 murid saja disebabkan isu pendapatan, bukan isu rumah, isu pendapatan di, mohon

jugak kepada Pertang supaya menitikkan beratkan pendapatan anak-anak felda ni. Terima kasih.

**YB ADUN Pertang:** Baik, terima kasih Yang Berhormat. Yang Berhormat, 2 isu ya, generasi kedua felda ni dan soal pendapatan, bahagian portfolio saya menekankan kepada penambahan minat generasi kedua terhadap aktiviti yang berkaitan dengan pertanian, penternakan dan jugak keterjaminan kos sara hidup. Jadi, program ini, saya dah sebut dalam jawapan saya pada hari pertama, beberapa pendekatan oleh Kerajaan Negeri, bagi mendatangkan minat di kalangan generasi kedua felda untuk terus terlibat dalam aktiviti pertanian. Selain daripada itu, pihak kerajaan sudah memperkenalkan pelbagai pendekatan yang berkaitan dengan keusahawanan, yang berkaitan dengan kerjaya untuk generasi kedua felda untuk mereka terlibat. Itu pertama ya, iaitu telah kita jalankan. Cumanya sekarang ini terpulang kepada pihak ahli-ahli Yang Berhormat yang terlibat untuk mengadakan sesi libat urus dengan generasi kedua ketiga felda supaya mereka berminat dengan program yang telah kita laksanakan dan perkenalkan.

Yang kedua, Yang Berhormat, sekolah kawasan felda yang sikit ni, kalau dia 1,000 pelajar, sekarang 200 pelajar. Ini bukan soal yang berkaitan dengan pembangunan generasi kedua felda, tidak. Ini kerana produktiviti di kawasan felda sekarang ni semakin hari semakin kurang. Jadi, anak-anak yang belajar di sekolah ni kebanyakannyalah cucu-cucu bagi generasi pertama felda, generasi kedua felda ni dia orang kadang-kadang dah ada sekatan sikit, iaitu Exco Hal Ehwal Wanita bolehlah buat pelbagai pendekatan di kawasan felda. Okey, saya terus Yang Berhormat ya.

Yang Berhormat Dato' *Speaker*, ADUN Gemas ni banyak dia bagi kat saya ni. Yang saya dapat makluman dan saya juga, walaupun semalam saya tidak ada di Dewan, tetapi saya telah melihat perbahasan ahli-ahli Yang Berhormat melalui *live* kita. Dan beberapa perkara yang telah diberi pandangan oleh Yang Berhormat Gemas ini adalah merupakan pandangan yang baik. Dan kita pihak kerajaan akan laksanakan beberapa pandangan ini. Cumanya ada beberapa perkara yang berkaitan dengan penjelasan daripada Yang Berhormat Gemas ini, antaranya ialah Kerajaan Negeri tentang meringankan kos sara hidup rakyat, yakni Jualan Harga Ladang Negeri Sembilan Prihatin yang telah dijalankan sejak pertengahan tahun, tahun yang lepaslah. Jualan ini diadakan sekali setiap minggu di 8 lokasi berlainan mengikut Parlimen seluruh negeri pada masa yang sama. Seluruh kawasan negeri Yang Berhormat, kita telah jalankan program jualan ladang ini sejak penggal-penggal yang lepas. Dan sambutan sangat baik. Dan harga di dalam

program jualan ladang ini adalah harga yang jauh lebih rendah berbanding dengan harga pasaran sekarang.

Cumanya untuk makluman Yang Berhormat, setiap jualan diadakan, lokasi ini akan diubah bagi meluaskan penerimaan pasaran kepada rakyat. Dengan kata lain, dalam minggu jualan Nismilan Prihatin akan diadakan di tempat yang berlainan bergantung kepada keadaan dan suasana yang telah diputuskan bersama pemimpin-pemimpin tempatan.

Dalam masa yang sama, untuk makluman Yang Berhormat, Kerajaan Persekutuan telah melancarkan 4 langkah intervensi di dalam mengatasi masalah isu bekalan beras. Ini saya dah sebut jelas tadi. Soal beras putih tempatan, soal beras import, soal program jangka panjang kita semua saya dah sebut. Cumanya sekarang kita mengharapkan supaya program kita, untuk membina kilang beras di Negeri Sembilan ini dapat kita terjemahkan bagi tempoh yang akan datang.

**YB ADUN Gemas:** Boleh saya mencelah?

**YB ADUN Pertang:** Ya.

**YB ADUN Gemas:** Maaf Tuan *Speaker*, saya cuma, bukan isu tentang kos tadi, saya cuba memberi pandangan dalam ucapan titah Tuanku tempoh hari, jangka masa pendek dan jangka masa panjang. Jangka masa panjang saya lebih menekankan tentang *reserve* tanah kampung, mungkin ini di bawah bidang Yang Amat Berhormat Sikamat, cuma kita tak nak tanah yang ada sekarang ni, ditukar menjadi taman perumahan, sebab sawah tadi kita tadi niat kita untuk pastikan sawah padi ni kekal dan 500 eh, 1,000 ekar yang Datuk maklumkan tadi, semua kita buat sawah padi. Sebab kita tak nak isu hari ini, bukan kami nak cari salah, kita sama-sama dalam Dewan ini memastikan sawah padi di Negeri Sembilan ni kita tak, negeri lain baru nak bukak, baru nak bukak sawah padi, nak, baru nak bagi tanah. Tapi Negeri Sembilan, kita memang dah ada. Cuma kita tak nak kita tak buat satu ketetapan merizabkan dalam tajuk Sekuriti Makanan, tanah-tanah ini boleh ditukar milik, *last*-nya besok jadi taman perumahan atau ditukar dari padi jadi pokok sawit. Itu yang kebimbangan.

Yang kedua, pasal saya sebut jugak, saya setuju dengan YB Klawang, eh YB Pertang, isu beras import ni, memang kita tak ada kawalan, tapi sekarang ni dia berubah-ubah, Datuk. Minggu lepas beli 38.00, minggu ni jenama yang sama, berat yang sama, import, kita tak, kita dah faham tadi beras *local* kita memang ada ke, kekurangan sekarang, tapi import ni, mohon Kerajaan Pusat melalui Kerajaan Negeri ni, kita bagi satu mesej mengatakan ada harga siling buat sementara ni. Kalau tak sampai

harga 42.00 ringgit dah, dah terlampau tinggi dah Datuk. Terima kasih Datuk.

**YB ADUN Pertang:** Terima kasih ADUN Gemas. Beras import ni, Yang Berhormat saya dah sebut ya, kerana ini di luar kawalan ataupun di luar bidang kuasa ya, pihak kementerian untuk mengadakan sekatan harga. Kita tak ada harga siling. Tetapi ini sudah dibangkitkan berkali-kali oleh Ahli-Ahli Parlimen di sidang Parlimen sekarang ini, antara menjadi topik hangat di dalam perbahasan, termasuk saya juga telah mengemukakan beberapa pandangan berkaitan dengan beras import ini. Itu telah pun dilaksanakan.

Cumanya dalam soal pendekatan kita sekarang di Negeri Sembilan ini ialah untuk menambah bekalan kita. Saya dah sebut tadi, beberapa tindakan jangka pendek, sederhana dan panjang sedang kita laksanakan. Intervensi kita untuk mempercukupkan bekalan beras putih tempatan kepada rakyat Negeri Sembilan sedang dan terus berjalan. Program jangka sederhana kita supaya beras kita jangan keluar lagi. Sekarang ni masalahnya Yang Berhormat, 1,200 hektar penanaman padi di Negeri Sembilan dihantar ke Melaka, dihantar ke Selangor dan hantar ke negeri lain. Apabila beras ni dihantar ke kawasan luar daripada Negeri Sembilan, dia tak balik dalam Negeri Sembilan balik, beras tu akan diedarkan daripada negeri ataupun kilang yang dihantar. Ini jadi masalah kita. Kita ada cukup beras.

Kemudian bila kita tidak lakukan sesuatu untuk bagi tempoh yang akan datang, maka kita akan sentiasa mengalami kekurangan yang sedemikian rupa. Dan itu pelan jangka panjang kita supaya Negeri Sembilan, *insyaAllah* apabila mendapat segala bentuk bantuan dan jugak *support* kita, maka kilang berskala kecil sederhana dahulu dapat kita bina di Negeri Sembilan dengan keluasan pengeluaran padi 1,500 hektar. Cumanya sekarang ini kawasan penanaman padi kita di Gemas kita nak tambah 20 hektar lagi, di Jelebu kita akan ada penambahan, di Jempol kita akan ada penambahan dan beberapa kawasan lain.

Cumanya sekarang ini, *shortage* kita, dengan izin Dato' Yang Dipertua, 300 hektar ni, *shortage* kita ini, *concurrently* kita akan dapatkan daripada luar. Maknanya bekalan beras, padi daripada luar kita bawak masuk ke Negeri Sembilan untuk tampung keperluan kilang padi yang berskala sederhana ni tadi dan dalam masa yang sama beberapa pendekatan ataupun beberapa pengisian supaya penanaman padi di Negeri Sembilan ni dapat kita tambah. Dan *insyaAllah* dalam tempoh 3 tahun yang akan datang, keperluan kilang ini dapat di-*supply*, dapat bekalan daripada penanam padi tempatan. Itu yang bekalan beras ya.

Kemudian soal kegunaan tanah ni, Yang Berhormat kita tidak *convert*. Dulu masalah kita ialah penanam padi ni dijadikan sebagai kerjaya kedua bagi masyarakat kita. Masyarakat kita yang tanam padi ni, dia tidak menjadikan satu pendapatan utama kepada mereka. Dia jadikan pendapatan kedua. Jadi maknanya tidak, buat kerja tu sampinganlah. Kerana itu, pengeluaran padi kita tidak mencapai tahap ataupun standard seperti yang diperlukan. Kualiti, ataupun jumlah pengeluaran padi kita. Kerana itu sekarang kita sedang jalankan kempen supaya semua golongan masyarakat terutamanya golongan belia remaja ni berminat dan menjadikan penanaman padi dan pengeluaran beras ini sebagai pendapatan utama mereka. Jadi pendekatan yang akan kita jalankan oleh pihak Kerajaan Negeri di masa ke semasa akan dapat mengisi keperluan seperti yang telah saya sebut tadi.

Saya juga nak balik balik kepada ucapan perbincangan yang Berhormat tentang harga beras ya, bukan harga beras, tentang perkara yang berkaitan dengan Kawalselia Padi Dan Beras di Negeri Sembilan. Kita telah adakan sesi libat urus Yang Berhormat, bersama pemborong beras yakni 3 syarikat ya, pada 11 September yang lalu, bagi mendapatkan input dan isu secara langsung ekoran keputusan kawal, kawalan, KPKM ini untuk melaksanakan Program Khas Beras Putih Tempatan mulai bulan, itu dah saya jelaskan tadi ya. Kita dah jalankan dan kesemua itu, sekarang ini cuma untuk Yang Berhormat, kita juga melibatkan LPP ataupun PPK apa ni, di seluruh Negeri Sembilan untuk membantu kita kerana kita boleh hantarkan melalui pembekal-pembekal atau pengedar-pengedar di seluruh daerah, tetapi buat masa ini kita gunakan FAMA dahulu, LPP dan jugak Agro Bazaar dan sebagainya. Ini semua telah kita laksanakan.

Cuma saya nak mintak kerjasama ahli-ahli Yang Berhormat di seluruh di Negeri Sembilan, sama ada daripada pihak kerajaan dan jugak pihak pembangkang, supaya sama-sama menjelaskan di kalangan rakyat. Kadang ada rakyat ni Yang Berhormat, bukanlah saya nak mencari, mendatangkan masalah tetapi ada di kalangan mereka menimbulkan isu kepanikan ataupun isu, atau sentimen yang boleh mendatangkan kemarahan kepada rakyat. Sebenarnya ini boleh kita selesaikan dengan baik. Dan beberapa pendekatan yang kita laksanakan ini dapat menampung keperluan bagi masyarakat. Jadi saya mohon ahli-ahli Yang Berhormat juga dapat membantu kerajaan di dalam memberikan penjelasan sebaik mungkin.

ADUN Gemas juga telah menimbulkan soal yang berkaitan dengan merizabkan tanah pertanian. Ini seperti yang Yang Berhormat sebut tadi ya. Saya nak sebut Yang Berhormat ya, sejak tahun 2013, Kerajaan Negeri telah memutuskan ya, bahawa semua tanah kategori pertanian

dengan syarat nyata tanaman padi dan sawah, tidak dibenarkan sama sekali untuk menukar syarat kegunaan tanah bagi menjamin bekalan padi di Negeri Sembilan. Itu dah jelas Yang Berhormat ya.

Kemudian saya nak pergi juga kepada perkara yang dibangkitkan oleh ADUN Johol, Seremban Jaya, Seri Menanti dan Gemas. Gemas lagi. Gemas ni saya ingat pandangan bagus, idea cantik, tetapi haluan tak berapa betul ya, betulkan.

**YB ADUN Gemas:** Guru yang sama.

**YB ADUN Pertang:** Ni kita runding dalam ke, runding luar, Yang Berhormat?

**YB ADUN Gemas:** Nanti saya jumpa Sikamat-lah.

**YB ADUN Pertang:** Saya sambung ya Dato' *Speaker*. Ni Gemas lagi, mohon penyelesaian tanah adat terbiar dan permohonan tanah berkenaan di Negeri Semilan. Untuk makluman insentif pertanian di bawah Kerajaan Negeri melalui portfolio jawatankuasa saya, adalah terbuka kepada semua pihak dan kategori tanah termasuk tanah adat setelah memenuhi syarat-syarat permohonan bagi setiap insentif tersebut. Antaranya memenuhi keluasan minimum dan mendapat kebenaran bertulis untuk mengusahakan tanah tersebut. Antara insentif ya, ni saya nak sebut jelas Yang Berhormat, antara insentif dan peruntukan kepada permohonan ini bagi projek pembangunan pertanian P51, di bawah Jabatan Pertanian adalah seperti berikut: yang pertama .....

**YB ADUN Gemas:** Yang Berhormat, bukan soalan saya tu.

**YB ADUN Pertang:** Haa? Haa yelah, ADUN Johol, Seremban Jaya, Seri Menanti dan Gemas. Gemas adalah sangkut-sangkut agaknya. Ke saya tengok Gemas ni perlu perbetulkan haluan cepat, jadi itu yang sebut selalu tu.

**YB ADUN Gemas:** Ni kena baca Yasin-lah ni.

**YB ADUN Pertang:** Pertama: insentif Peningkatan Hasil Tanaman, bantuan maksima sehingga 12,000.00/hektar dan setiap peserta meliputi bantuan naik taraf infrastruktur ladang dan bekalan input pertanian. Perkara kedua: Insentif Pembangunan Tanah Terbiar, bantuan maksima sehingga 15,000.00 setiap hektar ataupun setiap peserta meliputi bantuan naik taraf infrastruktur ladang dan input pertanian. Insentif ketiga ialah Insentif Latihan Petani meliputi skop

pemindahan teknologi pertanian dan khidmat nasihat teknikal. Insentif latihan ini diberikan secara percuma kepada semua yang berminat untuk menceburi bidang pertanian.

Untuk makluman ahli Yang Berhormat, bantuan, bagi bantuan berkaitan dengan industri penternakan pula, yang boleh dipohon adalah seperti berikut:

- bantuan baka ternakan di bawah Skim *Double Up 2.0*. Penternak membeli ternakan dari jabatan pada kadar 30% daripada harga perolehan ternakan.
- Yang kedua: bantuan naik taraf ladang, naik taraf kandang dan reban. Bantuan pembinaan dan peralatan pembinaan kandang dan reban ternakan juga yang tidak melebihi 20,000.00 kepada setiap penternak. Buat reban pun kita bagi jugak bantuan, Yang Berhormat, untuk makluman Yang Berhormat belah sana, yang belah sini kita tahu, *insyaAllah*.
- Kemudian yang ketiga: bantuan naik taraf infrastruktur kawalan pencemaran di ladang seperti kolam kumbahan, pun ada bantuan yang tidak melebihi 20,000.00 setiap penternak.
- Bantuan *Homeplot*. Bantuan peralatan dan benih rumput bagi membangunkan kawasan pastura persendirian tidak melebihi 20,000.00 bagi setiap penternak.
- Bantuan peralatan dan mesin bagi aktiviti penternakan dan juga latihan.
- Bantuan transformasi ekonomi desa untuk peningkatan ekonomi rumah dengan nilai tidak melebihi 1,200.00 kepada setiap penternak.
- Lain-lain bantuan am seperti khidmat nasihat, bantuan berkaitan bidang pertanian, kursus berkaitan dan program persampelan dijalankan di masa ke semasa.

Yang Berhormat Dato' *Speaker*, yang seterusnya adalah perkara yang dibangkitkan oleh ADUN Johol dan juga ADUN Labu berkaitan dengan jurang kemajuan antara bandar dan luar bandar yang mesti dikurangkan melalui pembangunan infrastruktur, terdapat keperluan untuk mewujudkan jaringan infrastruktur bagi, yang menyeluruh bagi tujuan tersebut. Yang Berhormat ini jawapan ni agak panjang sikit, berdasarkan kepada beberapa fakta dan data, saya mohon kebenaran

kepada Yang Berhormat untuk tidak membacakan dan menghantar jawapan bertulis kepada semua ahli Dewan bagi menjmatkan masa, boleh Yang Berhormat? Terima kasih. Johol dengan Labu, saya mintak, boleh Yang Berhormat? Terima kasih Yang Berhormat ya. Jadi pasal ni, bagi, jadi Yang Berhormat lebih fokus baca ni, kang saya sebut kang Yang Berhormat tak berapa nak dengar, dah tengah hari ni. Jadi Yang Berhormat saya jawab bertulis.

Cadangan pe, ni Yang Berhormat ADUN Seri Menanti dan ADUN Gemas. Gemas lagi. Cadangan pembinaan kilang padi. Saya dah sebut secara *detail* tadi, tak perlu saya ulas ya. Kemudian cadangan ADUN Sikamat, program harga, harga jualan ladang prihatin yang dapat diteruskan dengan tambahan barangan stok barangan dapur, seperti bekalan ayam, minyak, beras dan lain-lain. Pandangan daripada Yang Berhormat ADUN Sikamat ini, akan saya ambil perhatian secara jelas bagi menambah stok bekalan asas makanan keperluan rakyat ini dan harga, kita akan pastikan harga ini tentunya lebih murah daripada ...[percakapan YB ADUN secara *off mic*]. Haa? Ni ADUN Sikamat. Oh *sorry, la ilahaiillallah*, mintak maaf bos.

**YB ADUN Labu:** Betul tu, dah tengah hari ni.

**YB ADUN Pertang:** Setiausaha MMK, air kena siapkan, ni masalah. ADUN Mambau dan Seri Menanti. Ini rujuk ADUN Sikamat, pasal apa masuk fail saya, kadang-kadang. Dato' *Speaker*, mintak maaf Dato' *Speaker*, saya ingat Dato' *Speaker* pun nanti kita akan lapik dengan Timbalan *Speaker*, supaya tak penat, *insyaAllah*. Ni saya *skip*. Okey, yang akhir sekali ni, Dato' *Speaker*, pasal, yelah dah 12:20, akhir sekali Dato' *Speaker*. ADUN yang dibangkitkan oleh ADUN, Yang Berhormat Fatah, daripada Bagan Pinang kan?

**YB ADUN Bagan Pinang:** Ya Datuk.

**YB ADUN Pertang:** Ya. Yang dibangkit tentang perancangan Jabatan Perikanan Negeri Sembilan untuk membantu nelayan tradisi dan penternak yang terkesan daripada projek pembangunan Negeri Sembilan. Ini penting Yang Berhormat ya. Antara usaha yang dibuat oleh Jabatan Perikanan Negeri Sembilan, Yang Berhormat, daripada, pertama: daripada jumlah orang nelayan berdaftar bawah Jabatan Perikanan, 22 orang nelayan adalah daripada Bagan Pinang yang menjalankan aktiviti menangkap ikan menggunakan peralatan jaring hanyut, bubu dan rawai. Yang kedua: dengan mengambil kira perairan Port Dickson yang sempit untuk tujuan penangkapan ikan, Jabatan perikanan, Perikanan berinisiatif meningkatkan stok sumber perikanan dengan melabuhkan tukun tiruan sebanyak 62 unit daripada tahun 2008

hingga 2020. Semoga usaha ini dapat menambahkan, tentunya akan menambahkan pendapatan nelayan bagi kawasan yang berkenaan. Dan yang ketiga Yang Berhormat, Jabatan Perikanan telah mewujudkan program Komuniti Perikanan di Bagan Pinang yang dikenali sebagai MyKP Bagan Pinang dengan berkonsepkan komuniti perikanan tempatan, yang menjalankan aktiviti pengurusan sumber perikanan, perikanan tangkapan akuakultur, industri asas tani perikanan, industri sokongan perikanan termasuk agro pelancongan dan perikanan rekreasi. Pada tahun 2021 Yang Berhormat, Jabatan Perikanan telah memberikan bantuan alatan projek hiliran ikan masin berjumlah 50,000.00 kepada MyKP Bagan Pinang, ahli-ahli MyKP juga kerap dihantar menjalani kursus dan latihan bagi peningkatan pengendalian dan pemprosesan produk-produk penghiliran yang berkaitan dengan soal yang berkaitan dengan perikanan.

Dato' Yang Dipertua, saya jangka saya telah pun menjawab kesemua perkara yang ditimbulkan oleh ahli-ahli Yang Berhormat. Cuma satu perkara yang berkaitan dengan tadi akan dilaksanakan dan dijawab secara lisan kepada semua ahli .....

**YB ADUN Paroi:** Ada soalan sikit ....

**YB ADUN Pertang:** ..... Yang Berhormat.. Terima kasih Yang Berhormat.

**YB ADUN Paroi:** Datuk, ada soalan sikit Datuk.

**YB ADUN Pertang:** Ya.

**YB ADUN Paroi:** Isu panik yang Datuk nyatakan tadi, tentang jualan panik oleh FAMA. Apa pendekatan?

**YB ADUN Pertang:** Bukan jualan panik FAMA ....

**YB ADUN Paroi:** Dan saya tengok .....

**YB ADUN Pertang:** .... pembelian panik oleh masyarakat.

**YB ADUN Paroi:** Jualan panik oleh FAMA kepada kita punya di, di, macam di Kuala Pilah ya. Dan apa pendekatan pihak kerajaan sekarang supaya suasana panik ni tak wujud?

**YB ADUN Pertang:** Yang Berhormat, saya dah sebut tadi, kita ada beberapa pendekatan berterusan daripada masa ke semasa untuk membekalkan bekalan beras putih tempatan mengikut FAMA, Agro Bazaar dan jugak beberapa lokaliti termasuk LPP bagi mencukupkan

permohonan dan permintaan bekalan beras putih tempatan di kawasan-kawasan seluruh Negeri Sembilan. Ini yang kita buat. Cumanya pembelian panik ini, ada di kalangan masyarakat yang rasa bekalan ini tak cukup. Mereka tak boleh dapat beras ni. Saya akui beberapa tempat memang tak ada Yang Berhormat. Dekat kedai sekarang beras putih tempatan tak ada. Dekat kedai biasa tak ada. Jadi, apabila bekalan ni sampai, tidak mencukupi untuk menampung keperluan masyarakat tempatan, mereka beli secara melam, melebihi daripada keperluan harian. Satu keluarga beli sampai 6 beg. Kadang-kadang sampai 8 beg. Maknanya 8 beg kali 10 dah 60 kilo, 80 kilo. Sedangkan keperluan keluarga itu cuma 1 beg saja untk setiap pembelian. Jadi, ini yang boleh menimbulkan *shortage*, dengan izin Yang Berhormat.

Kerana itu saya nak mintak dan juga war-warkan, melalui FAMA dan sebagainya, bahawa bekalan yang kita salurkan melalui *outlet-outlet* seperti yang saya sebutkan mencukupi bagi kawasan yang berkenaan. Cuma, saya maklumkan juga, bagi kawasan yang agak *distance* sedikit, dengan izin, jauh sedikit daripada FAMA dan jugak pusat-pusat pengedaran ini, itu mendatangkan sedikit masalah bagi mendapatkan beras putih tempatan ini. Dan *insyaAllah* kita sedang kaji dan teliti untuk kita perbaiki dari masa ke semasa Yang Berhormat ya. Terima kasih Dato' *Speaker*.

**YB ADUN Seremban Jaya:** Exco, Exco Pertang. Terima kasih lagi satu .....

**YB Yang Dipertua Dewan:** Seremban.

**YB ADUN Seremban Jaya:** ..... saya mintak .....

**YB Yang Dipertua Dewan:** .... Seremban, sekejap.

**YB ADUN Seremban Jaya:** Mintak izin. Satu minit. Mintak izin. Ini jualan ladang ....

**YB Yang Dipertua Dewan:** Yang Berhormat, tunggu saya terangkan sikit boleh tak?

**YB ADUN Seremban Jaya:** Boleh, boleh.

**YB Yang Dipertua Dewan:** Saya perhatikan memang sidang kita memang ada harmonilah. Dan apabila pihak tu ada *floor*, kadang-kadang kita mencelah. Mencelah tu boleh, tapi dia mengikut peraturanlah. Dia tak boleh ambil *mic* tu terus cakap. Terus soal situ. Kurang-kurang dia kena berdiri dululah, ambil perhatian. Dan mungkin saya akan beri

perhatian kepada yang ada *floor* tu, ada Yang Berhormat nak mencelah. Jadi kita tak nak apa ni, apa ni, yang ada *floor* tu, tiba-tiba dicelah dengan secara *verbal* tanpa, dan persetujuan tu mesti diberi oleh yang ada *floor* tu. Saya tak ada, tak boleh halang. Tapi kalau yang ada *floor* tu dia tak boleh kasi, saya pun tak boleh kasi. Okey, itu yang saya nak terangkan. Daripada sini, kita terus, okey. Boleh ni .....

**YB ADUN Seremban Jaya:** Dato', Dato' *Speaker*.

**YB Yang Dipertua Dewan:** Pertang?

**YB ADUN Seremban Jaya:** Dato' *Speaker*.

**YB Yang Dipertua Dewan:** Yang Berhormat Pertang, boleh?

**YB ADUN Seremban Jaya:** Boleh haa?

**YB Yang Dipertua Dewan:** Boleh? Okey.

**YB ADUN Seremban Jaya:** Okey. Terima kasih Dato' *Speaker*, bagus. Terima kasih. Tadi, Exco Pertang memang saya terima kasih. Lagi satu kira sekarang jualan ladang, jualan ladang boleh Kerajaan Negeri *support* yang banyak, pasal bulan-bulan, saya satu bulan satu kali DUN Seremban Jaya, jualan ladang, mereka turun memang keliling tempat itu, mereka *happy*. Saya rayu, mintak kepada Exco Pertang, esok pun 13 haribulan, saya ada jualan ladang di DUN Seremban Jaya, Taman Seri Kamban memang satu cara yang bagus. Sekarang masalah barang-barang mahu dapat pun ada susah bukan, mereka sudah turun, adalah, memang bagus. Saya mintak Kerajaan Negeri boleh jualan ladang FAMA, boleh bantu lebih sikit. Terima kasih.

**YB ADUN Pertang:** Ini saya dah jelaskan Yang Berhormat. Memang kita akan tambah lagi dan jugak harga kos lebih murah pada pasaran. Dan bekalan untuk keperluan harian ni yang kita beri tumpuan. Cuma Yang Berhormat, apabila ada barang yang kita hantar tu murah, ada, sebagai ADUN Seremban Jaya, besok tambah lagi subsidi kepada barang itu, untuk pengundi. Jadi lebih baik. Jadi, Yang Berhormat membawa satu imej baik untuk Kerajaan Perpaduan di Negeri Sembilan. Terima kasih *Speaker*.

**YB ADUN Seremban Jaya:** Saya minta laluan *Speaker*, boleh cakap?

**YB ADUN Pertang:** Ada lagi?

**YB ADUN Seremban Jaya:** Tak, saya mahu terima kasih. Terima kasih.

**YB ADUN Pertang:** Haa sudah, okey.

**YB ADUN Seremban Jaya:** Terima kasih.

**YB ADUN Pertang:** Terima kasih *Speaker*.

**YB Yang Dipertua Dewan:** Sekarang saya mempersilakan Yang Amat Berhormat ADUN Sikamat untuk menggulung perbahasan.

**YAB ADUN Sikamat:** *Bismillahirrahmanirrahim*. Terima kasih Dato' Yang Dipertua. Saya menjawab soalan ADUN Johol ya, ADUN Johol, mohon penyelesaian isu tanah adat terbiar dan permohonan pembangunan tanah berkenaan di Negeri Sembilan.

Enakmen Pemegangan Tanah Luak Tanah Mengandung Dan Tanah Adat Lingkungan 2022 (Enakmen No.20/22) telah diwartakan dan dikuatkuasakan pada 29 Disember 2022 dan memansuhkan *Customary Tenure* yang saya jawab sebelum ini. Enakmen ini mengemaskinikan peruntukan lama dengan mewujudkan peruntukan baru, antaranya permohonan untuk mengubah syarat sekatan dan kategori kuasa Pihak Berkuasa Negeri untuk menetapkan atau mengubah syarat sekatan dan kategori pecah bahagian, penyatuan lot-lot tanah, kuasa Pihak Berkuasa Negeri untuk meluluskan penyerahan balik dan bermilik semula, pengambilan tanah bagi Tanah Adat Luak Tanah Mengandung dan Tanah Adat Lingkungan.

Peruntukan-peruntukan ini diwujudkan agar urusan hal ehwal Adat Luak Tanah Mengandung dan Tanah Adat Lingkungan selari dengan perkembangan pembangunan tanah masa kini. Walau bagaimanapun, Enakmen 20/22 ini hanya terpakai pada Adat Luak Tanah Mengandung dan Tanah Adat Lingkungan Daerah Kuala Pilah dan Jempol sahaja. Namun bagi tanah adat lain ia memakai *Customary Tenure* Enakmen *Chapter 215*, undang-undang tersebut masih tidak, memperuntukkan hal berkenaan dengan pembangunan tanah.

Bagi soalan Johol juga, mengenai memperkasakan Perbadanan Kemajuan Negeri, Negeri Sembilan (PKNNS). Adalah dimaklumkan bahawa Kerajaan Negeri prihatin dengan, dan peka dengan peranan *Government Link Agency (GLC)* di Negeri Sembilan seperti Perbadanan Kemajuan Negeri, Negeri Sembilan (PKNNS). Seawal 2018, Manifesto Pakatan Harapan ketika Pilihan Raya Umum Ke-14, antaranya ialah mengembalikan peranan PKNNS sebagai pemaju perumahan Negeri Sembilan. Apabila Kerajaan Negeri Sembilan mengambil alih pentadbiran Negeri Sembilan bermula 2018, PKNNS telah diberi peranan yang aktif dalam membantu Kerajaan Negeri membangun

Negeri Sembilan khususnya dalam sektor ekonomi. Fokus utama PKNNS adalah pertama: menggerak pertumbuhan ekonomi Negeri Sembilan melalui pembangunan hartanah. Pada tahun 2020, PKNNS telah diberi kepercayaan oleh Kerajaan Negeri bagi melaksanakan projek Perumahan Penjawat Awam Negeri Sembilan, projek perumahan rakyat, Projek Rumah Penjawat Awam Negeri Sembilan adalah dibangunkan di atas tanah seluas 45.96 ekar di Mukim Labu, Daerah Seremban. Projek ini telah berjaya merealisasikan impian 351 orang penjawat awam yang memiliki rumah sendiri iaitu teres 1 tingkat *Type A* dengan harga 90,000.00 dan *Type B* dengan harga 250,000.00 ringgit. Projek ini siap sepenuhnya pada bulan April 2022.

PKNNS telah terlibat juga dalam melaksanakan Projek Perumahan Rimbun Aman, yang melibatkan pembinaan 71 unit rumah teres 2 tingkat *Type C* dengan harga rumah minimum 498,000.00 ringgit seunit, di tanah berkeluasan 7 ekar di Mukim Labu, Daerah Seremban. Pembangunan projek ini telah mencapai kemajuan sehingga 99% dan dijangka siap pada akhir tahun 2023 ini.

Selain itu, PKNNS juga telah membangunkan projek perumahan di tanah seluas lebih kurang 45 ekar di Mukim Chembong, Daerah Rembau. Projek perumahan ini akan merangkumi lebih kurang 624 unit rumah *Type A, B* dan *C*. Pembinaan projek akan dimulakan setelah urusan tanah diselesaikan dalam masa terdekat. Ini juga bagi menjawab soalan ADUN Chembong ya, mengenai apakah peranan yang dimainkan oleh GLC di, di Rembau.

Fokus PKNNS yang kedua adalah menyokong pembangunan ekonomi negeri melalui inisiatif pelaburan dan pembangunan *business* dalam Kumpulan PKNNS. PKNNS telah menetapkan pelaburan dalam syarikat-syarikat anak, syarikat-syarikat anak pada tahun 2020 melalui penstrukturan semula ekuiti dalam Syarikat Negeri Roadstone Sdn. Bhd. (NRSB), pegangan ekuiti PKNNS dalam syarikat tersebut telah meningkat daripada 51% kepada 80%. Hasil syarikat NRSB telah bertambah baik dan memperolehi pendapatan sebanyak 178.23 juta pada tahun 2022 berbanding pendapatan sebanyak 49.26 juta pada tahun 2018. Kenaikan pendapatan pada tahun 2018 adalah sebanyak 72%. Peningkatan ini adalah berlaku kerana peningkatan pendapatan projek yang amat ketara pada tahun 2022 berbanding pendapatan projek yang diterima pada tahun 2018. Dengan peningkatan hasil NRSB ini, dividen tahunan yang dibayar oleh NRSB kepada PKNNS telah meningkat iaitu 1.5 juta pada tahun 2020, 2.8 juta pada tahun 2021 dan 4.0 juta bagi tahun 2022.

Di samping itu juga, pada tahun 2021, PKNNS telah meluaskan pelaburannya dengan mengambil alih sepenuhnya anak Syarikat Pati Nilai Quarry Sdn. Bhd. Pegangan saham asal PKNNS dalam Syarikat PNQ adalah sebanyak 30%. Manakala nilai pengambilan Syarikat PNQ pada 2021 tersebut adalah sebanyak 6.93 juta. PKNNS akan terus meneroka *business* baru apabila pada tahun 2023 ini. PKNNS telah mendapat kelulusan daripada Kementerian Kewangan bagi menubuhkan satu lagi anak syarikat baru iaitu syarikat yang membangunkan longkang konkrit pra-tuang (*precast concrete*).

Fokus utama PKNNS yang ketiga adalah sebagai pelaksana inisiatif Kerajaan Negeri dan Kerajaan Persekutuan. PKNNS ini, PKNNS kini adalah agensi pelaksana bagi inisiatif Kerajaan Negeri iaitu bagi Tabung Pembangunan Usahawan Negeri Sembilan (TUNS) yang telah dimulakan pada tahun 2019 hingga 2023. Program TUNS dan TUNS Plus telah memanfaatkan seramai 6,135 orang usahawan kecil dan seramai 621 usahawan mikro.

Selain itu PKNNS adalah agensi pelaksana bagi inisiatif Kerajaan Negeri bagi Program Rumah Harapan Rakyat Negeri Sembilan (RHR) yang dimulakan pada tahun 2021. Bagi tahun 2021 dan 2022, sebanyak 112 permohonan telah diluluskan dan jumlah tersebut 57 unit rumah telah siap dibina dan telah diserahkan kepada peserta. Manakala 5 unit lagi adalah dalam pembinaan.

PKNNS adalah agensi pelaksana yang menyalurkan peruntukan dari Kementerian Ekonomi bagi program Inisiatif Pendapatan Rakyat (IPR) yang telah diperkenalkan oleh Kerajaan Persekutuan. Program ini menyasarkan kepada golongan miskin bagi membasmi kemiskinan tegar di Negeri Sembilan. Sejak tahun 2019, PKNNS telah mempertingkatkan kecekapan tadbir urus dengan Menyusun semula fungsi bahagian dan menambah baik *Standard Operating Procedure* (SOP) bagi setiap aktiviti dalaman, tatacara kutipan sewaan premis dan tanah telah dimantapkan bagi memastikan PKNNS memperolehi hasil pendapatan yang baik, aset-aset telah sekian lama tidak menjana pendapatan telah dilupuskan dan diganti dengan perolehan aset yang baru. Dengan pelbagai program pembangunan dan juga penambahbaikan ini, PKNNS memperolehi pendapatan sebanyak 14.04 juta pada tahun 2022, berbanding pendapatan sebanyak 10.2 juta yang diterima pada tahun 2018.

Kerajaan Negeri akan terus menyokong usaha dalam memperkasakan PKNNS agar bersaing dengan sekurang-kurangnya setara dengan J-Corp dan Perbadanan Kemajuan Negeri Selangor. Tapi malang ya, kita tak ada tanah simpanan yang besar untuk kita bersaing, kita tak ada ladang, kita tak ada, kita ada tanah yang kecil-kecil, 50 ekar di setiap daerah lebih

kurang ada 100 ekar, begitu je, kita tak ada ladang. Jadi untuk bersaing besar kita tak ada kemampuan yang agak besar setakat ini. Tapi kita akan ke arah tersebut.

Bagi menjawab soalan ADUN Johol dan Mambau. Mempromosikan Negeri Sembilan kepada pelabur antarabangsa untuk melabur selain aeroangkasa, bagi sektor lain, mungkin telah dijawab oleh YB Teo, jawab dah? Mengenai program pelaburan antarabangsa. Dah jawab kan? Hab, hab logistik juga diwujudkan, dah jawab kan yang ni? Belum jawab lagi? Okey, Kerajaan Negeri melalui Invest NS sentiasa mempromosikan peluang-peluang pelaburan di Negeri Sembilan di peringkat antarabangsa melalui pelbagai kaedah dan platform. Antaranya adalah dengan mengadakan edaran *brochure* dan risalah *NS Investment Guide* ke pejabat MIDA di luar negara. Pada tahun 2023, Invest NS menumpukan edaran brosur/risalah ke negara Jerman, China, Thailand, Korea Selatan dan Ibu Pejabat ASEAN di Bangkok. Selain itu pentadbiran ini turut mengadakan misi gerakan, misi galakan pelaburan ke negara luar serta mewakili Negeri Sembilan dalam expo-expo antarabangsa seperti musu, MUSIAD Expo di Istanbul Turki, Expo *International Greentech & Eco Products Malaysia (IGEM 2023)*, *International Rubber Industry Convention & Expo (IRICE)* dan *Selangor Business Summit - Selangor Industrial Park Expo (SPARK)* anjuran Selangor pada bulan Oktober ini.

Proses pelaburan di negeri ini juga telah diselia dan ditambah baik dengan adanya mesyuarat pra teknikal dan pelarasan dan, di peringkat Invest NS, sebelum dibawa ke mesyuarat OSC di peringkat PBT. Proses ini tertumpu pada projek-projek perkilangan dan perkhidmatan terpilih di mana bertujuan untuk memudahcara urusan para pelabur serta memastikan urusan projek mempercepat dan berjalan lancar. Tempoh kelulusan KM, tanah dan, dan pendirian bangunan adalah dalam tempoh 1 bulan tertakluk kepada status permohonan lengkap dan memenuhi syarat keperluan agensi teknikal yang ditetapkan.

Oleh itu, berdasarkan kepada gerak kerja dan aktiviti promosi dan pemasaran ini hasilnya, pada suku kedua tahun ini, Januari hingga Jun, Negeri Sembilan telah berjaya memperolehi 89 projek diluluskan dengan jumlah pelaburan sebanyak 1.95 bilion direkodkan oleh MIDA. Walau bagaimanapun, berdasarkan unjuran *pipeline* Invest NS sehingga bulan September ini, Negeri Sembilan berkemungkinan mampu mencapai 5 bilion jumlah pelaburan melalui beberapa projek yang telah berjaya ditempatkan di negeri ini dan kini sedang dalam rundingan MIDA bagi mendaftarkan pelaburan baru antaranya projek F&N di Gemas (1.0 bilion), Projek *Data Centre* (1.0 bilion), Nexperia Tuanku

Jaafar Industrial Park (300 juta), Sandvik Group di Sendayan (150 juta), Farm Fresh di Enstek (100 juta) dan lain-lain lagi.

Untuk makluman, sektor ini, *Renewable Energy* (RE) adalah satu sektor yang disasarkan dalam pembangunan industri di Negeri Sembilan. Kerajaan Negeri sedia maklum dengan keperluan para pelabur di mana mereka mematuhi Standard ESG yang ditetapkan untuk melayakkan syarikat eksport produk keluar negara. Oleh itu Kerajaan Negeri melalui Invest NS berhasrat untuk mewujudkan program *Corporate Green Power Programme (CGPP)* dengan kerjasama pihak swasta bagi membantu pelabur-pelabur di negeri ini mengurangkan *carbon footprint* dan mematuhi standard ESG untuk pasaran eksport. Tapak cadangan bagi program CGPP ini adalah di Bahau, Negeri Sembilan seluas 200 ekar bagi pembangunan loji tenaga solar yang dijangka membekalkan 70, *megawatt*.

Untuk makluman juga, pada 7 September 2023 yang lalu, cadangan program ini telah dibentangkan kepada 7 buah syarikat utama di Techpark@Enstek yang berminat seperti Ajinomoto Berhad, Kellogg's Asia Product (M) Sdn. Bhd., Sunshine Bread Sdn. Bhd., Dutch Lady Milk Industries Berhad, Mahsuri Food dan Taison Group dan Mission Foods Malaysia Sdn. Bhd.

Berkenaan maklumat peluang pelaburan pula, para pelabur boleh melayari laman web [investns.com.my](http://investns.com.my) bagi mendapatkan info terkini. Kerajaan Negeri juga sedang dalam proses menaik taraf sistem Gis9 yang bakal mengandungi modul pelaburan. Kerajaan Negeri turut menitikberatkan hab logistik untuk menarik pelabur berskala besar di Negeri Sembilan. Antara usaha yang dilaksanakan Kerajaan Negeri adalah untuk mewujudkan zon perindustrian bebas ataupun zon perdagangan bebas di Negeri Sembilan. Walau bagaimanapun, cadangan itu masih dalam peringkat kajian oleh pihak UPEN.

Dato' Yang Dipertua, ADUN Chennah, pelaburan sektor logistik, Kerajaan Negeri sentiasa mengalu-alukan dan kita sedia maklum kita amat strategik, berhampiran dengan KLIA dan Port Klang, 35 minit ke KLIA, Port Klang – 90 minit. Oleh itu, bagi fasiliti pembekuan sejuk ini lokasi yang bersesuaian adalah di sekitar kawasan industri Nilai, Enstek, Senawang dan Sungai Gadut. Dan kita akan membantu pihak yang berminat ini untuk sama-sama mengenal pasti tapak dan kita akan berunding dengan tuan-tuan punya tanah kawasan-kawasan tersebut.

Dato' Yang Dipertua, Chennah dan Rantau mengenai *feeder port*, ya, *feeder port*. Cadangan ini mewujudkan Pelabuhan Port Dickson amat disambut baik, ya, perkara ini juga pernah dikaji dalam pelaksanaan

Kajian Kemungkinan mengenai cadangan Pembangunan Lembah Aeroangkasa di Negeri Sembilan mengambil kira Port Dickson yang terletak berhadapan dengan Selat Melaka, manakala berdasarkan kepada Rancangan Pembangunan Negeri Sembilan '21 - '25 dan hala tuju hubung kait antara sektor ekonomi pembangunan industri maritim meningkatkan, dan akan meningkatkan input pengeluaran industri utama dan seterusnya menggalakkan ekonomi bidangan dan aglomerasi aktiviti ekonomi dalam Negeri Sembilan. Justeru pentadbiran Kerajaan Negeri amat mengalu-alukan pihak swasta berkenaan untuk mengusulkan pemajuan ini.

Bagi soalan ADUN Chennah, jalan antara Chennah ke Hulu Langat. Jalan yang ditutup adalah Jalan N32 Jalan Kuala Klawang - Genting Peras bermula di seksyen 18 ya, di seksyen 18 dan kerja-kerja cerun yang kritikal sedang dilakukan dan *insyaAllah* siap pada penghujung Disember 2023. Bagi jalan Daerah Hulu Langat, Selangor, Jabatan Kerja Raya Selangor memaklumkan kerja pembaikan cerun masih dalam pening, peringkat pembinaan dan dijangka siap pada Februari 2024. Jadi kita dah boleh bukak tapi Selangor takleh bukak lagi.

Untuk jawapan ADUN Temiang. Pemilikan tanah kekal bagi Kampung Baru. Kita sedia maklum untuk taman-taman kita telah dilaksanakan, Kampung Baru juga kita telah, Kerajaan Negeri pada 15 Jun 2022 mengambil maklum akan keputusan Majlis Tanah Negara Ke-73 pada 30 November 2013 telah membuat ketetapan semula berkenaan keputusan Majlis Tanah Negara Ke-42 pada 8 Januari 1988 dan Majlis Tindakan Tanah Negara Ke-53 pada 25 April 1997 berkenaan dasar berkaitan Kampung Baru iaitu pertama: tempoh pelak, pajakan (*lease hold*) bagi Kampung-Kampung Baru dinaikkan daripada 30 tahun kepada 60 tahun; dan yang kedua: tempoh pajakan (*lease hold*) bagi Kampung-Kampung Baru tersebut hendaklah kurang, sekurang-kurangnya 60 tahun tetapi tidak melebihi 99 tahun. Oleh itu, Kerajaan Negeri pada 8 Februari 2023, mengambil keputusan bersetuju bagi Kampung Baru dilaksanakan kaedah pelanjutan tempoh pajakan di bawah Seksyen 90A Kanun Tanah Negara (Akta 828) dan Pengarah Tanah Galian Negeri Sembilan telah mengeluarkan pekeliling pada 21 Februari 2023 berkaitan garis panduan dasar pelaksanaan pelanjutan tempoh pajakan bagi tanah-tanah yang berstatus kediaman di Kampung Baru di bawah Seksyen 90A Kanun Tanah Negara (Akta 828) iaitu sehingga 99 tahun.

Soalan ADUN Temiang. Kolam takungan ya. Kolam takungan. Kerajaan Negeri Sembilan melalui Jabatan JPS, tadi saya rasa dah dijawab, oleh YB Nilai. Melan, telah melantik ya, telah melantik perunding bagi melaksanakan Kajian Pelan Induk Saliran Mesra Alam (PISMA) pada tahun 2022 bagi mengkaji beberapa cadangan bagi mengatasi masalah

banjir di kawasan Temiang termasuk cadangan membina sebuah kolam takungan. Kajian dijangka siap seawal suku pertama 2024. Bilangan kolam takungan sekarang kita ada 166. Dan juga kita sedia maklum kita perlukan 10 juta untuk buat *maintenance* bagi memastikan kolam takungan kita dapat berfungsi dengan baik.

Soalan ADUN Klawang. Kesiapsiaga, kajian untuk menentukan aras sungai yang asal dan kesiapsiagaan menghadapi Monsun Timur Laut. Jabatan Pengairan Saliran (JPS) merupakan salah satu agensi teknikal yang bertanggungjawab memberi ulasan teknikal berkaitan permohonan pengambilan pasir sungai. Manakala kuasa melulus sesuatu permohonan permit, pengambilan pasir di Semenanjung Malaysia, Sabah dan Sarawak diberikan kepada Pihak Berkuasa Melulus di mana Negeri Sembilan adalah Majlis Mesyuarat Kerajaan Negeri. JPS Malaysia menge, mengguna pakai Garis Panduan Pengambilan Pasir Sungai 2022 di mana pengusaha perlu mengemukakan pelan kerja ukur yang disediakan oleh juruukur berlesen yang mengandungi maklumat topografi, keratan rentas sungai dan keratan memanjang. Selain itu pengusaha perlu menjalankan kerja penyiasatan tanah dan mengemukakan profil *borehole log* yang menentukan isipadu pasir sungai yang boleh dikeluarkan. Kadar pengambilan isi padu pasir adalah bergantung kepada aras reka bentuk dasar sungai manakala bagi sungai yang tidak mempunyai aras rekabentuk, kedalaman maksimum pengorekan pasir hendaklah tidak melebihi 1.5 meter atau ketebalan yang akan ditetapkan oleh JPS. Semua pengorekan pasir perlu meninggalkan satu meter minima lapisan pasir di dasar sungai sebagai penapis semulajadi untuk mengekalkan kestabilan morfologi sungai dan pengambilan pasir hanya dibenarkan dalam lingkungan 1/3 kawasan tengah sungai.

Kesiapsiagaan menghadapi banjir, Kerajaan Negeri melalui Jawatankuasa Bencana Negeri dan Daerah telah diaktifkan di mana arahan telah diberikan kepada semua agensi yang terlibat bagi membuat persediaan palarasan agensi. Antara persiapan yang telah diadakan oleh JPS adalah Program Pemuliharaan Sungai untuk mengurangkan risiko banjir, program pemuliharaan muara-muara sungai, program penyelenggaraan kolam-kolam takungan, penyelenggaraan pam bergerak dan kelengkapan kesiapsiagaan menghadapi banjir, penyelenggaraan pintu-pintu air dan penyelenggaraan stesen hujan, aras air dan siren. Terima kasih.

Untuk soalan Klawang mengenai tempat persinggahan R&R di Lot 2328 Mukim Klawang. Lot 2328 telah diluluskan pemberian kepada Majlis Daerah Jelebu. Ketika ini, lot tersebut dalam proses pembatalan rizab

pembangunan akan datang dan di bawah kawalan Setiausaha Kerajaan Negeri.

Klawang juga, berkenaan dengan, dah ni dah jawab, mengenai menentukan aras sungai. Tuan Razi Mohd Ali, insentif pemberian lot tanah kawasan felda oleh Kerajaan Negeri, tadi dah dijawab oleh YB Exco Kanan. Insentif pemberian lot kepada kawasan felda, tadi dah jawab.

Sungai Lui, adalah pintu masuk daripada Pahang sempadan Bera, mohon naik taraf jalan antara Bahau – Kemayan kerana keadaan bahu jalan yang bahaya. Untuk makluman, JKR Negeri Sembilan pernah membuat permohonan kepada Kerajaan Negeri pada Rancangan Malaysia ke-12 *Rolling Plan 1* (RP1) diangkat kepada pihak Kementerian Kerja Raya di bawah tajuk Menaik Taraf Jalan Sedia Ada Dari Serting Tengah Bandar Seri Jempol – Air Hitam – Kemayan Jempol, Negeri Sembilan. Walau bagaimanapun ia ter, ia tidak termasuk dalam senarai keutamaan. Dan kita sedia maklum jalan, jalan ini kita, daripada Kuala Pilah akan ada satu *highway* baru yang, dan nampaknya sedang dalam proses kelulusan.

Soalan yang dibangkitkan oleh ADUN Sungai Lui, paip pecah di felda, paip usang, uzur, SAINS mengambil tindakan segera membaiki paip-paip pecah dan tidak mengganggu aktiviti harian. Bagi jangka masa panjang, pihak SAINS membuat permohonan kepada FELDA untuk menggantikan paip-paip yang uzur atau usang di kawasan felda. Ada banyak, memang kita akui seperti di, di, paip pecah di felda ini, bagi bulan Jun sahaja, Januari – 7, Februari – 8, Mac – 4, April – 6, Mei – 20, Mei tu musim hari raya, Jun – 17, Julai – 19, Ogos – 8, September – 9. Jadi, kita akan mohon kepada pihak FELDA bagi menggantikan paip-paip usang di kawasan-kawasan felda.

Pencahayaan Negeri Sembilan, Sungai Lui. Pada 2022, sebanyak 413 lampu jalan telah dipasang di Daerah Jempol melalui Program Pencahayaan Negeri daripada jumlah ini, 158 jalan telah dipasang di DUN Sungai Lui yang tertumpu di kampung, di kawasan Kampung Felda Sungai Lui, Kampung Sungai Sampo, Kampung Baru Air Hitam, Kampung Dusat dan Kampung Serampang Indah. Bagi tahun 2023, sebanyak 140 tiang lampu dan 70 lampu telah diangkat permohonan melalui program Pencahayaan Negeri dengan pecahan 10 tiang dan 5 lampu dipasang di DUN Sungai Lui.

Bagi soalan DUN Lobak, isu masalah penyelenggaraan rumah pangsa, mohon peruntukan belanjawan '24 sebanyak 1.0 projek penyelenggaraan rumah swasta 2024 diberikan 180 skim rumah pangsa di seluruh Negeri Sembilan. Ini saya rasa, dah dijawab oleh ADUN Nilai.

ADUN Lobak juga, isu Lingkaran Tengah Seremban (*Middle Ring Road Seremban*), mohon sambungan Jalan Lingkaran Tengah kawasan DUN Lobak termasuk jalan menghala ke Mantin, Ulu Beranang, Jalan Templer untuk meningkatkan ekonomi di kawasan sekeliling. Untuk makluman, JKR Negeri Sembilan telah pun mengangkat permohonan bagi menyambung baki jalan Lingkaran Tengah Seremban kepada pihak Kementerian Kerja Raya pada 28 Februari 2023 di bawah 2 tajuk iaitu membina jalan Lingkaran Tengah Seremban dari *interchange Labu* ke FT001, Jalan Tun Dr. Ismail ke ta, ke Temiang, Daerah Seremban Negeri Sembilan serta membina Lingkaran Tengah Seremban ke *interchange* Temiang/LEKAS ke *interchange* Jalan Dato Siamang Gagap, Daerah Seremban bagi *Rolling*, RMK Ke-12, *Rolling Plan* Ke-4. Walau bagaimanapun, projek ini belum diluluskan dan JKR Negeri akan melaksanakan kerja-kerja ini sebaik sahaja peruntukan diluluskan.

ADUN Lukut, REE. Sebelum penerokaan sumber nadir bumi dijalankan di Negeri Sembilan, satu garis panduan atau SOP yang ber, yang komprehensif akan disediakan dengan melibatkan pandangan dan kepakaran jabatan-jabatan teknikal. Penyediaan garis panduan ataupun SOP nadir bumi Negeri Sembilan akan berpandukan kepada SOP yang dikeluarkan oleh Kerajaan Persekutuan. Dan ia diharap akan lengkap dan dirangka oleh pakar dalam bidang perlombongan dan pemuliharaan alam sekitar daripada jabatan dan agensi peringkat persekutuan. Sehubungan itu, dia akan menjimatkan masa dan kos bagi tujuan penyelidikan yang mana SOP tersebut akan dikaji, disesuaikan, ditambah baik mengikut keperluan Kerajaan Negeri. Kerajaan Negeri akan memastikan penerokaan nadir bumi ini akan dijalankan secara terancang bagi mengelakkan sebarang isu pencemaran dan kemasyarakatan khususnya untuk jangka masa yang panjang.

ADUN Lukut, Kampung Baru 99 tahun, kampung, dipanjangkan kepada kampung tradisional, ini telah, kampung tradisional memang 99 tahun. YB Choo, Lukut, kawasan Lukut dapat dikurang, lampu isyarat, okey. Kementerian Kerja Raya dalam proses percubaan penggunaan *smart traffic light* di lokasi tertentu di Negeri Sembilan. Dicadangkan jalan Sungai Ujong sekitar tol Seremban dan juga sekitar Port Dickson. Untuk tahun 2024, sememangnya ada peruntukan untuk Negeri Sembilan bagi pemasangan *smart traffic light* oleh Kementerian Kerja Raya dan mungkin kita akan bawa ke, ke Lukut ya, untuk bagi mengatasi masalah yang berlaku.

YB Choo, ini, ini bukan Choo ni rasanya, ni Chennai, Hulu Langat ya. Tadi saya dah jawab. Cerun ya, untuk makluman ya, untuk makluman tambahan, cerun di Jalan Genting Peras, kita ada 5 pembinaan yang melibatkan 10.5 juta, jangka siap pada Disember 2023. Dalam reka

bentuk ataupun 4 kos lebih kurang 11.52 juta ya. Ada lagi cerun-cerun yang berbahaya di kawasan tersebut, 9 ya.

Mambau, mani, manifes, manifesto aspirasi Kerajaan Negeri Sembilan. Menyorak, men, mesyuarat penyelarasan pertama oleh agensi pelaksana akan diadakan pada 3 November '23 bagi memulakan segera gerak kerja pelaksanaan manifesto untuk manfaat kepada rakyat. Pelaksanaan aspirasi ini akan dipantau secara berkala untuk memastikan 70 aspirasi perpaduan ini dilaksanakan seperti yang dijanjikan.

ADUN Paroi, kerja pembaikan mas, jalan ya, jalan di depan Masjid Bandar Baru Senawang ya. Kerja pembaikan Masjid Bandar Baru Senawang sedang dilaksanakan tanpa menggunakan peruntuk, peruntukan pihak Kerajaan Negeri sama ada melalui pihak JKR mahupun pihak Jabatan Agama Islam. Kerja pen, ini soalan dia, jalan ni, okey. Melaksanakan kerja pembaikan cerun di hadapan Balai Polis Senawang, kerja tersebut dijangka siap pada November 2023 dengan anggaran kos 1.74 juta. Pihak JKR Negeri Sembilan juga telah mengambil maklum permasalahan jalan Senawang 3 yang beralun dan berombak ya. Nanti kita lihat bagaimana untuk diselesaikan.

Gemas, peruntukan, Kerajaan Negeri mengambil maklum tentang perkara ini dan akan membincangkan isu ini dalam masa terdekat.

Mengenai ADUN Paroi juga, surat terbuka kepada Duli Yang Maha Mulia Yang di-Pertuan Besar Negeri Sembilan. Pihak MAINS menafikan semua dakwaan yang dinyatakan dalam surat terbuka tersebut. Ianya merupakan isu yang sentiasa diulang-ulang oleh pihak tertentu bagi memberi gambaran tidak baik kepada pihak MAINS. Untuk makluman, pihak MAINS telah mengeluarkan kenyataan rasmi pada 14 Februari 2023 bertajuk Kerjasama Penuh Majlis Agama Islam Negeri Sembilan (MAINS) Mengenai Dakwaan Penyelewengan Wang Zakat. Susulan itu juga beberapa laporan Polis telah dibuat oleh pihak MAINS berkaitan isu yang dibangkitkan untuk tindakan pihak berkuasa. Pihak MAINS juga telah mengadakan taklimat bersama Ahli Dewan Undangan Negeri, Negeri Sembilan pada 17 April 2023 bagi menjelaskan tentang perkhidmatan MAINS dan isu-isu yang berkaitan. Isu ini telah disiasat oleh pihak berkuasa bermula tahun 2019 lagi.

Majlis Agama Islam Negeri Sembilan mengalu-alukan hasil siasatan Suruhanjaya Pencegahan Rasuah (SPRM) dan pihak Polis (PDRM) berhubung dakwaan penyelewengan wang zakat di Negeri Sembilan. Laporan hasil siasatan tersebut juga amat penting bagi membersihkan imej MAINS dan mengembalikan keyakinan masyarakat terhadap tatakelola pengurusan zakat di Negeri Sembilan ini. Ya, kita, kerana itu

saya mula lantik jadi Menteri Besar, dia tak benarkan saya jadi Pengerusi MAINS sekali ya. Kena berasingan. Jadi, sekarang dia berasingan.

Dan kita sebagai wakil rakyat, dan rakyat Negeri Sembilan kena yakin ya, apa jua ada perkara-perkara yang tidak baik, tidak betul, harus kita laporkan tetapi kita tidak boleh merosakkan imej MAINS ya, bagi memastikan bahawa kepercayaan yang meningkat saban tahun, kita nampak peningkatan bayaran zakat tersebut. Tapi kalau ada perkara-perkara sebegini, dia hanya akan merosakkan, yang akan rugi adalah penerima-penerima zakat. Kalau dulu penerima-penerima zakat hanya mendapat 250.00 ringgit satu keluarga. Sekarang bergantung kepada tanggungan keluarga tersebut. Dari bermula dari 350.00 sehinggalah 800.00 ringgit. Bermakna kita tambah lagi bantuan kepada keluarga yang dapat tu lebih banyak, sampai 800.00 ringgit. Jadi kalau kita hanya nak merosakkan, nama baik MAINS, kutipan Baitulmal, pengagihannya, akhirnya yang rugi adalah masyarakat Islam di Negeri Sembilan. Sedangkan kita berbanding dengan negeri jiran kita, kita jauh beza, kutipan mereka lebih banyak berkali-kali ganda. Kita sebelah pun kita hanya dapat sekitar 160 juta ya. Dia hampir 1.0 bilion. Jadi kita rugi. Sepatutnya kita juga lebih dapat limpahan yang lebih. Jadi, kita hari ini kena memberikan imej yang baik, pastikan keluarga miskin dapat bantuan, orang susah dapat bantuan, itu yang perlu kita sampaikan kepada MAINS, tindakan mereka perlu segera, ini yang harus kita lihat, bantuan kepada pelajar-pelajar, bantuan kepada anak-anak yang belajar di sekolah harus diberikan perhatian, jumlah mereka lebih banyak, tak apa. Jadi ini yang harus kita lihat, dan saya berharap kepada seluruh pimpinan di Negeri Sembilan ini, tak kira kerajaan ataupun pembangkang, pastikan bahawa inilah satu-satunya yang boleh bantu masyarakat Islam untuk keluar daripada kemiskinan dan keluar. Dan kita berharap ramai lagi boleh membayar zakat pada masa akan datang.

Dato' Yang Dipertua, ADUN Jeram Padang, Sungai Lui, jalan Rompin – Gemas perlu dibesarkan dibaiki, ini saya pun dah jawab dalam soalan lisan tempoh hari. Dan *insyaAllah*, dan disokong oleh Menteri Pertahanan, antara jalan-jalan yang perlu kita beri perhatian supaya aset-aset ketenteraan juga boleh dibawa bukan sahaja melalui Gemas – Tampin, tetapi melalui Pasir Besar ke, ke Selatan, ke banyak arah supaya kita, jika ada *emergency*, ini akan memudahkan jalan, apa, kemudahan ataupun memudahkan peralatan-peralatan tentera kita dapat digerakkan ya.

Ini, saya dah, Jeram Padang. Projek naik taraf sistem bekalan air, tangki di kawasan perumahan bagi mengatasi gangguan bekalan air dan kes paip pecah. Bagi DUN Jeram Padang, terdapat 3 bilangan tangki servis terletak di DUN Jeram Padang iaitu Rumah Rakyat Rompin, Felcra

Rompin dan Kampung Orang Asli Batu Peti, berkapasiti keseluruhannya 0.98 juta liter yang aktif dan diselenggara secara berkala daripada pihak SAINS. Bagi kerja-kerja pembaikan paip pecah, ia akan dilaksanakan secara berterusan dalam tempoh 24 jam mengikut piagam pelanggan SAINS. Yang ketiga, untuk menjamin kecukupan air pada masa akan hadapan, terdapat beberapa projek yang dalam peringkat pembinaan, reka bentuk dan perancangan bagi DUN Jeram Padang seperti senarai berikut:

- Projek Bekalan Air Luar Bandar Sistem Retikulasi Negeri Sembilan Bagi Tahun 2022, perancangan jangkaan pembinaan pada tahun 2024 iaitu di bawah Kementerian Kemajuan Desa Dan Wilayah. Pemasangan paip retikulasi 100mm dan 150mm serta, serta 100mm dan 155mm di MMU PVC.
- Projek, kedua adalah Projek Air Luar Bandar Sistem Retikulasi Negeri Sembilan 2021. Rekabentuk jangka pembinaan pada 2024, Kementerian Desa Dan Wilayah. Pemasangan paip yang sama dan juga pembinaan tangki sedutan dan rumah pam.
- Yang ketiga: Projek Bekalan Air Luar Bandar. Rekabentuk dijangka pembinaan 2024. Kementerian Kemajuan Desa Dan Wilayah. Kerja pemasangan retikulasi 100 mm dan DMMS dan MU PVC.
- Projek Bekalan Air Ladang RISDA, Palong Negeri Sembilan. pembinaan dijangka siap 2024. Kementerian Desa. Yakni pemasangan paip retikulasi 100mm. Kerja pembinaan 1 unit tangki menara jenis RC dan tangki sedutan serta rumah pam.

Jadi kita harap dengan projek-projek ini juga dapat membantu dan saya juga berharap bahawa banyak lagi tangki-tangki dapat disediakan di kawasan-kawasan yang menghadapi masalah.

ADUN Mambau, Seri Menanti, Jualan Harga Ladang telah dijawab oleh ADUN Pertang. Kesesakan jalan waktu puncak, jalan utama Seremban – Kuala Pilah, cuti hujung minggu. Untuk makluman, kerja-kerja, kerajaan, Kementerian Kerja Raya telah siap melaksanakan kajian awal jalan alternatif Kuala Pilah – Seremban dan telah dibentangkan kepada Kerajaan Negeri, laporan akhir kajian tersebut seiring dengan, itu hasil inisiatif Kerajaan Negeri, JKR Negeri Sembilan juga telah mengangkat permohonan ke Kementerian Kerja Raya bagi tajuk projek Membina Jalan Baru Dari Ulu Bendul Ke Juasseh, Kuala Pilah, Negeri Sembilan bagi pelaksanaan Rancangan Malaysia Ke-12 *Rolling Plan 4* (RP4). JKR Negeri Sembilan akan melaksanakan kerja sebaik sahaja peruntukan diluluskan.

Yang Berhormat Tuan Abdul Fatah Zakaria, ADUN Bagan Pinang bangkit isu pencemaran kapal-kapal perairan. Pemantauan kapal-kapal di perairan Port Dickson adalah dibuat oleh Jabatan Laut. Jabatan Alam Sekitar sedia, bersedia setiap waktu bagi, jika berlaku tumpahan minyak dan pembersihan akan dilaksanakan. Kerajaan Negeri bersedia untuk kerja pembersihan pantai melalui Pelan Tindakan Pembersihan Pantai (PTPP) yang tersedia. Tiada kes tumpahan minyak sepanjang tahun 2023, tahun 2022, hanya yang terakhir berlaku pada 12 Oktober 2020 di Pantai Cermin Port Dickson ya. Jadi, itu kira peringkat Kerajaan Negeri Sembilan, kawasan kita, kita telah selesaikan dalam tempoh tak sampai sebulan ya. Kita telah selesaikan.

DUN Serting, kerap terputus bekalan air. ADUN Serting. Okey, kawasan FELDA Raja Alias, tindakan telah diambil adalah dengan pemasangan alat kawalan tekanan secara automatik bagi mengurangkan kes pecah, paip pecah bagi kawasan Kampung Serting Hilir. Sebahagian daripada paip telah dibuat penukaran pada tahun 2021 sepanjang 1.5 kilometer dengan kos 320,000.00. Bagi usaha penggantian paip-paip lama, buat masa ini penggantian dibuat pada skala kecil di kawasan yang kritikal mengikut kemampuan kewangan SAINS. Penggantian skala besar perlu mendapat kerjasama dari pihak pengurusan Aset Air Berhad (PAAB) dan juga FELDA.

Chembong, lantikan Timbalan *Speaker*, *insyaAllah* saya akan bincangkan dalam masa terdekat. Masalah kera, beruk, musim dan musuh tanaman, isu ni perlu diberi perhatian berkaitan musuh tanaman kera, beruk. Jabatan PERHILITAN sebagai pengimbang kepada kehendak manusia yang inginkan pembangunan dan kesejahteraan masyarakat serta keperluan hidupan liar untuk terus hidup, untuk terus hidup dan dipelihara. Kera merupakan salah satu spesies hidupan liar, menimbulkan konflik antara manusia dan, terutama di daerah-daerah yang mempunyai pembangunan yang kita pesat ya. Punca utama konflik manusia dan hidupan liar berlaku disebabkan persaingan mendapatkan makanan dan ruang untuk hidup.

Antara usaha kerajaan dan jabatan dalam mengatasi konflik spesies kera dan, di Negeri Sembilan adalah program bersepadu bersama Majlis Pengurusan Komuniti Kampung ya, dialog, taklimat, operasi basmi musuh tanaman. Matlamat program mengurangkan masalah, memastikan ancaman, gangguan hidupan liar kera, inisiatif sumbangan perangkap kera ya, daripada kerajaan, lepas tu siasatan pemasangan perangkap bagi aduan, gangguan kera, tapi masih tak selesai juga, penubuhan Jawatankuasa Teknikal Pengurusan Konflik Hidupan Liar Peringkat Negeri Sembilan ya, dan khidmat nasihat. Ini antara yang dapat dilakukan sekarang. Dan dulu kita ada isu babi hutan ya. Jadi,

sekarang tak ada bunyi dah. Dah tak ada kan? Sebab dia ada satu hari, sekali tu dia kena virus. Jadi dah nampak tak, tak, tak ada isu tersebut.

Mohon kaji teroka keperluan kewajaran jalan baru Kundur Hilir. JKR Negeri Sembilan mengambil maklum perkara tersebut dan akan semak dengan, di tapak. Akan dilaksanakan mengikut keperluan projek ini. Kita akan buat kajian.

ADUN Chuah, rizab kubur India telah memasuki tanah lot 20240 dan lot 20241, Mukim Jimah. Pejabat Daerah Tanah Port Dickson mencadangkan pengambilan tanah di bawah Seksyen 3(1)(a) Akta Pengambilan Tanah 1990 bagi kerja-kerja, kedua-dua terlibat dan telah mendapat nilai awal daripada Jabatan Penilaian Perkhidmatan Harta (JPPH) bagi, pada Mei 2021. Bagi pihak JPPH, setelah mengemukakan anggaran nilai awal pada 13 Ogos 2021 dan PTG mengemukakan anggaran nilai ini kepada YB Chuah pada 7 September 2021 ketika itu, bagi mendapatkan peruntukan pengambilan tanah. Walau bagaimanapun, tiada maklum balas diterima sehingga hari ini. Status terkini bagi pemohon pengambilan dibuat, dan tiada peruntukan pengambilan disediakan oleh Kerajaan Negeri.

Kalau ada yang, jadi saya, bagi pihak ya, bagi pihak kerajaan juga mencadangkan supaya ada pihak-pihak di kalangan masyarakat Cina ataupun India yang boleh mewakafkan, kalau orang Melayu dia wakaf untuk kubur, sebab kita orang Melayu tak ada dalam, tak kritikal isu tanah kubur ini, sebab kita ada perkataan "wakaf". Itu kampung-kampung dia wakafkan tanah, siapa ada tanah, dia wakafkan tanah dia, untuk kubur-kubur. Jadi itu yang orang Melayu ada tanah. Kita tak ada buat pengambilan tanah untuk kubur di Negeri Sembilan ini. Jadi, saya juga bercadangkan supaya masyarakat Cina dan masyarakat India supaya boleh ya, nak sebut nama apa, nak sedekah ke, wakaf ke, itu perkataan yang sama, yang kalau boleh masyarakat Cina juga boleh meniru masyarakat Islam, masyarakat India, untuk mewakafkan sebahagian tanah mereka untuk digunakan sebagai tapak-tapak kubur ataupun mereka berkongsi beli tapak-tapak baru yang mana sesuai untuk kemudahan perkuburan masyarakat Cina dan India. Itu saja Dato' Yang Dipertua. Terima kasih Dato' Yang Dipertua.

**YB Yang Dipertua Dewan:** Ahli-ahli Yang Berhormat sekalian, usul menjunjung kasih Titah Ucapan Diraja telah pun dicadang, disokong, dibahas dan telah pun dijawab oleh pihak kerajaan. Ahli-ahli Yang Berhormat, Yang Berhormat yang bersetuju dengan usul ini sila angkat tangan. Yang tidak bersetuju? Yang berkecuali? Usul ini diluluskan sebulat suara ya.

[Keputusan undian: semua 29 orang ahli Yang Berhormat yang hadir bersetuju. ADUN Repah, ADUN Chembong, ADUN Lukut, ADUN Lenggeng dan ADUN Gemenchek tiada di dalam Galeri Persidangan ketika undian dijalankan]

Kita akan bersambung pada pukul 2:30, sekarang ni Mesyuarat Dewan ditangguhkan.

**[Mesyuarat Dewan ditangguhkan pada jam 1.12 petang]**

---

**[mesyuarat disambung semula pada jam 2.35 petang]**

5. **RANG UNDANG-UNDANG**

**Rang Undang-Undang Perbekalan Tambahan 2023**

**Setiausaha Dewan:** Perkara kelima, Rang Undang-Undang. Dipersilakan Yang Amat Berhormat ADUN Sikamat.

**[Bacaan kali pertama]**

**YAB ADUN Sikamat:** Yang Berhormat Dato' Yang Dipertua, saya bangun mencadangkan supaya "Rang Undang-Undang bernama Satu Enakmen bagi menggunakan sejumlah wang daripada Kumpulan Wang Disatukan Negeri untuk perbelanjaan tambahan bagi perkhidmatan tahun 2023 dan bagi memperuntukkan jumlah wang itu bagi maksud yang tertentu bagi tahun itu" dibacakan bagi kali pertama.

**YB ADUN Pertang:** Yang Berhormat Dato' Yang Dipertua, saya bangun menyokong cadangan Yang Amat Berhormat Sikamat tadi, terima kasih.

**YB Yang Dipertua Dewan:** Ahli-ahli Yang Berhormat sekalian, Rang Undang-Undang ini dibacakan kali pertama.

**Setiausaha Dewan:** Satu Rang Undang-Undang bernama Satu Enakmen bagi menggunakan sejumlah wang daripada Kumpulan Wang Disatukan Negeri untuk perbelanjaan tambahan bagi perkhidmatan tahun 2023 dan bagi memperuntukkan jumlah wang itu bagi maksud yang tertentu bagi tahun itu.

**[Bacaan kali kedua]**

**YAB ADUN Sikamat:** Yang Berhormat Dato' Yang Dipertua, sebelum saya mencadangkan Rang Undang-Undang ini dibacakan bagi kali yang kedua, saya bangun memohon izin untuk membentangkan Rang Undang-Undang perbelan, Perbekalan Tambahan 2023. Rang Undang-Undang ini bertujuan untuk mengadakan peruntukan bagi mengeluarkan wang sebanyak 8,960,000.00 ringgit dari Kumpulan Wang Disatukan Negeri.

Yang Berhormat Dato' Yang Dipertua, *alhamdulillah*, syukur ke hadrat Ilahi kerana dengan limpah kurniaNya kita diberi peluang untuk berkumpul di Dewan yang mulia ini. Untuk makluman Yang Berhormat Dato' Yang Dipertua, penutup tahun 2022 menyaksikan Kerajaan Negeri berjaya mencapai *surplus* ataupun lebih sebenar sebanyak 30.98 juta berbanding anggaran defisit sebanyak 88.0 juta dalam, dalam Belanjawan Tahun 2022.

Lebih sebenar tersebut berjaya dicapai apabila kutipan hasil tahun 2022 telah dengan izin, *significantly exceed target* berjumlah 521.22 juta atau 120.65% berbanding sasaran hasil sebanyak 432 juta ringgit. Kutipan hasil 2022 tersebut merupakan antara rekod terbaik dalam sejarah Negeri Sembilan. Antara penyumbang utama peningkatan kutipan hasil tahun 2022 adalah Cukai Tanah Semasa dan Tunggakan sebanyak 148.06 juta, diikuti dengan bayaran Premium Tanah sebanyak 142.26 juta dan Permit Tanah Dan Galian sebanyak 33.92 juta.

Dengan tema "Melunas Janji, Menggalas Harapan", Kerajaan Negeri telah menyediakan Belanjawan Tahun 2023 dengan anggaran kutipan hasil sebanyak 450 juta, manakala Anggaran Belanja Mengurus sebanyak 550 juta termasuk Anggaran Belanja Pembangunan sebanyak 130 juta. Fokus Belanjawan 2023 adalah melaksanakan inisiatif-inisiatif yang diyakini dapat mengimbangkan di antara keperluan sara hidup dan pengukuhan ekonomi supaya terus berdaya tahan.

Walaupun demikian, terdapat keperluan untuk menyelaras semula keperluan Belanjawan Tahun 2023, dan dengan ini saya mohon izin untuk membentangkan Anggaran Perbelanjaan Mengurus Tambahan 2023 sebanyak 8,960,000.00 ringgit Malaysia.

Yang Berhormat Dato' Yang Dipertua, peruntukan tambahan ini melibatkan pelbagai faktor seperti perubahan dasar polisi kerajaan, penumpuan kepada cadangan Ketua Audit Negara serta impak peningkatan kos sara hidup. Tambahan ini adalah untuk menampung kekurangan peruntukan akibat Kenaikan Gaji Tahunan (KGT) Tambahan Khas, Bantuan Khas Kewangan (BKK) dan Bantuan Khas Kewangan

(BKK) Aidilfitri 2023 serta bayaran balik hutang kepada Kerajaan Persekutuan.

Untuk itu, Kerajaan Negeri bersetuju membuat tambahan peruntukan berjumlah 8,960,000.00 ringgit bersamaan dengan 1.63% daripada peruntukan asal Belanjawan Tahun 2023 berjumlah 550 juta. Peruntukan tambahan ini akan menjadikan peruntukan keseluruhan tahun 2023 meningkat kepada 558.96 juta dengan anggaran defisit sebanyak 108.96 juta.

Yang Berhormat Dato' Yang Dipertua, sebanyak 2 Vot Tanggungan iaitu T01 yakni Peruntukan Diraja akan ditambah sebanyak 88,000.00 manakala T04 – Bayaran Hutang Kerajaan ditambah peruntukan sebanyak 550,000.00 ringgit menjadikan keseluruhan berjumlah 638,000.00 ringgit. Tambahan pada T04 adalah selaras dengan penekanan khas berkaitan kepentingan untuk membayar hutang Persekutuan oleh Ketua Audit Negara.

Sebanyak 17 Vot Bekalan melibatkan jabatan-jabatan akan ditambah peruntukan dalam jumlah keseluruhan sebanyak 8.322 juta yang merangkumi peruntukan pertama, Emolumen sebanyak 6,256,000.00 ringgit; kedua: Bekalan dan Perkhidmatan sebanyak 1,346,000.00 ringgit; ketiga: Pemberian dan Kenaan Bayaran Tetap sebanyak 720,000.00 ringgit.

Yang Berhormat Dato' Yang Dipertua, di bawah butiran Emolumen, peruntukan tambahan diperlukan untuk penyelarasan bayaran Kenaikan Gaji Tahunan serta Kenaikan Gaji Tahunan (KGT) Tambahan Khas Kepada Pegawai Perkhidmatan Awam sebanyak 100.00 ringgit sebulan untuk penjawat awam lantikan negeri. Ia selaras dengan pemanjangan Pekeliling Perkhidmatan Bilangan 2 Tahun 2022 – Pemberian Kenaikan Gaji Tahunan (KGT) Tambahan Khas Kepada Pegawai Perkhidmatan Awam Persekutuan Dalam Kumpulan Pelaksana Dan Kumpulan Pengurusan Dan Profesional Bagi Tahun 2023 dengan anggaran implikasi kewangan sebanyak 4.8 juta ringgit.

Seterusnya, tambahan peruntukan diperlukan bagi penyelarasan bayaran Bantuan Khas Kewangan (BKK) sebanyak satu setengah bulan gaji yang telah diumumkan semasa pembentangan Belanjawan Tahun 2023 pada 25 November 2022 yang lalu, serta Bantuan Khas Kewangan Aidilfitri 2023 sebanyak 1,000.00 ringgit seorang. Bantuan Khas Kewangan ini adalah manifestasi penghargaan Kerajaan Negeri kepada penjawat awam Kerajaan Negeri Sembilan di atas pencapaian kutipan hasil tahun 2022. Kerajaan Negeri juga prihatin dalam usaha meringankan beban kos sara hidup yang dialami oleh penjawat awam.

Yang Berhormat Dato' Yang Dipertua, bagi butiran Bekalan dan Perkhidmatan, peruntukan sebanyak 1,346,000.00 ringgit diperlukan bagi menampung bayaran bil elektrik lampu jalan negeri yang bertambah sebanyak 2,475 kepada 16,346 serta kesan pelarasan tarif elektrik lampu jalan mulai bulan Januari 2023 susulan pelaksanaan dengan izin, *Imbalance Cost Pass-Through* (ICPT) sebanyak 846,000.00 di bawah Vot B11 – Jabatan Kerja Raya Negeri.

Selain itu, peruntukan sebanyak 500,000.00 ringgit ditambah kepada Vot B10 – Pejabat Duli Yang Maha Mulia, Duli Yang Maha Mulia bagi menampung kos-kos penyelenggaraan dan perubatan.

Bagi butiran Pemberian dan Kenaan Bayaran Tetap, peruntukan tambahan berjumlah 720,000.00 ringgit disediakan untuk perbelanjaan Anggota Pentadbiran di bawah Vot B02 – Dewan Undangan Negeri sebanyak 500,000.00 ringgit selaras dengan Enakmen Anggota Pentadbiran Dan Ahli Dewan Undangan Negeri (Saraan) 1980.

Tambahan sebanyak 220,000.00 juga disediakan untuk Vot B13 – Jabatan Kebajikan Masyarakat bagi menampung Bayaran Bantuan Am melalui pelarasan senarai kelayakan penerima bantuan. Secara purata, Kerajaan Negeri memperuntukkan di antara 14.38 juta hingga 16.13 juta setahun bagi tahun 2018 bagi bayaran Bantuan Am. Bermula tahun 2020, Kerajaan Negeri telah menaikkan kadar bantuan di antara 50.00 hingga 60.00 ringgit yang menjadikan jumlah bantuan bulanan meningkat di antara 250.00 hingga 320.00 ringgit.

Yang Berhormat Dato' Yang Dipertua, sehingga 30 September 2023, prestasi perbelanjaan Pembangunan adalah sebanyak 64.24 juta ataupun 49.41% berbanding Anggaran Belanja Pembangunan Tahun 2023 berjumlah 130 juta. Berdasarkan prestasi belanja membangun tersebut, pembangunan tersebut, saya telah meluluskan sekatan perbelanjaan sebanyak 6.125 juta ringgit di beberapa vot Pembangunan, hasil. Hasil sekatan berkenaan, Kerajaan Negeri bersetuju untuk menambah peruntukan sebanyak 1.5 juta kepada Vot P51 – Jabatan Pertanian Negeri bagi menyelesaikan pembayaran kemajuan siap kerja projek Kompleks Teknologi Pertanian Ulu Sepri, Rembau dan seterusnya menjadikan siling P51 tahun 2023 meningkat daripada 11.350 juta kepada 12.850 juta.

Selain itu, tambahan sebanyak 700,000.00 kepada Vot P59 – Bangunan Kerajaan Negeri bagi bayaran kemajuan siap kerja 2 projek iaitu Pembinaan Bangunan Baharu Mahkamah Syariah Jempol dan Kerja-kerja Mengubahsuai Ruang Kerja / Pejabat Badan Kawal Selia Air Negeri

Sembilan (BKSA) Di Pusat Perniagaan Paroi. Pertambahan ini akan meningkatkan siling Vot P59 daripada 15.650 juta kepada 16.350 juta.

Walau bagaimanapun, tambahan peruntukan kepada 2 vot Pembangunan berkenaan tidak akan meningkatkan Anggaran Belanja Pembangunan 2023 yang diluluskan sebanyak 130 juta. Ini kerana tambahan tersebut dibiayai melalui penjimatan atau sekatan yang telah dilakukan.

Yang Berhormat Dato' Yang Dipertua, sekian penerangan saya dan dengan ini saya mencadangkan agar Rang Undang-Undang Perbekalan Tambahan Tahun 2023 dibacakan untuk kali pertama. Sekian, terima kasih.

**YB ADUN Pertang:** Yang Berhormat Dato' Yang Dipertua, saya bangun menyokong cadangan itu, terima kasih.

**YB Yang Dipertua Dewan:** Ahli-ahli Yang Berhormat sekalian, Rang Undang-Undang Perbekalan Tambahan Tahun 2023 telah dicadangkan untuk dibacakan buat kali yang kedua dan telah disokong. Oleh itu saya, seterusnya saya kemukakan untuk perbahasan pada dasarnya sahaja. Jadi untuk ini saya menjemput 2 apa, 4 pembahas. 2 daripada pihak pembangkang dan 2 daripada pihak kerajaan. Saya mulakan dengan pihak, Gemas ada cadang nak siapa-siapa, atau nak kemudian?

**YB ADUN Gemas:** Kami bagi laluan kepada, kami masih baru.

**YB Yang Dipertua Dewan:** Johol nak berucap?

**YB ADUN Johol:** *Assalamualaikum WBT.* Yang Berhormat Dato' Yang Dipertua, Yang Amat Berhormat Sikamat, Yang Berhormat Exco Kanan; Pertang. Di kesempatan ini saya ingin mengambil sedikit berkaitan dengan isu perbahasan anggaran perbelanjaan tambahan mengurus tahun 2023. Bagi pihak kami, kami menyambut baik apa yang telah dibentangkan oleh Sikamat sebentar tadi, yang berkaitan dengan anggaran ataupun tambahan Anggaran Perbelanjaan Mengurus Tahun 2023 seperti yang telah diedarkan kepada kami. Rata-rata apa yang kami tengok, lihat apa yang telah dinyatakan ialah berkaitan dengan lebih kepada agensi-agensi Kerajaan Negeri dan juga mahupun Persekutuan dan jugak perkara-perkara yang berkaitan dan sebenarnya ini lebih kepada pengurusan Kerajaan Negeri sendiri pada tahun 2023.

Sukacita saya sedikit nak bertanyakan jugaklah, berkaitan dengan rang undang, Rang Undang-Undang ini dan jugak anggaran tambahan perbelanjaan mengurus ini. Sepertimana yang kita sedia maklum ya,

sekarang ini kita dah berada dalam satu situasi sepertimana yang kita bahaskan tempoh hari, daripada hari kedua sehingga semalam, yang berkaitan dengan Kerajaan Perpaduan kita ya. Jadi apa yang saya lihat, kita akan, keterlibatan ADUN-ADUN di kawasan, ADUN kerajaan ialah berkaitan dengan pelantikan JPKK iaitu Jawatankuasa Pembangunan Kemajuan Kampung, dan jugak Jawatankuasa Kemajuan Rancangan ya.

Jadi, saya ingin bertanya, adakah pihak negeri telah mengambil kira tambahan anggaran perbelanjaan mengurus ini sejajar dengan adanya pelantikan-pelantikan yang telah kita putuskan untuk kampung-kampung ataupun kawasan-kawasan yang terlibat dengan JPKK termasuk kampung-kampung tradisional, Kampung Baru Cina ya, dan jugak kawasan-kawasan felda iaitu JKKR. Jadi saya mohon penjelasan ataupun jika ada keperluan pihak Kerajaan Negeri berkaitan dengan anggaran perbelanjaan mengurus yang melibatkan perkara yang saya bangkitkan tadi. Sekian, terima kasih Dato' Yang Dipertua.

**YB Yang Dipertua Dewan:** Dijemput lagi. ADUN yang bersedia untuk berbahas? Untuk itu, seorang jelah. Seri Menanti? Klawang.

**YB ADUN Klawang:** Terima kasih yang, Dato' Yang Dipertua. *Alhamdulillah* ya, walaupun kita merancang defisit, tetapi kita dah dilimpahi rezeki daripada Allah SWT *surplus* dan hanya kita nak menggunakan tak sampai beberapa peratus ini, daripada *surplus* yang akan kita gunakan itu, saya kira ianya adalah satu keperluan ya, yang perlu kita pertimbangkan bersama dan perlu kita sokong untuk kelancaran pengurusan perbelanjaan negeri. Saya tidak nampak sebarang tu, apa nama ni, kekangan di sana. Dan sudah tentulah, boleh kita semua bersetuju termasuk pihak pembangkang untuk kita menyokong. Sekian.

**YB Yang Dipertua Dewan:** Ahli-ahli Yang Berhormat sekalian, sesi perbahasan Rang Undang-Undang Perbekalan Tambahan Tahun 2023 telah pun selesai. Saya seterusnya mempersilakan pihak kerajaan untuk menjawab, ya.

**YAB ADUN Sikamat:** Terima kasih Dato' Yang Dipertua. Saya jawablah, tadi mintak Exco Kanan tadi nak jawab, saya kata saya jawablah sebab satu soalan je yang perlu dijawab. Okey, JPKK, JPKR, kampung tradisional, kampung baru dan ketua-ketua kampung yang kita sedia maklum akan tamat pada bulan Oktober ini. Dan pelantikan juga *isyaAllah* dalam bulan Oktober ini. Dan bajet itu adalah bajet yang telah di, disediakan ya. Memang telah ada sehingga bulan 12. Jadi, itu tak ada masalah dan tidak melibatkan bajet tambahan. Dan peruntukan itu masih mencukupi.

Dan untuk Klawang, saya ucapkan ribuan terima kasih kerana menyokong dan saya rasa, bajet ini hanyalah untuk pengurusan pentadbiran untuk perkara-perkara yang di luar, di luar maklumat kita sebab bajet oleh Kerajaan Persekutuan adalah pada tahun ini. Sepatutnya tahun lepas, kita telah ikut. Tapi ada tahun ini ada tambahan yang diumumkan oleh Perdana Menteri, jadi terpaksa kita *adjust* bajet tersebut pada kali ini. Jadi itu sahaja Dato' Yang Dipertua. Terima kasih.

**YB Yang Dipertua Dewan:** Sekarang saya mempersilakan Yang Amat Berhormat ADUN Sikamat untuk menggulung perbahasan. Tadi jawab soalan tadi ...

**YAB ADUN Sikamat:** Saya dah gulung dah tadi. Saya sekali lagi mengucapkan ribuan terima kasih kepada Dato' Yang Dipertua, dan semua Ahli Dewan Undangan Negeri yang memahami tujuan bajet tambahan ini dikemukakan ya, dan saya rasa keperluannya amat penting untuk kita memastikan bahawa Kerajaan Negeri akan mengikut peraturan yang telah ditetapkan. Di samping itu juga, kita memberi perhatian terhadap satu teguran audit iaitu bayaran, bayaran hutang kita kepada Kerajaan Persekutuan. Kita bayar secara agak minima, tetapi teguran tu mintak kita bayar lebih sikit, jadi kita telah lakukan ini. Jadi kita telah lakukan yang terbaik. Dan *insyaAllah*, sebenarnya kita bukan tak nak bayar, Kerajaan Persekutuan pun ada hutang dengan Kerajaan Negeri ya, yang belum di, dapat diselesaikan iaitu bayaran di Kem Gemas ya. Kalau itu dapat dibayar, kita juga akan ada pendapatan yang baik untuk kita pastikan pembangunan negeri dapat lebih bangun. Jadi, dia tak bayar kito, kito pun tahan sikitlah. Jadi kalau kita dapat duit tersebut, kita akan dapat bayaran yang banyak dan kerana itu, banyak kita, kita lakukan perbincangan bersama Kementerian Pertahanan, Kementerian Kewangan bagi memastikan bahawa kita boleh dapat duit tersebut pada masa terdekat ini *insyaAllah*. Jadi itu saja daripada saya, terima kasih Dato' Yang Dipertua. Saya terima kasih.

**YB Yang Dipertua Dewan:** Ahli-ahli Yang Berhormat sekalian, perbahasan Rang Undang-Undang Perbekalan Tambahan Tahun 2023 telah dijawab oleh pihak kerajaan. Ahli-ahli Yang Berhormat yang bersetuju Rang Undang-Undang ini dibacakan bagi kali kedua, sila angkat tangan. Yang berkecuali? Yang tidak bersetuju? Rang Undang-Undang ini dibacakan bagi kali kedua.

[Keputusan undian: semua 29 orang ahli Yang Berhormat yang hadir bersetuju. ADUN Nilai, ADUN Chembong, ADUN Temiang, ADUN Jeram Padang dan ADUN Lenggeng tiada di dalam Galeri Persidangan ketika undian dijalankan]

**Setiausaha Dewan:** Satu Rang Undang-Undang bernama Satu Enakmen bagi menggunakan sejumlah wang daripada Kumpulan Wang Disatukan Negeri untuk perbelanjaan tambahan bagi perkhidmatan tahun 2023 dan bagi memperuntukkan jumlah wang itu bagi maksud yang tertentu bagi tahun itu.

**YAB ADUN Sikamat:** Yang Berhormat Dato' Yang Dipertua, saya bangun mencadangkan supaya Dewan bersidang secara Jawatankuasa dan Rang Undang-Undang ini perditimbangkan sefasal demi sefasal.

**YB ADUN Pertang:** Yang Berhormat Dato' Yang Dipertua, saya bangun menyokong cadangan itu.

**YB Yang Dipertua Dewan:** Ahli-Ahli Yang Berhormat sekalian, yang bersetuju Dewan bersidang secara Jawatankuasa dan Rang Undang-Undang ini ditimbang sefasal demi sefasal, sila angkat tangan. Yang tidak setuju? Yang berkecuali? Dewan bersidang secara Jawatankuasa.

[Keputusan undian: semua 29 orang ahli Yang Berhormat yang hadir bersetuju. ADUN Nilai, ADUN Chembong, ADUN Temiang, ADUN Jeram Padang dan ADUN Lenggeng tiada di dalam Galeri Persidangan ketika undian dijalankan]

**[Cokmar Diturunkan]**

**[Dewan Bersidang Secara Jawatankuasa]**

**Setiausaha Dewan:** Fasal 1.

**YB Pengerusi:** Ahli-ahli Yang Berhormat sekalian, ada apa-apa bantahan? Jika tiada, Fasal 1 adalah menjadi sebahagian daripada Rang Undang-Undang.

**Setiausaha:** Fasal 2.

**YB Pengerusi:** Ahli-ahli Yang Berhormat sekalian, ada apa-apa bantahan? Jika tiada, Fasal 2 adalah menjadi sebahagian daripada Rang Undang-Undang.

**Setiausaha:** Jadual.

**YB Pengerusi:** Ahli-ahli Yang Berhormat sekalian, ada apa-apa bantahan? Jika tiada, Jadual adalah menjadi sebahagian daripada Rang Undang-Undang.

**YAB ADUN Sikamat:** Yang Berhormat Dato' yang, Pengerusi, saya mohon mencadangkan supaya Rang Undang-Undang dikemukakan kepada Dewan.

**YB ADUN Pertang:** Yang Berhormat Dato' Pengerusi, saya bangun menyokong cadangan itu.

**YB Pengerusi:** Ahli-ahli Yang Berhormat sekalian, Rang Undang-Undang ini dimaklumkan kepada Dewan sekarang. Ahli-ahli Yang Berhormat yang bersetuju sila angkat tangan. Yang tidak setuju? Yang berkecuali? Sidang, Dewan bersidang semula.

[Keputusan undian: semua 30 orang ahli Yang Berhormat yang hadir bersetuju. ADUN Chembong, ADUN Temiang, ADUN Jeram Padang dan ADUN Lenggeng tiada di dalam Galeri Persidangan ketika undian dijalankan]

**[Cokmar Dinaikkan]**

**[Dewan Bersidang Semula]**

**[Bacaan kali ketiga]**

**YAB ADUN Sikamat:** Yang Berhormat Dato' Yang Dipertua, saya bangun menyatakan bahawa Rang Undang-Undang Perbekalan Tambahan Tahun 2023 telah ditimbangkan sefasal demi sefasal dan telah dipersetujui tanpa pindaan. Oleh itu saya mencadangkan supaya Rang Undang-Undang ini dibacakan bagi kali ketiga dan diluluskan.

**YB ADUN Pertang:** Yang Berhormat Dato' Yang Dipertua, saya bangun menyokong cadangan itu.

**YB Yang Dipertua Dewan:** Ahli-ahli Yang Berhormat sekalian yang bersetuju Rang Undang-Undang ini dibacakan pada kali, bagi kali ketiga dan diluluskan sila angkat tangan. Yang berkecuali? Yang tidak setuju? Rang Undang-Undang ini akan dibacakan pada kali yang ketiga dan diluluskan.

[Keputusan undian: semua 30 orang ahli Yang Berhormat yang hadir bersetuju. ADUN Chembong, ADUN Temiang, ADUN Jeram Padang dan ADUN Lenggeng tiada di dalam Galeri Persidangan ketika undian dijalankan]

**Setiausaha Dewan:** Enakmen Perbekalan Tambahan Tahun 2023. Dikanunkan oleh Yang Maha Mulia dan Undang Yang Empat serta Tengku Besar Tampin dengan nasihat dan persetujuan Dewan Undangan Negeri.

## 6. PENANGGUHAN PERSIDANGAN

**Setiausaha Dewan:** Perkara keenam, Penangguhan Persidangan.

**YAB ADUN Sikamat:** Yang, Yang Berhormat Dato' Yang Dipertua, saya bangun mencadangkan supaya Persidangan Dewan Undangan Negeri ditangguhkan dengan ucapan berbanyak-banyak terima kasih kepada Yang Berhormat Dato' Yang Dipertua kerana telah berjaya menganda, mengendalikan Persidangan Dewan ini.

**YB ADUN Pertang:** Yang Berhormat Dato' Yang Dipertua, saya bangun dengan cadangan itu. Terima kasih. Menyokong cadangan penangguhan itu, terima kasih.

**YB Yang Dipertua Dewan:** Ahli-ahli Berhormat sekalian, cadangan untuk menangguhkan Persidangan Dewan telah pun dibuat dan mendapat sokongan. Sementara itu saya ada menerima satu permohonan daripada ahli Yang Berhormat untuk membuat Ucapan Penangguhan bagi sidang kali ini. Ahli Yang Berhormat dibenarkan untuk menyampaikan ucapan selama 10 minit sahaja. Saya persilakan Yang Berhormat ADUN Seri Menanti.

**YB ADUN Seri Menanti:** Saya tarik balik, Dato' Dipertua, terima kasih.

**YB Yang Dipertua Dewan:** Saya bukan satu lagi. Sebenarnya kita ada 2 permohonan. Satu daripada Chembong. Chembong tak dapat hadir petang ni kerana hal yang kecemasan, jadi. Diberi saya, Chembong dan Seri Menanti-lah. Jadi saya nak, tak ada siapa nak sambut, okey, tak ada ya. Pihak kerajaan pun tak ada apa nak jawab kan? Ahli-ahli Yang Berhormat sekalian, sebelum saya tangguhkan persidangan kali ini, saya mengambil kesempatan ini untuk mengucapkan terima kasih dan setinggi-tinggi penghargaan kepada Yang Amat Berhormat, Yang Berhormat, ketua-ketua jabatan, media massa dan urus setia persidangan yang telah bersama-sama menjayakan persidangan kita pada kali ini.

Ahli-ahli Yang Berhormat sekalian, Persidangan Dewan ditangguhkan ke tarikh 1 Disember 2023. Sebagai makluman, Persidangan Ketiga

(Belanjawan) akan diadakan pada 1 haribulan, 4 hingga 7 dan 11 haribulan Disember 2023. Persidangan ditangguhkan.

**[Persidangan Dewan ditangguhkan pada jam 3.05 petang]**

HANSARD DUNNS